

Namo tassa bhagavato arahato sammāsambuddhassa

Aṅuttaranikāye

Pañcakanipāta-ṭikā

1. Paṭhamapaṇṇāsakaṃ

1. Sekhabalavaggo

1. Saṃkhittasuttavaṇṇanā

1. Pañcakanipātassa paṭhame kāmaṃ sampayuttadhammesu thirabhāvopi balaṭṭho eva, paṭipakkhehi pana akampanīyattaṃ sātisayaṃ balaṭṭhoti vuttaṃ – “**assaddhiye na kampatī**”ti.

Saṃkhittasuttavaṇṇanā niṭṭhitā.

2-6. Vitthatasuttādivaṇṇanā

2-6. Dutiye **hirīyatīti** lajjati virajjati. Yasmā hirī pāpajigucchanalakkhaṇā, tasmā “**jigucchatīti attho**”ti vuttaṃ. **Ottappatīti** utrasati. Pāputrāsallakkhaṇaṃhi ottappaṃ.

Paggahitavīriyoti saṅkocaṃ anāpannavīriyo. Tenāha “**anosakkitamānaso**”ti. **Pahānatthāyāti** samucchinnatthāya. Kusalānaṃ dhammānaṃ upasampadā nāma samadhigamo evāti āha “**paṭilābhatthāyā**”ti.

Gatiatthā dhātusaddā buddhiatthā hontīti āha “**udayañca vayañca paṭivijjhituṃ samatthāyā**”ti. Missakanayenāyaṃ desanā gatāti āha “**vikkhambhanavasena ca samucchavedavasena cā**”ti. Tenāha “**vipassanāpaṇṇāya ceva maggapaṇṇāya cā**”ti. Vipassanāpaṇṇāya vikkhambhanakiriyato sā ca kho padesikāti nippadesikaṃ katvā dassetuṃ “**maggapaṇṇāya paṭilābhasaṃvattanato**”ti vuttaṃ. Dukkakkhayagāminibhāvepi eseva nayo. **Sammāti** yāthāvato. Akuppadhammatāya hi maggapaṇṇāya khepitaṃ khepitameva, nāssa puna khepanakiccaṃ atthīti upāyena ñāyena sā pavattatīti āha “**hetunā nāyena**”ti. Tatiyādīsu natthi vattabbaṃ.

Vitthatasuttādivaṇṇanā niṭṭhitā.

7. Kāmasuttavaṇṇanā

7. Sattame asanti lūnanti tenāti **asitaṃ**, dāttaṃ. Vividhā ābhañjanti bhāraṃ olambenti tenāti **byābhaṅgī**, vidhaṃ. **Kulaputtoti** ettha duvidho kulaputto jātikulaputto, ācārakulaputto ca. Tattha “tena kho pana samayena raṭṭhapālo nāma kulaputto tasmīṃyeva thullakoṭṭhike aggakulīkassa putto”ti (ma. ni. 2.294) evaṃ āgato uccakulappasuto **jātikulaputto** nāma. “Ye te kulaputtā saddhā agārasmā anagāriyaṃ pabbajitā”ti (ma. ni. 1.34) evaṃ āgatā pana yattha katthaci kule pasutāpi ācārasampannā **ācārakulaputto** nāma. Idha pana ācārakulaputto adhippeto. Tenāha “**kulaputtoti ācārakulaputto**”ti. **Yuttanti** anucchavikaṃ, evaṃ vattabbaṃ arahatīti attho. Sesametha uttānameva.

Kāmasuttavaṇṇanā niṭṭhitā.

8. Cavanasuttavaṇṇanā

8. Aṭṭhame **saddhāyāti** iminā adhigamasaddhā dassitā. Catubbidhā hi saddhā – āgamanīyasaddhā, adhigamasaddhā, pasādasaddhā, okappanasaddhāti. Tattha **āgamanīyasaddhā** sabbaññubodhisattānaṃ pavattā hoti. Āgamanīyappaṭipadāya āgatā hi saddhā sātisayā mahābodhisattānaṃ paropadesena vinā saddheyyavattum aviparītato gahetvā adhimuccanato. Saccappaṭivedhato āgatasaddhā **adhigamasaddhā** suppabuddhādīnaṃ viya. “Sammāsambuddho bhagavā” tiādīnā buddhādīsu uppajjanakappasādo **pasādasaddhā** mahākappinarājādīnaṃ viya. “Evameta” nti okkanditvā pakkhanditvā saddahanavasena kappanaṃ okappanaṃ, tadeva saddhāti **okappanasaddhā**. Tattha pasādasaddhā paraneyyarūpā hoti, savanamattenapi pasīdanato. Okappanasaddhā saddheyyaṃ vatthum ogāhitvā anupavisitvā “evameta” nti paccakkhaṃ karontī viya pavattati.

Cavanasuttavaṇṇanā niṭṭhitā.

9. Paṭhamaagāravasuttavaṇṇanā

9. Navame **appatissayoti** appatissavo va-kārassa ya-kāraṃ katvā niddeso. Garunā kismiñci vutto gāravavasena patissavanaṃ, patissavo, patissavabhūtaṃ, taṃsabhāvañca yaṃ kiñci gāraṃ. Natthi etasmim patissavoti **appatissavo**, gāravavirahito. Tenāha “**ajeṭṭhako anīcavutti**” ti.

Paṭhamaagāravasuttavaṇṇanā niṭṭhitā.

10. Dutiyaagāravasuttavaṇṇanā

10. Dasame **vuddhintiādīsu sīlena vuddhiṃ**, maggena **virūḷhiṃ**, nibbānena **vepullaṃ**. Sīlasamādhīhi vā **vuddhiṃ**, vipassanāmaggehi **virūḷhiṃ**, phalanibbānehi **vepullaṃ**. Ettha ca yassa catubbidhaṃ sīlaṃ akhaṇḍādibhāvappavattiyā suparisuddhaṃ visesabhāgiyattā appakasireneva maggaphalāvahaṃ saṅgharakkhitattherassa viya, so tādīsena sīlena imasmim dhammavinaye vuddhiṃ āpajjissati. Tena vuttaṃ – “sīlena vuddhi” nti. Yassa pana ariyamaggo uppanno, so virūḷhamūlo viya pādapo suppatiṭṭhitattā sāsane virūḷhiṃ āpanno nāma hoti. Tena vuttaṃ – “maggena virūḷhi” nti. Yo sabbakilesanibbānappatto, so arahā sīlādiddhamakkhandhapāriyā sati vepullappatto hoti. Tena vuttaṃ “nibbānena vepulla” nti. Dutiyavikappe attho vuttanayānusārena vedītabbo.

Dutiyaagāravasuttavaṇṇanā niṭṭhitā.

Sekhabalavaggavaṇṇanā niṭṭhitā.

2. Balavaggo

1. Ananussutasuttavaṇṇanā

11. Dutiyassa paṭhame **abhijānitvāti** abhivisiṭṭhena ñāṇena jānitvā. **Aṭṭhahi kāraṇehi tathāgatassāti** “tathā āgatoti tathāgato. Tathā gatoti tathāgato. Tathalakkaṇaṃ āgatoti tathāgato. Tathadhamme yāthāvato abhisambuddhoti tathāgato. Tathadassitāya tathāgato. Tathāvāditāya tathāgato. Tathākāritāya tathāgato. Abhibhavanaṭṭhena tathāgato” ti evaṃ vuttehi aṭṭhahi kāraṇehi. Usabhassa idanti **āsabhaṃ**, seṭṭhaṭṭhānaṃ. Tenāha “**āsabhaṃ ṭṭhānanti seṭṭhaṭṭhāna**” nti. Parato dassitabalayogena “dasabaloha” nti **abhītanādaṃ nadati**. **Brahmacakkanti** ettha seṭṭhapariyāyo. **Brahmasaddoti** āha “**seṭṭhacakka**” nti. Cakkañcetaṃ dhammacakkaṃ adhippettaṃ.

Ananussutasuttavaṇṇanā niṭṭhitā.

3. Saṃkhittasuttavaṇṇanā

13. Tatiye kāmaṃ sampayuttadhammesu thirabhāvopi balaṭṭho eva, paṭipakkhehi pana akampanīyattaṃ sātisayaṃ balaṭṭhoti vuttaṃ “**muṭṭhassacce na kampatī**”ti.

Saṃkhittasuttavaṇṇanā niṭṭhitā.

4. Vitthatasuttavaṇṇanā

14. Catutthe **satinepakkenā**ti satiyā nepakkena, tikkhavisadasūrabhāvenāti attho. Aṭṭhakathāyaṃ pana nepakkaṃ nāma paññāti adhippāyena “nepakkaṃ vuccati paññā”ti vuttaṃ. Evaṃ sati añño niddiṭṭho nāma hoti. **Satimā**ti ca iminā savisesā sati gahitāti paratopi “cirakatampi cirabhāsitaṃ saritā anussaritā”ti satikiccameva niddiṭṭhaṃ, na paññākkiccam, tasmā **satinepakkenā**ti satiyā nepakkabhāvenāti sakkā viññātum labbhateva. Paccayavisesavasena aññadhammanirapekkho satiyā balavabhāvo. Tathā hi ñāṇavippayuttacittenapi sajjhāyanaśammasanāni sambhavanti.

Cirakatampīti attanā vā parena vā kāyena cirakataṃ cetiyaṅgaṇavattādīmahāvattappaṭipattipūraṇaṃ. **Cirabhāsitaṃ**pi attanā vā parena vā vācāya cirabhāsitaṃ sakkaccaṃ uddisanauddisāpanadhammāsāraṇadhammadesanāupanisinnakaparikathānumodanīyādivasena pavattitaṃ vacīkammaṃ. **Saritā anussaritā**ti tasmīṃ kāyena cirakate kāyo nāma kāyaviññatti, cirabhāsitaṃ vācā nāma vacīviññatti, tadubhayampi rūpaṃ, taṃsamuṭṭhāpakā cittacetāsikā arūpaṃ. Iti ime rūpārūpadhammā evaṃ uppajjivā evaṃ niruddhāti saratī ceva anussarati ca, satisambojjhaṅgaṃ samuṭṭhāpetīti attho. Bojjhaṅgasamuṭṭhāpikā hi sati idha adhippetā. Tāya satiyā esa sakīṃ saraṇena saritā, punappunaṃ saraṇena anussaritāti veditabbā.

Vitthatasuttavaṇṇanā niṭṭhitā.

5-10. Daṭṭhabbasuttādivaṇṇanā

15-20. Pañcame **savisayasmimīyevā**ti attano attano visaye eva. **Lokiyalokuttaradhamme kathetunti** lokiyadhamme lokuttaradhamme ca tena tena pavattivisesena kathetum. **Catūsu sotāpattiyaṅgesūti** sappurisaśaṃsevo saddhammassavanaṃ yonisomanasikāro dhammānudhammapaṭipattīti imesu catūsu sotāpattimaggakāraṇesu. Kāmañca tesu satiādayopi dhammā icchitabbāva tehi vinā tesam asambhavato, tathāpi cettha saddhā visesato kiccakārīti veditabbā. Saddho eva hi sappurise payirupāsati, saddhammaṃ suṇāti, yoniso ca aniccādito manasi karoti, ariyamaggassa ca anudhammaṃ paṭipajjati, tasmā vuttaṃ “**ettha saddhābalaṃ daṭṭhabba**”nti. Iminā nayena sesabalesupi attho daṭṭhabbo.

Catūsu sammappadhānesūti catubbidhasammappadhānabhāvanāya. **Catūsu satipaṭṭhānesūti**ādisupi eseva nayo. Ettha ca sotāpattiyaṅgesu saddhā viya, sammappadhānabhāvanāya vīriyaṃ viya ca satipaṭṭhānabhāvanāya yasmā “vineyya loke abhiññādomanassa”nti (dī. ni. 2.373; ma. ni. 1.106) vacanato pubbhāge kiccato sati adhikā icchitabbā, evaṃ samādhikammikassa samādhī, “ariyasaccabhāvanā paññābhāvanā”ti katvā tattha paññā pubbhāge adhikā icchitabbāti pākāṭoyamattho. Adhigamakkhaṇe pana samādhipaññānaṃ viya sabbesampi balānaṃ saddhādīnaṃ samatāva icchitabbā. Tathā hi “ettha saddhābala”ntiādinā tattha tattha etthaggaṇaṃ kataṃ.

Idāni saddhādīnaṃ tattha tattha atirekakiccatam upamāya vibhāvetum “**yathā hī**”tiādi vuttaṃ. Tatridam upamā saṃsandanaṃ – rājapañcamasahāyā viya vimuttiparipācakāni pañca balāni. Nesam kīlanatthaṃ ekajjhaṃ vīthiotaraṇaṃ viya balānaṃ ekajjhaṃ vipassanāvīthiotaraṇaṃ, sahāyesu paṭhamādīnaṃ yathāsakaṃ geheva vicāraṇā viya saddhādīnaṃ sotāpattiyaṅgādīni patvā pubbaṅgamatā.

Sahāyesu itaresaṃ tattha tattha tuṅhībhāvo viya sesabalānaṃ tattha tattha tadanvayatā, tassa pubbaṅgamaṃ balassa kiccānugatā. Na hi tadā tesāṃ sasambhārapathavīdīsū āpādināṃ viya kiccaṃ pākaṃ hoti, saddhādīnaṃyeva pana kiccaṃ vibhūtaṃ hutvā tiṭṭhati puretaraṃ tathāpaccayehi cittasantānassa abhisāṅkhatattā. Ettha ca vipassanākammiṃssa bhāvanā viśesato paññuttarāti dassanattaṃ rājānaṃ nidassanaṃ katvā paññindriyaṃ vuttaṃ. Chaṭṭhādīni suviññeyyāni.

Daṭṭhabbasuttādivaṇṇanā niṭṭhitā.

Balavaggavaṇṇanā niṭṭhitā.

3. Pañcaṅgikavaggo

1-2. Paṭhamaagāravasuttādivaṇṇanā

21-22. Tatiyassa paṭhame **ābhisamācārikanti** abhisamācāre uttamasamācāre bhavaṃ. Kiṃ pana tanti āha “**vattavasena paññattasīla**”nti. Sesāṃ suviññeyyameva. Dutiye natthi vattabbaṃ.

Paṭhamaagāravasuttādivaṇṇanā niṭṭhitā.

3-4. Upakkilesasuttādivaṇṇanā

23-24. Tatiye **na ca pabhāvanti** na ca pabhāsammaṃ. **Pabhijjanasabhāvanti** tāpetvā tālakajjanapabhaṅguraṃ. **Avasesaṃ lohanti** vuttāvasesaṃ saṅgālohaṃ, vijātilohaṃ, pisācalohaṃ, kittimalohanti evaṃpabhedāṃ sabbampi lohaṃ. **Uppajjituṃ appadānenāti** ettha nanu lokiyakusalacittassapi suvisuddhassapi uppajjituṃ appadānena upakkilesatāti? Saccametāṃ, yasmiṃ pana santāne nīvaraṇāni laddhappatiṭṭhāni, tattha mahaggatakusalassapi asambhavo, pageva lokuttarakusalassa. Parittakusalaṃ pana yathāpaccayaṃ uppajjamānaṃ nīvaraṇehi upahate santāne uppattiyā aparisuddhaṃ hontaṃ upakkiliṭṭhaṃ nāma hoti aparisuddhadīpakapallikavaṭṭitelādisannissayo padīpo viya. Apica nippariyāyato uppajjituṃ appadānena tesāṃ upakkilesatāti dassento “**yadaggena hi**”tiādīmāha. Ārammaṇe vikkhittappavattivasena cuṇṇavicuṇṇatā veditabbā. Catutthe natthi vattabbaṃ.

Upakkilesasuttādivaṇṇanā niṭṭhitā.

5. Anuggahitasuttavaṇṇanā

25. Pañcame **sammādiṭṭhī vipassanāsammādiṭṭhī**tiādīnā aṅguttarabhāṅgānaṃ matena ayaṃ atthavaṇṇanā āradhā, majjhimabhāṅgānaṃ panettha aññathā atthaṃ vadanti. Vuttañhetā **majjhimaṭṭhakathāyaṃ** (ma. ni. aṭṭha. 1.452) –

“**Anuggahitā**”ti laddhūpakārā. **Sammādiṭṭhī** arahattamaggasammādiṭṭhī. Phalakkhaṇe nibbattā cetovimutti phalaṃ assāti **cetovimutti phalā**. Tadeva cetovimuttisaṅkhātāṃ phalaṃ ānisaṃso assāti **cetovimutti phalānisaṃsā**. Dutiyaṃ depi eseva nayo. Ettha catutthaphalapaññā **paññāvimutti** nāma, avasesā dhammā **cetovimutti**ti veditabbā. “**Sīlanuggahitā**”tiādīsū **sīlanti** catupārisuddhisīlaṃ. **Sutanti** sappāyadhammassavanaṃ. **Sākacchāti** kammaṭṭhāne khalanapakhalanacchedanakathā. **Samathoti** vipassanāpādikā aṭṭha samāpattiyo. **Vipassanāti** sattavidhā anupassanā. Catupārisuddhisīlāni pūrentassa, sappāyadhammassavanaṃ suṇantassa, kammaṭṭhāne khalanapakhalanaṃ chindantassa vipassanāpādikāsu aṭṭhasu samāpattīsū kammaṃ karontassa, sattavidhaṃ anupassanaṃ bhāventassa arahattamaggo uppajjivā phalaṃ deti.

“Yathā hi madhuraṃ ambapakkamaṃ paribhuñjitukāmo ambapotakassa samantā udakakoṭṭhakaṃ thiraṃ katvā bandhati, ghaṭaṃ gahetvā kālena kālaṃ udakaṃ āsiñcati, udakassa anikkhamaṇaṃ thiraṃ karoti. Yā hoti samīpe valli vā sukkhadaṇḍako vā kipillikapuṭo vā makkaṭakajālaṃ vā, taṃ apaneti, khañṭiṃ gahetvā kālena kālaṃ mūlāni parikhaṇati, evamassa appamattassa imāni pañca kāraṇāni karoto so ambo vaḍḍhitvā phalaṃ deti, evaṃ sampadamidaṃ veditabbaṃ. Rukkhaṃ samantato koṭṭhakabandhanaṃ viya hi sīlaṃ daṭṭhabbaṃ, kālena kālaṃ udakasiñcanaṃ viya dhammassavanaṃ, mariyādāya thirabhāvakaṇaṃ viya samatho, samīpe valliādīnaṃ haraṇaṃ viya kammaṭṭhāne khalanapakkhalanacchedanaṃ, kālena kālaṃ khañṭiṃ gahetvā mūlakhaṇaṃ viya sattanaṃ anupassanānaṃ bhāvanā, tehi pañcahi kāraṇehi anuggahitassa ambarukkhaṃ madhuraphaladānakālo viya imassa bhikkhuno imehi pañcahi dhammehi anuggahitāya sammādiṭṭhiyā arahattaphaladānaṃ veditabba’nti.

Ettha ca **laddhūpakārā**ti yathārahaṃ nissayādivasena laddhapaccayā. Vipassanāsammādiṭṭhiyā anuggahitabhāvena gahitattā maggasammādiṭṭhiṃ ca arahattamaggasammādiṭṭhi. Anantarassa hi vidhi paṭisedho vā, aggaphalasaṃdhimhi tapparikkhāradhammesuyeva ca kevalo cetopariyāyo niruḥhoti **sammādiṭṭhīti arahattamaggasammādiṭṭhi. Phalakkhaṇeti** anantaraṃ kālantare cāti duvidhepi phalakkhaṇe. Paṭippassaddhivasena sabbasaṃkilesehi cetovimuccati eṭṭhāyāti **cetovimutti**, aggaphalapaññaṃ ṭhapetvā avasesā phaladhammā. Tenāha “**cetovimutti phalaṃ assāti, cetovimuttisaṅkhātaṃ phalaṃ ānisaṃso**”ti. Sabbakilesehi cetaso vimuccanaṃsaṅkhātaṃ paṭippassambhanaṃsaṅkhātaṃ pahānaṃ phalaṃ ānisaṃso cāti yojanā. Idha cetovimuttisaddena pahānamattaṃ gahitaṃ, pubbe pahāyakkhadhammā. Aññathā phaladhammā eva ānisaṃsoti gayhamāne punavacanaṃ niratthakaṃ siyā. **Paññāvimmuttiphalaṇisaṃsāti** etthāpi evameva attho veditabbo. Sammāvācākamantājīvā sīlasabhāvattā visesato samādhissa upakārā, tathā sammāsaṅkappo jhānasabhāvattā. Tathā hi so “**appanā**”ti niddiṭṭho. Sammāsatisammāvāyāmā pana samādhipakkhiyā evāti āha “**avasesā dhammā cetovimuttīti veditabba**”ti.

Catupārisuddhisīlanti ariyamaggādhigamaṃ padaṭṭhānabhūtaṃ catupārisuddhisīlaṃ. **Sutā**disupi eseve nayo. Attano cittappavattīrocanaṃ saha kathaṃ saṃkathā, saṃkathāva **sākacchā**. Idha pana kammaṭṭhānapaṭibaddhāti āha “**kammaṭṭhāne...pe... kathā**”ti. Tassa kammaṭṭhānaṃ ekavāraṃ vidhiyā appaṭipajjanaṃ khalanaṃ, anekavāraṃ pakkhalanaṃ, tadubhayassa vicchedanī apanayanī kathā **khalanapakkhalanacchedanakathā. Pūrentassāti** vivaṭṭasannissitaṃ katvā pārentassa brūhentassa ca. **Suñantassāti** “yathāuggahitakammaṭṭhānaṃ phāṭiṃ gamissatī”ti evaṃ suñantassa. Teneva hi “**sappāyadhammassavana**”nti vuttaṃ. **Kammaṃ karontassāti** bhāvanānuyogakammaṃ karontassa. Pañcasupi ṭhānesu anta-saddo hetuatthajotano daṭṭhabbo. Evañhi “yathā hī”tiādīnā vuccamānā ambūpamā yujjeyya.

Udakakoṭṭhakanti jalāvāṭaṃ. **Thiraṃ katvā bandhatī**ti asithilaṃ daḷhaṃ nātimahantaṃ nātikhuddakaṃ katvā yojeti. **Thiraṃ karotī**ti udakasiñcanaṃ tato tato pavattitvā udakassa anikkhamaṇaṃ jalāvāṭapālīṃ thirataṃ karoti. **Sukkhadaṇḍakoti** tasseva ambagacchassa sukkhako sākhasīsako. **Kipillikapuṭoti** tambakipillikapuṭo. **Khañṭinti** kudālaṃ. **Koṭṭhakabandhanaṃ viya sīlaṃ** sammādiṭṭhiyā vaḍḍhanūpāyassa mūlabhāvato. **Udakasiñcanaṃ viya dhammassavanaṃ** bhāvanāya paribrūhanaṃ. **Mariyādāya thirabhāvakaṇaṃ viya samatho** yathāvuttāya bhāvanādiṭṭhānāya sīlamariyādāya daḷhībhāvāpādanato. Samāhitassa hi sīlaṃ thirataṃ hoti. **Samīpe valliādīnaṃ haraṇaṃ viya kammaṭṭhāne khalanapakkhalanacchedanaṃ** icchitabbabhāvanāya vibandhanāpanayanato. **Mūlakhaṇaṃ viya sattanaṃ anupassanānaṃ bhāvanā** tassā vibandhassa mūlabhūtānaṃ taṇhāmānadiṭṭhīnaṃ palikhaṇaṃ. Ettha ca yasmā supārisuddhasīlassa kammaṭṭhānaṃ anuyūñjantassa sappāyadhammassavanaṃ icchitabbaṃ, tato yathāsute atthe sākacchāsaṃpajjanaṃ, tato kammaṭṭhānavisodhanaṃ samathanibbatti, tato samāhitassa āradhaviṭṭhassa vipassanāpāripūri, paripuññā vipassanā maggasammādiṭṭhiṃ brūhetīti evametesāṃ aṅgānaṃ paramparāya sammukhā anuggaṇhanaṃ ayamānupubbī kathitāti veditabbaṃ.

Anuggahitasuttavaṇṇanā niṭṭhitā.

6. Vimuttāyatanasuttavaṇṇanā

26. Chaṭṭhe vimuttiyā vaṭṭadukkhato vimuccanassa āyatanāni kāraṇāni **vimuttāyatanānīti** āha – **“vimuccanakāraṇāni”**ti. **Pāliattham jānantassāti** “idha sīlaṃ āgataṃ, idha samādhi, idha paññā”tiādinaṃ taṃtampāliattham yāthāvato jānantassa. **Pāliṃ jānantassāti** tadatthabodhiniṃ pāliṃ yāthāvato upadhārentassa. **Taruṇapīṭi** sañjātamattā mudukā pīti jāyati. Kathaṃ jāyati? Yathādesitaṃ dhammaṃ upadhārentassa tadanucchavikameva attano kāyavācāmanosamācāraṃ pariggaṇhantassa somanassaṃ pattassa pamodalakkhaṇaṃ pāmojjaṃ jāyati. **Tuṭṭhākārabhūtā balavapīṭi** purimuppannāya pītiyā vasena laddhāsevanattā ativiya tuṭṭhākārabhūtā kāyacittadarathassa passambhanasamatthāya passaddhiyā paccayo bhavituṃ samatthā balappattā pīti jāyati. Yasmā nāmakāye passaddhe rūpakāyopi passaddho eva hoti, tasmā “nāmakāyo passambhati”ceva vuttaṃ.

Sukhaṃ paṭilabhatīti vakkhamānassa cittasamādhānassa paccayo bhavituṃ samattham cetasiṃ nirāmisasukhaṃ paṭilabhati vindati. **Samādhiyāti** ettha pana na yo koci samādhi adhippeto, atha kho anuttarasamādhīti dassento **“arahatta...pe... samādhiyāti”**ti āha. **“Ayaṃ hī”**tiādi tassaṃ desanāyaṃ tādissa puggalassa yathāvuttasamādhipaṭilābhassa kāraṇabhāvavibhāvanam, yaṃ tathā vimuttāyatanabhāvo. **Osakkītunti** dassituṃ. **Samādhiyeva samādhinimittanti** kammaṭṭhānapāliyā āruḷho samādhi eva parato uppajjanakabhāvanāsamādhissa kāraṇabhāvato samādhinimittam. Tenāha **“ācariyassa santike”**tiādi.

Vimuttāyatanasuttavaṇṇanā niṭṭhitā.

7. Samādhisuttavaṇṇanā

27. Sattame sabbaso kilesadukkhadarathapariḷāhānaṃ vigatattā sātisayametta sukhanti vuttaṃ **“appitappitakkhaṇe sukhattā paccuppannasukho”**ti. Purimassa purimassa vasena pacchimaṃ pacchimaṃ laddhāsevanatāya santapaṇītarabhāvappattam hotīti āha **“purimo...pe... sukhavipāko”**ti. **Kilesappaṭippassaddhiyāti** kilesānaṃ paṭippassambhanena laddhattā. **“Kilesappaṭippassaddhibhāvanti** kilesānaṃ paṭippassambhanabhāvaṃ. **Laddhattā** pattattā tabbhāvaṃ upagattā. Lokiyasamādhissa paccanīkāni nīvaraṇapaṭhamajjhānanikantiādīni niggahetabbāni, aññe kilesā vāretabbā. Imassa pana arahattasamādhissa paṭippassaddhasabbakilesattā na niggahetabbam vāretabbāca atthīti maggānantaraṃ samāpattikkhaṇe ca appayogena adhigatattā appitattā ca aparīhānivasena vā appitattā **na sasaṅkhāraniggayhavāritagato. Sativepullappattattāti** etena appavattamānāyapi satiyā satibahulatāya sato eva nāmāti dasseti. **Yathāparicchinnakālavasenāti** etena paricchinnassatiyā satoti dasseti. **Sesesūti** ñāṇesu.

Samādhisuttavaṇṇanā niṭṭhitā.

8-9. Pañcaṅgikasuttādivaṇṇanā

28-29. Aṭṭhame karo vuccati pupphasambhavaṃ “gabbhāsaye kiriyatī”ti katvā. Karato jāto kāyo **karajakāyo**, tadupanissayo catusantatirūpasamudāyo. Kāmaṃ nāmakāyopi vivekajena pītisukhena tathā laddhūpakāro, “abhisandeti”tiādivacanato pana rūpakāyo idha adhippetoti āha **“imaṃ karajakāya”**nti. **Abhisandeti**ti abhisandanam karoti. Tam pana abhisandanam jhānamayena pītisukhena karajakāyassa tintabhāvāpādanam sabbatthakameva lūkhabhāvāpanayananti āha **“temeti”**tiādi. Tayidaṃ abhisandanam atthato yathāvuttapītisukhasamuṭṭhānehi paṇītarūpehi kāyassa pariṭṭharaṇam daṭṭhabbam. **Parisandeti**tiādisupi eseva nayo. Sabbam etassa atthīti sabbāvā, tassa **sabbāvato**. Avayavāvayavisambandhe avayavini sāmivacananti avayavavisayo **sabba**-saddo, tasmā vuttaṃ **“sabbakoṭṭhāsavato”**ti. **Aphuṭam nāma na hoti** yattha yattha kammajarūpaṃ, tattha tattha

cittajarūpassa abhibyāpanato. Tenāha “**upādinna**kasantatī”tiādi.

Chekoti kusalo. Tam panassa kosallaṃ nahānīyacunṇānaṃ karaṇe piṇḍikaraṇe ca samatthatāvasena veditabbanti āha “**paṭibalo**”tiādi. **Kaṃsa**-saddo “mahatīyā kaṃsapāṭiyā”tiādīsu (ma. ni. 1.61) suvaṇṇe āgato. “Kaṃso upahato yathā”tiādīsu (dha. pa. 134) kittimalohe. Katthaci paṇṇattimatte “upakamso nāma rājāsi, mahākaṃsassa atrajo”tiādi (jā. aṭṭha. 4.10.164 ghaṭapaṇḍitajātakavaṇṇanā). Idha pana yattha katthaci loheti āha “**yena kenaci lohena katabhājane**”ti. **Snehānugatā**ti udakasinehena anuppavisanavasena gatā upagatā. **Snehaparetā**ti udakasinehena parito gatā samantato phuṭā. Tato eva **santarabāhirā phuṭā snehena**. Etena sabbaso udakena temitabhāvamāha. **Na ca pagghariṇī**ti etena tintassapi tassa ghanathaddhabhāvaṃ vadati. Tenāha “**na bindubindū**”tiādi.

Tāhi tāhi udakasirāhi ubbhijjatīti ubbhidaṃ, ubbhidaṃ udakaṃ etassāti **ubbidodako**. **Ubbhinnaudakoti** nadītīre khatakūpako viya ubbhijjanakaudako. **Uggacchanaudakoti** dhārāvasena uṭṭhahanaudako. Kasmā panettha ubbidodakova rahado gahito, na itaroti āha “**heṭṭhā uggacchanaudakañhi**”tiādi. **Dhārānipātabubbula**kehīti dhārānipātehi ca udakabubbulehi ca. “Phenaṇaṭalehi cā”ti vattabbaṃ, **sannisinna**meva aparikkhobhatāya niccalameva, suppasannaevāti adhippāyo. **Sesanti** “abhisandeti”tiādikaṃ.

Uppalānīti uppalagacchāni. **Setarattanī**lesūti uppalesu, setuppalarattuppalanīluppalesūti attho. **Yaṃ kiñci uppalam uppalameva** sāmāññaggahaṇato. **Satapattanti** ettha **sata**-saddo bahupariyāyo “satagghī”tiādīsu viya. Tena anekasatapattassapi saṅgaho siddho hoti. Loke pana rattaṃ padumaṃ, setaṃ puṇḍarikanti vuccati. Yāva aggā yāva ca mūlā udakena abhisandanādisambhavadassanattaṃ **udakānuggata**ggahaṇaṃ. Idha uppalādīni viya karajakāyo, udakaṃ viya tatiyajjhānasukhaṃ.

Yasmā **parisuddhena cetasā**ti catutthajjhānacittamāha, tañca rāgādiupakkilesamalāpagamato nirupakkilesaṃ nimmalaṃ, tasmā āha “**nirupakkilesatṭhena parisuddha**”nti. Yasmā pana pārisuddhiyā eva paccayavisesena pavattiviseso pariyodātā sudhantasuvaṇṇassa nighaṃsanena pabhassaratā viya, tasmā āha “**pabhassaratṭhena pariyodātaṃ veditabba**”nti. **Idanti** odātavacanaṃ. **Utupharaṇatthanti** utuno pharaṇadassanattaṃ. **Utupharaṇaṃ na hoti** sesanti adhippāyo. Tenāha “**tañkhaṇa ...pe... balavaṃ hoti**”ti. **Vatthaṃ viya karajakāyoti** yogino karajakāyo vatthaṃ viya daṭṭhabbo utupharaṇasadisena catutthajjhānasukhena pharitaḍḍattā. Purisassa sarīraṃ viya catutthajjhānaṃ daṭṭhabbaṃ utupharaṇatṭhāniyassa sukhasa nissayabhāvato. Tenāha “**tasmā**”tiādi. Tattha ca “**parisuddhena cetasā**”ti cetogahaṇena jhānasukhaṃ vuttanti daṭṭhabbaṃ. Tenāha “**utupharaṇaṃ viya catutthajjhānasukha**”nti. Nanu ca catutthajjhāne sukhameva natthīti? Saccam natthi, sātalakkhaṇasantasabhāvattā panettha upekkhā “sukha”nti adhippetā. Tena vuttaṃ **sammohavinodaniyaṃ** (vibha. aṭṭha. 232) “upekkhā pana santattā, sukhamicceva bhāsītā”ti.

Tassa tassa samādhissa sarūpadassanassa paccayattā paccavekkhaṇaññaṃ **paccavekkhaṇanimittaṃ**. **Samabharitoti** samapuṇṇo.

Maṇḍabhūmīti papāvaṇṇabhūmi. Yattha salilasiñcanena vināva sassāni ṭhitāni sampajjanti. Yuge yojetabbāni yoggāni, tesam ācariyo **yoggācariyo**. Tesam sikkhāpanato hatthiādayopi “yoggā”ti vuccantīti āha pāliyaṃ “assadammaśārathī”ti. **Yena yenā**ti catūsu maggesu yena yena maggena. **Yaṃ yaṃ gatinti** javasamajavādibhedāsu gatīsu yaṃ yaṃ gatiṃ. Navame natthi vattabbaṃ.

Pañcaṅgikasuttādivaṇṇanā niṭṭhitā.

10. Nāgitasuttavaṇṇanā

30. Dasame **uccāsaddamahāsaddā**ti uddham uggatattā ucco patthaṭo mahanto vinibbhijjivā gahetuṃ asakkuṇeyyo saddo etesanti uccāsaddamahāsaddā. Vacīghosopi hi bahūhi ekajjhaṃ pavattito

atthato saddato ca duravabodho kevalaṃ mahānigghoso eva hutvā sotapathamāgacchati. **Macchavilopeti** macchānaṃ vilumpitvā viya gahaṇe, macchānaṃ vā vilumpane. Kevaṭṭānañhi macchapacchiṭhapitaṭṭhāne mahājano sannipatitvā “idha aññaṃ ekaṃ macchaṃ dehi, ekaṃ macchaphālaṃ dehi”ti, “etassa te mahā dinno, mayhaṃ khuddako”ti evaṃ uccāsaddaṃ mahāsaddaṃ karonti. Macchaggahaṇatthaṃ jāle pakkhittepi tasmim̐ ṭhāne kevaṭṭā ceva aññe ca “paviṭṭho gahito”ti mahāsaddaṃ karonti. Taṃ sandhāyetaṃ vuttaṃ. **Asucisukhanti** kāyāsucisannissitattā kilesāsucisannissitattā ca asucisannissitasukhaṃ. **Nekhammasukhassāti** kāmato nikkhamantassa sukhasa. **Pavivekasukhassāti** gaṇasaṅgaṇikato kilesasaṅgaṇikato ca vigatassa sukhasa. **Upasamasukhassāti** rāgādivūpasamāvahassa sukhasa. **Sambodhasukhanti** maggasaṅkhātassa sambodhasa niṭṭhappattatthāya sukhaṃ. Sesam̐ suviññeyyameva.

Nāgitasuttavaṇṇanā niṭṭhitā.

Pañcaṅgikavaggavaṇṇanā niṭṭhitā.

4. Sumanavaggo

1. Sumanasuttavaṇṇanā

31. Catutthassa paṭhame **satakkakūti** satasikharo, anekakūṭoti attho. Idaṃ tassa mahāmeghabhāvadassanaṃ. So hi mahāvassaṃ vassati. Tenevāha – “**ito cito ca uṭṭhitena valāhakakūṭasatena samannāgatoti attho**”ti. **Dassanasampannoti** ettha dassanaṃ nāma sotāpattimaggo. So hi paṭhamam̐ nibbānadassanato “dassana”nti vuccati. Yadipe taṃ gotrabhu paṭhamataram̐ passati, disvā pana kattabbakiccassa kilesappahānassa akaraṇato na taṃ “dassana”nti vuccati. Avajjanaṭṭhāniyañhi taṃ ñāṇam̐. Maggassa nibbānārammaṇatāsāmañña cetaṃ vuttaṃ, na nibbānappaṭivijjanena, tasmā dhammacakkhuṃ punappunam̐ nibbattanena bhāvanam̐ appattam̐ dassanaṃ, dhammacakkhuñca pariññādikiccakaraṇena catusaccadhammadassanaṃ tadabhisamayoti natthettha gotrabhussa dassanabhāvāpatti. Sesamettha suviññeyyameva.

Sumanasuttavaṇṇanā niṭṭhitā.

2. Cundīsuttavaṇṇanā

32. Dutiye “ariyakantehi sīlehi samannāgato”tiādīsu (a. ni. 5.179) ariyakantānīti pañcasīlāni āgatāni. Ariyakantāni hi pañcasīlāni ariyānaṃ kantāni piyāni, bhavantaragatāpi ariyā tāni na vijahanti. Idha pana “yāvata, cunda, sīlāni ariyakantāni sīlāni, tesam̐ aggamakkhāyati...pe... agge te paripūrakārino”ti vuttattā maggaphalāni sīlāni adhippetānīti āha “**ariyakantāni sīlānīti maggaphalasampayuttāni sīlānī**”ti.

Cundīsuttavaṇṇanā niṭṭhitā.

3. Uggahasuttavaṇṇanā

33. Tatiye **sabbapaṭhamam̐ uṭṭhānasīlāti** rattiyā vibhāyanavelāya sāmike parijane seyyāya avuṭṭhite sabbapaṭhamam̐ uṭṭhānasīlā. Sāmikaṃ disvā nisinnāsanato aggidaḍḍhā viya paṭhamameva vuṭṭhahantīti vā **pubbuṭṭhāyiniyo**. **Kimkāranti** kimkaraṇīyam̐, kimkaraṇabhāvena pucchitvā kātabbaveyyāvaccanti attho. Taṃ paṭissuṇantā vicarantīti **kimkārappaṭissāviniyo**. Manāpaṃyeva kiriyam̐ karonti sīlenāti **manāpacāriniyo**. Piyameva vadanti sīlenāti **piyavādiniyo**.

Tatrupāyāyāti tatra kamme sādhetabbaupāyabhūtāya vīmaṃsāya. Tenāha “**tasmim̐**

uṇṇākappāsasaṃvidhāne’’tiādi. **Alaṃ kātunti** kātuṃ samatthā. **Alaṃ saṃvidhātunti** vicāretuṃ samatthā. Tenāha “**alaṃ kātuṃ alaṃ saṃvidhātunti attanā kātumpi parehi kārāpetumpi**”’’tiādi. Sesamettha suviññeyyameva.

Uggahasuttavaṇṇanā niṭṭhitā.

4-5. Sīhasenāpatisuttādivaṇṇanā

34-35. Catutthe **sandiṭṭhikanti** asaṃparāyikatāya sāmaṃ daṭṭhabbaṃ. Sayāṃ anubhavitabbaṃ attapaccakkhaṃ diṭṭhadhammikanti attho. **Na saddhāmattakeneva tiṭṭhatīti** “dānaṃ nāma sādhu sundaraṃ, buddhādīhi paṇḍitehi pasattha”’nti evaṃ saddhāmattakeneva na tiṭṭhati. **Yaṃ dānaṃ detīti** yaṃ deyyadhammaṃ parassa deti. **Tassa pati hutvāti** tabbisayaṃ lobhaṃ suṭṭhu abhibhavanto tassa adhipati hutvā deti. Tena anadhibhavanīyattā **na dāso na sahāyoti**. Tattha tadubhayaṃ anvayato byatirekato ca dassetuṃ “**yo hī**”’tiādi vuttaṃ. **Dāso hutvā deti** taṇhādāsabyassa upagatattā. **Sahāyo hutvā deti** tassa piyabhāvavissajjanato. **Sāmī hutvā deti** tattha taṇhādāsabyato attānaṃ mocetvā abhibhuyya pavattanato. Atha vā yo dānasīlatāya dāyako puggalo, so dāne pavattibhedena dānadāso, dānasahāyo, dānapatīti tippakāro hoti. Tadassa tippakāraṭaṃ vibhajivā dassetuṃ “**yo hī**”’tiādi vuttaṃ. Dātabbaṭṭhena **dānaṃ**, annapānādi.

Tattha yaṃ attanā paribhuñjati, taṇhādhipannatāya tassa vasena vattanato dāso viya hoti. Yaṃ pasesaṃ dīyati, tatthāpi annapānasāmaññena idaṃ vuttaṃ “**dānasaṅkhātassa deyyadhammassa dāso hutvā**”’ti. **Sahāyo hutvā deti** attanā paribhuñjitabbassa pasesaṃ dātabbassa ca samasamaṃ ṭhapanato. **Pati hutvā deti** sayāṃ deyyadhammassa vase avattivā tassa attano vase vattāpanato. Aparo nayo – yo attanā paṇītaṃ paribhuñjitvā pasesaṃ nihīnaṃ deti, so **dānadāso** nāma tannimittanihīnabhāvāpattito. Yo yādisaṃ attanā paribhuñjati, tādisameva pasesaṃ deti, so **dānasahāyo** nāma tannimittanihīnadhikabhāvavivajjanena sadisabhāvāpattito. Yo attanā nihīnaṃ paribhuñjitvā pasesaṃ paṇītaṃ deti, so **dānapati** nāma tannimittaseṭṭhabhāvāpattito.

Nittejabhūto tejahānippattiyā. Saha byati gacchatīti sahabyo, sahapavattanako, tassa bhāvo **sahabyatā**, sahapavattīti āha “**sahabhāvaṃ ekībhāvaṃ gatā**”’ti. **Asitassāti** vā abandhassa, taṇhābandhanena abandhassāti attho. Pañcamaṃ uttānameva.

Sīhasenāpatisuttādivaṇṇanā niṭṭhitā.

6-7. Kāladānasuttādivaṇṇanā

36-37. Chaṭṭhe **ārāmatoti** phalārāmato. **Paṭhamuppannānīti** sabbapaṭhamamaṃ sujātāni. **Bhāsitaññūti** bhikkhū gharadvāre ṭhitā kiñcāpi tuṇhī honti, atthato pana “bhikkhaṃ dethā”’ti vadanti nāma ariyāya yācanāya. Vuttañhetamaṃ “uddhissa ariyā tiṭṭhanti, esā ariyānaṃ yācanā”’ti. Tatra ye “mayāṃ pacāma, ime na pacanti, pacamāne patvā alabhanā kuhiṃ labhissanti”’ti deyyadhammaṃ saṃvibhajanti, te **bhāsitaññū** nāma ñatvā kattabbassa karaṇato. **Yuttappattakāleti** dātuṃ yuttappattakāle. **Appaṭivānacittoti** anivattanacitto. Sattamaṃ uttānameva.

Kāladānasuttādivaṇṇanā niṭṭhitā.

8. Saddhasuttavaṇṇanā

38. Aṭṭhame **anukampantīti** “sabbe sattā sukhī hontu averā abyāpajjā”’ti evaṃ hitapharaṇena anuggaṇhanti. Apica upaṭṭhākānaṃ geḥaṃ aññe sīlavante sabrahmacārino gahetvā pavisantāpi **anuggaṇhanti** nāma. **Nīcavuttinti** paṇipātasīlaṃ. **Kodhamānathaddhatāya rahitanti**

kodhamānavasena uppanno yo thaddhabhāvo cittassa uddhumātalakkhaṇo, tena virahitanti attho. **Soraccenāti** “tattha katamaṃ soraccaṃ? Yo kāyiko avītikkamo, vācasiko avītikkamo, kāyikavācasiko avītikkamo, idaṃ vuccati soraccaṃ. Sabbopi sīlasaṃvaro soracca”nti evamāgatena sīlasaṃvarasaṅkhātena soratabhāvena. **Sakhilanti** “tattha katamaṃ sākhalāyaṃ? Yā sā vācā thaddhakā kakkasā pharusā kaṭukā abhisajjani kodhasāmantā asamādhisaṃvattanikā, tathārūpiṃ vācaṃ pahāya yā sā vācā nelā kaṇṇasukhā pemaṇiyā hadayaṅgamā porī bahujanakantā bahujanamanāpā, tathārūpiṃ vācaṃ bhāsītā hoti. Yā tattha saṅhavācatā sakhilavācatā aphaṇṇasavācatā, idaṃ vuccati sākhalāya”nti (dha. sa. 1350) evaṃ vuttena sammodakamudubhāvena samannāgataṃ. Tenāha “**sakhilanti sammodaka**”nti.

Saddhasuttavaṇṇanā niṭṭhitā.

9-10. Puttasuttādivaṇṇanā

39-40. Navame **bhatoti** posito. Taṃ pana bharaṇaṃ jātakālato paṭṭhāya sukhapaccayūpaharaṇena dukkhapaccayūpaharaṇena ca pavattitanti dassetuṃ “**amhehi**”tiādi vuttaṃ. **Hatthapādavaḍḍhanādi** **ādi**-saddena mukhena siṅghānikāpanayananaḥāpanamaṇḍanādiṇca saṅgaṇhāti. Mātāpitūnaṃ santakaṃ khettādiṃ avināsetvā rakkhitaṃ tesam paramparāya ṭhitiyā kāraṇaṃ hotīti āha “**amhākaṃ santakaṃ...pe... kulavaṃso ciraṃ ṭhassati**”ti. **Salākabhaddādi** **anupacchinditvā**ti salākabhaddādi avicchinditvā. Yasmā dāyajjappaṭilābhassa yogyabhāvena vattamānoyeva dāyassa paṭipajjissati, na itaroti āha “**kulavaṃsānurūpāya paṭipattiyā**”tiādi. **Attanā dāyajjārahaṃ karontoti** attānaṃ dāyajjārahaṃ karonto. Mātāpitāro hi attano ovāde avattamāne micchāpaṭipanne dārake vinicchayaṃ gantvā aputte karonti, te dāyajjārahā na honti. Ovāde vattamāne pana kulasantakassa sāmike karonti. **Tatiyadivasato paṭṭhāyā**ti matadivasato tatiyadivasato paṭṭhāya. Sesam suviññeyyameva. Dasamaṃ uttānameva.

Puttasuttādivaṇṇanā niṭṭhitā.

Sumanavaggavaṇṇanā niṭṭhitā.

5. Muṇḍarājavaggo

1-2. Ādiyasuttādivaṇṇanā

41-42. Pañcamassa paṭhame **uṭṭhānavīriyādhigatehī**ti vā uṭṭhānena ca vīriyena ca adhigatehi. Tattha **uṭṭhānanti** kāyikaṃ vīriyaṃ. **Vīriyanti** cetasikanti vadanti. **Uṭṭhānanti** vā bhoguppādane yuttappayuttatā. **Vīriyaṃ** tajjo ussāho. **Piṇṭanti** dhātaṃ sutittaṃ. Tathābhūto pana yasmā thūlasarīro hoti, tasmā “**thūlaṃ karoti**”ti vuttaṃ. Dutiyaṃ uttānameva.

Ādiyasuttādivaṇṇanā niṭṭhitā.

3. Itṭhasuttavaṇṇanā

43. Tatiye **appamādaṃ pasamsantī**ti “etāni āyuādīni patthayantena appamādo kātabbo”ti appamādameva pasamsanti paṇḍitā. Yasmā vā puññakiriyaṃ paṇḍitā appamādaṃ pasamsanti, tasmā āyuādīni patthayantena appamādova kātabboti attho. Purimasmiṃ atthavikappe “puññakiriyaṃ”ti padassa “appamatto”ti iminā sambandho. Yasmā paṇḍitā appamādaṃ pasamsanti, yasmā ca puññakiriyaṃ appamatto ubho atthe adhigato hoti, tasmā āyuādīni patthayantena appamādova kātabbo. Dutiyasmiṃ atthavikappe paṇḍitā appamādaṃ pasamsanti. Katthāti? Puññakiriyaṃ. Kasmāti ce? Yasmā appamatto ubho atthe adhiggaṇhāti paṇḍito, tasmāti attho. **Atthappaṭilābhenāti**

diṭṭhadhammikādihitappaṭilābhena.

Iṭṭhasuttavaṇṇanā niṭṭhitā.

4. Manāpadāyīsuttavaṇṇanā

44. Catutthe jhānāmanena nibbattaṃ **manomayanti** āha “**suddhāvāsesu ekaṃ jhānāmanena nibbattaṃ devakāya**”nti. Satipi hi sabbasattānaṃ abhisāṅkhāramanasā nibbattabhāve bāhirapaccayehi vinā manasāva nibbattatā “**manomayā**”ti vuccanti rūpāvaccarasattā. Yadi evaṃ kāmabhāve opapātikasattānampi manomayabhāvo āpajjati ce? Na, tatha bāhirapaccayehi nibbattetabbatāsāṅkāya eva abhāvato “manasāva nibbattā”ti avadhāraṇāsambhavato. Niruḷho vāyaṃ loke manomayavohāro rūpāvaccarasattesu. Tathā hi “annamayo, pāṇamayo, manomayo, ānandamayo, viññānamayo”ti pañcadhā attānaṃ vedavādinopi vadanti. Uccedavādinopi vadanti “dibbo rūpī manomayo”ti (dī. ni. 1.87). **Tīsu vā kulasampattīsūti** brāhmaṇakhattiyavessasāṅkhātesu sampannakulesu. **Chasu vā kāmasaggesūti** chasu kāmāvaccaradevesu.

Manāpadāyīsuttavaṇṇanā niṭṭhitā.

5-6. Puññābhisandasuttādivaṇṇanā

45-46. Pañcame **asaṅkheyyoti** ālḥakagaṇanāya asaṅkheyyo. Yojanavasena panassa saṅkhā atthi heṭṭhā mahāpathaviyā upari ākāseṇa parisamantato cakkavāḷapabbatena majjhe tatha tatha ṭhitakehi dīpapabbatapariyantehi paricchinnatā jānantena yojanato saṅkhātuṃ sakkāti katvā. Mahāsarīramacchakumbhīlayakkharakkhasamahānāgadānavādīnaṃ saviññāṇakānaṃ balavāmukhapātālādīnaṃ aviññāṇakānaṃ bheravārammaṇānaṃ vasena **bahubheravaṃ**. **Puthūti** bahū. **Savantīti** sandamānā. **Upayantīti** upagacchanti. Chaṭṭhaṃ uttānameva.

Puññābhisandasuttādivaṇṇanā niṭṭhitā.

7-8. Dhanasuttādivaṇṇanā

47-48. Sattame **saddhāti** maggenāgatā saddhā. **Sīlaṅca yassa kalyāṇanti** kalyāṇasīlaṃ nāma ariyasāvakaṃ ariyakantaṃ sīlaṃ vuccati. Tatha kiñcāpi ariyasāvakaṃ ekasīlampi akantaṃ nāma natthi, imasmim paṇatthe bhavantarepi appahīnaṃ pañcasīlaṃ adhippetā. Aṭṭhamaṃ uttānameva.

Dhanasuttādivaṇṇanā niṭṭhitā.

9. Kosalasuttavaṇṇanā

49. Navame **patitakkhandhoti** sammukhā kiñci oloketuṃ asamattatāya adhomukho. **Nippaṭibhānoti** sahadhammikaṃ kiñci vattuṃ avisahanato nippaṭibhāno paṭibhānarahito.

Kosalasuttavaṇṇanā niṭṭhitā.

10. Nāradasuttavaṇṇanā

50. Dasame **ajjhomucchitoti** adhimattāya taṇhāmucchāya mucchito, mucchaṃ mohaṃ pamādaṃ āpanno. Tenāha “**gilitvā...pe... atirekamucchāya taṇhāya samannāgato**”ti. **Mahaccāti** mahatiyā. Liṅgavipallāseṇa cetāṃ vuttaṃ. Tenāha “**mahatā rājānubhāvenā**”ti.

Nāradasuttavaṇṇanā niṭṭhitā.

Muṇḍarājavaggavaṇṇanā niṭṭhitā.

Paṭhamapaṇṇāsakaṃ niṭṭhitam.

2. Dutiyapaṇṇāsakaṃ

(6) 1. Nīvaraṇavaggo

1-2. Āvaraṇasuttādivaṇṇanā

51-52. Dutiyassa paṭhame āvarantīti **āvaraṇā**, nīvārayantīti **nīvaraṇā**. Ettha ca **āvarantīti** kusalaḍḍhamuppattiṃ ādito parivārenti. **Nīvārayantīti** niravasesato vārayantīti attho, tasmā **āvaraṇavasenāti** ādito kusaluppattivāraṇavasena. **Nīvaraṇavasenāti** niravasesato vāraṇavasenāti evamettha attho daṭṭhabbo. Yasmā pañca nīvaraṇā uppajjamānā anuppannāya lokiya lokuttarāya paññāya uppajjitum na denti, uppannāpi aṭṭha samāpattiyo pañca vā abhiññā upacchinditvā pātentī, tasmā **“paññāya dubbalīkaraṇā”**ti vuccanti. Upacchindanaṃ pātanañcetta tāsam paññānaṃ anuppannānaṃ uppajjitum appadānameva. Iti mahaggaṭānuttarapaññānaṃ ekaccāya ca parittapaññāya anuppattihetubhūtā nīvaraṇadhammā itarāsaṃ samatthataṃ vihanantiyevāti paññāya dubbalīkaraṇā vuttā. Bhāvanāmanasikārena vinā pakatiyā manussehi nibbattetabbo dhammoti **manussadhammo**, manussatthabhāvāvaho vā dhammo **manussadhammo**, anuḷāraṃ parittakusalaṃ. Yaṃ asatipi buddhuppāde vattati, yañca sandhāyāha **“hīnena brahmacariyena, khattiye upapajjati”**ti (jā. 1.8.75). Alaṃ ariyāya ariyabhāvāyāti alamariyo, ariyabhāvāya samatthoti vuttaṃ hoti. Nāṇadassanameva nāṇadassanaviseso, alamariyo ca so nāṇadassanaviseso cāti **alamariyānāṇadassanaviseso**.

Nāṇadassananti ca dibbacakkhupi vipassanāpi maggopi phalampi paccavekkhaṇañāṇampi sabbaññutaññāṇampi vuccati. **“Appamatto samāno nāṇadassanaṃ ārādhetī”**ti (ma. ni. 1.311) hi ettha dibbacakkhu nāṇadassanaṃ nāma. **“Nāṇadassanāya cittaṃ abhinīharati abhininnāmetī”**ti (dī. ni. 1.234) ettha vipassanāññāṇam. **“Abhabbā te nāṇāya dassanāya anuttarāya sambodhāyā”**ti (a. ni. 4.196) ettha maggo. **“Ayamañño uttarimanussadhammā alamariyānāṇadassanaviseso adhigato phāsuvihāro”**ti (ma. ni. 1.328) ettha phalaṃ. **“Nāṇaṇca pana me dassanaṃ udapādi, akuppā me vimutti, ayamantimā jāti, natthi dāni punabbhavo”**ti (saṃ. ni. 5.1081; mahāva. 16; paṭi. ma. 2.30) ettha paccavekkhaṇañāṇam. **“Nāṇaṇca pana me dassanaṃ udapādi ‘sattāhakālakato ālāro kālāmo’”**ti (ma. ni. 1.284; 2.340) ettha sabbaññutaññāṇam. Idha pana lokuttaradhammo adhippeto. Ettha ca rūpāyatanam jānāti cakkhuvīññāṇam viya passati cāti **nāṇadassanaṃ**, dibbacakkhu. Sammasanūpacāre ca dhammalakkhaṇattayañca tathā jānāti passati cāti **nāṇadassanaṃ**, vipassanā. Nibbānaṃ cattāri vā saccāni asamhappaṭivedhato jānāti passati cāti **nāṇadassanaṃ**, maggo. Phalaṃ pana nibbānavaseneva yojetabbaṃ. Paccavekkhaṇā maggādhigatassa atthassa sabbaso jotanaṭṭhena **nāṇadassanaṃ**. Sabbaññutā anāvaraṇatāya samantacakkhutāya ca **nāṇadassanaṃ**. **Byādiṇṇakāloti** pariyaḍinnakālo. Dutiyam uttānameva.

Āvaraṇasuttādivaṇṇanā niṭṭhitā.

3-4. Padhāniyaṅgasuttādivaṇṇanā

53-54. Tatiye padahatīti padahano, bhāvanāmanuyutto yogī, tassa bhāvo bhāvanānuyogo **padahanabhāvo**. Padhānamassa atthīti padhāniko, ka-kārassa ya-kāraṃ katvā **“padhāniyo”**ti vuttaṃ. **“Abhinīhārato paṭṭhāya āgatattā”**ti vuttattā paccakabodhisattasāvakabodhisattānampi pañidhānato pabhuti āgatasaddhā **āgamanasaddā** eva, ukkaṭṭhaniddesena pana **“sabbaññubodhisattāna”**nti

vuttam. Adhigamato samudāgatattā aggamaggaphalasampayuttā cāpi **adhigamasaddhā nāma**, yā sotāpannessa āngabhāvena vuttā. **Acalabhāvenā**ti paṭipakkhena anadhībhavanīyattā niccalabhāvena. **Okappananti** okkandītvā adhimuccanam, pasāduppattiyā pasādanīyavattusmiṃ pasādanameva. **Suppaṭividdhanti** suṭṭhu paṭividdham. Yathā tena paṭividdhena sabbaññūtaññānam hatthagatam ahoṣi, tathā paṭividdham. Yassa buddhasubuddhatāya saddhā acalā asampavedhi, tassa dhammasudhammatāya saṅghasuppaṭipannatāya tena paṭivedhena saddhā na tathāti aṭṭhānametaṃ anavakāso. Tenāha bhagavā – “yo, bhikkhave, buddhe pasanno dhamme pasanno saṅghe pasanno”tiādi. **Padhānavīriyam ijjhati** “addhā imāya paṭipadāya jarāmarāṇato muccissāmī”ti sakkaccaṃ padahanato.

Appa-saddo abhāvatto “appasaddassa...pe... kho panā”tiādīsu viyāti āha “**arogo**”ti. **Samavepākinīyāti** yathābhuttamāhāraṃ samākāreneva pacanasīlāya. Daḷham katvā pacantī hi gahaṇī ghorabhāvena pīttavikārādivasena rogaṃ janeti, sīhilaṃ katvā pacantī mandabhāvena vātavikārādivasena tenāha “**nātisītāya nāccuṇhāyā**”ti. Gahaṇitejassa mandapaṭutāvasena sattānam yathākkamaṃ sītuṇhasahatāti āha “**atisītalaggahaṇiko**”tiādi. Yāthāvato accayadesanā attano āvikaraṇam nāmāti āha “**yathābhūtam attano aguṇam pakāsetā**”ti. **Udayatthagāminīyāti** saṅkhārānam udayaṇca vayaṇca paṭivijjhantīyāti ayamettha atthoti āha “**udayaṇcā**”tiādi. **Parisuddhāyāti** nirupakkilesāya. **Nibbijjhitaṃ samatthāyāti** tadaṅgavasena savisesam pajahitaṃ samatthāya. **Tassa dukkhassa khayagāminīyāti** yaṃ dukkham imasmim nāṇe anadhigate pavattiraḥam, adhigate na pavattī, taṃ sandhāya vadati. Tathāhesa yogāvacarō “cūlasotāpanno”ti vuccati. Catuttham uttānameva.

Padhāniyaṅgasuttādivaṇṇanā niṭṭhitā.

5. Mātāputtasuttavaṇṇanā

55. Pañcame **vissāsoti** visacchāyasantāno bhāvo. **Otāroti** tattha cittassa anuppaveso. **Gahetvāti** attano eva okāsaṃ gahetvā. **Khepetvāti** kusalavāraṃ khepetvā.

Ghaṭṭeyyāti akkamanādivasena bādheyya. **Tīhi pariññāhīti** ñātātīraṇappahānasāṅkhātāhi tīhi pariññāhi. Natthi etesaṃ kutoci bhayanti **akutobhayā**, nibbhayāti attho. Catunnaṃ oghānam, saṃsāramahoghasseva vā pāraṃ pariyantaṃ gatā. Tenāha “**pāraṃ vuccati nibbāna**”ntiādi.

Mātāputtasuttavaṇṇanā niṭṭhitā.

6. Upajjhāyasuttavaṇṇanā

56. Chaṭṭhe madhurakabhāvo nāma sarīrassa thambhitattaṃ, taṃ pana garubhāvapubbakanti āha “**sañjātagarubhāvo**”ti. **Na pakkhāyantīti** nappakāsenti, nānākāraṇato na upaṭṭhahanti. Tenāha “**catasso disā ca anudisā ca mayham na upaṭṭhahanti**”ti. Sesamettha uttānameva.

Upajjhāyasuttavaṇṇanā niṭṭhitā.

7. Abhiṇhapaccavekkhitabbaṭṭhānasuttavaṇṇanā

57. Sattame **jarādhammoti dhamma**-saddo “asammosadhammo nibbāna”ntiādīsu (su. ni. 763) viya pakatipariyāyo, tasmā jarāpakatiko jīṇṇasabhāvōti attho. Tenāha “**jarāsabhāvo**”tiādi. Sesapadesupi eseva nayo. Kammunā dātappaṃ ādiyātīti **kammadāyādo**, attanā yathūpacitakammaphalabhāgīti attho. Taṃ pana dāyajjam kāraṇūpacārena vadanto “**kammaṃ mayham dāyajjam santakanti attho**”ti āha yathā “kusalānam, bhikkhave, dhammānam samādānāhetu, evamidam puñṇam vaḍḍhatī”ti (dī. ni. 3.80). Yonīhi phalaṃ sabhāvato bhinnampi

abhinnaṃ viya missitaṃ hoti. Tenāha “**kammaṃ mayhaṃ yoni kāraṇa**”nti. Mamattavasena bajjhantīti bandhū, ñāti sālohito ca, kammaṃ pana ekantasambandhavāti āha “**kammaṃ mayhaṃ bandhū**”ti. **Paṭiṭṭhā**ti avassayo. Kammasadiso hi sattānaṃ avassayo natthi.

Yobbanam ārabba uppannamadoti “mahallakakāle puññaṃ karissāma, daharamha tāvā”ti yobbanam apassāya mānakaraṇam. “Ahaṃ nirogo satṭhi vā sattati vā vassāni atikkantāni, na me harītakakhaṇḍampi khāditabbaṃ, ime panaññe ‘asukam no thānaṃ rujjati, bhesajjam khādāmā’ti vicaranti, ko añño mayā sadiso nirogo nāmā”ti evaṃ mānakaraṇam **ārogyamado**. Sabbesampi jīvitam nāma pabhaṅguraṃ dukkhānubandhañca, tadubhayaṃ anoloketvā pabandhaṭṭhitim paccayasulabhatañca nissāya “ciraṃ jīviṃ, ciraṃ jīvāmi, ciraṃ jīvissāmi, sukhaṃ jīviṃ, sukhaṃ jīvāmi, sukhaṃ jīvissāmi”ti evaṃ mānakaraṇam **jīvitamado**.

Upadhirahitanti kāmūpadhirahitaṃ. Cattāro hi upadhī – kāmūpadhi, khandhūpadhi, kilesūpadhi, abhisāṅkhārūpadhīti. Kāmāpi “yaṃ pañca kāmagaṇe paṭicca uppajjati sukhaṃ somanassaṃ, ayaṃ kāmānaṃ assādo”ti (ma. ni. 1.166) evaṃ vuttassa sukhasa adhiṭṭhānabhāvato “upadhiyati ettha sukha”nti iminā vacanatthena “upadhī”ti vuccati, khandhāpi khandhamūlakassa dukkhassa adhiṭṭhānabhāvato, kilesāpi apāyadukkhassa adhiṭṭhānabhāvato, abhisāṅkhārāpi bhavadukkhassa adhiṭṭhānabhāvato. Sesam suviññeyyameva.

Abhiṅhapaccavekkhitabbaṭṭhānasuttavaṇṇanā niṭṭhitā.

8-10. Licchavikumārakasuttādivaṇṇanā

58-60. Aṭṭhame **sāpateyyanti** ettha sam vuccati dhanam, tassa paṭīti sapatī, dhanasāmiko. Tassa hitāvahattā sāpateyyam, drabyam, dhananti attho. Attano rucivasena gāmakiccaṃ netīti gāmaniyo, gāmaniyoyeva **gāmaṇiko**.

Anvāya upanissāya jīvanasīlā **anujīvinoti** āha “**ye ca etaṃ upanissāya jīvantī**”ti. Ekaṃ mahākulaṃ nissāya paṇṇāsampi satṭhipi kulāni jīvanti, te manusse sandhāyetaṃ vuttaṃ. Sesam suviññeyyameva. Navamādīni uttānatthāneva.

Licchavikumārakasuttādivaṇṇanā niṭṭhitā.

Nīvaraṇavaggavaṇṇanā niṭṭhitā.

(7) 2. Saññāvaggo

1-5. Saññāsuttādivaṇṇanā

61-65. Dutiyassa paṭhame “**mahapphalā mahānisamsā**”ti ubhayampetaṃ atthato ekaṃ, byañjanaṃ nānanti āha “**mahapphalā**”tiādi. “Pañcime gahapatayo ānisamsā”tiādīsu (udā. 76) ānisamsa-saddo phalapariyāyopi hoti. Mahato lokuttarassa sukhasa paccayā hontīti **mahānisamsā**. **Amatogadhā**ti amatabbhantarā amataṃ anuppaviṭṭhā nibbānadiṭṭhattā, tato paraṃ na gacchanti. Tena vuttaṃ “amatapariyosānā”ti. Amataṃ pariyoṣānaṃ avasānaṃ etāsanti **amatapariyoṣānā**. **Maraṇasaññā**ti maraṇānupassanāññāneva saññā. **Āhāre paṭikūlasaññā**ti āhāraṃ gamanādivasena paṭikūlato pariggaṇhantassa uppannasaññā. **Ukkaṇṭhitassā**ti nibbindantassa katthacipi asajjantassa. Dutiyādīni uttānatthāneva.

Saññāsuttādivaṇṇanā niṭṭhitā.

6-10. Sājīvasuttādivaṇṇanā

66-70. Chaṭṭhe saha ājīvanti etthāti **sājīvo**, pañhassa pucchanaṃ vissajjanañca. Tenāha “**sājīvoti pañhapucchanañceva pañhavissajjanañcā**”tiādi. **Abhisankhatanti** citaṃ. Sattamādīni uttānatthāneva.

Sājīvasuttādivaṇṇanā niṭṭhitā.

Saññāvaggavaṇṇanā niṭṭhitā.

(8) 3. Yodhājīvavaggo

1-2. Paṭhamacetovimuttiphalaṣuttādivaṇṇanā

71-72. Tatiyassa paṭhame **avijjāpalighanti** ettha **avijjāti** vaṭṭamūlikā avijjā, ayaṃ pacurajanehi ukkhipituṃ asakkuṇeyyabhāvato dukkhipanaṭṭhena nibbānadvārappavesavibandhanena ca “paligho viyāti paligho”ti vuccati. Tenesa tassā ukkhittatā “**ukkhittapaligho**”ti vutto. Punabbhavassa karaṇasīlo, punabbhavaṃ vā phalaṃ arahaṭīti **ponobhavikā**, punabbhavadāyikāti attho. **Jātiṣaṃsāroti** jāyanaṣasena ceva saṃsaraṇaṣasena ca evaṃladdhanāmānaṃ punabbhavakkhandhānaṃ paccayo kammābhisaṅkhāro. Jātiṣaṃsāroti hi phalūpacārena kāraṇaṃ vuttaṃ. Tañhi punappunaṃ uppattikāraṇaṣasena parikkhipivā ṭhitatā “**parikhā**”ti vuccati santānassa parikkhipanato. Tenesa tassa saṃkiṇṇatā vikiṇṇatā sabbaso khittatā vināsittatā “**saṃkiṇṇaparikho**”ti vutto.

Taṇhāsaṅkhātanti ettha **taṇhāti** vaṭṭamūlikā taṇhā. Ayañhi gambhīrānugataṭṭhena “**esikā**”ti vuccati. **Luñcivā** uddharitvā. **Oraṃbhāgiyānīti** oraṃbhāgajanakāni kāmabhava upapattipaccayāni kāmāragasamyojanādīni. Etāni hi kavāṭaṃ viya nagaradvāraṃ cittaṃ pidahitvā ṭhitatā “aggaḷā”ti vuccanti. Tenesa tesam niggatatā bhinnatā “**niraggaḷo**”ti vuttoti. Aggamaggena panno apacito mānaddhajo etassāti **pannaddhajo**. **Pannabhāroti** khandhabhāraḷesabhāraabhisaṅkhārabhāra oropitā assāti pannabhāro. **Viṣaṃyuttoti** catūhi yogehi sabbakilesehi ca viṣaṃyutto. **Asmimānoti** rūpe asmīti māno, vedanāya, saññāya, saṅkhāresu, viññāṇe asmimāno. Ettha hi pañcapi khandhe avisesato “asmī”ti gahetvā pavattamāno asmimānoti adhippeto.

Nagaradvārassa pariṣṣayaṣaṭṭibāhanatthañceva sodhanatthañca ubhosu passesu esikāthambhe nikaṇṭitvā ṭhapetīti āha “**nagaradvāre ussāpīte esikāthambhe**”ti. Pākāraviddhamṣaneneva parikhābhūmisamakaraṇaṃ hotīti āha “**pākāraṃ bhinditvā parikhaṃ vikiritvā**”ti. “**Eva**”ntiādi upamāsaṃsandanaṃ. Santo saṃvijjamaṇo kāyo dhammasamūhoti **sakkāyo**, upādānakkhandhapañcakaṃ. **Dvattiṃsakammakāraṇā** dukkhakkhandhe āgatadukkhāni. Akkhirogasīsarogādayo. **Aṭṭhanavuti rogā**, rājabhayādīni **pañcaviṣatimahābhayāni**. Dutīyaṃ uttānameva.

Paṭhamacetovimuttiphalaṣuttādivaṇṇanā niṭṭhitā.

3-4. Paṭhamadhammavīhārīṣuttādivaṇṇanā

73-74. Tatiye **niyakajjhatteti** attano santāne. Mettāya upasaṃharaṇaṣasena **hitam esantena**. Karaṇāya vasena **anukampamānena**. **Pariggahetvāti** parito gahetvā, pharivāti attho. **Pariccāti** parito katvā, samantato pharivā icceva attho. “**Paṭṭicā**”tipi pāṭho. **Mā pamajjitthāti** “jhāyathā”ti vuttasamathavipassanānaṃ ananuyuñjanaṇa aññena vā kenaci pamādakāraṇena mā pamādaṃ āpajjittha. Niyyānikasāsane akattabbakaraṇaṃ viya kattabbākaraṇampi pamādoti. **Vipattikāleti** sattaasappāyādivipattiyutte kāle. Sabbepi sāsane guṇā idheva saṅgahaṃ gacchantīti āha “**jhāyatha mā pamādattha...pe... anusāsani**”ti. Catutthe natthi vattabbaṃ.

Paṭhamadhammavihārīsuttādivaṇṇanā niṭṭhitā.

5. Paṭhamayodhājīvasuttavaṇṇanā

75. Pañcame yujjhaṇaṃ yodho, so ājīvo etesanti **yodhājīvā**. Tenāha “**yuddhūpajīvino**”ti. **Santhambhitvā ṭhātuṃ na sakkotī** baddho dhitisampanno ṭhātuṃ na sakkoti. **Samāgateti** sampatte. **Byāpajjati** vikāramāpajjati. Tenāha “**pakatibhāvaṃ jahatī**”ti.

Rajaggasminti paccatte bhummavaacananti āha “**kiṃ tassa puggalassa rajaggaṃ nāmā**”ti. **Vinibbeḥetvāti** gahitaggahaṇaṃ vissajjāpetvā. **Mocetvāti** sarīrato apanetvā.

Paṭhamayodhājīvasuttavaṇṇanā niṭṭhitā.

6. Dutiyayodhājīvasuttavaṇṇanā

76. Chaṭṭhe **cammanti** iminā cammamayaṃ cammamiti sibbitaṃ, aññaṃ vā keṭakaphalakādiṃ saṅgaṇhāti. **Dhanukalāpaṃ sannayhitvāti** dhanuñceva tūnirañca sannayhitvā sajjetvā. Dhanudaṇḍassa jiyāyattabhāvakaraṇādipi hi dhanuno sannayhanaṃ. Tenevāha “**dhanuñca sarakalāpañca sannayhitvā**”ti. **Yuddhasannivesena ṭhitanti** dvinnāṃ senānaṃ byūhanasaṃvidhānanayena kato yo sanniveso, tassa vasena ṭhitaṃ, senābyūhasaṃvidhānavasena sanniviṭṭhanti vuttaṃ hoti. **Ussāhañca vāyāmañca karotī** yujjhanavasena ussāhaṃ vāyāmañca karoti. **Pariyāpādentī** maraṇapariyantikaṃ aparaṃ pāpentī. Tenāha “**pariyāpādayanti**”ti, jīvitaṃ pariyāpādayanti maraṇaṃ paṭipajjāpentī vuttaṃ hoti.

Arakkhiteneva kāyenātiādīsu hatthapāde kīlāpento gīvaṃ viparivattento kāyaṃ na rakkhati nāma. Nānappaḥāraṃ duṭṭhullaṃ karonto vācaṃ na rakkhati nāma. Kāmaṇṭikādayo vitakkento cittaṃ na rakkhati nāma. **Anupaṭṭhitāya satiyāti** kāyagatāya satiyā anupaṭṭhitāya. **Rāgena anugatoti** rāgena anupahato. **Rāgaparetoti** vā rāgena phuṭṭho phuṭṭhavisena viya sappena.

Anudhanaṭṭhenati anupāyappaṭipattiyā. Sampati āyatiñca **mahābhitāpaṭṭhena**. Anavatthitasabhāvatāya **ittarapaccupaṭṭhānaṭṭhena**. Muhuttaramaṇīyatāya **tāvakaḷikaṭṭhena**. Byattehi abhibhavaṇīyatāya **sabbaṅgapaccaṅgalibhaṅjanaṭṭhena**. Chedanabhedanādiadhikaraṇabhāvena ugghaṭṭanasadisatāya **adhikuṭṭanaṭṭhena**. Avaṇe vaṇaṃ uppādetvā anto anupavisanasabhāvatāya **vinivijjanaṭṭhena**. Diṭṭhadhammikasamparāyika anathanimittatāya **sāsaṅkasappaṭibhayaṭṭhena**.

Dutiyayodhājīvasuttavaṇṇanā niṭṭhitā.

7-8. Paṭhamaanāgatabhayaṇṇasuttādivaṇṇanā

77-78. Sattame **visesassa pattiya** visesassa pāpuṇanattaṃ. **Vīriyanti** padhānavīriyaṃ. Taṃ pana caṅkamanavasena karaṇe “**kāyika**”ntipi vattabbaṃ labhatīti āha – “**duvidhampī**”ti. **Satthakavātāti** sandhibandhanāni kattariyā chindantā viya pavattavātā. Tenāha – “**satthaṃ viyā**”tiādi. **Katakammehī** katacorakammehi. Te kira katakammā yaṃ nesaṃ devataṃ āyācitvā kammaṃ nipphannaṃ, tassa upakāratthāya manusse māretvā galalohitāni gaṇhanti. Te “**aññesu manussesu māriyamānesu kolāhalaṃ uppajjissati, pabbajitaṃ pariyesanto nāma natthī**”ti maññaṃānā bhikkhū gahetvā mārenti. Taṃ sandhāyetaṃ vuttaṃ. **Akatakammehī** aṭavito gāmaṃ āgamanakāle kammanipphattatthaṃ puretaraṃ balikammaṃ kātukāmehi. Tenevāha – “**corikaṃ katvā nikkhantā katakammā nāmā**”tiādi. Aṭṭhame natthi vattabbaṃ.

Paṭhamaanāgatabhayaṇṇasuttādivaṇṇanā niṭṭhitā.

9. Tatiyaanāgatabhayasuttavaṇṇanā

79. Navame **pāḷigambhīrā**ti (saṃ. ni. tī. 2.2.229) pāḷivasena gambhīrā agādhā dukkhogāhā sallasuttasadisā. **Sallasutta**ñhi (su. ni. 579) “animittamanaññāta”ntiādinā pāḷivasena gambhīraṃ, na atthagambhīraṃ. Tathā hi tattha tā tā gāthā duviññeyyarūpā tiṭṭhanti. Duviññeyyañhi ñāṇena dukkhogāhanti katvā “gambhīra”nti vuccati. Pabbāparampettha kāsañci gāthānaṃ duviññeyyatāya dukkhogāhameva, tasmā pāḷivasena gambhīraṃ. **Atthagambhīrā**ti atthavasena gambhīrā mahāvedallasuttasadisā, **mahāvedallasuttassa** (ma. ni. 1.449 ādayo) atthavasena gambhīratā pākāṭāyeva. Lokam uttaratīti lokuttaro, so atthabhūto etesaṃ atthīti **lokuttarā**. Tenāha – “**lokuttaradhammadīpakā**”ti. **Suññatāpaṭisaṃyuttā**ti sattuññadharmappakāsakā. Tenāha “**khandhadhātuātanapaccayākārappaṭisaṃyuttā**”ti. **Uggahetabbaṃ pariyāpūṇitabbanti** ca līngavacanavipallāsena vuttanti āha “**uggahetabbe ceva vaḷaṇṇjetabbe cā**”ti. Kavino kammaṃ **kavitā**. Yassa pana yaṃ kammaṃ, taṃ tena katanti vuccatīti āha “**kavitāti kavīhi katā**”ti. **Kāveyyanti** kabyaṃ, **kabyanti** ca kavinā vuttanti attho. Tenāha “**tasseva vevacana**”nti. **Cittakkharā**ti citrākāraakkharā. Itaraṃ tasseva vevacanaṃ. **Sāsanato bahiddhā ṭhitā**ti na sāsanāvacaṛā. **Bāhirakasāvakehī** “buddhā”ti appaññātānaṃ yesaṃ kesañci sāvakehi. **Sussūsissantī**ti akkharacittatāya ceva sarasampattiyā ca attamaṇā hutvā sāmaṇeradahaṛabhikkhumātugāmahāgahapatikādayo “esa dhammakathiko”ti sannipatitvā sotukāmā bhavissanti.

Tatiyaanāgatabhayasuttavaṇṇanā niṭṭhitā.

10. Catutthaanāgatabhayasuttavaṇṇanā

80. Dasame **pañcavidhena saṃsaggenā**ti “savanasaṃsaggo, dassanasamṣaggo, samullāpasamṣaggo, sambhogasamṣaggo, kāyasamṣaggo”ti evaṃ vuttena pañcavidhena saṃsaggena. Saṃsajjati etenāti saṃsaggo, rāgo. Savanahetuko, savanavasena vā pavatto saṃsaggo **savanasaṃsaggo**. Esa nayo sesesupi. **Kāyasamṣaggo** pana kāyaparāmāso. Tesu parehi vā kathiyamānaṃ rūpādisampattiṃ attanā vā sitalapitagītasaddaṃ suṇantassa sotaviññānavīthivasena uppanno rāgo **savanasaṃsaggo** nāma. Visabhāgarūpaṃ oloketassa pana cakkhuvīññānavīthivasena uppanno rāgo **dassanasamṣaggo** nāma. Aññamaññaālāpasallāpavasena uppannarāgo **samullāpasamṣaggo** nāma. Bhikkhuno bhikkhuniyā santakaṃ, bhikkhuniyā bhikkhussa santakaṃ gahetvā paribhogakaraṇavasena uppannarāgo **sambhogasamṣaggo** nāma. Hatthagāhādivasena uppanno rāgo **kāyasamṣaggo** nāma.

Anekavihitanti

annasannidhipānasannidhivatthasannidhiyānasannidhisayanasannidhigandhasannidhi-āmisasannidhivasena anekappakāraṃ. **Sannidhikatassā**ti etena “sannidhikāraparibhoga”nti (dha. sa. tīkamātikā 10) ettha kāra-saddassa kammaṭṭhatam dasseti. Yathā vā “ācayaṃ gāmino”ti vattabbe anunāsikalopena “ācayagāmino”ti niddeso kato, evaṃ “sannidhikāraṃ paribhoga”nti vattabbe anunāsikalopena “**sannidhikāraparibhoga**”nti vuttam, sannidhiṃ katvā paribhoganti attho.

“Sannidhikatassa paribhoga”nti ettha (dī. ni. aṭṭha. 1.12) pana duvidhā kathā vinayavasena sallekhasena ca. Vinayavasena tāva yaṃ kiñci annaṃ ajja paṭiggahitaṃ aparajju sannidhikāraṃ hoti, tassa paribhoge pācittiyam. Attanā laddham pana sāmaṇeraṇaṃ datvā tehi laddham vā pāpetvā dutiyadivase bhūñjitum vaṭṭati, sallekko pana na hoti. Pānasannidhimhipi eseva nayo. Vatthasannidhimhi anadhiṭṭhitāvikkappaṭam sannidhi ca hoti, sallekhañca kopeti. Ayaṃ nippariyāyakathā. Pariyāyato pana ticīvarasantuṭṭhena bhavitabbaṃ, catuttham labhitvā aññassa dātabbaṃ. Sace yassa kassaci dātum na sakkoti, yassa pana dātukāmo hoti, so uddesatthāya vā paripucchathāya vā gato, āgatamatte dātabbaṃ, adātum na vaṭṭati. Cīvare pana appahonte, satiyā vā paccāsāya anuññātakālaṃ ṭhapetum vaṭṭati. Sūcisuttacīvarakāraṇaṃ alābhe tatopi vinayakammaṃ katvā ṭhapetum vaṭṭati “imasmim jīṇṇe puna īdisaṃ kuto labhissāmi”ti pana ṭhapetum na vaṭṭati, sannidhi ca hoti, sallekhañca

kopeti.

Yānasannidhimhi **yānaṃ** nāma vayhaṃ ratho sakaṭaṃ sandamānikā pāṭaṅkīti. Na panetaṃ pabbajitassa yānaṃ, upāhanaṃ pana yānaṃ. Ekabhikkhussa hi eko araṅṅāvāsathāya, eko dhotapādakathāyāti ukkaṃsato dve upāhanasaṅghāṭakā vaṭṭanti, tatiyaṃ labhivā aññaṃ dātabbo. “Imasmiṃ jīṇe aññaṃ kuto labhissāmi”’ti ṭhpetuṃ na vaṭṭati, sannidhi ca hoti, sallekhaṅca kopeti. Sayanasannidhimhi **sayananti** mañco. Ekassa bhikkhuno eko sayanagabbhe, eko divāṭṭhāneti ukkaṃsato dve mañcā vaṭṭanti. Tato uttariṃ labhivā aññaṃ bhikkhuno, gaṇassa vā dātabbo, adātuṃ na vaṭṭati, sannidhi ceva hoti, sallekho ca kuppāti. Gandhasannidhimhi bhikkhuno kaṇḍukacchuchavidosaḍḍiābādhe sati gandhā vaṭṭanti. Gandhatthikena gandhaṅca āharāpetvā tasmīṃ roge vūpasante aññesaṃ vā ābādhikānaṃ dātabbaṃ, dvāre pañcaṅguligharadhūpanādīsu vā upanetaṃ. “Puna roge sati bhavissati”’ti ṭhpetuṃ na vaṭṭati, gandhasannidhi ca hoti, sallekhaṅca kopeti.

Āmisanti vuttāvesaṃ daṭṭhabbaṃ. Seyyathidaṃ – idhekacco bhikkhu “tathārūpe kāle upakārya bhavissanti”’ti tilataṇḍulamuggamāsanālikeraloṇamacchappitelakulālabhājanādīni āharāpetvā ṭhpeti. So vassakāle kālasseva sāmaṇerehi yāguṃ pacāpetvā paribhuñjitvā “sāmaṇera udakakaddame dukkhaṃ gāmaṃ pavisitūṃ, gaccha asukakulaṃ gantvā mayhaṃ vihāre nisinnabhāvaṃ ārocehi, asukakulato dadhiādīni āharā”’ti peseti. Bhikkhūhi “kiṃ, bhante, gāmaṃ pavissāma”’ti vuttepi “duppaveso, āvuso, idāni gāmo”’ti vadati. Te “hotu, bhante, acchatha tumhe, mayaṃ bhikkhaṃ pariyesitvā āharissāma”’ti gacchanti. Atha sāmaṇero dadhiādīni āharitvā bhataṅca byañjanaṅca sampādetvā upaneti, taṃ bhūñjantasseva upaṭṭhākā bhataṃ paṇanti, tatopi manāpamanāpaṃ bhūñjati. Atha bhikkhū piṇḍapātaṃ gahetvā āgacchanti, tatopi manāpamanāpaṃ bhūñjatiyeva. Evaṃ catumāsampi vītināmeti. Ayaṃ vuccati bhikkhu muṇḍakuṭumbikajīvikāṃ jīvati, na samaṇajīvikanti. Evarūpo **āmisasannidhi** nāma hoti. Bhikkhuno pana vasanaṭṭhāne ekā taṇḍulanāli eko guḷapiṇḍo kuḍuvamattaṃ sappīti ettakaṃ nidhetuṃ vaṭṭati akāle sampattacorānaṃ atthāya. Te hi ettakaṃ āmisapaṭisaṅghāraṃ alabhantā jīvitā voropeyyuṃ, tasmā sace hi ettakaṃ natthi, āharāpetvāpi ṭhpetuṃ vaṭṭati. Aphāsukakāle ca yadetta kappiyaṃ, taṃ attanāpi paribhuñjitūṃ vaṭṭati. Kappiyakuṭiyaṃ pana bahūṃ ṭhpetassapi sannidhi nāma natthi.

Catutthaanāgatabhayasuttavaṇṇanā niṭṭhitā.

Yodhājīvavaggavaṇṇanā niṭṭhitā.

(9) 4. Theravaggo

1-2. Rajanīyasuttādivaṇṇanā

81-82. Catutthassa paṭhamāṃ suviññeyyameva. Dutīye guṇamakkhanāya pavattopi attano kāraṃ gūthena paharantaṃ gūtho viya paṭhamataraṃ makkhetīti makkho, so etassa atthīti **makkhī**. Paḷāsātīti paḷāso, parassa guṇe ḍaṃsitvā viya apanetīti attho. So etassa atthīti **paḷāsī**. Paḷāsī puggalo hi dutiyassa dhuraṃ na deti, sampasāretvā tiṭṭhati. Tenāha “**yugaggāhalakkhaṇena paḷāsena samannāgato**”’ti.

Rajanīyasuttādivaṇṇanā niṭṭhitā.

3. Kuhakasuttavaṇṇanā

83. Tatiye **tīhi kuhanavattūhīti** sāmantaṃ jappanairiyāpathasannissitapaccayappaṭisevanabhedato tippabhedehi kuhanavattūhīti. Tividhena kuhanavattūhīti lokāṃ kuhayati vimhāpayati “aho acchariyapuriso”’ti attani paresaṃ vimhayaṃ uppādetīti **kuhako**. Lābhasakkāratthiko hutvā lapati attānaṃ dāyakaṃ vā ukkhipitvā yathā so kiñci dadāti, evaṃ ukkācetvā kathetīti **lapako**. Nimittaṃ sīlaṃ

tassāti **nemittiko**, nimittena vā carati, nimittam vā karotīti nemittiko. **Nimittanti** ca paresam paccayadānasaññuppādakam kāyavacīkammaṃ vuccati. Nippeso sīlamassāti **nippesiko**. Nippisatīti vā nippeso, nippesoyeva **nippesiko**. **Nippesoti** ca saṭṭhapuriso viya lābhasakkārattham akkosanuppaṇḍanaparapiṭṭhimamsikatādi.

Kuhakasuttavaṇṇanā niṭṭhitā.

6-7. Paṭisambhidāppattasuttādivaṇṇanā

86-87. Chaṭṭhe paṭisambhidāsu yaṃ vattabbaṃ, taṃ heṭṭhā vuttameva. **Uccāvacānīti** uccanīcāni. Tenāha “**mahantakhuddakānī**”ti. **Kimkaraṇīyānīti** “kim karomī”ti evaṃ vatvā kattabbakammāni. Tattha **uccakammāni** nāma cīvarassa karaṇaṃ, rajanaṃ, cetiye sudhākammaṃ, uposathāgāracetiyagharabodhigharesu kattabbakammanti evamādi. **Avacakammaṃ** nāma pādadhovanamakhanādi khuddakakammaṃ. **Tatrupāyāsāti** tatrupalagamaniyā, tatra tatra mahante khuddake ca kamme sādhanavasena upagacchantiyāti attho. Tassa tassa kamma nippādane samatthāyāti vuttaṃ hoti. **Tatrupāyāyāti** vā tatra tatra kamme sādhetabbe upāyabhūtāya. **Alaṃ kātunti** kātuṃ samattho hoti. **Alaṃ samvidhātunti** vicāretuṃ samattho. Sattamaṃ uttānameva.

Paṭisambhidāppattasuttādivaṇṇanā niṭṭhitā.

8. Therasuttavaṇṇanā

88. Aṭṭhame **thirabhāvappattoti** sāsane thirabhāvaṃ anivattibhāvaṃ pattho. Pabbajito hutvā bahū rattiyo jānātīti **rattaññū**. Tenāha “**pabbajitadivasato paṭṭhāyā**”tiādi. **Pākaṭoti** ayathābhūtaguṇehi ceva yathābhūtaguṇehi ca samuggato. Yaso etassa atthīti **yasassī**, yaṣaṃ sito nissito vā **yasassī**. Tenāha “**yaṣanissito**”ti. Asataṃ asādhūnaṃ dhammā **asaddhammā**, asantā vā asundarā gārayhā lāmakā dhammāti **asaddhammā**. Vipariyāyena **saddhammā** veditabbā.

Therasuttavaṇṇanā niṭṭhitā.

9. Paṭhamasekhasuttavaṇṇanā

89. Navame āramitabbatṭhena kammaṃ ārāmo etassāti kammārāmo, tassa bhāvo **kammārāmatā**. Tattha **kammanti** itikattabbaṃ kammaṃ vuccati. Seyyathidaṃ – cīvaravicāraṇaṃ cīvarakammakaraṇaṃ upatthambhanaṃ pattatthavikaṃsabaddhakakāyabandhanadhammakaraṇaādhārapādakathalīkasammajjaniādīnaṃ karaṇanti. Ekacco hi etāni karonto sakaladivasam etāneva karoti, taṃ sandhāyesa paṭikkhepo. Yo pana etesaṃ karaṇavelāyameva tāni karoti, uddesavelāya uddesaṃ gaṇhāti, sajjhāyavelāya sajjhāyati, cetiyaṅgaṇavattavelāya cetiyaṅgaṇavattaṃ karoti, manasikāraṇavelāya manasikāraṇaṃ karoti, na so kammārāmo nāma. **Bhassārāmatāti** ettha yo itthivaṇṇapurisavaṇṇādivasena ālāpasallāpaṃ karontoyeva divasañca rattiñca vītināmeti, evarūpo bhasse pariyantakārī na hoti, yaṃ bhassārāmo nāma. Yo pana rattimpi divasampi dhammaṃ katheti, pañhaṃ vissajjeti, yaṃ appabhasso bhasse pariyantakārīyeva. Kasmā? “Sannipatitānaṃ vo, bhikkhave, dvayaṃ karaṇīyaṃ dhammī vā kathā, ariyo vā tuṅhībhāvo”ti (ma. ni. 1.273; udā. 12, 28, 29) vuttatā.

Niddārāmatāti ettha yo gacchantopi nisinnopi nipannopi thinamidhābhibhūto niddāyatiyeva, yaṃ niddārāmo nāma. Yassa pana karajakāye gelaññena cittaṃ bhavaṅge otarati, nāyaṃ niddārāmo. Tenevāha – “abhijānāmi kho paṇāhaṃ, aggivessana, gimhānaṃ pacchime māse pacchābhattaṃ piṇḍapātappaṭikkanto catugguṇaṃ saṅghāṭiṃ paññāpetvā dakkhiṇena passena sato sampajāno niddaṃ okkamitā”ti (ma. ni. 1.387). **Saṅgaṇīkārāmatāti** ettha yo ekassa dutiyo, dvinnaṃ tatiyo, tiṇṇaṃ catuttho evaṃ saṃsaṭṭhova viharati, ekako assādaṃ na labhati, yaṃ saṅgaṇīkārāmo. Yo pana catūsu

iriyāpathesu ekakova assādaṃ labhati, nāyaṃ saṅgaṇikārāmo veditabbo. Sekhānaṃ paṭiladdhagaṇassa parihānāsambhavato “**upariguṇehi**”tiādi vuttaṃ.

Paṭhamasekhasuttavaṇṇanā niṭṭhitā.

10. Dutiyasekhasuttavaṇṇanā

90. Dasame **atipātovāti** sabbarattiṃ niddāyitvā balavapaccūse koṭisammuṅjanīyā thokaṃ sammajjitvā mukhaṃ dhovitvā yāgubhikkhatthāya pātova pavisati. **Taṃ atikkamitvāti** gihisaṃsaggavasena kālaṃ vītināmento majjhanhikasamayaṃ atikkamitvā pakkamati. Pātovēva hi gāmaṃ pavisitvā yāguṃ ādāya āsanasālaṃ gantvā pivitvā ekasmiṃ ṭhāne nīpanno niddāyitvā manussānaṃ bhojanavelāya “paṇītabhikkhaṃ labhissāmī”ti upakaṭṭhe majjhanhike utṭhāya dhammakaraṇena udakaṃ gahetvā akkhīni puñchitvā piṇḍāya caritvā yāvadatthaṃ bhuñjitvā gihisaṃsaṭṭho kālaṃ vītināmetvā majjhanhe vītivatte paṭikkamati.

Appicchakathāti, “āvuso, atricchataṃ pāpicchatāti ime dhammā pahātabbā”ti tesu ādīnaṃ dassetvā “evarūpaṃ appicchataṃ samādāya vattitabba”ntiādinayappavattā kathā. **Tīhi vivekehīti** kāyaviveko, cittaviveko, upadhivivekoti imehi tīhi vivekehi. Tattha eko gacchati, eko tiṭṭhati, eko nisīdati, eko seyyaṃ kappeti, eko gāmaṃ piṇḍāya pavisati, eko paṭikkamati, eko caṅkamaṃ adhiṭṭhāti, eko carati, eko viharatīti ayaṃ **kāyaviveko** nāma. Aṭṭha samāpattiyo pana **cittaviveko** nāma. Nibbānaṃ **upadhiviveko** nāma. Vuttampi hettaṃ – “kāyaviveko ca vivekaṭṭhakāyānaṃ nekkhammābhiratānaṃ, cittaviveko ca parisuddhacittānaṃ paramavodānappattānaṃ, upadhiviveko ca nirupadhīnaṃ puggalānaṃ visaṅkhāragatāna”nti (mahāni. 57). **Duvidhaṃ vīriyanti** kāyikaṃ, cetasikaṃca vīriyaṃ. **Sīlanti** catupārisuddhisīlaṃ. **Samādhinti** vipassanāpādaḷā aṭṭha samāpattiyo. **Vimuttikathāti** vā ariyaphalaṃ ārabha pavattā kathā. Sesamaṃ uttānameva.

Dutiyasekhasuttavaṇṇanā niṭṭhitā.

Theravaggavaṇṇanā niṭṭhitā.

(10) 5. Kakudhavaggo

1-10. Paṭhamasampadāsuttādivaṇṇanā

91-100. Pañcamassa paṭhame dutiye ca natthi vattabbaṃ. Tatiye ājānanato **aññā**, uparimaggapaññā heṭṭhimamaggena ñātapariññāya eva jānanato. Tassā pana phalabhāvato maggaphalapaññā taṃsahagatā sammāsaṅkappādayo ca idha “aññā”ti vuttā. Aññāya byākaraṇāni **aññābyākaraṇāni**. Tenevāha “**aññābyākaraṇānīti arahattabyākaraṇānī**”ti. **Adhigatamānenāti** appatte pattasaññī, anadhigate adhigatasaññī hutvā adhigataṃ mayāti mānena. Catutthādīni uttānatthāneva.

Paṭhamasampadāsuttādivaṇṇanā niṭṭhitā.

Kakudhavaggavaṇṇanā niṭṭhitā.

Dutiyapaṇṇāsakaṃ niṭṭhitam.

3. Tatiyapaṇṇāsakaṃ

(11) 1. Phāsuvihāravaggo

1-4. Sārajjasuttādivaṇṇanā

101-4. Tatiyassa paṭhame natthi vattaḅbaṃ. Dutiye piṇḍapātādiatthāya upasaṅkamtum yuttaṭṭhānaṃ gocaro, vesiyā gocaro assāti **vesiyāgocaro**, mittasanthavavasena upasaṅkamtabbatṭhānanti attho. Vesiyā nāma rūpūpajīvinīyo, tā mittasanthavavasena na upasaṅkamtabbā samaṇabhāvassa antarāyakarattā, parisuddhāsayaṃsapi garahāhetuto, tasmā dakkhiṇādānavasena satim upaṭṭhapetvā upasaṅkamtabbā. **Vidhavā** vuccanti matapatikā, pavutthapatikā vā. **Thullakumāriyoti** mahallikā anividdhā kumāriyo. **Paṇḍakāti** napuṃsakā. Te hi ussannakilesā avūpasantapariḷāhā lokāmisaniṣṭakathābahulā, tasmā na upasaṅkamtabbā. **Bhikkhuniyo** nāma ussannabrahmacariyā. Tathā **bhikkhūpi**. Aññaṃaññaṃ visabhāgavatthubhāvato santhavavasena upasaṅkamane katipāheneva brahmacariyantarāyo siyā, tasmā na upasaṅkamtabbā, gilānapucchanādivasena upasaṅkamane satokārinā bhavitabbā. Tatiyacatutthāni uttānatthāneva.

Sārajjasuttādivaṇṇanā niṭṭhitā.

5. Phāsuvihārasuttavaṇṇanā

105. Pañcame mettā etassa atthīti mettaṃ, taṃsamutṭhānaṃ kāyakammaṃ **mettaṃ kāyakammaṃ**. Esa nayo sesadvayepi. **Āvīti** pakāsaṇaṃ. Pakāsaḅbhāvo cettha yaṃ uddissa taṃ kāyakammaṃ karīyati, tassa sammukhabhāvatoṭi āha “**sammukhā**”ti. **Rahoti** appakāsaṃ. Appakāsatā ca yaṃ uddissa taṃ kāyakammaṃ karīyati, tassa apaccakkhabhāvatoṭi āha “**parammukhā**”ti. Imāni mettakāyakammādīni bhikkhūnaṃ vasena āgatāni tesam seṭṭhaparisabhāvato, gihīsūpi labbhantiyeva. Bhikkhūnañhi mettacittena ābhisamācārikapūraṇaṃ mettaṃ kāyakammaṃ nāma. Gihīnaṃ cetiyavandanatthāya bodhivandanatthāya saṅghanimantanatthāya gamanaṃ gāmaṃ piṇḍāya pavitṭhe bhikkhū disvā paccuggamaṇaṃ pattappaṭiggahaṇaṃ āsanapaññāpanaṃ anugamaṇanti evamādikaṃ mettaṃ kāyakammaṃ nāma. Bhikkhūnaṃ mettacittena ācārapaññāntisikkhāpanaṃ kammatṭhānakathanaṃ dhammadesanā tepitakampi buddhavacanaṃ mettaṃ vacīkammaṃ nāma. Gihīnaṃ “cetiavandanāya gacchāma, bodhivandanāya gacchāma, dhammassavanaṃ karissāma, dīpamālaṃ pupphapūjaṃ karissāma, tīṇi sucaritāni samādāya vattissāma, salākabhattādīni dassāma, vassāvāsikaṃ dassāma, ajja saṅghassa cattāro paccaye dassāma, saṅghaṃ nimantetvā khādanīyādīni saṃvidahatha, āsanāni paññapetha, pānīyaṃ upaṭṭhapetha, saṅghaṃ paccuggantvā ānetha, paññattāsane nisīdāpetha, chandajātā ussāhajātā veyyāvaccam karothā”tiādīkathanakāle mettaṃ vacīkammaṃ nāma. Bhikkhūnaṃ pātova utṭhāya sarīrappaṭijagganaṃ katvā cetiyaṅgaṇaṃ gantvā vattādīni katvā vivittasenāsane nisīdītvā “imasmiṃ vihāre bhikkhū sukhī hontu averā abyāpajjā”ti cintanaṃ mettaṃ manokammaṃ nāma, gihīnaṃ “ayyā sukhī hontu averā abyāpajjā”ti cintanaṃ mettaṃ manokammaṃ nāma.

Tattha navakānaṃ cīvarakammādīsū sahāyabhāvagamaṇaṃ sammukhā kāyakammaṃ nāma, therānaṃ pana pādadhovanasiñcanabījanādānādībhedampi sabbaṃ sāmīcīkammaṃ sammukhā kāyakammaṃ nāma, ubhayehipi dunnikkhittānaṃ dārubhaṇḍādīnaṃ tesu avaññaṃ akatvā attanā dunnikkhittānaṃ viya paṭisāmaṇaṃ parammukhā mettaṃ kāyakammaṃ nāma. “Devatthero tīssatthero”ti vuttaṃ evaṃ paggayhavacanaṃ sammukhā mettaṃ vacīkammaṃ nāma, vihāre asantaṃ pana paṭipucchantassa “kuhiṃ amhākaṃ devatthero, kuhiṃ amhākaṃ tīssatthero, kadā nu kho āgamissatī”ti evaṃ piyavacanaṃ parammukhā mettaṃ vacīkammaṃ nāma. Mettāsinehasiniddhāni pana nayanāni ummīletvā pasannena mukhena olokanaṃ sammukhā mettaṃ manokammaṃ nāma, “devatthero tīssatthero arogo hotu abyāpajjo”ti samannāharaṇaṃ parammukhā mettaṃ manokammaṃ nāma. Kāmañcettha mettāsinehasiniddhānaṃ nayanānaṃ ummīlanaṃ, pasannena mukhena olokanañca mettaṃ kāyakammameva. Yassa pana cittassa vasena nayanānaṃ mettāsinehasiniddhatā, mukhassa ca pasannatā, taṃ sandhāya vuttaṃ “mettaṃ manokammaṃ nāmā”ti. Samādhisaṃvattanappayojanāni **samādhisaṃvattanīkāni**.

Samānasīlataṃ gatoti tesu tesu disābhāgesu viharantehi bhikkhūhi saddhiṃ samānasīlataṃ gato.

Yāyanti yā ayaṃ mayhañceva tumhākañca paccakkhabhūtā. **Diṭṭhīti** sammādiṭṭhi. **Ariyāti** niddosā. **Niyyāṭṭi** vaṭṭadukkhato nissarati niggacchati. Sayaṃ niyyantīyeva hi taṃsamaṅgipuggalaṃ vaṭṭadukkhato niyyāpetīti vuccati. Yā satthu anusīṭṭhi, taṃ karotīti **takkaro**, tassa, yathānusīṭṭhaṃ paṭipajjakassāti attho. **Dukkhakkhayāyāti** sabbadukkhakkhayatthaṃ. **Diṭṭhisāmaññagatoti** samānadiṭṭhibhāvaṃ upagato.

Phāsuvihārasuttavaṇṇanā niṭṭhitā.

6-10. Ānandasuttādivaṇṇanā

106-110. Chaṭṭhe **adhisīleti** nimittatthe bhumbaṃ, sīlanimittaṃ na upavadati na nindatīti attho. Attani kamme ca anu anu pekkhati sīlenāti **attānupekkhī**. Sattamādīni uttānatthāneva.

Ānandasuttādivaṇṇanā niṭṭhitā.

Phāsuvihāravaggavaṇṇanā niṭṭhitā.

(12) 2. Andhakavindavaggo

1-4. Kulūpakasuttādivaṇṇanā

111-114. Dutiyassa paṭhame asanthavesu kulesu viśāsō etassāti **asanthavavissāsī**. Anissaro hutvā vikappeti saṃvidahati sīlenāti **anissaravikappī**. Viśaṭṭhāni viṣuṃ khittāni bhedenā avatthitāni kulāni ghaṭanattāyā upasevati sīlenāti **viśaṭṭhupasevī**. Dutiyādīni uttānatthāneva.

Kulūpakasuttādivaṇṇanā niṭṭhitā.

5-13. Maccharinīsuttādivaṇṇanā

115-123. Pañcame āvāsamacchariyādīni pañca idha bhikkhuniyā vasena āgatāni, bhikkhussa vasenapi tāni veditabbāni. Āvāsamacchariyena hi samannāgato bhikkhu āgantukaṃ disvā “ettha cetiyassa vā saṅghassa vā parikkhāro ṭhapito”tiādīni vatvā saṅghikaāvāsaṃ na deti. Kulamacchariyena samannāgato bhikkhu tehi tehi kāraṇehi ādīnavaṃ dassetvā attano upaṭṭhāke kule aññesaṃ pavesampi nivāreti. Lābhamacchariyena samannāgato saṅghikampi lābhaṃ maccharāyanto yathā aññe na labhanti, evaṃ karoti attanā viśamanissitatāyā balavanissitatāyā ca. Vaṇṇamacchariyena samannāgato attano vaṇṇaṃ vaṇṇeti, paresaṃ vaṇṇe “kiṃ vaṇṇo eso”ti taṃ taṃ dosaṃ vadati. **Vaṇṇoti** cettha sarīravaṇṇopi, guṇavaṇṇopi veditabbo.

Dhammacchariyena samannāgato – “imaṃ dhammaṃ pariyāpuṇitvā eso maṃ abhibhavissatī”ti aññassa na deti. Yo pana – “ayaṃ imaṃ dhammaṃ uggahetvā aññathā atthaṃ viparivattetvā nāsessatī”ti dhammanuggahena vā – “ayaṃ imaṃ dhammaṃ uggahetvā uddhato unnaḷo avūpasantacitto apuññaṃ pasavissatī”ti puggalānuggahena vā na deti, na taṃ macchariyaṃ. **Dhammoti** cettha pariyattidhammo adhippeto. Paṭivedhadhammo hi ariyānaṃyeva hoti, te ca naṃ na maccharāyanti macchariyassa sabbaso pahīnattāti tassa asambhavo eva. Tattha āvāsamacchariyena lohagehe paccati, yakkho vā peto vā hutvā tasseva āvāsassa saṅkāraṃ sīsena ukkhipitvā carati. Kulamacchariyena appabhogo hoti. Lābhamacchariyena gūthaniraye nibbattati, saṅghassa vā gaṇassa vā lābhaṃ maccharāyitvā puggalīkapaṇibhogena vā paṇibhuñjitvā yakkho vā peto vā mahāajagaro vā hutvā nibbattati. Vaṇṇamacchariyena bhavesu nibbattassa vaṇṇo nāma na hoti. Dhammacchariyena kukkuḷaniraye nibbattati. Chaṭṭhādīni uttānatthāneva.

Maccharinīsuttādivaṇṇanā niṭṭhitā.

Andhakavindavaggavaṇṇanā niṭṭhitā.

(13) 3. Gilānavaggo

124-130. Tatiyo vaggo uttānatthoyeva.

(14) 4. Rājavaggo

1. Paṭhamacakkānuvattanasuttavaṇṇanā

131. Catutthassa paṭhame **atthaññūti** hitaññū. Hitapariyāyo hettha attha-saddo “attattho parattho” tiādīsu (mahāni. 69; cūḷani. mogharājamāṇavapucchānidde 85; paṭi. ma. 3.5) viya. Yasmā cesa paresaṃ hitaṃ jānanto te attani rañjeti, tasmā vuttaṃ “**rañjituṃ jānāti**” ti. **Daṇḍeti** aparādhānurūpe daṇḍane. **Balamhīti** balakāye. **Pañca attheti** attattho, parattho, ubhayattho, diṭṭhadhammiko attho, samparāyiko atthoti evaṃ pañcappabhede atthe. **Cattāro dhammeti** catusaccadhamme, kāmarūpārūpalokuttarabhede vā cattāro dhamme. Paṭiggahaṇaparibhogamattaññūtāya eva pariyesanavissajjanamattaññūtāpi bodhitā hontīti “**paṭiggahaṇaparibhogamattaṃ jānāti**” icceva vuttaṃ.

Uttarati atikkamati, abhibhavatīti vā uttaraṃ, natthi ettha uttaranti **anuttaraṃ**. Anatisayaṃ, appaṭibhāgaṃ vā anekāsu devamanussaparisāsu anekasatakkhattuṃ tesam ariyasaccappaṭivedhasampādanavasena pavattā bhagavato dhammadesanā **dhammacakkaṃ**. Apica sabbapaṭhamam aññātaḥḍaṇḍāññappamukhāya aṭṭhārasaparisagaṇāya brahmakoṭiyā catusaccassa paṭivedhavidhāyini yā dhammadesanā, tassā sātīsayā dhammacakkasamaññā. Tattha satipaṭṭhānātidhammo eva pavattanaṭṭhena cakkanti **dhammacakkaṃ**. **Cakkanti** vā āṇā dhammato anapetattā, dhammañca taṃ cakkañcāti **dhammacakkaṃ**. Dhammena ñāyena cakkantipi **dhammacakkaṃ**. Yathāha “dhammañca pavatteti cakkañcāti dhammacakkaṃ, cakkañca pavatteti dhammañcāti dhammacakkaṃ, dhammena pavatteti dhammacakka” ntiādī (paṭi. ma. 2.40-41). **Appaṭivattiyanti** dhammissarassa bhagavato sammāsambuddhassa dhammacakkassa anuttarabhāvato appaṭisedhanīyaṃ. Kehi pana appaṭivattiyanti āha – “**samaṇena vā**” tiādī. Tattha **samaṇenāti** pabbajjaṃ upagatena. **Brāhmaṇenāti** jātibrāhmaṇena. Sāsanaparamatthasamaṇabrāhmaṇānañhi paṭilomacittamyeva natthi. **Devenāti** kāmāvacaradevena. **Kenacīti** yena kenaci avasiṭṭhapārisajjena. Ettāvata aṭṭhannampi parisānaṃ anavasesapariyādānaṃ daṭṭhabbaṃ. **Lokasminti** sattaloke.

Paṭhamacakkānuvattanasuttavaṇṇanā niṭṭhitā.

2. Dutiyacakkānuvattanasuttavaṇṇanā

132. Dutīye **cakkavattivattanti** dasavidhaṃ, dvādasavidhaṃ vā cakkavattibhāvāvahaṃ vattaṃ. Tattha antojanasmim balakāye dhammikāyeva rakkhāvaraṇaguttiyā saṃvidhānaṃ, khattīyesu, anuyantesu, brāhmaṇagahapatikesu, negamañānapadesu, samaṇabrāhmaṇesu, migapakkhīsu, adhammikapaṭikkhepo, adhanānaṃ dhanānuppādānaṃ, samaṇabrāhmaṇe upasaṅkamitvā pañhapucchānanti idaṃ dasavidhaṃ cakkavattivattaṃ. Idameva ca gahapatike pakkhijāte ca visuṃ katvā gahaṇavasena dvādasavidhaṃ. **Pitarā pavattitameva anuppavatteti**ti dasavidhaṃ vā dvādasavidhaṃ vā cakkavattivattaṃ pūretvā nisinnassa puttassa aññaṃ pātubhavati, so taṃ pavatteti. Ratanamayattā pana sadisaṭṭhena tadevetanti katvā “pitarā pavattita” nti vuttaṃ. Yasmā vā so “apposukko, tvaṃ deva, hohi, ahamanusāsissāmī” ti āha. Tasmā pitarā pavattitaṃ āñcakkam anuppavatteti nāmāti evamettha attho daṭṭhabbo. Yañhi attano puññānubhāvasiddhaṃ cakkaratanaṃ, taṃ nippariyāyato tena pavattitaṃ

nāma, netaranti paṭhamanayo vutto. Yasmā pavattitasseva anuvattanaṃ, paṭhamanayo ca taṃsadise tabbhārasena vuttoti taṃ anādiyivā dutiyanayo vutto.

Dutiya-cakkānuvattanasuttavaṇṇanā niṭṭhitā.

4. Yassaṃdisaṃsuttavaṇṇanā

134. Catutthe “**ubhato sujāto**”ti ettake vutte yehi kehici dvīhi bhāgehi sujātata paññāpeyya, sujāta-saddo ca “sujāto cārudassano”tiādīsu (ma. ni. 2.399; su. ni. 553; theragā. 818) ārohasampattipariyāyoti jātivāsena sujātataṃ vibhāvetuṃ “**mātito ca pitito cā**”ti vuttaṃ. Anorasaputtavasenapi loke mātupitusamaññā dissati, idha pana sā orasaputtavasena icchitāti dassetuṃ “**saṃsuddhaggahaṇiko**”ti vuttaṃ. Gabbhaṃ gaṇhāti dhāretīti **gahaṇī**, gabbhāsayaśaṇṇito mātukucchippadeso. Tenāha “**saṃsuddhāya mātukucchiyā samannāgato**”ti. Yathābhuttassa āhārassa vipācanavasena gaṇhanato ahaḍḍanato **gahaṇī**, tejjodhātu. Pitā ca mātā ca pitaro. Pitūnaṃ pitaro pitāmahā. Tesam yugo pitāmahayugo, tasmā **yāva sattamā pitāmahayugā**, pitāmahadvandāti evamettha attho daṭṭhabbo. Evañhi pitāmahaggahaṇeneva mātāmahopi gahitoti so aṭṭhakathāyaṃ visuṃ na uddhato. Yuga-saddo cettha ekasesanayena daṭṭhabbo “yugo ca yugo ca yugo”ti. Evañhi tattha tattha dvinnam gahitameva hoti. Tenāha “**tato uddham sabbepi pubbapurisā pitāmahaggahaṇeneva gahitā**”ti. Purisaggahaṇaṇcetta ukkaṭṭhaniddesavasena katanti daṭṭhabbam. Evañhi “mātito”ti pālīvacanaṃ samatthitaṃ hoti.

Akkhittoti appattakkhepo. **Anavakkhittoti** sampattavivādādīsu na avakkhitto na chaḍḍito. Jātivādenāti hetumhi karaṇavacananti dassetuṃ “**kena kāraṇenā**”tiādi vuttaṃ. Ettha ca “ubhato... pe... pitāmahayugā”ti etena khattiyassa yonidosābhāvo dassito saṃsuddhaggahaṇikabhāvakittanato. “Akkhitto”ti iminā kiriyāparādhābhāvo. Kiriyāparādhena hi sattā khepaṃ pāpuṇanti. “Anupakkuṭṭho”ti iminā ayuttasaṃsaggābhāvo. Ayuttasaṃsaggāhi paṭicca sattā akkosam labhanti.

Aḍḍhatā nāma vibhavasampannatā, sā taṃ taṃ upādāyupādāya vuccatīti āha “**yo koci attano santakena vibhavana aḍḍho hoti**”ti. Tathā mahaddhanatāpīti taṃ ukkaṃsagataṃ dassetuṃ “**mahatā aparimāṇasaṅkhena dhanena samannāgato**”ti vuttaṃ. Bhuñjitabbato paribhuñjitabbato viśesato kāmā bhogā nāmāti āha “**pañcakāmaguṇavasena**”ti. Koṭṭham vuccati dhaññassa āvasanaṭṭhānaṃ, koṭṭhabhūtaṃ agāraṃ **koṭṭhāgāraṃ**. Tenāha “**dhaññena ca paripuṇṇakoṭṭhāgāro**”ti. Evaṃ sārāgabbham koso, dhaññapariṭṭhapanatṭhānaṇca koṭṭhāgāranti dassetvā idāni tato aññathā taṃ dassetuṃ “**atha vā**”tiādi vuttaṃ. Tattha yathā asino tikkhabhāvaparīhāraṃ koṭṭhāgāranti dassetvā idāni tato aññathā taṃ dassetuṃ “**atha vā**”tiādi vuttaṃ. Tattha yathā asino tikkhabhāvaparīhāraṃ katvā caturaṅginī senā kosoti āha “**catubbidho koso hatthi assā rathā pattī**”ti. Vatthakoṭṭhāgārāggahaṇeneva sabbassapi bhaṇḍaṭṭhapanatṭhānaṇca gahitattā “**tividham koṭṭhāgāra**”nti vuttaṃ.

Yassā paññāya vasena puriso “paṇḍito”ti vuccati, taṃ paṇḍiccanti āha “**paṇḍiccena samannāgato**”ti. Taṃtaṃtikattabbatāsu chekabhāvo byattabhāvo **veyyattiyam**. Sammohaṃ himsati vidhamatīti medhā, sā etassa atthīti **medhāvī**. Ṭhāne ṭhāne uppatti etissā atthīti **ṭhānuppatti**, ṭhānaso uppajjanapaññā. **Vaḍḍhiattheti** vaḍḍhisankhāte atthe.

Yassaṃdisaṃsuttavaṇṇanā niṭṭhitā.

5-9. Patthanāsuttādivaṇṇanā

135-9. Pañcame **hatthisminti** hatthisippe. Hatthīti hi hatthivisayattā hatthisannissitattā ca hatthisippaṃ gahitaṃ. Sesapadesupi eseva nayo. Vayattīti vayo, sobhanesu katthaci apakkhalanto avitthāyanta tāni sandhāretuṃ sakkotīti attho. Na vayo avayo, tāni atthato saddato ca sandhāretuṃ na sakkoti. Avayo na hotīti **anavayo**. Dve paṭisedhā pakatiṃ gamentīti āha “**anavayoti samattho**”ti.

Chaṭṭhādīni uttānatthāneva.

Patthanāsuttādivaṇṇanā niṭṭhitā.

10. Sotasuttavaṇṇanā

140. Dasame **tibbānanti** tikkhānaṃ. **Kharānanti** kakkasānaṃ. **Kaṭukānanti** dāruṇānaṃ. **Asātānanti** nasātānaṃ appiyānaṃ. Na tāsū mano appeti, na tā manāṃ appāyanti vaḍḍhentīti **amanāpā**.

Sotasuttavaṇṇanā niṭṭhitā.

Rājavaggavaṇṇanā niṭṭhitā.

(15) 5. Tikaṇḍakāvaggo

1. Avajānātisuttavaṇṇanā

141. Pañcamassa paṭhame **datvā avajānāti**ti ettha eko bhikkhu mahāpuñño catupaccayalābhī hoti, so cīvarādīni labhivā aññaṃ appapuññaṃ āpucchati. Sopi tasmim punappunaṃ āpucchantepe gaṇhātiyeva. Athassa itaro thokaṃ kupito hutvā maṅkubhāvaṃ uppādetukāmo vadati “ayaṃ attano dhammatāya cīvarādīni na labhati, amhe nissāya labhati”ti. Evampi **datvā avajānāti** nāma. Eko pana ekena saddhim dve tīṇi vassāni vasanto pubbe taṃ puggalaṃ garuṃ katvā gacchante gacchante kāle cittikāraṃ na karoti, āsananisinnatthānampi na gacchati. Ayampi puggalo **saṃvāsena avajānāti** nāma. **Ādheyyamukhoti** ādito dheyyamukho, paṭhamavacanasmimyeva ṭhapitamukhoti attho. Tatthāyaṃ nayo – eko puggalo sārūppamyeva bhikkhuṃ “asārūppo eso”ti katheti. Taṃ sutvā esa niṭṭhaṃ gacchati, puna aññaena sabhāgena bhikkhunā “sārūppo aya”nti vuttepe tassa vacanaṃ na gaṇhāti. Asukena nāma “asārūppo aya”nti amhākaṃ kathitanti purimabhikkhunova kathaṃ gaṇhāti. Aparopissa dussīlaṃ “sīlavā”ti katheti. Tassa vacanaṃ saddahitvā puna aññaena “asārūppo eso bhikkhu, nāyaṃ tumhākaṃ santikaṃ upasaṅkamituṃ yutto”ti vuttepe tassa vacanaṃ aggahetvā purimaṃyeva kathaṃ gaṇhāti. Aparo vaṇṇampi kathitaṃ gaṇhāti, avaṇṇampi kathitaṃ gaṇhātiyeva. Ayampi **ādheyyamukhoyeva** nāma ādhātābbamukho, yaṃ yaṃ suṇāti, tattha tattha ṭhapitamukhoti attho.

Loloti saddhādīnaṃ ittarakālappatitattā assaddhiyādīhi lulitabhāvena lolo. **Ittarabhattīti**ādīsū punappunaṃ bhajanena saddhāva bhattipemaṃ. Saddhāpemaṃ gehassitapemaṃ vaṭṭati, pasādo saddhāpasādo. **Evam puggalo lolo hotīti** evaṃ ittarasaddhādītāya puggalo lolo nāma hoti. Haliddirāgo viya, thusarāsīmhi koṭṭitakhānuko viya, assapiṭṭhiyaṃ ṭhapitakumbhaṇḍaṃ viya ca anibaddhatthāne muhuttana kuppāti. **Mando momūhoti** aññaṇabhāvena mando, avisayatāya momūho, mahāmūlhoti attho.

Avajānātisuttavaṇṇanā niṭṭhitā.

2-3. Ārabhatīsuttādivaṇṇanā

142-3. Dutiye **ārabhatīti** ettha **ārambha**-saddo kammakiriyaḥṣanavīriyakopanāpattivītikamesu vattati. Tathā hesa “yaṃ kiñci dukkhaṃ sambhoti, sabbaṃ ārambhapaccayā”ti (su. ni. 749) kamme āgato. “Mahārambhā mahāyañña, na te honti mahapphalā”ti (saṃ. ni. 1.120; a. ni. 4.39) kiriyāya. “Samaṇaṃ gotamaṃ uddissa pānaṃ ārabhanti”ti (ma. ni. 2.51) ḥṣane. “Ārambhatha nikkhamatha, yuñjatha buddhasāsane”ti (saṃ. ni. 1.185; netti. 29; peṭako. 38; mi. pa. 5.1.4) vīriye. “Bījagāmahūtagāmasamārambhā paṭivirato hotī”ti (dī. ni. 1.10, 195; ma. ni. 1.293) kopane. “Ārabhati ca vippaṭisārī ca hotī”ti (a. ni. 5.142; pu. pa. 191) ayaṃ pana āpattivītikame āgato, tasmā

āpattivītikamavasena ārabhati ceva, tappaccayā ca vippaṭisārī hotīti ayamettha attho.

Yathābhūtaṃ nappajānāti anadhigatattā yathāsabhāvato na jānāti. **Yatthassāti** yasmim̐ assa, yaṃ ṭhānaṃ patvā etassa puggalassa uppannā pāpakā akusalā dhammā aparisesā nirujjhantīti attho. Kiṃ pana patvā te nirujjhantīti? Arahattamaggaṃ, phalappattassa pana niruddhā nāma hontī. Evaṃ santepi idha maggakiccavasena pana phalameva vuttanti veditabbaṃ.

Ārabhatī na vippaṭisārī hotīti āpattiṃ āpajjati, taṃ panesa desetumaṃ sabhāgapuggalaṃ pariyesati, tasmā na vippaṭisārī hotī. **Na ārabhati vippaṭisārī hotīti** āpattiṃ na āpajjati, vinayapaññattiyam̐ pana akovidattā anāpattiyā āpattisaññī hutvā vippaṭisārī hotīti evamettha attho daṭṭhabbo. “**Na ārabhati na vippaṭisārī hotī**”ti yo vutto, kataro so puggalo? Ossaṭṭhavīriyapuggalo. So hi “kiṃ me imasmim̐ kāle parinibbānena, anāgate metteyyasammāsambuddhakāle parinibbāyissāmī”ti visuddhasīlopi paṭipattiṃ na pūreti. So hi “kimatthaṃ āyasmā pamatto viharati, puthujjanassa nāma gati anibaddhā, tasmā hi metteyyasammāsambuddhassa sammukhībhāvaṃ labheyyāsī, arahattatthāya vipassanaṃ bhāvehi”ti ovaditabbova.

Sādhūti āyācanatthe nipāto. Iduṃ vuttaṃ hoti – yāva aparaddhaṃ vata āyasmātā, evaṃ santepi mayaṃ āyasmantaṃ yācāma, desetabbayuttakassa desanāya, vuṭṭhātabbayuttakassa vuṭṭhānena, āvikātabbayuttakassa āvikiriyāya ārambhaje āsave pahāya suddhante ṭhitabhāvapaccavekkhaṇena vippaṭisārāje āsave paṭivinodetvā nīharitvā vipassanācittañceva vipassanāpaññaṇca vaḍḍhetūti. **Amunā pañcamena puggalenāti** etena pañcamena khīṇāsavapuggalena. **Samasamo bhavissatīti** lokuttaragūṇehi samabhāveneva samo bhavissatīti evaṃ khīṇāsavena ovaditabboti attho. Tatiyaṃ uttānameva.

Ārabhatisuttādivaṇṇanā niṭṭhitā.

4-6. Tikaṇḍakīsuttādivaṇṇanā

144-6. Catutthe **paṭikūleti** amanuññe aniṭṭhe. **Appaṭikūlasaññīti** iṭṭhākāreneva pavattacitto. **Iṭṭhasmim̐ vatthusmim̐ asubhāya vā pharati, aniccato vā upasaṃharati** upaneti pavatteti. **Aniṭṭhasmim̐ vatthusminti** aniṭṭhe sattasaññīte ārammaṇe. **Mettāya vā pharatīti** mettaṃ hitesitaṃ upasaṃharanto sabbatthakameva vā tattha pharati. **Dhātuto vā upasaṃharatīti** dhammasabhāvacinanena dhātuto paccavekkhaṇāya dhātumanasikāraṃ vā tattha pavatteti. **Tadubhayaṃ abhinivajjetvāti** sabhāvato ānubhāvato ca upatiṭṭhantaṃ ārammaṇe paṭikūlabhāvaṃ appaṭikūlabhāvañcāti taṃ ubhayaṃ pahāya aggahetvā, sabbasmim̐ pana tasmim̐ majjhatto hutvāti vuttaṃ hoti. Majjhatto hutvā viharitukāmo pana kiṃ karotīti? Iṭṭhāniṭṭhesu āpāthaṃ gatesu neva somanassito hoti, na domanassito hoti. **Upekkhako vihareyyāti** iṭṭhe arajjanto aniṭṭhe adussanto yathā aññe asamapekkhanena moham̐ uppādentī, evaṃ anuppādento chasu ārammaṇesu chaḷaṅgupekkhāya upekkhako vihareyya. Tenevāha “**chaḷaṅgupekkhāvasena pañcamo**”ti. Iṭṭhāniṭṭhachaḷārammaṇāpāthe parisuddhapakatibhāvāvijahanalakkaṇāya chasu dvāresu pavattanato “**chaḷaṅgupekkhā**”ti laddhanāmāya tatramajjhātupekkhāya vasena pañcamo vāro vuttoti attho. Pañcamaṃ chaṭṭhaṇca uttānameva.

Tikaṇḍakīsuttādivaṇṇanā niṭṭhitā.

7-10. Asappurisadānasuttādivaṇṇanā

147-150. Sattame **asakkaccanti** anādaraṃ katvā. Deyyadhammassa asakkaccakaraṇaṃ nāma asampannaṃ karotīti āha “**na sakkaritvā sucim̐ katvā detī**”ti, uttaṇḍulādidosavirahitaṃ sucisampannaṃ katvā na detīti attho. **Acittikatvāti** na citte katvā, na pūjetvāti attho. Pūjento hi pūjetabbavatthum̐ citte ṭhapeti, na tato bahi karoti. Cittaṃ vā acchariyaṃ katvā paṭipattivikaraṇaṃ sambhāvanakiriyā, tappaṭikkhepato **acittikaraṇaṃ** asambhāvanakiriyā. **Agāravena detīti** puggale

agaruṃ karonto nisīdanaṭṭhāne asammajjitvā yattha vā tattha vā nisīdāpetvā yaṃ vā taṃ vā ādhāraṃ ṭhapetvā dānaṃ deti. **Asahatthā**ti na attano hatthena deti, dāsakammakarodīhi dāpeti. **Apaviddhaṃ deti**ti antarā apaviddhaṃ vicchedaṃ katvā deti. Tenāha “**na nirantaraṃ deti**”ti. Atha vā **apaviddhaṃ deti**ti ucchiṭṭhādichaḍḍaniyadhammaṃ viya avakkhittakaṃ katvā deti. Tenāha “**chaḍḍetukāmo viya deti**”ti. “Addhā imassa dānassa phalameva āgacchatī”ti evaṃ yassa kammassakatādiṭṭhi atthi, so āgamanadiṭṭhiko, ayaṃ pana na tādisoti **anāgamanadiṭṭhiko**. Tenāha “**katassa nāma phalaṃ āgamissati**”tiādi. Aṭṭhamādīsu natthi vattabbaṃ.

Asappurisadānasuttādivaṇṇanā niṭṭhitā.

Tikaṇḍakīvaggavaṇṇanā niṭṭhitā.

Tatīyapaṇṇāsakaṃ niṭṭhitaṃ.

4. Catutthapaṇṇāsakaṃ

(16) 1. Saddhammavaggo

151-160. Paṭhamo vaggo uttānatthoyeva.

(17) 2. Āghātavaggo

1-5. Paṭhamaāghātapaṭivīnayasuttādivaṇṇanā

161-165. Dutiyaṃ paṭhame natthi vattabbaṃ. Dutiye āghāto paṭivīnayaṭi ettha, etehīti vā **āghātapaṭivīnaya**. Tenāha “**āghāto etehi paṭivīnetabbo**”tiādi.

Nantakanti anantakaṃ, antavirahitaṃ vatthakhaṇḍaṃ. Yadi hi tassa anto bhavyeṃ, “**pilotikā**”ti saṅkhaṃ na gaccheṃ.

Sevālenāti bījakaṇṇikakesarādibhedena sevālena. **Udakapappaṭakenā**ti nīlamaṇḍūkapiṭṭhivaṇṇena udakapiṭṭhiṃ chādetvā nibbattena udakapiṭṭhikena. **Ghammena anugato**ti ghammena phuṭṭho abhibhūto. **Cittuppādanti** paṭighasampayuttacittuppādaṃ.

Visabhāgavedanuppattiyā kakaceneva iriyāpathapavattinivāraṇena chindanto ābādhati pīletīti ābādho, so assa atthīti **ābādhi**ko. Taṃsamutṭhānena **dukkhito** sañjātadukkho. **Bāḥagilānoti** adhimattagilāno. **Gāmantaṇāyakassā**ti gāmantasampāpakassa.

Pasannabhāvena udakassa acchabhāvo veditabboti āha “**acchodakāti pasannodakā**”ti. Sādurasatāya sātātāti āha “**madhurodakā**”ti. Tanukameva salilaṃ viṣesato sītalaṃ, na bahalāti āha “**tanusītasalilā**”ti. **Setakā**ti nikkaddamā. Sacikkhallādivasena hi udakassa vivaṇṇatā. Sabhāvato pana taṃ setavaṇṇameva. Tatīyādīni uttānatthāneva.

Paṭhamaāghātapaṭivīnayasuttādivaṇṇanā niṭṭhitā.

6. Nirodhasuttavaṇṇanā

166. Chaṭṭhe **amarisanattheti** asahanatthe. **Anāgatavacaṇaṃ katanti** anāgatasaddappayogo kato, attho pana vattamānakālikova. Akkharacintakā (pāṇini. 3.3.145-146) hi īdisesu ṭhānesu

anokappanāmarisanatthavasena atthisadde upapade vattamānakālepi anāgatavacanam karonti.

Nirodhasuttavaṇṇanā niṭṭhitā.

7-9. Codanāsuttādivaṇṇanā

167-9. Sattame **vatthusandassanā**ti yasmim vatthusmim āpatti, tassa sarūpato dassanam. **Āpattisandassanā**ti yaṃ āpattiṃ so āpanno, tassā dassanam. **Samvāsappaṭikkhepoti** uposathappavāraṇādisamvāsassa paṭikkhipanam akaraṇam. **Sāmīcippaṭikkhepoti** abhivādanādisāmīcikiriya akaraṇam. **Codayamānenā**ti codentena. **Cuditakassa kāloti** cuditakassa codetabbakālo. **Puggalanti** codetabbapuggalam. **Upaparikkhitvāti** “ayaṃ cuditakalakkhaṇe tiṭṭhati, na tiṭṭhati”ti vīmaṃsitvā. **Ayasaṃ āropeṭīti** “ime maṃ abhūtena abbhācikkhantā ayasaṃ byasanaṃ uppādentī”ti bhikkhūnam ayasaṃ uppādeti. Aṭṭhamanavamāni uttānatthāneva.

Codanāsuttādivaṇṇanā niṭṭhitā.

10. Bhaddajisuttavaṇṇanā

170. Dasame **abhibhavitvā ṭhito** ime satteti adhippāyo. Yasmā pana so “pāsaṃsabhāvena uttamabhāvena ca te satte abhibhavitvā ṭhito”ti attānam maññati, tasmā vuttaṃ “**jeṭṭhako**”ti. **Aññadatthu dasoti** dassane antarāyābhāvavacanena ñeyyavisesapariggāhikabhāvena ca anāvaraṇadassāvitaṃ paṭijānātīti āha “**sabbaṃ passatīti adhippāyo**”ti.

Bhaddajisuttavaṇṇanā niṭṭhitā.

Āghātavaggaṇṇanā niṭṭhitā.

(18) 3. Upāsakavaggo

1-6. Sārajjasuttādivaṇṇanā

171-176. Tatiyassa paṭhamadutiyatatiyacatutthe natthi vattabbaṃ. Pañcame **upāsakapacchimakoti** upāsakanihīno. “Iminā diṭṭhādīnā idaṃ nāma maṅgalaṃ bhavissatī”ti evaṃ bālajanaparikkappitakotūhalasaṅkhātena diṭṭhasutamutamaṅgalena samannāgato **kotūhalamaṅgaliko**. Tenāha “**iminā idaṃ bhavissatī**”tiādi. **Maṅgalaṃ paccetīti** diṭṭhamaṅgalādibhedam maṅgalameva patthiyāyati. **No kammanti** kammassakataṃ no patthiyāyati. **Imamhā sāsana**ti ito sabbaññubuddhasāsanaṃ. **Bahiddhāti** bāhirakasamaye. **Dakkhiṇeyyaṃ pariyesatīti** “duppaṭipannā dakkhiṇeyyā”ti saññī gavesati. Ettha dakkhiṇapariyesanapubbakāre ekaṃ katvā pañca dhammā veditabbā. Chaṭṭhaṃ uttānameva.

Sārajjasuttādivaṇṇanā niṭṭhitā.

7-8. Vaṇijjāsuttādivaṇṇanā

177-8. Sattame **satthavaṇijjāti** āvudhabhaṇḍam katvā vā kāretvā vā kataṃ vā paṭilabhitvā tassa vikkayo. **Āvudhabhaṇḍam kāretvā tassa vikkayoti** idaṃ pana nidassanamattaṃ. **Sūkaramigādayo posetvā tesam vikkayoti** sūkaramigādayo posetvā tesam maṃsaṃ sampādetvā vikkayo. Ettha ca satthavaṇijjā paroparādhānimittatāya akaraṇīyā vuttā, sattavaṇijjā abhujissabhāvakaraṇato, maṃsavisavaṇijjā vadhaḥetuto, majjjavaṇijjā pamādatṭhānato. Aṭṭhamam uttānameva.

Vañijjāsuttādivaṇṇanā niṭṭhitā.

9. Gihisuttavaṇṇanā

179. Navame **ābhicetasikānanti abhicetoti** abhikkantaṃ visuddhacittaṃ vuccati adhicittaṃ vā, abhicetasi jātāni ābhicetasikāni, abhiceto sannissitānīti vā ābhicetasikāni. Tenevāha “**uttamacittanissitāna**”nti. **Diṭṭhadhammasukhavihārānanti** diṭṭhadhamme sukhavihārānaṃ. **Diṭṭhadhammoti** paccakkho attabhāvo vuccati, tatha sukhavihārānanti attho. Rūpāvacarajjhānānametaṃ adhivacanaṃ. Tāni hi appetvā nisinnā jhāyino imasmimyeva attabhāve asaṃkiliṭṭhaṃ nekkhammasukhaṃ vindanti, tasmā “**diṭṭhadhammasukhavihārānī**”ti vuccanti.

Catubbidhamerayanti pupphāsavo, phalāsavo, gulāsavo, madhvāsavoti evaṃ catuppabhedam merayaṃ. **Pañcavidhañca suranti** pūvasurā, piṭṭhasurā, odanasurā, kiṇṇapakkhittā, sambhārasaṃyuttāti evaṃ pañcappabhedam suraṃ. Puññaṃ attho etassāti **puññaṭtho**. Yasmā panesa puññaṃ atthiko nāma hoti, tasmā vuttaṃ “**puññaṃ atthikassā**”ti. Sesamettha uttānameva.

Gihisuttavaṇṇanā niṭṭhitā.

10. Gavesīsuttavaṇṇanā

180. Dasame **sukāraṇanti** bodhipariṇāpanassa ekantikaṃ sundaraṃ kāraṇaṃ. **Mandahasitanti** īsakaṃ hasitaṃ. **Kahaṃ kahanti** hāsasaddassa anukaraṇametaṃ. **Haṭṭhappahaṭṭhākāramattanti** haṭṭhassa pahaṭṭhākāramattaṃ. Yathā gahitasāṅketā “**pahaṭṭho bhagavā**”ti sañjānanti, evaṃ ākāranidassanamattaṃ.

Idāni iminā pasaṅgena hāsasamuṭṭhānaṃ vibhāgato dassetuṃ “**hasitañca nāmeta**”ntiādi āradhāṃ. Tattha ajjuhekkhanavaseṇaṃ hāso na sambhavati, pageva domanassavaseṇāti āha “**terasahi somanassasahagatacittēhi**”ti. Nanu ca keci kodhavaseneṇaṃ hasantīti? Na, te sampiyanti kodhavatthum tattha “**mayam dāni yathākāmakāritaṃ āpajjissāmā**”ti duviññeyyantarena somanassacitteneva hāsassa uppajjanato. **Tesūti** pañcasu somanassasahagatakiriyaṃcittesu. **Balavārammaṇeti** uḷāratame ārammaṇe yamakapāṭihāriyasādise. **Dubbālārammaṇeti** anuḷāraārammaṇe.

“**Imasmim pana thāne...pe... uppādeti**”ti idaṃ porāṇaṭṭhakathāyaṃ tathā āgatattā vuttaṃ, na sahetukasomanassasahagatacittēhi bhagavato sitaṃ na hotīti dassanattaṃ. **Abhidhammaṭṭhākāyaṃ** (dha. sa. mūlaṭī. 968) pana “**atītaṃsādīsū appaṭṭhataṃ nānaṃ vatvā ‘imehi dhammehi samannāgatassa buddhassa bhagavato sabbam kāyakammaṃ nānapubbaṅgamaṃ nānānuparivatti’**tiādivacanaṃ (mahāni. 156; paṭī. ma. 3.5) ‘bhagavato idaṃ cittaṃ uppajjati’ti vuttavacanaṃ vicāretabba’nti vuttaṃ. Tattha iminā hasituppādacittena pavattiyamānampi bhagavato sitakaraṇaṃ pubbenivāsaṇāgatamaṃsabbāññutaññānaṃ anuvattakattā nānānuparivattiyevāti evaṃ pana nānānuparivattibhāve sati na koci pāḷiṭṭhakathānaṃ virodho. Tathā hi **abhidhammaṭṭhākathāyaṃ** (dha. sa. aṭṭha. 568) “**tesam nānaṃ ciṇṇapariyante idaṃ cittaṃ uppajjati**”ti vuttaṃ. Avassañcetam evaṃ icchitabbaṃ, aññathā āvajjanacittassapi bhagavato tathārūpe kāle na yujjeyya. Tassapi hi viññattisamuṭṭhāpakabhāvassa nicchitattā. Tathā hi vuttaṃ “**evañca katvā manodvārāvajjanassapi viññattisamuṭṭhāpakattaṃ upapannaṃ hoti**”ti (dha. sa. mūlaṭī. 1 kāyakammadvārakathāvaṇṇanā) na ca viññattisamuṭṭhāpakatte taṃsamuttānākāyaviññattiyā kāyakammādhivāsaṃ āpajjanabhāvo vissajjati.

Hasitanti sitameva sandhāya vadati. Tenāha “**evaṃ appamattakampī**”ti. **Samosaritā vijjulātā**. Sā hi itaravijjulātā viya khaṇaṭṭhitiyā sīghanirodhā ca na hoti, apica kho dandhanirodhā, na ca sabbakālīkā. Dīdhiti pāvakaṃmahāmeghato vā cātuddīpikamahāmeghato vā niccharati. Tenāha “**cātuddīpikamahāmeghamukhato**”ti. Ayaṃ kira tāsaṃ rasmīnaṃ dhammatā, yadidaṃ tikkhattum sīsaṃ padakkhiṇaṃ katvā **dāṭhaggesuyeva antaradhānaṃ**. Sesamettha suviññeyyameva.

Gavesīsuttavaṇṇanā niṭṭhitā.

Upāsakavaggavaṇṇanā niṭṭhitā.

(19) 4. Araññavaggo

1. Āraññikasuttavaṇṇanā

181. Catutthassa paṭhame **appicchatamyeva nissāyāti**ādīsu “iti appiccho bhavissāmī”ti idaṃ me āraññikaṅgaṃ appicchatāya saṃvattissati, “iti santuṭṭho bhavissāmī”ti idaṃ me āraññikaṅgaṃ santuṭṭhiyā saṃvattissati, “iti kilese sallikhissāmī”ti idaṃ me āraññikaṅgaṃ kilesasallikhanatthāya saṃvattissatīti āraññiko hoti. **Aggoti** jeṭṭhako. Sesāni tasseva vevacanāni.

Gavā khīranti gāvito khīraṃ nāma hoti, na gāvīyā dadhi. **Khīramhā dadhīti**ādīsipi eseva nayo. **Evamevanti** yathā etesu pañcasu gorasesu sappimaṇḍo aggo, evamevaṃ imesu pañcasu āraññikesu yo ayaṃ appicchatādīni nissāya āraññiko hoti, ayaṃ aggo ceva seṭṭho ca mokkho ca pavaro ca. Imesu āraññikesu jātiāraññikā veditabbā, na āraññikanāmamattena āraññikāti veditabbā. **Pamsukūlikā**ādīsipi eseva nayo.

Āraññikasuttavaṇṇanā niṭṭhitā.

Araññavaggavaṇṇanā niṭṭhitā.

(20) 5. Brāhmaṇavaggo

1. Soṇasuttavaṇṇanā

191. Pañcamassa paṭhame **sampiyenevāti** aññamaññapemeneva kāyena ca cittena ca missībhūtā saṅghaṭṭitā saṃsaṭṭhā hutvā saṃvāsaṃ vattenti, na appiyena niggahena vāti vuttaṃ hoti. Tenāha “**piya**”ntiādi. Udaraṃ avadīhati upacīnoti pūretīti **udarāvadehakaṃ**. Bhāvanapuṃsakañcetaṃ, udarāvadehakaṃ katvā udaraṃ pūretvāti attho. Tenāha “**udaraṃ avadīhitvā**”tiādi.

Soṇasuttavaṇṇanā niṭṭhitā.

2. Doṇabrāhmaṇasuttavaṇṇanā

192. Dutiye **pavattāro**ti (dī. ni. ṭī. 1.285) pāvacaṇabhāvena vattāro. Yasmā te tesam mantānaṃ pavattanakā, tasmā āha “**pavattayitāro**”ti. Sudde bahi katvā rahobhāsītabbaṭṭhena mantā eva taṃtaṃtaṃthappaṭipattīhetutāya **mantapadaṃ**. Anupanītāsādhāraṇatāya rahassabhāvena vattabbakiriyāya adhigamūpāyaṃ. **Sajjhāyanti** gāyanavasena sajjhāyitaṃ. Taṃ pana udattānudattādīnaṃ sarānaṃ sampadāvaseneva icchīnti āha “**sarasampattivasenā**”ti. **Aññesaṃ vuttanti** pāvacaṇabhāvena aññesaṃ vuttaṃ. **Samupabyūlhanti** saṅgahetvā uparūpari saññūlhaṃ. **Rāsikatanti** iruvedaya juvedasā mavedādivasena, tatthāpi paccekam mantabrahmādivasena, ajjhāyānuvākādivasena ca rāsikataṃ. **Tesanti** mantānaṃ kattūnaṃ. **Dibbena cakkhunā oloketvāti** dibbacakkhuparibhaṇḍena yathākammūpagañāṇena sattānaṃ kammassakatādīṃ, paccakkhato dassanaṭṭhena dibbacakkhusadisena pubbenivāsañāṇena atītakappe brāhmaṇaṃ mantajjhena vidhiṇca oloketvā. **Pāvacaṇena saha saṃsandetvāti** kassapasammāsambuddhassa yaṃ vacanaṃ vaṭṭasannissitaṃ, tena saha aviruddhaṃ katvā. Na hi tesam vivaṭṭasannissito attho paccakkho hoti. **Aparāpareti** aṭṭhakādīhi aparāpare pacchimā okkākarājakālādīsū uppannā. **Pakkhipitvāti** aṭṭhakādīhi ganthitamantapadesu kilesasannissitapadānaṃ

tattha tattha pade pakkhipanaṃ katvā. **Viruddhe akamṣūti brāhmaṇadhammikasuttādīsu** (su. ni. brāhmaṇadhammikasuttaṃ 286 ādayo) āgatanayena saṃkilesatthadīpanato paccanīkabhūte akamṣu.

Usūnaṃ asanakammaṃ issatthaṃ, dhanusippena jīvikā. Idha pana issatthaṃ viyāti **issatthaṃ**, sabbaāvudhajīvikāti āha “**yodhājīvakammenā**”ti, āvudhaṃ gahetvā upaṭṭhānakammenāti attho. **Rājaporisaṃ** nāma vinā āvudhena poroheccāmaccakammādirājakammaṃ katvā rājupatṭhānaṃ. **Sippaññatarenāti** gahitāvasesena hatthiassasippadinā. Kumārabhāvato pabhuti caraṇena **komārabrahmacariyaṃ**.

Udakaṃ pātetvā dentīti dvāre ṭhitasseva brāhmaṇassa hatthe udakaṃ āsiñcantā “idaṃ te, brāhmaṇa, bhariyaṃ posāpanatthāya demā”ti vatvā denti. Kasmā pana te evaṃ brahmacariyaṃ caritvāpi dāraṃ pariyesanti, na yāvajīvaṃ brahmacārino hontīti? Micchādīṭṭhivasena. Tesañhī evaṃ dīṭṭhi hoti “yo puttaṃ na uppādeti, so kulavaṃsacchedakaro hoti, tato niraye paccatī”ti. Cattāro kira abhāyitabbaṃ bhāyanti gaṇḍuppādako, kīkī, kontinī, brāhmaṇoti. Gaṇḍuppādā kira mahāpathaviyā khayanaḥayena mattabhojanā honti, na bahuṃ mattikaṃ khādanti. Kīkī sakuṇikā ākāsapatanabhayaena aṇḍassa upari uttānā seti. Kontinī sakuṇī pathavīkampanabhayaena pādehi bhūmiṃ na suṭṭhu akkamati. Brāhmaṇā kulavaṃsūpacchedabhayaena dāraṃ pariyesanti. Āhu cettha –

“Gaṇḍuppādo kīkī ceva, kontī brāhmaṇadhammiko;
Ete abhayaṃ bhāyanti, sammūlhā caturo janā”ti. (su. ni. aṭṭha. 2.293);

Sesamettha uttānameva.

Doṇabrāhmaṇasuttavaṇṇanā niṭṭhitā.

3. Saṅgāravasuttavaṇṇanā

193. Tatiye (saṃ. ni. ṭī. 2.5.236) **paṭhamaññevāti** puretaraṃyeva, asajjhāyakatānaṃ mantānaṃ appaṭibhānaṃ pageva paṭhamaṃyeva siddhaṃ, tattha vattabbameva natthīti adhippāyo. Pariyuṭṭhānaṃ nāma abhibhavo gahaṇanti āha “**kāmarāgapariyuṭṭhitenāti kāmarāgaggahitenā**”ti. Vikkhambheti apānetīti vikkhambhanaṃ, paṭipakkhato nissarati etenāti nissaraṇaṃ. Vikkhambhanañca taṃ nissaraṇaṃcāti **vikkhambhananissaraṇaṃ**. Tenāha “**tatthā**”tiādi. Sesapadadvayepi eseva nayo. Attanā araṇīyo pattabbo attho **attattho**. Tathā **parattho** veditabbo.

“Aniccato anupassanto nīccasaññaṃ pajahatī”tiādīsu (paṭi. ma. 1.52) byāpādādīnaṃ anāgatattā byāpādavāre tadanāganissaraṇaṃ na gahitaṃ. Kiñcāpi na gahitaṃ, paṭisañkhānavasena tassa vinodetabbatāya tadanāganissaraṇampi labbhatevāti sakkā viññātuṃ. **Ālokasaññā** upacārappattā vā appanāppattā vā. Yo koci kasiṇajjhānādibhedo **samatho. Dhammavavatthānaṃ** upacārappanāppattavasena gahetabbaṃ.

Kudhitoti tatto. **Ussūrakajātoti** tasseva kudhitabhāvassa ussūrakaṃ accuṇhataṃ patto. Tenāha “**usumakajāto**”ti. **Tilabījakādibhedenāti** tilabījakaṇṇikakesarādibhedena sevālena. **Paṇakenāti** udakapicchillena. **Appasanno** ākulatāya. **Asannisinno** kalaluppattiyā. **Anālokatṭhāneti** ālokarahite ṭhāne.

Saṅgāravasuttavaṇṇanā niṭṭhitā.

4. Kāraṇapālīsuttavaṇṇanā

194. Catutthe **paṇḍito maññeti** ettha **maññeti** idaṃ “maññati”ti iminā samānatthaṃ nipātapadaṃ.

Tassa iti-saddam ānetvā attham dassento “**paṇḍitoti maññati**”ti āha. Anumatipucchāvasena cetam vuttam. Tenevāha “**udāhu no**”ti. “Tam kiṃ maññati bhavam piṅgiyānī samaṇassa gotamassa paññāveyyattiya”nti vuttamevattham puna gaṇhanto “paṇḍito maññe”ti āha, tasmā vuttam “**bhavam piṅgiyānī samaṇam gotamam paṇḍitoti maññati udāhu no**”ti, yathā te khameyya, tathā nam kathehīti adhippāyo. **Aham ko nāma**, mama avisayo esoti dasseti. **Ko cāti** hetunissakke paccattavacananti āha “**kuto cā**”ti. Tathā cāha “**kena kāraṇena jānissāmi**”ti, yena kāraṇena samaṇassa gotamassa paññāveyyattiyaṃ jāneyyaṃ, tam kāraṇam mayi natthīti adhippāyo. **Buddhoyeva bhaveyya** abuddhassa sabbathā buddhaññānubhāvaṃ jānituṃ asakkuṇeyyattāti. Vuttañhetam – “appamattakaṃ panetaṃ, bhikkhave, oramattakaṃ sīlamattakaṃ, yena puthujjano tathāgatassa vaṇṇam vadamāno vadeyya (dī. ni. 1.7). Atthi, bhikkhave, aññeva dhammā gambhīrā duddasā duranubodhā... pe... yehi tathāgatassa yathābhūtam vaṇṇam sammā vadamāno vadeyyā”ti (dī. ni. 1.28) ca. **Etthāti** “sopi nūnassa tādiso”ti etasmiṃ pade.

Pasatthappasatthoti pasatthehi pāsamsēhi attano guṇeheva so pasattho, na tassa kittinā, pasamsāsabhāveneva pāsamsoti attho. Tenāha “**sabbaguṇāna**”ntiādi. **Maṇiratananti** cakkavattino maṇiratanam.

Sadevake pāsamsānampi pāsamsoti dassetuṃ “**pasatthehi vā**”ti dutiyavikappo gahito. Araṇīyato attho, so eva vasatīti vasoti **atthavaso**. Tassa tassa payogassa ānisaṃsabhūtam phalanti āha “**atthavasanti atthānisaṃsa**”nti. Attho vā phalam tadadhīnavuttitāya vaso etassāti **atthavaso**, kāraṇam.

Khuddakamadhūti khuddakamakkhikāhi katadaṇḍakamadhu. **Aneḷakanti** niddosaṃ apagatamakkhikaṇḍakam.

Udāharīyati ubbegapītivasenāti **udānam**, tathā vā udāharaṇam **udānam**. Tenāha “**udāharam udāharī**”ti. Yathā pana tam vacanam udānanti vuccati, tam dassetuṃ “**yathā hī**”tiādi vuttam. Sesam suviññeyyameva.

Kāraṇapālīsuttavaṇṇanā niṭṭhitā.

5. Piṅgiyānīsuttavaṇṇanā

195. Pañcame **sabbasaṅgāhikanti** sarīragatassa ceva vatthālaṅkāragatassa cāti sabbassa nīlabhāvassa saṅgāhakavacanam. **Tassevāti** nīlādisabbasaṅgāhikavasena vuttaatthasseva. **Vibhāgadassananti** pabhedadassanam. Yathā te licchavirājāno apītādivaṇṇā eva keci keci vilepanavasena pītādivaṇṇā khāyimsu, evaṃ anīlādivaṇṇā eva keci vilepanavasena nīlādivaṇṇā khāyimsu. Te kira suvaṇṇavicittehi maṇiobhāsehi ekanīlā viya khāyanti.

Kokanadanti vā padumavisesanam yathā “kokāsaka”nti. Tam kira bahupattam vaṇṇasampannam ativiya sugandhañca hoti. Ayañhettha attho – yathā kokanadasaṅkhātam padumam pāto sūriyuggamanavelāya phullam vikaṣitam avītagandham siyā virocamaṇam, evaṃ sarīragandhena guṇagandhena ca sugandham, saradakāle antalikkhe ādiccamiva attano tejasā tapantam, aṅgehi niccharantajutitāya aṅgīrasam sambuddham passāti.

Piṅgiyānīsuttavaṇṇanā niṭṭhitā.

6. Mahāsupinasuttavaṇṇanā

196. Chaṭṭhe **dhātukkhobhakarapaṇḍāyā** nāma visabhāgabhesajjasenāsanāhārādipaccayo.

Atthakāmatāya vā anattakāmatāya vāti pasannā atthakāmatāya, kuddhā anattakāmatāya. **Atthāya vā anattāya vāti** sabhāvato bhavitabbāya atthāya vā anattāya vā. **Upasamharantīti** attano devānubhāvena upanenti. **Bodhisattamā viya puttapaṭilābhanimittanti** tadā kira pure puṇṇamāya sattamadivasato paṭṭhāya vīgatasurāpānaṃ mālāgandhādivibhūṭisampannaṃ nakkhattakīlaṃ anubhavamānā bodhisattamāta sattame divase pātova uṭṭhāya gandhodakena nahāyitvā sabbālānkārabhūsitā varabhōjanaṃ bhuñjitvā uposathaṅgāni adhiṭṭhāya sirigabbhaṃ pavisitvā sirisayane nipannā niddaṃ okkamamānā imaṃ supinaṃ addasa – cattāro kira naṃ mahārājāno sayaneneva saddhiṃ ukkhipitvā anotattadaḥaṃ netvā nahāpetvā dibbavatthaṃ nivāsetvā dibbagandhehi vilimpetvā dibbapupphāni piḷandhetvā tato avidūre rajatapabbato, tassa anto kanakavimānaṃ atthi, tasmīṃ pācīnato sīsaṃ katvā nipajjāpesuṃ. Atha bodhisatto setavaravāraṇo hutvā tato avidūre eko suvaṇṇapabbato, tattha caritvā tato oruyha rajatapabbataṃ āruhitvā kanakavimānaṃ pavisitvā mātaraṃ padakkhiṇaṃ katvā dakkhiṇapassaṃ phāletvā kucchiṃ pavīṭṭhasadiso ahoṣi. Imaṃ supinaṃ sandhāya etaṃ vuttaṃ “bodhisattamāta viya puttapaṭilābhanimitta”nti.

Kosalarājā viya soḷasa supineti –

“Usabhā rukkhā gāviyo gavā ca,
Asso kaṃso siṅgālī ca kumbho;
Pokkharāṇī ca apākacandanaṃ,
Lābūni sīdanti silāplavanti.

“Maṇḍūkiyo kaṇhasappe gilanti,
Kākaṃ suvaṇṇā parivārayanti;
Tasā vakā eḷakānaṃ bhayā hī”ti. (jā. 1.1.77) –

Ime soḷasa supine passanto kosalarājā viya.

1. Ekadivasam kira kosalamahārājā rattiṃ niddūpagato pacchimayāme soḷasa mahāsupine passi (jā. atṭha. 1.1.76 mahāsupinajātakavaṇṇanā). Tattha cattāro añjanavaṇṇā kāḷausabhā “yujjhissāmā”ti catūhi disāhi rājanānaṃ āgantvā “usabhayuddhaṃ passissāmā”ti mahājane sannipatite yujjhanākāraṃ dassetvā naditvā gajjitvā ayujjhivāva paṭikkantā. Imaṃ paṭhamaṃ supinaṃ addasa.

2. Khuddakā rukkhā ceva gacchā ca pathaviṃ bhinditvā vidatthimattampi ratanamattampi anuggantvāva pupphanti ceva phalanti ca. Imaṃ dutiyaṃ addasa.

3. Gāviyo tadahuḷātānaṃ vacchānaṃ khīraṃ pivantiyo addasa. Ayaṃ tatiyo supino.

4. Dhuravāhe ārohapariṇāhasampanne mahāgoṇe yugaparamparāya ayojetvā taruṇe godamme dhure yojente addasa. Te dhuraṃ vahituṃ asakkontā chaḍḍetvā aṭṭhaṃsu, sakaṭāni nappavattiṃsu. Ayaṃ catuttho supino.

5. Ekaṃ ubhatomukhaṃ assaṃ addasa. Tassa ubhosu passesu yavasam denti, so dvīhipi mukhehi khādanti. Ayaṃ pañcamaṃ supino.

6. Mahājano satasahassagghanikaṃ suvaṇṇapātiṃ sammajjitvā “idha passāvaṃ karohī”ti ekassa jarasiṅgālassa upanāmesi. Taṃ tattha passāvaṃ karontaṃ addasa. Ayaṃ chaṭṭho supino.

7. Eko puriso rajjuṃ vaṭṭetvā pādāmūle nikkhipati. Tena nisinnapīṭhassa heṭṭhā sayitā chātasiṅgālī tassa ajānantasseva taṃ khādanti. Imaṃ sattamaṃ supinaṃ addasa.

8. Rājadvāre bahūhi tucchakumbhehi parivāretvā ṭhapitaṃ ekaṃ mahantaṃ pūritakumbhaṃ

addasa. Cattāropi pana vaṇṇā catūhi disāhi catūhi anudisāhi ca ghaṭehi udakaṃ ānetvā pūritakumbhameva pūrenti, pūritaṃ pūritaṃ udakaṃ uttaritvā palāyati. Tepi punappunaṃ tattheva udakaṃ āsiñcanti, tucchakumbhe oloketāpi natthi. Ayaṃ aṭṭhamo supino.

9. Ekaṃ pañcapadumasañchannaṃ gambhīraṃ sabbatotitthaṃ pokkharaṇiṃ addasa. Samantato dvipadacatuppadā otarivā tattha pānīyaṃ pivanti. Tassa majjhe gambhīraṭṭhāne udakaṃ āvilaṃ, tīrappadese dvipadacatuppadānaṃ akkamaṇaṭṭhāne acchaṃ vippasannamanāvilaṃ. Ayaṃ navamo supino.

10. Ekissāyeva kumbhiyā paccamānaṃ odanaṃ apākaṃ addasa. “Apāka”nti vicāretvā vibhajitvā ṭhapitaṃ viya tīhākārehi paccamānaṃ ekasmiṃ passe atikilino hoti, ekasmiṃ uttaṇḍulo, ekasmiṃ supakkoti. Ayaṃ dasamo supino.

11. Satasahassagghanakaṃ candanasāraṃ pūtitakkena vikkiṇante addasa. Ayaṃ ekādasamo supino.

12. Tucchalābūni udake sīdantāni addasa. Ayaṃ dvādasamo supino.

13. Mahantamahantā kūṭāgārappamāṇā ghanasilā nāvā viya udake plavamānā addasa. Ayaṃ terasamo supino.

14. Khuddakamadhukapupphappamāṇā maṇḍūkiyo mahante kaṇhasappe vegena anubandhitvā uppalanāle viya chinditvā maṃsaṃ khādītva gilantiyo addasa. Ayaṃ cuddasamo supino.

15. Dasahi asaddhammehi samannāgataṃ gāmagocaraṃ kākaṃ kañcanaṇṇavaṇṇatāya “suvaṇṇā”ti laddhanāme suvaṇṇarājahaṃse parivārente addasa. Ayaṃ pannarasamo supino.

16. Pubbe dīpino eḷake khādanti. Te pana eḷake dīpino anubandhitvā muramurāti khādante addasa. Athaṅṅe tasā vakā eḷake dūratova disvā tasitā tāsappattā hutvā eḷakānaṃ bhayā palāyitvā gumbagahanāni pavisitvā nilīyimsu. Ayaṃ soḷasamo supino.

1. Tattha adhammikānaṃ rājūnaṃ, adhammikānañca manussānaṃ kāle loke viparivattamāne kusale osanne akusale ussanne lokassa parihānakāle devo na sammā vasissati, meghapādā pacchijjissanti, sassāni milāyissanti, dubbhikkhaṃ bhavissati, vassitukāmā viya catūhi disāhi meghā utṭhahitvā itthikāhi ātape patthaṭānaṃ vīhiādīnaṃ temanabhayena antopavesitakāle purisesu kudālapitake ādāya āḷibandhanatthāya nikkhantesu vassanākāraṃ dassetvā gajjitvā vijjulatā nicchāretvā usabhā viya ayujjhitvā avassitvāva palāyissanti. Ayaṃ paṭṭhamassa vipāko.

2. Lokassa parihānakāle manussānaṃ parittāyukakāle sattā tibbarāgā bhavissanti, asampattavayāva kumāriyo purisantaraṃ gantvā utuniyo ceva gabbhiniyo ca hutvā puttadhītāhi vaḍḍhissanti. Khuddakarukkhānaṃ pupphaṃ viya hi tāsāṃ utunibhāvo, phalaṃ viya ca puttadhītaro bhavissanti. Ayaṃ dutiyassa vipāko.

3. Manussānaṃ jeṭṭhāpacāyikakammassa naṭṭhakāle sattā mātāpitūsu vā sassusasuresu vā lajjam anupaṭṭhapetvā sayameva kuṭumbaṃ saṃvidahantāva ghāsacchādanamattampi mahallakānaṃ dātukāmā dassanti, adātukāmā na dassanti. Mahallakā anāthā hutvā asayaṃvasī dārake ārādhētva jīvissanti tadahujātānaṃ vacchakānaṃ khīraṃ pivantiyo mahāgāviyo viya. Ayaṃ tatiyassa vipāko.

4. Adhammikaṃ rājūnaṃ kāle adhammikaṃ rājāno paṇḍitānaṃ pavenikusalānaṃ kammanittharaṇasamatthānaṃ mahāmattānaṃ yasaṃ na dassanti, dhammasabhāyaṃ vinicchayaṭṭhānepi paṇḍite vohārusale mahallake amacce na ṭhapessanti, tabbiparītānaṃ pana taruṇataruṇānaṃ yasaṃ dassanti, tathārūpe eva ca vinicchayaṭṭhāne ṭhapessanti. Te rājakammāni ceva yuttāyuttañca ajānantā

neva taṃ yasaṃ ukkhipituṃ sakkhissanti, na rājakammāni nittharituṃ. Te asakkontā kammadhuraṃ chaḍḍessanti, mahallakāpi paṇḍitāmaccā yasaṃ alabhantā kiccāni nittharituṃ samatthāpi “kiṃ amhākaṃ etehi, mayaṃ bāhirakā jāta, abbhantarikā taruṇadārakā jānissanti”ti uppannāni kammāni na karissanti. Evaṃ sabbathāpi tesam rājūnaṃ hāniyeva bhavissati, dhuraṃ vahituṃ asamatthānaṃ vacchadammānaṃ dhure yojitakālo viya dūravāhānaṃca mahāgoṇānaṃ yugaparamparāya ayojitakālo viya bhavissati. Ayaṃ catutthassa vipāko.

5. Adhammikarājakāleyeva adhammikabālarājāno adhammike lolamanusse vinicchaye ṭhapessanti, te pāpapuññesu anādarā bālā sabhāyaṃ nisīditvā vinicchayaṃ dentā ubhinnampi atthapaccatthikānaṃ hatthato lañjaṃ gahetvā khādissanti asso viya dvīhi mukhehi yavasam. Ayaṃ pañcamassa vipāko.

6. Adhammikāyeva vijātirājāno jātisampannānaṃ kulaputtānaṃ āsaṅkāya yasaṃ na dassanti, akulīnānaṃyeva dassanti. Evaṃ mahākulāni duggatāni bhavissanti, lāmakakulāni issarāni. Te ca kulīnapurisā jīvituṃ asakkontā “ime nissāya jīvissāmā”ti akulīnānaṃ dhītarō dassanti, iti tāsam kuladhītānaṃ akulīnehi saddhiṃ samvāso jarasiṅgālassa suvaṇṇapātiyaṃ passāvakaṇasadiṣo bhavissati. Ayaṃ chaṭṭhassa vipāko.

7. Gacchante gacchante kāle itthiyo purisalolā surālolā alaṅkāralolā visikhālolā āmisalolā bhavissanti dussilā durācārā. Tā sāmikehi kasigorakkhādīni kammāni katvā kicchena kasirena sambhataṃ dhanam jārehi saddhiṃ suram pivantiyo mālagandhavilepanam dhārayamānā antogehe accāyikampi kiccaṃ anoloketvā gehaparikkhepassa uparibhāgenapi chiddaṭṭhānehipi jāre upadhārayamānā sve vapitabbayuttakaṃ bījampi koṭṭetvā yāgubhattakhajjakāni pacitvā khādamānā vilumpissanti heṭṭhāpīṭhake nipannachātasiṅgālī viya vaṭṭetvā vaṭṭetvā pādāmūle nikkhitarajjuṃ. Ayaṃ sattamassa vipāko.

8. Gacchante gacchante kāle loko parihāyissati, raṭṭham nirojam bhavissati, rājāno duggatā kapaṇā bhavissanti. Yo issaro bhavissati, tassa bhaṇḍāgāre sataśassamattā bhavissanti. Te evaṃduggatā sabbe jānapade attanova kammaṃ kāressanti, upaddutā manussā sake kammante chaḍḍetvā rājūnaṃyeva atthāya pubbaṇṇāparaṇṇāni vapantā rakkhantā lāyantā maddantā pavesentā ucchukkhetāni karontā yantāni vāhentā phāṇitādīni pacantā pupphārāme phalārāme ca karontā tattha tattha nipphannāni pubbaṇṇādīni āharitvā rañño koṭṭhāgārameva pūressanti. Attano gehesu tucchakoṭṭhe oloketāpi na bhavissanti, tucchakumbhe anoloketvā pūritakumbhapūraṇasadiṣameva bhavissati. Ayaṃ aṭṭhamassa vipāko.

9. Gacchante gacchante kāle rājāno adhammikā bhavissanti, chandādivasena agatiṃ gacchantā rajjam kāressanti, dhammena vinicchayaṃ nāma na dassanti lañjavittakā bhavissanti dhanalolā, raṭṭhavāsikesu tesam khantimettānuddayā nāma na bhavissanti, kakkhaḷā pharusā ucchuyante ucchubhaṇḍikā viya manusse pīlentā nānappakāram balim uppādetvā dhanam gaṇhissanti. Manussā balipīlitā kiñci dātuṃ asakkontā gāmanigamādayo chaḍḍetvā paccantaṃ gantvā vāsam kappessanti. Majjhimanapado suñño bhavissati, paccanto ghanavāso seyyathāpi pokkharāṇiyā majjhe udakam āvilaṃ pariyaṇṇe vippasannaṃ. Ayaṃ navamassa vipāko.

10. Gacchante gacchante kāle rājāno adhammikā bhavissanti, tesu adhammikesu rājayuttāpi brāhmaṇagahapatikāpi negamajānapadāpīti samaṇabrāhmaṇe upādāya sabbe manussā adhammikā bhavissanti. Tato tesam ārakkhadevatā, balipaṭṭiggāhikadevatā, rukkhadevatā, ākāsaṭṭhadevatāti evam devatāpi adhammikā bhavissanti. Adhammikarājūnaṃ rajje vātā visamā kharā vāyissanti, te ākāsaṭṭhakavimānāni kampessanti. Tesu kampitesu devatā kupitā devam vassituṃ na dassanti. Vassamānopi sakalaraṭṭhe ekappahāreṇeva na vassissati, vassamānopi sabbattha kasikkammaṃ vā vappakammaṃ vā upakāro hutvā na vassissati. Yathā ca raṭṭhe, evam janapadehi gāmehi ekataḷākasaṇṇepi ekappahāreṇa na vassissati, taḷākassa uparibhāge vassanto heṭṭhābhāge na vassissati, heṭṭhā vassanto upari na vassissati. Ekasmiṃ bhāge sassam ativassena vassissati, ekasmiṃ avassanena

milāyissati, ekasmiṃ sammā vassamāno sampādessati. Evaṃ ekassa rañño rajje vuttasassā vipāko. Tippakārā bhavissanti ekakumbhiyā odano viya. Ayaṃ dasamassa vipāko.

11. Gacchante gacchanteyeva kāle sāsane parihāyante paccayalolā alajjikā bahū bhikkhū bhavissanti. Te bhagavatā paccayaloluppaṃ nimmathetvā kathitadhammadesanaṃ cīvarādicatupaccayahetu paresaṃ desessanti. Paccayehi mucchitvā nittharaṇapakkhe ʘhitā nibbānābhikumhaṃ katvā desetupaṃ na sakkhissanti. Kevalaṃ “padabyañjanasampattiñceva madhurasaddaṇca sutvā mahagghāni cīvarādīni dassanti” iccevaṃ desessanti. Apare antaravīthicatukkarājadvārādīsu nisīditvā kahāpaṇaaddhakahāpaṇapādamāsakarūpādīnipi nissāya desessanti. Iti bhagavatā nibbānagghanakaṃ katvā desitaṃ dhammaṃ catupaccayatthāya ceva kahāpaṇādīatthāya ca vikkiṇitvā desetā satasahassagghanakaṃ candanasāraṃ pūtitakkena vikkiṇantā viya bhavissanti. Ayaṃ ekādasamassa vipāko.

12. Adhammikaṛājakāle loka viparivattanteyeva rājāno jātisampannānaṃ kulaputtānaṃ yasaṃ na dassanti, akulīnānaññeva dassanti. Te issarā bhavissanti, itarā daliddā. Rājasammukhepi rājadvārepi amaccasammukhepi vinicchayaṭṭhānēpi tucchalābusadisānaṃ akulīnānaṃyeva kathā osīditvā ʘhitā viya niccalā suppatiṭṭhitā bhavissati. Saṅghasannipātepi saṅghakammagaṇakammaṭṭhānesu ceva pattacīvarapariveṇādivinicchayaṭṭhānesu ca dussīlānaṃ pāpapuggalānaṃyeva kathā niyyānikā bhavissati, na lajjibhikkhūnanti evaṃ sabbatthāpi tucchalābūnaṃ sīdanakālo viya bhavissati. Ayaṃ dvādasamassa vipāko.

13. Tādiseyeva kāle adhammikaṛājāno akulīnānaṃ yasaṃ dassanti. Te issarā bhavissanti, kulīnā duggatā. Tesu na keci gāraṃ karissanti, itaresuyeva karissanti. Rājasammukhe vā amaccasammukhe vā vinicchayaṭṭhāne vā vinicchayakusalānaṃ ghanasilāsadisānaṃ kulaputtānaṃ kathā na ogāhitvā patiṭṭhahissati. Tesu kathentesu “kiṃ ime kathenti” ti itare parihāsameva karissanti. Bhikkhusannipātepi vuttappakāresu ʘhānesu neva pesale bhikkhū garukātabbe maññissanti, nāpi nesaṃ kathā pariyogāhitvā patiṭṭhahissati, silānaṃ plavanakālo viya bhavissati. Ayaṃ terasamassa vipāko.

14. Loka parihāyanteyeva manussā tibbarāgādijātikā kilesānuvattakā hutvā taruṇānaṃ attano bhariyānaṃ vase vattissanti. Gehe dāsakammakārādayopi gomahimsādayopi hiraññasuvaṇṇampi sabbāṃ tāsāṃyeva āyattaṃ bhavissati. “Asukaṃ hiraññasuvaṇṇaṃ vā paricchadādijātaṃ vā kaha” nti vutte “yattha vā tattha vā hotu, kiṃ tuyhiminā byāpārena, tvaṃ mayhaṃ ghare santaṃ vā asantaṃ vā jānitukāmo jāto” ti vatvā nānappakārehi akkositvā mukhasattīhi koṭṭetvā dāsaceṭake viya vase katvā attano issariyaṃ pavattessanti. Evaṃ madhukapupphappamāṇānaṃ maṇḍūkīnaṃ āsivise kaṇhasappe gilanakālo viya bhavissati. Ayaṃ cuddasamassa vipāko.

15. Dubbalaṛājakāle pana rājāno hatthisippādīsu akusalā yuddhesu avisāradā bhavissanti. Te attano rājādhipaccaṃ āsaṅkamānā samānajātikānaṃ kulaputtānaṃ issariyaṃ adatvā attano pādāmūlikanahāpanakappakādīnaṃ dassanti. Jātigottasampannā kulaputtā rājakule patiṭṭhaṃ alabhamānā jīvikaṃ kappetaṃ asamatthā hutvā issariye ʘhite jātigottahīne akulīne upaṭṭhahantā vicarissanti, suvaṇṇarājahaṃsehi kākassa parivāritakālo viya bhavissati. Ayaṃ pannarasamassa vipāko.

16. Adhammikaṛājakāleyeva ca akulīnāva rājavallabhā issarā bhavissanti, kulīnā apaññātā duggatā. Te rājānaṃ attano kathaṃ gāhāpetvā vinicchayaṭṭhānādīsu balavanto hutvā dubbalānaṃ pavēṇiāgatāni khattavatthādīni “amhākaṃ santakāni” ti abhiyuñjitvā te “na tumhākaṃ, amhāka” nti āgantvā vinicchayaṭṭhānādīsu vivadante vettalatādīhi paharāpetvā gīvāyaṃ gahetvā apakaḍḍhāpetvā “attano pamāṇaṃ na jānātha, amhehi saddhiṃ vivadatha, idāni vo paharāpetvā rañño kathetvā hatthapādacchedādīni kāressāmā” ti santajjessanti. Te tesāṃ bhayena attano santakāni vatthūni “tumhākaṃyeva tāni, gaṇhathā” ti niyyātetvā attano gehāni pavisitvā bhītā nipajjissanti. Pāpabhikkhūpi pesale bhikkhū yathārucci viheṭhessanti. Pesalā bhikkhū paṭisaraṇaṃ alabhamānā araññaṃ pavisitvā gahanatṭhānesu nilīyissanti. Evaṃ hīnajaṅghehi ceva pāpabhikkhūhi ca upaddutaṃ

jātimantakulaputtānañceva pesalabhikkhūnañca eḷakānaṃ bhayena tasavakānaṃ palāyanakālo viya bhavissati. Ayaṃ soḷasamassa vipāko. Evaṃ tassa tassa anattassa pubbanimittabhūte soḷasa mahāsupine passi. Tena vuttaṃ “kosalarājā viya soḷasa supine”ti. Ettha ca pubbanimittato attano atthānatthanimittam supinaṃ passanto attano kammānubhāvena passati. Kosalarājā viya lokassa atthānatthanimittam supinaṃ passanto pana sabbasattasādhāraṇakammānubhāvena passatīti veditabbaṃ.

Kuddhā hi devatāti mahānāgavihāre mahātherassa kuddhā devatā viya. Rohaṇe kira mahānāgavihāre mahāthero bhikkhusaṅghaṃ anapaloketvāva ekaṃ nāgarukkaṃ chindāpesi. Rukkhe adhivatthā devatā therassa kuddhā paṭhamameva naṃ saccasupinena palobhetvā pacchā “ito te sattadivasamatthake upaṭṭhāko rājā marissatī”ti supine ārocesi. Thero taṃ kathaṃ āharitvā rājorodhānaṃ ācikkhi. Tā ekappahāreneva mahāviraṃ viraviṃsu. Rājā “kiṃ eta”nti pucchi. Tā “evaṃ therena vutta”nti ārocayīṃsu. Rājā divasaṃ gaṇāpetvā sattāhe vītivate therassa hatthapāde chindāpesi. **Ekantaṃ saccameva hotīti** phalassa saccabhāvato vuttaṃ, dassanaṃ pana vipallatthameva. Teneva pahīnavipallāsā pubbanimittabhūtampi supinaṃ na passanti. Dvīhi tīhipi kāraṇehi kadāci supinaṃ passatīti āha “**samsaggabhedato**”ti. “Asekhā na passanti pahīnavipallāsattā”ti vacanato catunnampi kāraṇānaṃ vipallāsā eva mūlakāraṇanti daṭṭhabbaṃ.

Tanti supinakāle pavattaṃ bhavaṅgacittaṃ. **Rūpanimittādiārammaṇanti** kammakammanimittagatinimittato aññaṃ rūpanimittādiārammaṇaṃ na hoti. **Īdisānīti** paccakkhato anubhūtapubbaparikkappitarūpādiārammaṇāni ceva rāgādisampayuttāni ca. **Sabbohārikacittenti** pakaticittena.

Dvīhi antehi muttoti kusalākusalasaṅkhātehi dvīhi antehi mutto.

Āvajjanatadārammaṇakkhaṇeti idaṃ yāva tadārammaṇuppatti, tāva pavattacittavāraṃ sandhāya vuttaṃ. “Supineneva diṭṭhaṃ viya me, sutam viya meti kathanakāle pana abyākatoyeva āvajjanamattasseva uppajjanato”ti vadanti. Evaṃ vadantehi pañcadvāre dutiyamoghavāre viya manodvārepi āvajjanaṃ dvattikkhattuṃ uppajjitvā javanaṭṭhāne ṭhatvā bhavaṅgaṃ otaratīti adhippetanti daṭṭhabbaṃ ekacittakkhaṇikassa āvajjanassa uppattiyam “diṭṭhaṃ viya me, sutam viya me”ti kappanāya asambhavato. Ettha ca “supinantepi tadārammaṇavacanato paccuppannavasena atītivasena vā sabhāvadhammā supinante ārammaṇaṃ hontī”ti vadanti. “Yadipi supinante vibhūtaṃ hutvā upaṭṭhite rūpādivatthumhi tadārammaṇaṃ vuttaṃ, tathāpi supinante upaṭṭhitanimittassa parikkappavasena gahetabbatāya dubbalabhāvato dubbalavatthukattāti vutta”nti vadanti. Keci pana “karajakāyassa nirussāhasantabhāvappattito tannissitahadayavatthu na suppasannaṃ hoti, tato tannissitāpi cittappavatti na suppasannā asuppasannaṃ vattinissitadīpappabhā viya, tasmā **dubbalavatthukattāti** ettha dubbalahadayavatthukattā”ti atthaṃ vadanti. Vīmaṃsitvā yuttataraṃ gahetabbaṃ.

Supinantacetanāti manodvārikajavanavasena pavattā supinantacetanā. Supinañhi passanto manodvārikeneva javanena passati, na pañcadvārikena. Paṭibujjhanto ca manodvārikeneva paṭibujjhanti, na pañcadvārikena. Niddāyantassa hi mahāvaṭṭim jāletvā dīpe cakkhusamīpaṃ upanīte paṭhamam cakkhudvārikaṃ āvajjanaṃ bhavaṅgaṃ na āvaṭṭeti, manodvārikameva āvaṭṭeti. Atha javanaṃ javitvā bhavaṅgaṃ otarati. Dutiyavāre cakkhudvārikāāvajjanaṃ bhavaṅgaṃ āvaṭṭeti, tato cakkhuvīññānādīni javanapariyosānāni pavattanti, tadanantaraṃ bhavaṅgaṃ pavattati. Tatiyavāre manodvārikāāvajjanena bhavaṅge āvaṭṭite manodvārikajavanaṃ javati. Tena cittaṃ “kiṃ ayaṃ imasmiṃ ṭhāne āloko”ti jānāti. Tathā niddāyantassa kaṇṇasamīpe tūriyesu paggahitesu, ghānasamīpe sugandhesu vā duggandhesu vā pupphesu upanītesu, mukhe sappimhi vā phāṇite vā pakkhitte, piṭṭhiyaṃ pāṇinā pahāre dinne paṭhamam sotadvārikādīni āvajjanāni bhavaṅgaṃ na āvaṭṭenti, manodvārikameva āvaṭṭeti, atha javanaṃ javitvā bhavaṅgaṃ otarati. Dutiyavāre sotadvārikādīni āvajjanāni bhavaṅgaṃ āvaṭṭenti, tato sotaghānajivhākāyaviññānādīni javanapariyosānāni pavattanti, tadanantaraṃ bhavaṅgaṃ vattati. Tatiyavāre manodvārikāāvajjanena bhavaṅge āvaṭṭite manodvārikajavanaṃ javati, tena cittaṃ nātvā “kiṃ ayaṃ imasmiṃ ṭhāne saddo, saṅkhasaddo bherisaddo”ti vā “kiṃ ayaṃ imasmiṃ ṭhāne gandho, mūlagandho”ti vā “kiṃ idaṃ mayhaṃ mukhaṃ pakkhittaṃ, sappīti vā phāṇita”nti vā “kenamhi

piṭṭhiyaṃ paḥaṭo, atibaddho me paḥāro’’ti vā vattā hoti. Evaṃ manodvārikajavaneneva paṭibujjhati, na pañcadvārikena. Supinampi teneva passati, na pañcadvārikena. Sesamettha suviññeyyameva.

Mahāsupinasuttavaṇṇanā niṭṭhitā.

7. Vassasuttavaṇṇanā

197. Sattame **utusamuṭṭhānanti** vassike cattāro māse uppannaṃ. **Akālepīti** cittavesākhamāsesupi. Vassavalāhakadevaputtānañhi attano ratiyā kīḷitukāmatācicte uppanne akālepi devo vassati. Tatridaṃ vatthu – eko kira vassavalāhakadevaputto vākarakuṭakavāsikhīṇāsavattherassa santikaṃ gantvā vanditvā aṭṭhāsi. Thero “kosi tva’’nti pucchi. Ahaṃ, bhante, vassavalāhakadevaputtoti. Tumhākaṃ kira cittena devo vassatīti. Āma, bhanteti. Passitukāmā mayanti. Temissatha, bhanteti. Meghasīsaṃ vā gajjitaṃ vā na paññāyati, kathaṃ temissāmāti. Bhante, amhākaṃ cittena devo vassati, tumhe paṇṇasālaṃ pavisathāti. “Sādhu, devaputtā’’ti pāde dhovitvā paṇṇasālaṃ pāvisi. Devaputto tasmim pavisanteyeva ekaṃ gītaṃ gāyitvā hatthaṃ ukkhipi, samantā tiyojanaṭṭhānaṃ ekameghaṃ ahoṣi. Thero addhatinto paṇṇasālaṃ paviṭṭhoti.

Vassasuttavaṇṇanā niṭṭhitā.

8-9. Vācāsuttādivaṇṇanā

198-9. Aṭṭhame **aṅgehīti** kāraṇehi. Aṅgīyanti hetubhāvena ñāyantīti **aṅgāni**, kāraṇāni. Kāraṇatthe ca aṅga-saddo. **Pañcahīti** hetumhi nissakkavacanaṃ. **Samannāgatāti** samanuāgatā pavattā yuttā ca. **Vācāti** samullapana-vācā. Yā “vācā girā byappatho’’ti (dha. sa. 636) ca, “nelā kaṇṇasukhā’’ti (dī. ni. 1.9) ca āgacchati. Yā pana “vācāya ce kataṃ kamma’’nti (dha. sa. aṭṭha. 1 kāyakammadvāra) evaṃ viññatti ca, “yā catūhi vacīduccaritehi āraṭi...pe... ayaṃ vuccati sammāvācā’’ti (dha. sa. 299) evaṃ virati ca, “pharusavācā, bhikkhave, āsevita bhāvita bahulikatā nirayasamvattanikā hoti’’ti (a. ni. 8.40) evaṃ cetanā ca vācāti āgatā, na sā idha adhippetā. Kasmā? Abhāsitabbato. “Subhāsita hoti, no dubbhāsita’’ti hi vuttaṃ. **Subhāsitāti** suṭṭhu bhāsita. Tenassā atthāvahataṃ dīpeti. **Anavajjāti** rāgādiavajjarahitā. Imināssa kāraṇasuddhiṃ agatigamanādippavattadosābhāvañca dīpeti. Rāgadosādivimuttañhi yaṃ bhāsato anurodhavivajjanato agatigamaṇaṃ durasamussitamevāti. **Ananuvajjāti** anuvādavimuttā. Imināssa sabbākārasampattiṃ dīpeti. Sati hi sabbākārasampattiyaṃ ananuvajjatāti. **Viññūnanti** paṇḍitānaṃ. Tena nindāpasamāsasu bālā appamañāti dīpeti.

Imehi khotiādīni tāni aṅgāni paccakkhato dassento taṃ vācaṃ nigameti. Yañca aññe paṭiññādīhi avayavehi, nāmādīhi padehi, liṅgavacanavibhattikālakārasampattīhi ca samannāgataṃ musāvādādivācācampi subhāsītanti maññanti, taṃ paṭisedheti. Avayavādisamannāgatāpi hi tathārūpī vācā dubbhāsitāva hoti attano ca paresaṅca anatthāvahattā. Imehi pana pañcahaṅgehi samannāgatā sacepi milakkhubhāsāpariyāpannā ghaṭaceṭikāgītikapariyāpannāpi hoti, tathāpi subhāsitāva lokiyalokuttarahitasukhāvahattā. Tathā hi maggapasse sassaṃ rakkhantiyā sīhaḷaceṭikāya sīhaḷakeneva jātijarāmarāyuttaṃ gītikaṃ gāyantiyā saddaṃ sutvā maggaṃ gacchantā saṭṭhimattā vipassakabhikkhū arahattaṃ pāpuṇṇesu.

Tathā tisso nāma āradhāvipassako bhikkhu padumassarasaṃpāna gacchanto padumassare padumāni bhañjitvā –

“Pātova phullitakokanadaṃ,
Sūriyālokena bhijjīyate;
Evaṃ manussattaṃ gatā sattā,
Jarābhivegena maddīyanti’’ti. (saṃ. ni. aṭṭha. 1.1.213; su. ni. aṭṭha. 2.452
subhāsitasuttavaṇṇanā) –

Imaṃ gītiṃ gāyantiyā ceṭikāya sutvā arahattaṃ patto.

Buddhantarepi aññataro puriso sattahi puttehi saddhiṃ aṭvato āgama aññatarāya itthiyā musalena taṇḍule koṭṭentiya –

“Jarāya parimadditaṃ etaṃ, milātacammaṇissitaṃ;
Maraṇena bhijjati etaṃ, maccussa ghāsamāmiṣaṃ.

“Kimīnaṃ ālayaṃ etaṃ, nānākuṇapena pūritaṃ;
Asucibhājanaṃ etaṃ, tadalikkhandaṣaṃ ida”nti. (saṃ. ni. aṭṭha. 1.1.213; su. ni. aṭṭha. 2.452 subhāsitasuttavaṇṇanā) –

Imaṃ gītaṃ sutvā paccavekkhanto saha puttehi paccekabodhiṃ patto. Evaṃ imehi pañcahi aṅgehi samannāgatā vācā sacepi milakkhubhāsāya pariyāpannā ghaṭaceṭikāgītikapariyāpannā vācā hoti, tathāpi subhāsītāti veditabbā. Subhāsītā eva anavajjā ananuvajjā ca viññūnaṃ atthathikānaṃ kulaputtānaṃ atthappaṭisaraṇānaṃ, no byañjanappaṭisaraṇānanti. Navamaṃ uttānameva.

Vācāsuttādivaṇṇanā niṭṭhitā.

10. Nissāraṇīyasuttavaṇṇanā

200. Dasame nissarantīti nissaraṇīyāti vattabbe dīghaṃ katvā niddeso. Kattari hesa anīya-saddo yathā “niyyāniyā”ti. Tenāha “**nissaṭā**”ti. Kuto pana nissaṭā? Yathāsakaṃ paṭipakkhato. Nijjīvaṭṭhena dhātuyoti āha “**attasuññasabhāvā**”ti. Atthato pana dhammadhātumanoviññādhātuviseso. Tādisassa bhikkhuno kilesavasena kāmesu manasikāro natthīti āha “**vīmaṃsanattha**”nti, “nekkhammaniyataṃ idāni me cittaṃ, kiṃ nu kho kāmavitakkopi uppajjissati”ti vīmaṃsantassāti attho. **Pakkhandanaṃ** nāma anuppaveso. So pana tattha natthīti āha “**nappavisati**”ti. **Pasīdanaṃ** nāma abhiruci. **Santiṭṭhanaṃ** patiṭṭhānaṃ. **Vimuccanaṃ** adhimuccananti. Taṃ sabbaṃ paṭikkhipanto vadati “**pasādaṃ nāpajjati**”tiādi. Evaṃbhūtaṃ panassa cittaṃ tassa kathaṃ tiṭṭhatīti āha “**yathā**”tiādi.

Tanti paṭhamajjhānaṃ. **Assāti** bhikkhuno. **Cittaṃ pakkhandatīti** parikkammacittena saddhiṃ jhānacittaṃ ekattavasena ekajjhaṃ katvā vadati. **Gocare gatattāti** attano ārammaṇe eva pavattattā. **Ahānabhāgiyattāti** ṭhitibhāgiyattā. **Suṭṭhu vimuttanti** vikkhambhanavimuttiyā sammadeva vimuttaṃ. Cittassa ca kāyassa ca vihananato **vighāto**. Dukkhaṃ paridahanato **pariḷāho**. **Kāmavedanaṃ na vediyati** anuppajjanato. Nissaranti tatoti **nissaraṇaṃ**. Ke nissaranti? Kāmā. Evañca **kāmānanti** kattusāmivacanaṃ suṭṭhu yujjati. Yadaggena kāmā tato nissaṭāti vuccanti, tadaggena jhānampi kāmato nissaṭānti vattabbaṃ labhatīti vuttaṃ “**kāmehi nissaṭattā**”ti. Evaṃ vikkhambhanavasena kāmānissaraṇaṃ vatvā idāni samucchadavasena accantato nissaraṇaṃ dassetuṃ “**yo panā**”tiādi vuttaṃ. **Sesapadesūti** sesakoṭṭhāsesu.

Ayaṃ pana visesoti visesaṃ vadantena taṃ jhānaṃ pādakaṃ katvātiādikō avisesoti katvā dutiyatatiyavāresu sabbaso anāmaṭṭho, catutthavāre pana ayampi visesoti dassetuṃ “**accantanissaraṇaṇcetta arahattaphalaṃ yojetabba**”nti vuttaṃ. Yasmā arūpajjhānaṃ pādakaṃ katvā aggamaggaṃ adhigantvā arahatte ṭhitassa cittaṃ sabbaso rūpehi nissaṭaṃ nāma hoti. Tassa hi phalasaṃpattito vuṭṭhāya vīmaṃsanatthaṃ rūpābhikhaṃ cittaṃ pesentassa. **Idamakkhātanti** samathayānikānaṃ vasena heṭṭhā cattāro vārā gahitā. Imaṃ pana sukkhavipassakassa vasenāti āha “**suddhasaṅkhāre**”tiādi. “**Puna sakkāyo natthī**”ti uppānanti “idāni me sakkāyappabandho natthī”ti vīmaṃsantassa uppānaṃ.

Nissāraṇīyasuttavaṇṇanā niṭṭhitā.

Brāhmaṇavaggavaṇṇanā niṭṭhitā.

Catutthapaṇṇāsakaṃ niṭṭhitam.

5. Pañcamapaṇṇāsakaṃ

(21) 1. Kimilavaggo

1-4. Kimilasuttādivaṇṇanā

201-4. Pañcamassa paṭhamadutiyaṇi uttānatthāneva. Tatiye adhivāsanaṃ khamanaṃ, paresaṃ dukkaṭaṃ duruttaṇca paṭivirodhākaraṇena attano upari āropetvā vāsanaṃ adhivāsanaṃ, tadeva khantīti **adhivāsanaṃkhamanti**. Subhe ratoti sūrato, suṭṭhu vā pāpato orato virato sorato, tassa bhāvo **soraccaṃ**. Tenāha “**soraccenāti sucisīlatāyā**”ti. Sā hi sobhanakammaratā, suṭṭhu vā pāpato oratabhāvo viratatā. Catutthe natthi vattabbaṃ.

Kimilasuttādivaṇṇanā niṭṭhitā.

5. Cetokhilasuttavaṇṇanā

205. Pañcame **cetokhilā** nāma atthato vicikicchā kodho ca. Te pana yasmaṃ santāne uppajjanti, tassa kharabhāvo kakkhaḷabhāvo hutvā upatiṭṭhanti, pageva attanā sampayuttacittassāti āha “**cittassa thaddhabhāvā**”ti. Yathā lakkhaṇapāripūriyā gahitāya sabbā satthu rūpakāyasirī gahitā eva nāma hoti evaṃ sabbaññutāya sabbadhammakāyasirī gahitā eva nāma hotīti tadubhayavatthukameva kaṅkham dassento “**sarīre kaṅkhamāno**”tiādimāha. **Vicinantoti** dhammasabhāvaṃ vīmaṃsanto. **Kicchatīti** kilamati. **Vinichetum na sakkotīti** sannitṭhātum na sakkoti. Ātapati kileseti **ātappaṃ**, sammāvāyāmoti āha “**ātappāyāti kilesasantāpanavīriyakaraṇatthāyā**”ti. **Punappunaṃ yogāyāti** bhāvanaṃ punappunaṃ yuñjanāya. **Satatakiriyaṃyāti** bhāvanāya niranterappayogāya.

Paṭivedhadhamme kaṅkhamānoti ettha kathaṃ lokuttaradhamme kaṅkhā pavattīti? Na ārammaṇakaraṇavasena, anussutākāraparivittakaladdhe parikappitarūpe kaṅkhā pavattatīti dassento āha “**vipassanā...pe... vadanti, taṃ atthi nu kho natthīti kaṅkhatī**”ti. **Sikkhāti** cettha pubbhāgasikkhā veditabbā. Kāmañcettha visesuppattiyā mahāsāvajjatāya ceva saṃvāsanimittam ghaṭanāhetu abhiñhuppattikatāya ca sabrahmacārīsūti kopassa visayo visesetvā vutto, aññatthāpi kopo na cetokhiloti na sakkā viññātunti keci. Yadi evaṃ vicikicchāyapi ayaṃ nayo āpajjati, tasmā yathārutavasena gahetabbaṃ.

Cetokhilasuttavaṇṇanā niṭṭhitā.

6-8. Vinibandhasuttādivaṇṇanā

206-8. Chaṭṭhe pavattitum appadānavasena kusalacittam vinibandhantīti **cetasovinibandhā**. Taṃ pana vinibandhantā muṭṭhiggāham gaṇhantā viya hontīti āha “**cittam vinibandhitvā**”tiādi. Kāmagiddho puggalo vatthukāmepe kilesakāmepe assādeti abhinandatīti vuttam “**vatthukāmepe kilesakāmepe**”ti. **Attano kāyeti** attano nāmakāye, attabhāve vā. **Bahiddhārūpeti** paresaṃ kāye anindriyabaddharūpe ca. Udaraṃ avadīhati upacīnoti pūretīti **udarāvadehakaṃ**. **Seyyasukhanti** seyyāya sayanavasena uppajjanakasukham. **Samparivattakanti** samparivattitvā. **Paṇidhāyāti** taṇhāvaseneva paṇidāhitvā. Iti pañcavidhopi lobhaviseso eva “cetovinibandho”ti vuttoti veditabbo. Sattamaṭṭhamesu natthi vattabbaṃ.

Vinibandhasuttādivaṇṇanā niṭṭhitā.

9-10. Gītassarasuttādivaṇṇanā

209-210. Navame āyatakō nāma gītassaro taṃ taṃ vattaṃ bhinditvā akkharāni vināsetvā pavattoti āha “**āyatakenā**”tiādi. Dhammehi suttavattaṃ nāma atthi, gāthāvattaṃ nāma atthi, taṃ vināsetvā atidīghaṃ kātuṃ na vaṭṭati. Dhammañhi bhāsantena caturassena vattena parimaṇḍalāni padabyañjanāni dassetabbāni. “Anujānāmi, bhikkhave, sarabhañña”nti (cūḷava. 249) ca vacanato sarena dhammaṃ bhaṇitūṃ vaṭṭati. Sarabhaññe kira taraṅgavattadhotakavattabhāggagahakavattādīni dvattiṃsa vattāni atthi. Tesu yaṃ icchati, taṃ kātuṃ labhatīti. Dasame natthi vattabbaṃ.

Gītassarasuttādivaṇṇanā niṭṭhitā.

Kimilavaggavaṇṇanā niṭṭhitā.

(22) 2. Akkosakavaggo

1-2. Akkosakasuttādivaṇṇanā

211-2. Dutiyassa paṭhame **dasahi akkosavatthūhi akkosakoti** “bālosi, mūḷhosi, oṭṭhosi, goṇosi, gadrabhosi”tiādīnā dasahi akkosavatthūhi akkosako. “Hotu, muṇḍakasamaṇa, adaṇḍo ahanti karosi, idāni te rājakulaṃ gantvā daṇḍaṃ āropessāmi”tiādīni vadanto paribhāsako nāmāti āha “**bhayadassanena paribhāsako**”ti. Lokuttaradhammā apāyamaḅḅassa pariṇanthabhāvato **pariṇantho** nāmāti āha “**lokuttarapariṇanthassa chinnattā**”ti, lokuttarasaṅkhātassa apāyamaḅḅaparipanthassa chinnattāti attho. Dutiyē natthi vattabbaṃ.

Akkosakasuttādivaṇṇanā niṭṭhitā.

3-10. Sīlasuttādivaṇṇanā

213-220. Tatiye (dī. ni. ṭī. 2.149) **dussīloti** ettha **du**-saddo abhāvatto “duppañño”tiādīsu (ma. ni. 1.449) viya, na garahaṇatthoti āha “**asīlo nissīlo**”ti. **Bhinnasaṃvaroti** ettha samādinnaṣīlo kenaci kāraṇena sīlabhedāṃ patto, so tāva bhinnasaṃvaro hotu. Yo pana sabbena sabbāṃ asamādinnaṣīlo ācārahīno, so kathaṃ bhinnasaṃvaro nāma hotīti? Sopi sādhusamācārassa parihaṇāyassa bheditattā bhinnasaṃvaro eva nāma. Vinaṭṭhasaṃvaro saṃvararahitoti hi vuttaṃ hoti. **Taṃ taṃ** sippaṭṭhānaṃ. **Māghātakāletī** “mā ghāthetha paṇīna”nti evaṃ māghātaghosanaṃ ghoṣitadvise. **Abbhuggacchati** pāpako kittisaddo. **Ajjhāsayena maṅku hotiyeva** vipaṭṭisāribhāvato.

Tassāti dussīlassa. **Samādāya vattitaṭṭhānanti** uṭṭhāya samuṭṭhāya katakāraṇaṃ. **Āpātham āgacchatīti** taṃ manaso upaṭṭhāti. **Ummīletvā idhalokanti** ummīlanakāle attano puttadārādivasena idhalokaṃ passati. **Nimīletvā paralokanti** nimīlanakāle gatinimittupaṭṭhānavasena paralokaṃ passati. Tenāha “**cattāro apāyā**”tiādi. **Pañcamapadanti** “kāyassa bheda”tiādīnā vutto pañcama ādīnavakoṭṭhāso. **Vuttavipariyāyenāti** vuttatthāya ādīnavakathāya vipariyāyena “appamatto taṃ taṃ kasivaṇijjādīṃ yathākālaṃ sampādetuṃ sakkoti”tiādīnā. Pāsamsaṃ sīlamassa atthīti **sīlavā**. **Sīlasampannoti** sīlena samannāgato sampannaṣīloti evamādikāṃ pana atthavacanaṃ sukaranti anāmaṭṭhaṃ. Catutthādīni uttānatthāneva.

Sīlasuttādivaṇṇanā niṭṭhitā.

Akkosakavaggavaṇṇanā niṭṭhitā.

(23) 3. Dīghacārikavaggo

1-10. Paṭhamadīghacārikasuttādivaṇṇanā

221-230. Tatiyassa paṭhamādīni suviññeyyāni. Pañcame **raho nisajjāya āpajjatīti** “yo pana bhikkhu mātugāmena saddhiṃ eko ekāya raho nisajjaṃ kappeyya, pācittiya”nti imasmiṃ **sikkhāpade** (pāci. 290) vuttaṃ āpattiṃ āpajjati. **Paṭicchanne āsane āpajjatīti** “yo pana bhikkhu mātugāmena raho paṭicchanne āsane nisajjaṃ kappeyya, pācittiya”nti imasmiṃ vuttaṃ āpattiṃ āpajjati. **Mātugāmassa uttari chappañcavācāhi dhammaṃ desento āpajjatīti** ‘yo pana bhikkhu mātugāmassa uttari chappañcavācāhi dhammaṃ deseyya aññatra viññunā purisaviggahenā”ti (pāci. 63) evaṃ vuttaṃ āpattiṃ āpajjati. Tenāha “**tesaṃ tesaṃ sikkhāpadānaṃ vasena veditabbānī**”ti. Chaṭṭhādīni uttānatthāni.

Paṭhamadīghacārikasuttādivaṇṇanā niṭṭhitā.

Dīghacārikavaggavaṇṇanā niṭṭhitā.

231-302. Catutthavaggādīni uttānatthāni.

Iti manorathapūraṇiyā aṅguttaranikāya-aṭṭhakathāya

Pañcakanipātavaṇṇanāya anuttānatthadīpanā samattā.

Namo tassa bhagavato arahato sammāsambuddhassa

Aṅguttaranikāye

Chakkanipāta-ṭīkā

1. Paṭhamapaṇṇāsakaṃ

1. Āhuneyyavaggo

1. Paṭhamaāhuneyyasuttavaṇṇanā

1. Chakkanipātassa paṭhame **cakkhunā rūpaṃ disvāti** nissayavohārena vuttaṃ. Sasambhāraṇiddeṣoyā yathā “dhanunā vijjhatī”ti, tasmā nissayasīsenā nissitassa gahaṇaṃ daṭṭhabbaṃ. Tenāyamatto “cakkhudvāre rūpārammaṇe āpāthagate taṃ rūpaṃ cakkhuvīññānena disvā”ti. **Neva sumano hotīti** javanakkhaṇe iṭṭhe ārammaṇe rāgaṃ anuppādentō neva sumano hoti gehassitapemavasēnapi maggena sabbaso rāgassa samucchinnattā. **Na dummanoti** aniṭṭhe adussanto na dummano. Pasādaññathattavasēnapi iṭṭhepi aniṭṭhepi majjhattepi ārammaṇe na samaṃ sammā ayoniso gahaṇaṃ **asamapekkhanaṃ**. Ayañcassa paṭipatti sativepullappattiyā paññāvepullappattiyā cāti āha “**sato sampajāno hutvā**”ti. Satiyā yuttattā **sato**. Sampajāññena yuttattā **sampajāno**. Ñāṇupattipaccayarahitakālepi pavattibhedanato “**satatavihāro kathito**”ti vuttaṃ. **Satatavihāro**ti khīṇāsavassa niccavihāro sabbadā pavattanakavihāro. Ṭhapetvā hi samāpattivelāṃ bhavaṅgavelāñca khīṇāsavā imināva chaḷaṅgupekkhāvihārena viharanti.

Ettha ca “chasu dvāresupi upekkhako viharatī” ti iminā chaḷaṅgupekkhā kathitā. “Sampajāno” ti vacanato pana cattāri nāṇasampayuttacittāni labbhanti tehi vinā sampajānatāya asambhavato. Satatavihārābhāvato aṭṭha mahākiriya-cittāni labbhanti. “Neva sumano na dummano” ti vacanato aṭṭha mahākiriya-cittāni, hasituppādo, voṭṭhabbanañcāti dasa cittāni labbhanti. Rāgadosasahajātānaṃ somanassadomanassānaṃ abhāvo tesampi sādharmaṇoti chaḷaṅgupekkhāvasena āgatānaṃ imesaṃ satatavihārānaṃ somanassaṃ kathaṃ labbhatīti ce? Āsevanato. Kiñcāpi khīṇāsavo iṭṭhāniṭṭhepi ārammaṇe majjhatto viya bahulaṃ upekkhako viharati attano parisuddhapakatibhāvāvijahanato, kadāci pana tathā cetobhisāṅkhārābhāve yaṃ taṃ sabhāvato iṭṭhaṃ ārammaṇaṃ, tassa yāthāvasabhāvaggahaṇavasena pi arahato cittaṃ pubbāsevanavasena somanassasahagataṃ hutvā pavattateva.

Paṭhamaāhuneyyasuttavaṇṇanā niṭṭhitā.

2-7. Dutiyāāhuneyyasuttādivaṇṇanā

2-7. Dutīye (visuddhi. 2.380) **anekavihitanti** anekavidhaṃ nānappakāraṃ. **Iddhividhanti** iddhikoṭṭhāsaṃ. **Paccanubhotīti** paccanubhavati, phusati sacchikarotī paṇuṇātīti attho. Idāniṣsa anekavihitabhāvaṃ dassento “**ekopi hutvā**” tiādīmāha. Tattha “ekopi hutvā” ti iminā karaṇato pubbeva pakatiyā ekopi hutvā. **Bahudhā hotīti** bahūnaṃ santike caṅkamtukāmo vā sajjhāyaṃ kātukāmo vā pañhaṃ pucchitukāmo vā hutvā satampi sahasampi hoti. **Āvibhāvaṃ tirobhāvanti** ettha āvibhāvaṃ karotī, tirobhāvaṃ karotīti ayamattho. Idameva hi sandhāya **paṭisambhidāyaṃ** (paṭi. ma. 3.11) vuttaṃ – “āvibhāvanti kenaci anāvuṭṭhaṃ hoti appaṭicchannaṃ vivaṭṭhaṃ, tirobhāvanti kenaci āvuṭṭhaṃ hoti paṭicchannaṃ pihitaṃ paṭikujjita” nti. **Tirokuṭṭhaṃ tiropākāraṃ tiropabbataṃ asajjamāno gacchati seyyathāpi ākāseti** ettha **tirokuṭṭanti** parakuṭṭhaṃ, kuṭṭassa parabhāganti vuttaṃ hoti. Esa nayo itaresu. **Kuṭṭoti** ca gehabhittiyā etaṃ adhivacanaṃ. **Pākāroti** gehavihāragāmādīnaṃ parikkhepapākāro. **Pabbatotīti** paṃsupabbato vā pāsāṇapabbato vā. **Asajjamānoti** alaggamāno seyyathāpi ākāse viya.

Ummujjanimujjanti ettha **ummujjanti** uṭṭhānaṃ vuccati. **Nimujjanti** saṃsīdanaṃ. Ummujjañca nimujjañca **ummujjanimujjaṃ**. **Udakepi abhijjamāneti** ettha yaṃ udakaṃ akkamitvā saṃsīdati, taṃ bhijjamānanti vuccati, viparītaṃ **abhijjamānaṃ**. **Pallaṅkena** gacchati. **Pakkhī sakuṇoti** pakkhehi yuttasakuṇo. **Imepi candimasūriye evaṃmahiddhike evaṃmahānubhāve paṇiṇā parāmasatīti** ettha candimasūriyānaṃ dvācattālīsayojanasahassassa upari caraṇena mahiddhikatā, tīsu dīpesu ekakkaṇe ālokakaraṇena mahānubhāvataṃ veditabbā. Evaṃ uparicaraṇāālokakaraṇehi mahiddhike mahānubhāve. **Parāmasatīti** gaṇhāti, ekadese vā chupati. **Parimajjatīti** samantato ādāsatalā viya parimajjati. **Yāva brahmalokāpīti** brahmalokampi paricchedaṃ katvā. **Kāyena vasaṃ vattetīti** tatra brahmaloke kāyena attano vasaṃ vatteti.

Dibbāya sotadhātuyāti ettha dibbasadisattā **dibbā**. Devatānañhi sucaritakammaṇibhattā pittasemharuhirādīhi apalibuddhā upakkilesavimuttatāya dūrepi ārammaṇasampaṭicchanasamatthā dibbā pasādasotadhātu hoti. Ayañcāpi imassa bhikkhuno vīriyabhāvanābalena nibbattā nāṇasotadhātu tādisāyevāti dibbasadisattā dibbā. Apica dibbavihārasena paṭiladdhattā attanā ca dibbavihārasannissitatāpi **dibbā**. Savanaṭṭhena nijjīvaṭṭhena ca sotadhātu. Sotadhātukiccakaraṇena sotadhātu viyātipi sotadhātu. Tāya **sotadhātuyā**. **Visuddhāyāti** suddhāya nirupakkilesāya. **Atikkantamānusikāyāti** manussūpacāraṃ atikkamitvā saddasavane mānusikaṃ maṃsasotadhātum atikkantāya vītivattetvā ṭhitāya. **Ubho sadde suṇātīti** dve sadde suṇāti. Katame dve? **Dibbe ca mānuse ca**, devānañca manussānañca saddeti vuttaṃ hoti. Etena padesapariyādānaṃ veditabbāṃ. **Ye dūre santike cāti** ye saddā dūre paracakkavālepi, ye ca santike antamaso sadehasannissitapaṇakasaddāpi, te suṇātīti vuttaṃ hoti. Etena nippadesapariyādānaṃ veditabbāṃ.

Parasattānanti attānaṃ ṭhapetvā sesasattānaṃ. **Parapuggalānanti** idampi iminā ekatthameva. Veneyyavasena pana desanāvīlāsena ca byañjananānattaṃ kataṃ. **Cetasā cetoti** attano cittena tesam

cittam. **Pariccāti** paricchinditvā. **Pajānātīti** sarāgādivasena nānappakārato jānāti. **Sarāgam** vā **cittanti**ādīsu pana aṭṭhalobhasahagatacittam sarāgam cittanti veditabbam. Avasesam cātubhūmakam kusalābyākatacittam **vītarāgam**. Dve domanassacittāni, dve vicikicchuddhaccacittānī imāni pana cattāri cittāni imasmim duke saṅgahaṃ na gacchanti. Keci pana therā tānipi saṅgaṇhanti. Duvidham pana domanassacittam **sadosam cittam** nāma. Sabbampi cātubhūmakam kusalābyākatacittam **vītadosam**. Sesāni dasa akusalacittāni imasmim duke saṅgahaṃ na gacchanti. Keci pana therā tānipi saṅgaṇhanti. **Samoham vītamohanti** ettha pana pāṭipuggalikanayena vicikicchuddhaccasahagatadvayameva samoham. Mohassa pana sabbākusalesu sambhavato dvādasavidhampi akusalacittam **samoham cittanti** veditabbam. Avasesam **vītamoham**. Thinamiddhānugataṃ pana **saṃkhittam**, uddhaccānugataṃ **vikkhittam**. Rūpāvacarārūpāvacaram **mahaggataṃ**, avasesam **amahaggataṃ**. Sabbampi tebhūmakam **sauttaram**, lokuttaram **anuttaram**. Upacārappattam appanāppattañca **samāhitam**, ubhayamappattam **asamāhitam**. Tadaṅgavikkhambhanasamucchedappaṭippassaddhinissaraṇavimuttim pattam pañcavidhampi etam **vimuttam**, vimuttimappattam vā **avimuttanti** veditabbam.

Anekavihitanti (pārā. aṭṭha. 1.12) anekavidham, anekehi vā pakārehi pavattitam saṃvaṇṇitanti attho. **Pubbenivāsanti** samanantarātītabhavaṃ ādim katvā tattha tattha nivutthasantānaṃ. **Anussaratīti** khandhapaṭipāṭivasena, cutipāṭisandhivasena vā anugantvā anugantvā sarati. Seyyathidaṃ – **ekampi jātim...pe... pubbenivāsam anussaratīti**. Tattha **ekampi jātinti** ekampi paṭisandhimūlam cutipariyosānaṃ ekabhavapariyāpannaṃ khandhasantānaṃ. Esa nayo **dvepi jātiyoti**ādīsupi. **Anekepi saṃvaṭṭakappeti**ādīsu pana parihāyamāno kappo **saṃvaṭṭakappo**, vaḍḍhamāno **vivaṭṭakappoti** veditabbo. Tattha saṃvaṭṭena saṃvaṭṭaṭṭhāyī gahito hoti taṃmūlakattā, vivaṭṭena vivaṭṭaṭṭhāyī. Evañhi sati yāni tāni ‘cattārimāni, bhikkhave, kappassa asaṅkhyeyyāni. Katamāni cattāri? Saṃvaṭṭo saṃvaṭṭaṭṭhāyī vivaṭṭo vivaṭṭaṭṭhāyī’ ti (a. ni. 4.156) vuttāni, tāni pariggahitāni honti.

Amutrāsinti amumhi saṃvaṭṭakappe aham amumhi bhava vā yoniyā vā gahiyā vā viññāṇaṭṭhitiyā vā sattāvāse vā sattanikāye vā āsiṃ. **Evamṇāmoti** tisso vā phusso vā. **Evamgottoti** gotamo vā kaccāyano vā kassapo vā. Idamassa atītabhave attano nāmagottānussaraṇavasena vuttam. Sace pana tasmim kāle attano vaṇṇasampattilūkhapaṇṭajīvikabhāvaṃ sukhadukkhahulataṃ appāyukadīghāyukabhāvaṃ vā anussaritukāmo hoti, tampi anussaratiyeva. Tenāha ‘**evamvaṇṇo...pe... evamāyupariyanto**’ ti. Tattha **evamvaṇṇoti** odāto vā sāmo vā. **Evamāhāroti** sālimamsodanāhāro vā pavattaphalabhajano vā. **Evamsukhadukkhappaṭisaṃvedīti** anena pakārena kāyikacetāsikānaṃ sāmisanirāmisādippabhedānaṃ sukhadukkhānaṃ paṭisaṃvedī. **Evamāyupariyantoti** evam vassasataparimāṇāyupariyanto vā caturāsītīkappasahassāyupariyanto vā. **So tato cuto amutra udapādinti** so aham tato bhavato yonito gahito viññāṇaṭṭhitito sattāvāsato sattanikāyato vā cuto punaamukasmim nāma bhava yoniyā gatiyā viññāṇaṭṭhitiyā sattāvāse sakkānikāye vā udapādim. **Tatrāpāsinti** tatrāpi bhava yoniyā gatiyā viññāṇaṭṭhitiyā sattāvāse sattanikāye vā puna ahoṣim. **Evamṇāmoti**ādi vuttanayameva.

Apica **amutrāsinti** idaṃ anupubbena ārohanassa yāvadicchakam anussaraṇam. **So tatoti** paṭinivattantassa paccavekkhaṇam, tasmā ‘**idhūpapanno**’ ti imissā idhūpapattiyā anantameva uppattiṭṭhānaṃ sandhāya ‘amutra udapādi’ nti idaṃ vuttanti veditabbam. **Tatrāpāsinti** evamādi panassa tatrāpi imissā upapattiyā antare upapattiṭṭhāne nāmagottādīnaṃ anussaraṇadassanattam vuttam. **So tato cuto idhūpapannoti** svāham tato anantaruppattiṭṭhānato cuto idha amukasmim nāma khattiyakule vā brāhmaṇakule vā nibbattoti. **Itīti** evam. **Sākāram sauddesanti** nāmagottavasena sauddesaṃ, vaṇṇādivasena sākāram. Nāmagottena hi satto ‘tisso kassapo’ ti uddisīyati, vaṇṇādīhi ‘sāmo odāto’ ti nānattato paññāyati, tasmā nāmagottam uddeso, itare ākārā.

Dibbenātiādīsu dibbasadisattā dibbam. Devatānañhi sucaritakammanibbattam pittasemharuhirādīhi apalibuddham upakkilesavimuttatāya dūrepi ārammaṇasampaṭicchanasamattham dibbam pasādacakkhu hoti. Idañcāpi vīriyabhāvanābalena nibbattam nānacakkhu tādisamevāti dibbasadisattā dibbam.

Dibbavīhārasena paṭiladdhattā attano ca dibbavīhārasannissitattāpi dibbaṃ. Ālokapariggahena mahājutikattāpi dibbaṃ. Tirokuṭṭādigatarūpadassanena mahāgatikattāpi **dibbaṃ**. Taṃ sabbaṃ saddasatthānusārena veditabbaṃ. Dassanaṭṭhena cakkhu. Cakkhukiccakaraṇena cakkhumivātipi cakkhu. Cutūpapādadassanena diṭṭhivisuddhihetuttā visuddhaṃ. Yo hi cutimeva passati, na upapātaṃ, so ucchedadiṭṭhiṃ gaṇhāti. Yo upapātaṃ passati, na cutiṃ, so navasattapātubhāvadiṭṭhiṃ gaṇhāti. Yo pana tadubhayaṃ passati, so yasmā duvidhampi taṃ diṭṭhigataṃ ativattati, tasmā taṃ dassanaṃ diṭṭhivisuddhihetu hoti. Ubhayampi cetam buddhaputtā passanti. Tena vuttaṃ “cutūpapādadassanena diṭṭhivisuddhihetuttā visuddha”nti. Manussūpacāraṃ atikkamivā rūpadassanena atikkantamānusakaṃ, mānusaṃ vā maṃsacakkhuṃ atikkantattā atikkantamānusakanti veditabbaṃ. Tena **dibbena cakkhunā visuddhena atikkantamānusakena**.

Satte passatīti manussānaṃ maṃsacakkhunā viya satte oloketi. **Cavamāne upapajjamāneti** ettha cutikkhaṇe vā upapattikkhaṇe vā dibbacakkhunā daṭṭhuṃ na sakkā. Ye pana āsannacutikā idāni cavissanti, te cavamānāti, ye ca gahitappaṭisandhikā sampatinibbattā ca, te upapajjamānāti adhippetā. Te evarūpe cavamāne upapajjamāne ca passatīti dasseti. **Hīneti** mohanissandayuttattā hīnānaṃ jātikulabhogādīnaṃ vasena hīlite uññāte. **Paṇītetī** amohanissandayuttattā tabbiparīte. **Suvaṇṇeti** adosanissandayuttattā iṭṭhakantamanāpavaṇṇayutte. **Dubbaṇṇeti** dosanissandayuttattā aniṭṭhākantamanāpavaṇṇayutte, virūpavirūpetipi attho. **Sugateti** sugatigate, alobhanissandayuttattā vā aḍḍhe mahaddhane. **Duggateti** duggatigate, lobhanissandayuttattā vā dalidde appannaṇāne.

Yathākammūpāgeti yaṃ yaṃ kammaṃ upacitaṃ, tena tena upagate. **Kāyaduccaritenā**tiādīsu duṭṭhu caritaṃ kilesapūtikattāti duccaritaṃ. Kāyena duccaritaṃ, kāyato vā uppannaṃ duccaritanti **kāyaduccaritaṃ**. Itaresupi eseva nayo. **Samannāgatāti** samaṅgibhūtā. **Ariyānaṃ upavādakāti** buddhaccekabuddhasāvakaṇaṃ ariyānaṃ antamaso gihisotāpannānampi anatthakāmā hutvā antimavatthunā vā guṇaparidhamsanena vā upavādakā, akkosakā garahakāti vuttaṃ hoti. **Micchādiṭṭhikāti** viparītadassanā. **Micchādiṭṭhikammamādānāti** micchādiṭṭhivasena samādinnānāvīdhakammā, yepi micchādiṭṭhimūlakesu kāyakammādīsu aññepi samādāpentī.

Kāyassa bhedāti upādinnakkhandhapariccāgā. **Paraṃ maraṇāti** tadanantaraṃ abhinibbattakkhandhaggahaṇā. Atha vā **kāyassa bhedāti** jivitindriyassūpacchedā. **Paraṃ maraṇāti** cuticittato uddhaṃ. **Apāyanti** evamādi sabbaṃ nirayavevacanameva. Nirayo hi saggamokkhaḥetubhūtā puññasammatā ayā apētattā, sukhānaṃ vā āyassa abhāvā **apāyo**. Dukkassa gati paṭisaraṇanti **duggati**, dosabahulatāya vā duṭṭhena kammaṇa nibbattā gatīti **duggati**. Vivasā nipatanti tattha dukkaṭṭakārinoti **vinipāto**, vinassantā vā ettha patanti sambhijjamaṇāṅgapaccāṅgāti **vinipāto**. Natthi ettha assādasāññīto ayoti **nirayo**.

Atha vā **apāyaggahaṇena** tiracchānayoṇiṃ dīpeti. Tiracchānayoṇi hi apāyo sugatito apētattā, na duggati mahesakkhānaṃ nāgarājādīnaṃ sambhavato. **Duggatiggahaṇena** pēttivisayañca. So hi apāyo ceva duggati ca sugatito apētattā dukkhassa ca gatibhūtattā, na tu vinipāto asurasadisam avinipatitattā. **Vinipātaggahaṇena** asurakāyaṃ. So hi yathāvuttena atthena apāyo ceva duggati ca sabbasamussayehi vinipatitattā vinipātoti vuccati. **Nirayaggahaṇena** avīciādīkamanekappakāraṃ nirayamevāti. **Upapannāti** upagatā, tattha abhinibbattāti adhippāyo. Vuttavipariyāyena sukkapakko veditabbo. Ayaṃ pana viseso – tattha **sugatiggahaṇena** manussāgatīpi saṅgayhati, **saggaggahaṇena** devagatiyeva. Tattha suṇḍarā gatīti **sugati**. Rūpādīhi visayehi suṭṭhu aggoti **saggo**. So sabbopi lujjanappalujjanaṭṭhena lokoti ayamettha saṅkhepo. Vīthāro pana sabbākārena **visuddhimaggasaṃvaṇṇanāto** gahetabbo. Tatiyādīni uttānatthāni.

Dutiyaāhuneyyasuttādivaṇṇanā niṭṭhitā.

8. Anuttariyasuttavaṇṇanā

8. Aṭṭhame natthi etesaṃ uttarāni visiṭṭhānīti anuttarāni, anuttarāni eva **anuttariyāni** yathā “anantameva anantariya”nti āha “**niruttarāni**”ti. **Dassanānuttariyaṃ nāma** phalavisesāvahattā. Esa nayo sesesupi. **Sattavidhaariyadhanalābhoti** sattavidhasaddhādilokuttaradhanalābho. **Sikkhāttayassa pūraṇanti** adhisīlasikkhādīnaṃ tissannaṃ sikkhānaṃ pūraṇaṃ. Tattha pūraṇaṃ nippariyāyato asekkhānaṃ vasena veditabbaṃ. Kalyāṇaputhujanato paṭṭhāya hi satta sekhā tisso sikkhā pūrenti nāma, arahā paripuṇṇasikkhoti. Iti imāni anuttariyāni lokiyalokuttarāni kathitāni.

Anuttariyasuttavaṇṇanā niṭṭhitā.

9. Anussatiṭṭhānasuttavaṇṇanā

9. Navame anussatiyo eva diṭṭhadhammikasamparāyikādihitasukhānaṃ kāraṇabhāvato ṭhānānīti **anussatiṭṭhānāni**. **Buddhaguṇārammaṇā satīti** yathā buddhānussati visesādhigamassa ṭhānaṃ hoti, evaṃ “itipi so bhagavā”tiādīnā buddhaguṇe ārabbe uppannā sati. Evaṃ anussarato hi pīti uppañjati, so taṃ pītiṃ khayato vayato paṭṭhapetvā arahattaṃ pāpuṇāti. Upacārakammaṭṭhānaṃ nāmetam gihīnampi labbhati. **Upacārakammaṭṭhānanti** ca paccakkhato upacārajjhānāvahaṃ kammaṭṭhānaparamparāya sammasanaṃ yāva arahattā lokiyalokuttaravisesāvahaṃ. Esa nayo sabbattha.

Anussatiṭṭhānasuttavaṇṇanā niṭṭhitā.

10. Mahānāmasuttavaṇṇanā

10. Dasame **tasmim samayeti** buddhāguṇānussaraṇasamaye. **Rāgapariyuṭṭhitanti** rāgena pariyuṭṭhitaṃ. Pariyuṭṭhānappattipi, rāgena vā saṃhitam cittaṃ araṇṇamiva corehi tena pariyuṭṭhitanti vuttaṃ, tassa pariyuṭṭhānaṭṭhānabhāvatoṇi pariyuṭṭhitarāganti attho. Byañjanaṃ pana anādiyivā atthamattaṃ dassento “**uppajjamānena rāgena uṭṭhahitvā gahita**”nti āha. **Ujukamevāti** pageva kāyavaṅkāḍīnaṃ apanītattā cittaṃ ca anujubhāvakarānaṃ mānādīnaṃ abhāvato, rāgādipariyuṭṭhānābhāvena vā oṇatiuṇṇatvirahato ujubhāvameva gataṃ. Atha vā **ujukamevāti** kammaṭṭhānassa thinaṃ middhaṃ oṭiṇṇatāya līnuddhaccavigamato majjhimasamathanimittappaṭipattiyā ujubhāvameva gataṃ. **Aṭṭhakathaṃ nissāyāti** bhavaṃjātiādīnaṃ padānaṃ atthaṃ nissāya. **Atthavedanti** vā hetuphalaṃ paṭicca uppannaṃ tuṭṭhimāha. **Dhammavedanti** hetuṃ paṭicca uppannaṃ tuṭṭhiṃ. “Ārakattā araha”nti anussarantassa hi yadidaṃ bhagavato kilesehi ārakattaṃ, so hetu. Nāpako cettha hetu adhippeto, na kārako sampāpako. Tatonena nīyamāno arahattattho phalaṃ. Iminā nayena sesapadesupi hetuso phalavipāko veditabbo. **Dhammānussatiādīsipi** hi ādimajjhapariyosānakalyāṇatādayo suppaṭipattīdayo ca tattha tattha hetubhāvena niddiṭṭhāyeva. **Dhammūpasamhitanti** yathāvuttahetuphalasaṅkhātāguṇūpasamhitam.

Mahānāmasuttavaṇṇanā niṭṭhitā.

Āhuneyyavaggavaṇṇanā niṭṭhitā.

2. Sāraṇīyavaggo

1. Paṭhamasāraṇīyasuttavaṇṇanā

11. Dutiyassa paṭhame **saritabbayuttakāti** anussaraṇārahā. Mijjati siniyhati etāyāti mettā, mittabhāvo. Mettā etassa atthīti **mettaṃ**, kāyakammaṃ. Taṃ pana yasmā mettāsahagatacittasamuṭṭhānaṃ, tasmā vuttaṃ “**mettena cittena kātabbaṃ kāyakamma**”nti. Esa nayo sesadvayepi. **Imānīti** mettakāyakammādīni. **Bhikkhūnaṃ vasena āgatāni** tesam seṭṭhaparisabhāvato. Yathā pana bhikkhunīsipi labbhanti, evaṃ gihīsipi labbhanti

catuparisasādhāraṇattāti taṃ dassento “**bhikkhūnañhī**”tiādimāha. Bhikkhuno sabbampi anavajjakāyakammaṃ ābhisamācārikakammantogadhamevāti āha “**mettena cittena...pe... kāyakammaṃ nāmā**”ti. Bhattivasena pavattiyamānā cetiyabodhīnaṃ vandanā mettāsiddhāti katvā tadatthāya gamanaṃ “mettaṃ kāyakamma”nti vuttaṃ. **Ādi**-saddena cetiyabodhibhikkhūsu vuttāvasesāpacāyanādivasena pavattamettāvasena pavattaṃ kāyikaṃ kiriyāṃ saṅgaṇhāti.

Tepiṭakampi buddhavacanaṃ kathiyamānanti adhippāyo. Tepiṭakampi buddhavacanaṃ paripucchanaatthakathanavasena pavattiyamānameva **mettaṃ vacīkammaṃ nāma** hitajjhāsayena pavattitabbato. **Tiṇi sucaritānī**ti kāyavacīmanosucaritāni. **Cintananti** evaṃ cintanamattampi manokammaṃ, pageva paṭiṭṭhānā bhāvanāti dasseti.

Āvīti pakāsaṃ. Pakāsabhāvo cettha yaṃ uddissa taṃ kāyakammaṃ karīyati, tassa sammukhabhāvatoti āha “**sammukhā**”ti. **Rahoti** appakāsaṃ. Appakāsatā ca yaṃ uddissa taṃ kāyakammaṃ karīyati, tassa apaccakkhabhāvatoti āha “**parammukhā**”ti. **Sahāyabhāvagamaṇaṃ** tesam purato. Tesu karontesuyeva hi sahāyabhāvagamaṇaṃ sammukhā kāyakammaṃ nāma hoti. **Ubhayehīti** navakehi therehi ca. **Paggayhāti** paggaṇhitvā uddhaṃ katvā kevalaṃ “devo”ti avatvā guṇehi thirabhāvajotanaṃ “devatthero”ti vacanaṃ paggayha vacanaṃ. Mamattabodhanaṃ vacanaṃ **mamāyanavacanaṃ**. Ekantaparammukhassa manokammaṃ sammukhatā nāma viññattisamuṭṭhāpanavasena hoti, tañca kho loke kāyakammanti pākāṭaṃ paññātaṃ. Hatthavikārādīni anāmasitvā eva dassento “**nayanāni ummīlevā**”tiādimāha. Kāmaṃ mettāsinehasiniddhānaṃ nayanānaṃ ummīlanā pasannena mukhena olokanañca mettaṃ kāyakammameva, yassa pana cittassa vasena nayanānaṃ mettāsinehasiniddhatā mukhassa ca pasannatā, taṃ sandhāya vuttaṃ “**mettaṃ manokammaṃ nāmā**”ti.

Lābha-saddo kammaśādhano “lābhā vata, bho, laddho”tiādisu viya. So cettha “dhammaladdhā”ti vacanato atītakālikoti āha “**cīvarādayo laddhapaccayā**”ti. Dhammato āgatāti **dhammikā**, parisuddhagamaṇā paccayā. Tenāha “dhammaladdhā”ti. Imameva hi atthaṃ dassetuṃ “**kuhanādi**”tiādi vuttaṃ. Na sammā gayhamānā hi dhammaladdhā nāma na hontīti tappaṭisedhanatthaṃ pāliyaṃ “dhammaladdhā”ti vuttaṃ. Deyyaṃ dakkhiṇeyyañca appaṭivibhattaṃ katvā bhuñjatīti **appaṭivibhattabhogī** nāma hoti. Tenāha “**dve paṭivibhattāni nāmā**”tiādi. **Cittena vibhajananti** etena cittuppādamattenapi vibhajaṇaṃ paṭivibhattaṃ nāma, pageva payogatoti dasseti. Cittena vibhajaṇapubbakaṃ vā kāyena vibhajaṇanti mūlameva dassetuṃ “**evaṃ cittaṃ vibhajana**”nti vuttaṃ. Tena cittuppādamattena paṭivibhāgo kātābboti dasseti. **Appaṭivibhattanti** bhāvanapuṃsakaniddeso, appaṭivibhattaṃ lābhaṃ bhuñjatīti kammaniddeso vā. **Taṃ neva gihīnaṃ deti** attano ājīvasodhanatthaṃ. **Na attanā paribhuñjati** “mayhaṃ asādhāraṇabhogitā mā hotū”ti. **Paṭiggaṇhanto ca...pe... passatīti** iminā āgamaṇato paṭṭhāya sādharmaṇabuddhiṃ upaṭṭhāpeti. Evaṃ hissa sādharmaṇabhogitā sukarā, sāraṇīyadhammo cassa pūro hoti.

Atha vā **paṭiggaṇhanto ca...pe... passatīti** iminā tassa lābhassa tīsu kālesu sādharmaṇato ṭhapanāṃ dassitaṃ. **Paṭiggaṇhanto ca saṅghena sādharmaṇaṃ hotūti** iminā paṭiggaṇhānakālo dassito. **Gahetvā...pe... passatīti** iminā paṭiggaṇhitakālo. Tadubhayaṃ pana tādisena pubbabhāgena vinā na hotīti atthasiddho purimakālo. Tayidaṃ paṭiggaṇhanto pubbevassa hoti “saṅghena sādharmaṇaṃ hotūti paṭiggaṇhissāmī”ti, paṭiggaṇhantassa hoti “saṅghena sādharmaṇaṃ hotūti paṭiggaṇhāmī”ti, paṭiggaṇhetvā hoti “saṅghena sādharmaṇaṃ hotūti hi paṭiggaṇhitaṃ mayā”ti. Evaṃ tilakkhaṇasampannaṃ katvā laddhaṃ lābhaṃ osāraṇalakkhaṇaṃ avikopetvā paribhuñjanto sādharmaṇabhogī appaṭivibhattabhogī ca hoti.

Imaṃ pana sāraṇīyadhammanti imaṃ catutthaṃ saritabbayuttadhamaṃ. **Na hi...pe... gaṇhanti**, tasmā sādharmaṇabhogitā dussīlassa natthīti ārambhopi tāva na sambhavati, kuto pūraṇanti adhippāyo. **Parisuddhasiloti** iminā lābhassa dhammikabhāvaṃ dasseti. **Vattaṃ akhaṇḍentoti** iminā appaṭivibhattabhogitaṃ sādharmaṇabhogitañca dasseti. Sati pana tadubhaye sāraṇīyadhammo pūrito eva

hotīti āha “**pūretī**”ti. **Odissakaṃ katvā**ti etena anodissakaṃ katvā pituno, ācariyupajjhāyādīnaṃ vā therāsanato paṭṭhāya dentassa sāraṇīyadhammoyeva hotīti dasseti. **Dātabbanti** avassaṃ dātabbaṃ. **Sāraṇīyadhammo panassa na hoti** paṭijaggaṭṭhāne odissakaṃ katvā dinnattā. Tenāha “**palibodhajagganaṃ nāma hoti**”ti. **Muttapalibodhassa vaṭṭati** amuttapalibodhassa pūretuṃ asakkuṇeyyattā. Yadi evaṃ sabbena sabbaṃ sāraṇīyadhammaṃ pūrentassa odissakadānaṃ vaṭṭati, na vaṭṭatīti? No na vaṭṭati yuttaṭṭhāneti dassento “**tena panā**”tiādīmāha. Iminā odissakadānaṃ panassa na sabbattha vāritanti dasseti. Gilānādīnañhi odissakaṃ katvā dānaṃ appaṭivibhāgapakkhikaṃ “asukassa na dassāmī”ti paṭikkhepassa abhāvato. Byatirekappadhāno hi paṭibhāgo. Tenāha “**avasesa**”ntiādi. **Adātumpīti pi**-saddena dātumpi vaṭṭatīti dasseti. Tañca kho karuṇāyanavasena, na vattaparipūraṇavasena, tasmā dussīlassapi atthikassa sati sambhave dātabbaṃ. Dānañhi nāma na kassaci nivāritaṃ.

Susikkhitāyāti sāraṇīyapūraṇavidhimhi susikkhitāya, sukusalāyāti attho. Idāni tassa kosallaṃ dassetuṃ “**susikkhitāya hī**”tiādi vuttaṃ. **Dvādasahi vassehi pūrehi, na tato oranti** iminā tassa duppūrataṃ dasseti. Tathā hi so mahapphalo mahānisaṃso diṭṭhadhammikehipi tāvagarutarehi phalānisaṃsehi anugatoti taṃsamaṅgī ca puggalo visesalābhī ariyapuggalo viya loke acchariyabbhutadhammasamannāgato hoti. Tathā hi so duppajahadānamayassa sīlamayassa puññaṃ paṭipakkhadhammaṃ sudūre vikkhambhitaṃ katvā visuddhena cetasā loke pākaṭo paññāto hutvā viharatī. Tassimamatthaṃ byatirekato anvayato ca vibhāvetuṃ “**sace hī**”tiādi vuttaṃ. Taṃ suviññeyyameva.

Idānissa samparāyike diṭṭhadhammike ca ānisaṃse dassetuṃ “**evaṃ pūritasāraṇīyadhammassā**”tiādi vuttaṃ. **Neva issā na macchariyaṃ hoti** cirakālabhāvanāya vidhutabhāvato. **Manussānaṃ piyo hoti** pariccāgasīlatāya vissutattā. Tenāha “**dadaṃ piyo hoti bhajanti naṃ bahū**”tiādi (a. ni. 5.34). **Sulabhapaccayo hoti** dānavasena ulārajjhāsāyānaṃ paccayalābhassa idhānisaṃsasabhāvato dānassa. **Pattagatamassa diyyamānaṃ na khīyati** pattagatasseva dvādasavassikassa mahāvattassa avicchedena pūritattā. **Aggabhaṇḍaṃ labhati** devasikaṃ dakkhiṇeyyānaṃ aggato paṭṭhāya dānassa dinnattā. **Bhaye vā...pe... āpajjanti** deyyappaṭiggāhakavikappaṃ akatvā attani nirapekkhacittena cirakālaṃ dānassa pūritatāya pasāritacittattā.

Tatrāti tesu ānisaṃsesu vibhāvetabbesu. **Imāni** phalāni **vatthūni** kāraṇāni. **Mahāgiriḡāmo** nāma nāgadīpapassee eko gāmo. **Alabhantāpīti** appapuññatāya alābhino samānāpi. **Bhikkhācāramaggasabhāganti** sabhāgaṃ tabbhāgiyaṃ bhikkhācāramaggaṃ jānanti. Anuttarimanussadhammattā therānaṃ saṃsayavinodanattañca “**sāraṇīyadhammo me, bhante, pūrito**”ti āha. Tathā hi dutiyavattusmimipi therena attā pakāsito. Daharakāle evaṃ kira sāraṇīyadhammapūraḡo ahoṡi. Manussānaṃ piyatāya sulabhapaccayatāyapi idaṃ vatthumeva. Pattagatākhīyanassa pana visesaṃ vibhāvanato “**idaṃ tāva...pe... ettha vatthū**”ti vuttaṃ.

Giribhaṇḡamahāpūjāyāti cetiyagirimhi sakalalaṅkādiṇe yojanappamāṇe samudde ca nāvāsāṅghāḡadike ṭhapetvā dīpapupphagandhādīhi kariyamānāya mahāpūjāya. Tassā ca paṭipattiyā avañjhabhāvavibhāvanatthaṃ “**ete mayhaṃ pāpuṇissanti**”ti āha. **Pariyāyēnapi** lesenapi. **Anucchavikanti** “sāraṇīyadhammapūraḡo”ti yathābhūtapavedanaṃ tumhākaṃ anucchavikanti attho.

Anārocetvāva palāyimsu corabhayena. “Attano dujjīvikāyā”tipi vadanti. Ahaṃ sāraṇīyadhammapūrikā, mama pattapariyāpannenapi sabbāpimā bhikkhuniyo yāpessantīti āha “**mā tumhe tesāṃ gatabhāvaṃ cintayitthā**”ti. **Vaṭṭissatīti** kappissati. **Therī sāraṇīyadhammapūrikā ahoṡi**, therassa pana sīlatejēneva devatā ussukkaṃ āpajji.

Natthi etesaṃ khaṇḡanti akhaṇḡāni. Taṃ pana nesaṃ khaṇḡaṃ dassetuṃ “**yassā**”tiādi vuttaṃ. Tattha upasampannasīlānaṃ uddesakkamena ādiantā veditabbā. Tenāha “**sattasū**”tiādi. Na hi añño koci

āpattikkhandhānaṃ anukkamo atthi, anupasampannasīlānaṃ samādānakkamenapi ādiantā labbhanti. **Pariyante chinnaṣāṭṭako viyāti** tatrante dasante vā chinnavatthaṃ viya. Visadisudāharaṇaṅcetaṃ “akhaṇḍānī”ti imassa adhikatattā. Evaṃ sesānampi udāharaṇāni. Khaṇḍikatā bhinnatā khaṇḍaṃ, taṃ etassa atthīti **khaṇḍaṃ**, sīlaṃ. **Chiddantiādīsipi** eseva nayo. **Vemajjhe bhinnaṃ** vinivijjhanavasena. Visabhāgavaṇṇena gāvī viyāti sambandho. Visabhāgavaṇṇena upaḍḍhaṃ tatiyabhāgagataṃ sambhinnavaṇṇaṃ **sabalaṃ**, visabhāgavaṇṇeheva bindūhi antarantarāhi vimissaṃ **kammāsaṃ**. Ayaṃ imesaṃ viseso. Sabalarahitāni **asabalāni**, tathā **akammāsāni**. Sīlassa taṇhādāsabyato mocanaṃ vivaṭṭupanissayabhāvāpādanaṃ, tasmā taṇhādāsabyato mocanavacanena tesam sīlānaṃ vivaṭṭupanissayatamāha. **Bhujissabhāvakarāṇatoti** iminā bhujissakarāni **bhujissānīti** uttarapadalopenāyaṃ niddesoti dasseti. Yasmā vā taṃsamaṅgipuggalo serī sayamaṃvasī bhujisso nāma hoti, tasmāpi **bhujissāni**. Aviññūnaṃ appamaṇatāya “**viññuppasatthānī**”ti vuttaṃ. Suparisuddhabhāvena vā sampannattā viññūhi pasatthānīti **viññuppasatthāni**.

Taṇhādīṭṭhihi aparāmaṭṭhattāti “imināhaṃ sīlena devo vā bhavissāmi devaṇṇataro vā”ti taṇhāparāmāseṇa, “imināhaṃ sīlena devo hutvā tattha nicco dhuvo sassato bhavissāmi”ti dīṭṭhiparāmāseṇa ca aparāmaṭṭhattā. **Parāmaṭṭhunti** “ayaṃ te sīlesu doso”ti catūsu vipattīsu yāya kāyaci vipattiyā dassanena parāmaṭṭhuṃ, anuddhamsetuṃ codetunti attho. Sīlaṃ nāma avippaṭṭisārādīpārapariyena yāvadeva samādhisampādanatthanti āha “**samādhisaṃvattanikānī**”ti. Samādhisaṃvattanappayojanāni **samādhisaṃvattanikāni**.

Samānabhāvo sāmāññaṃ, paripuṇṇacatupārisuddhibhāvena majjhe bhinnasuvaṇṇassa viya bhedābhāvato sīlena sāmāññaṃ sīlasāmāññaṃ, taṃ gato upagatoti **sīlasāmāññaḡato**. Tenāha “**samānabhāvūpagatasīlo**”ti, sīlasampattiyā samānabhāvaṃ upagatasīlo sabhāgavuttikoti attho. Kāmaṃ puthujjanānampi catupārisuddhisīle nānattaṃ na siyā, taṃ pana na ekantikaṃ, idaṃ ekantikaṃ niyatabhāvatoti āha “**natthi maggasīle nānatta**”nti. **Taṃ sandhāyetaṃ vuttanti** maggasīlaṃ sandhāya taṃ “yāni tāni sīlāni”tiādi vuttaṃ.

Yāyanti yā ayaṃ mayhaṅceva tumhākaṅca paccakkhabhūtā. **Dīṭṭhīti** maggasammādiṭṭhi. **Niddosāti** niddhutadosā, samucchinnarāgādīpāpadhammāti attho. **Niyyātīti** vaṭṭadukkhato nissarati niggacchati. Sayamaṃ niyyantīyeva hi taṃsamaṅgipuggalaṃ vaṭṭadukkhato niyyāpetīti vuccati. Yā satthu anusīṭṭhi, taṃ karotīti **takkaro**, tassa, yathānusiṭṭhaṃ paṭipajjantassāti attho. **Samānadiṭṭhibhāvanti** sadisadiṭṭhibhāvaṃ saccasampaṭivedhena abhinnadiṭṭhibhāvaṃ.

Paṭhamasāraṇīyasuttavaṇṇanā niṭṭhitā.

2. Dutiyasāraṇīyasuttavaṇṇanā

12. Dutiye **sabrahmacārīnanti** sahadhammikānaṃ. Piyamaṃ piyāyitabbakaṃ karontīti **piyakaraṇā**. Garuṃ garuṭṭhāniyaṃ karontīti **garukaraṇā**. **Saṅgaṇhanatthāyāti** saṅgahavatthuvisesabhāvato sabrahmacārīnaṃ saṅgahaṇāya saṃvattantīti sambandho. **Avivadanatthāyāti** saṅgahavatthubhāvato eva na vivadanatthāya. Sati ca avivadanahetubhūtasāṅgahakatte tesam vasena sabrahmacārīnaṃ samaggabhāvo bhedābhāvo siddhoyevāti āha “**sāmaggiyā**”tiādi.

Dutiyasāraṇīyasuttavaṇṇanā niṭṭhitā.

3. Nissāraṇīyasuttavaṇṇanā

13. Tatiye **vaḍḍhitāti** bhāvanāpāripūrivaseṇa paribrūhitā. **Punappunaṃ katāti** bhāvanāya bahulīkaraṇena aparāparaṃ pavattitā. **Yuttayānasadisā katāti** yathā yuttamājāññāyānaṃ chekena sārathinā adhiṭṭhitaṃ yathārucci pavattati, evamaṃ yathārucci pavattirahaṃ gahitā. **Vatthukatāti** vā adhiṭṭhānaṭṭhena vatthu viya katā, sabbaso upakkilesavisodhanena iddhivisesatāya pavattiṭṭhānabhāvato

suvisodhitaparissayavatthu viya katāti vuttaṃ hoti. **Adhiṭṭhitāti** paṭipakkhadūrībhāvato subhāvitabhāvena tamtamadhiṭṭhānayoḡyātāya ṭhapitā. **Samantato citāti** sabbabhāgena bhāvanūpacayaṃ gamitā. Tenāha “**upacitā**”ti. **Suṭṭhu samāraddhāti** iddhibhāvanāsikhāppattiyā sammadeva sambhāvitā. **Abhūtabyākaraṇaṃ byākaroti**ti “mettā hi kho me cetovimutti bhāvitā”tiādīnā attani avijjamānaguṇābhībyāhāraṃ byāharati. Cetovimuttisaddaṃ apekkhitvā “**nissaṭā**”ti vuttaṃ. **Puna byāpādo natthī**ti idāni mama byāpādo nāma sabbaso natthīti ṇatvā.

Balavavipassanāti bhayatupaṭṭhāne ṇāṇaṃ, ādīnavānupassane ṇāṇaṃ mucchitukamyatāṇāṇaṃ, bhaṅgaṇāṇanti catunnaṃ ṇāṇānaṃ adhivacanaṃ. Yesaṃ nimittānaṃ abhāvena arahattaphalasaṃpattiyā animittatā, taṃ dassetuṃ “**sā hī**”tiādī vuttaṃ. Tattha rāgassa nimittaṃ, rāgo eva vā nimittaṃ **rāganimittaṃ**. **Ādi**-saddena dosanimittādīnaṃ saṅgaho daṭṭhabbo. Rūpavedanādisaṅkhāranimittaṃ **rūpanimittādi**. Tesameveva niccādivasena upaṭṭhānaṃ **niccanimittādi**. Tayidaṃ nimittaṃ yasmā sabbena sabbāṃ arahattaphale natthi, tasmā vuttaṃ “sā hi...pe... animittā”ti. Nimittaṃ anussarati anugacchati ārabha pavattati sīlenāti **nimittānusārī**. Tenāha “**vuttappabhedāṃ nimittaṃ anusaraṇasabhāva**”nti.

Asmimānoti “asmī”ti pavatto attavisayo māno. **Ayaṃ nāma ahamasmīti** rūpalakkhaṇo vedanādīsu vā aññataralakkhaṇo ayaṃ nāma attā ahaṃ asmīti. Asmimāno samugghātīyati etenāti **asmimānasamugghāto**, arahattamaggo. **Puna asmimāno natthī**ti tassa anuppattidhammatāpādanaṃ kittento samugghātattameva vibhāveti.

Nissāraṇīyasuttavaṇṇanā niṭṭhitā.

4-5. Bhaddakasuttādivaṇṇanā

14-15. Catutthe āramitabbaṭṭhena vā kammaṃ ārāmo etassāti **kammārāmo**. Kamme rato na ganthadhure vipassanādhure vāti **kammarato**. **Punappunaṃ yuttoti** tapparabhāvena anu anu yutto pasuto. **Ālāpasallāpoti** itthivaṇṇapurisavaṇṇādivasena punappunaṃ lapanāṃ. Pañcame natthi vattabbaṃ.

Bhaddakasuttādivaṇṇanā niṭṭhitā.

6. Nakulapitusuttavaṇṇanā

16. Chaṭṭhe visabhāgavedanuppattiyā kakaceneva catuiriyāpathaṃ chindanto ābādhayātīti ābādho, so yassa atthīti **ābādhiko**. Taṃsamuṭṭhānadukkhena **dukkhito**. **Adhimattagilānoti** dhātusaṅkhayena parikkhīṇasarīro.

Sappaṭibhayakantārasadisā soḷasavatthukā aṭṭhavatthukā ca vicikicchā tiṇṇā imāyāti **tiṇṇavicikicchā**. Vigatā samucchinnā pavattīdīsu “evaṃ nu kho na nu kho”ti evaṃ pavattikā kathaṃkathā assāti **vigatakathaṃkathā**. Sārajjakarānaṃ pāpadhammānaṃ pahīnattā rāgavikkhepesu sīlādiguṇesu ca tiṭṭhakattā vesārajjāṃ, visāradabhāvaṃ veyyattiyāṃ pattāti **vesārajjappattā**. Attanā eva paccakkhato diṭṭhattā na paraṃ pacceti, nassa paro paccetabbo atthīti **aparappaccayā**.

Gilānā vuṭṭhitoti gilānabhāvato vuṭṭhāya ṭhito. Bhāvappadhāno hi ayaṃ niddeso. **Gilāno hutvā vuṭṭhitoti** idaṃ pana atthamattanidassanaṃ.

Nakulapitusuttavaṇṇanā niṭṭhitā.

7. Soppasuttavaṇṇanā

17. Sattame **paṭisallānā vuṭṭhitoti** ettha **paṭisallānanti** tehi tehi saddhivihārikaantevāsikaupāsakādisattehi ceva rūpārammaṇādisaṅkhārehi ca paṭinivattitvā apasakkitvā nilīyanaṃ vivecanaṃ. Kāyacittehi tato vivitto ekībhāvo pavivekoti āha “**ekībhāvāyā**”tiādi. **Ekībhāvato** ca iminā kāyavivekato vuṭṭhānamāha. **Dhammanijjhānakkhantitoti**ādinā cittavivekato. **Vuṭṭhitoti** tato duvidhavivekato bhavaṅguppattiyā sabrahmacārīhi samāgamena upeto.

Soppasuttavaṇṇanā niṭṭhitā.

8. Macchabandhasuttavaṇṇanā

18. Aṭṭhame **macchaghātakanti** macchabandhaṃ kevaṭṭaṃ. **Orabbhikādīsu urabbhā** vuccanti eḷakā, urabbhe hantīti **orabbhiko**. **Sūkarikādīsupi** eseva nayo.

Macchabandhasuttavaṇṇanā niṭṭhitā.

9. Paṭhamamaraṇassatisuttavaṇṇanā

19. Navame **evaṃnāmake gāmeti** nātikānāmakam gāmaṃ nissāya. Dvinnam cūlapitimahāpitiputtānaṃ dve gāmā, tesu ekasmiṃ gāme. Nātīnañhi nivāsaṭṭhānabhūto gāmo nātiko, nātikoyeva **nātiko** ña-kārassa na-kārādeso “animittā na nāyare”tiādīsu (visuddhi. 1.174; sam. ni. aṭṭha. 1.1.20; jā. aṭṭha. 2.2.34) viya. So kira gāmo yesaṃ tadā tesam pubbapurisena attano nātīnaṃ sādharmaṇabhāvena nivasito, tena nātikoti paññāyittha. Atha pacchā dvīhi dāyādehi dvidhā vibhajitvā paribhutto. Giṅjakā vuccati iṭṭhakā, giṅjakāhiyeva kato āvasathoti **giṅjakāvasatho**. So hi āvāso yathā sudhāparikammaṃ payojanaṃ natthi, evaṃ iṭṭhakāhi eva cinitvā chādetvā kato. Tasmim kira padese mattikā sakkharamarumpavālukādīhi asammissā kathinā saṅhasukhumā, tāya katāni kulālabhājanānīpi silāmayāni viya dalhāni. Tasmā te upāsakā tāya mattikāya dīghaputhū iṭṭhakā kāretvā ṭhapetvā ṭhapetvā dvāravātapānakavāṭatūlāyo sabbaṃ dabbasambhārena vinā tāhi iṭṭhakāhiyeva pāsādaṃ kāresuṃ. Tena vuttaṃ “**iṭṭhakāmaye pāsāde**”ti.

Rattindivanti ekarattidivam. **Bhagavato sāsananti** ariyamaggappaṭivedhāvahaṃ satthu ovādaṃ. **Bahu vata me kataṃ assāti** bahu vata mayā attahitaṃ pabbajitakiccaṃ kataṃ bhaveyya.

Tadantaranti tattakaṃ velaṃ. **Ekaṇḍapātanti** ekaṃ divasaṃ yāpanappahonakaṃ piṇḍapātaṃ. **Yāva anto pavitṭhavāto bahi nikkhamati, bahi nikkhantavāto vā anto pavisatīti** ekasseva pavesanikkhamo viya vuttaṃ, taṃ nāsikāvātabhāvasāmaññenāti daṭṭhabbaṃ.

Paṭhamamaraṇassatisuttavaṇṇanā niṭṭhitā.

10. Dutiyamaraṇassatisuttavaṇṇanā

20. Dasame **nikkhanteti** vītivatte. **Patigatāyāti** paccāgatāya, sampattāyāti attho. Tenāha “**paṭipannāyā**”ti. **So mamassa antarāyoti** yathāvuttā na kevalaṃ kālakiriyāva, mama atidullabhaṃ khaṇaṃ labhitvā tassa satthusāsanamanasikārassa ceva jīvitassa ca saggamokkhānañca antarāyo assa, bhaveyyāti attho. Tenāha “**tividho antarāyo**”tiādi. **Vipajjeyyāti** vipattiṃ gaccheyya. Satthakena viya aṅgapaccaṅgānaṃ kantanakārakā kāye sandhibandhanacchedakavātā **satthakavātā**. **Kattukamyatāchandoti** niyyānāvaho kattukamyatākusalacchando. **Payogavīriyanti** bhāvanānuyogavīriyaṃ. Na paṭivāti na paṭinivattatīti **appaṭivānī**, antarā vosānānāpajjanavīriyaṃ. Tenāha “**anukkaṇṭhanā appaṭisaṅgharaṇā**”ti.

Dutiyamaraṇassatisuttavaṇṇanā niṭṭhitā.

Sāraṇīyavaggaṇṇanā niṭṭhitā.

3. Anuttariyavaggo

1-2. Sāmakasuttādivaṇṇanā

21-22. Tatiyassa paṭhame **kevalakappanti** ettha **kevala**-saddo anavasesattho, **kappa**-saddo samantabhāvattho. Tasmā kevalakappaṃ pokkharāṇiyanti evamattho daṭṭhabbo. Anavasesaṃ pharituṃ samatthassapi obhāsassa kenaci kāraṇena ekadesapharaṇampi siyā, ayaṃ pana sabbasova pharatīti dassetuṃ samantattho kappa-saddo gahito. **Attano obhāsena pharivāti** vatthālāṅkārasarīrasamuṭṭhitena obhāsena pharivā, candimā viya ekobhāsaṃ ekapajjotaṃ karivāti attho. **Samanuñño**ti sammadeva katamanuñño. Tenāha “**samānacitto**”ti, samānajjhāsayoti attho. Dukkhaṃ vaco etasminti dubbaco, tassa kammaṃ dovacassaṃ, tassa puggalassa anādarīyavasena pavattā cetanā, tassa bhāvo atthitā **dovacassatā**. Atha vā dovacassameva **dovacassatā**. Sā atthato saṅkhārakkhandho hoti. Cetanāpadhāno hi saṅkhārakkhandho. Catunnaṃ vā khandhānaṃ apadakkhiṇaggāhitākārena pavattānaṃ etaṃ adhivacananti vadanti. Pāpā assaddhādayo puggalā etassa mittāti pāpamitto, tassa bhāvo **pāpamittatā**. Sāpi atthato dovacassatā viya daṭṭhabbā. Yāya hi cetanāya puggalo pāpamitto pāpasampavaṅko nāma hoti, sā cetanā pāpamittatā. Cattāropi vā arūpino khandhā tadākārappavattā pāpamittatā. Dutiyaṃ uttānameva.

Sāmakasuttādivaṇṇanā niṭṭhitā.

3. Bhayasuttavaṇṇanā

23. Tatiye sambhavati jātimaraṇaṃ etenāti **sambhavo**, upādānanti āha “**jātiyā ca maraṇassa ca sambhave paccayabhūte**”ti. **Anupādāti** anupādāya. Tenāha “**anupādiyivā**”ti. Jātimaraṇāni sammā khīyanti etthāti **jātimaraṇasaṅkhayo**, nibbānanti āha “**jātimaraṇānaṃ saṅkhayasaṅkhāte nibbāne**”ti. **Sabbadukkhaṃ upaccaganti** sakalampi vaṭṭadukkhaṃ atikkantā carimacittanīrodhena vaṭṭadukkhalessappi asambhavato.

Bhayasuttavaṇṇanā niṭṭhitā.

4. Himavantasuttavaṇṇanā

24. Catutthe **samāpattikusalo hotīti** samāpajjanakusalō hoti. Tenāha “**samāpajjituṃ kusalo**”ti. Tattha antogatahetuattho ṭhiti-saddo, tasmā ṭhapanakusaloti atthoti āha “**samādhim ṭhāpetuṃ sakkotīti attho**”ti. Tattha **ṭhāpetuṃ sakkotīti** sattaṭṭhaaccharāmatṭaṃ khaṇaṃ jhānaṃ ṭhāpetuṃ sakkoti adhiṭṭhānavasibhāvassa nipphāditattā. **Yathāparicchedenāti** yathāparicchinnakālena. **Vuṭṭhātuṃ sakkoti** vuṭṭhānavasibhāvassa nipphāditattā. Kallaṃ sañjātaṃ assāti kallitaṃ, tasmiṃ kallite kallitabhāve kusalo **kallitakusalo**. **Hāsetuṃ** tosetuṃ sampahaṃsetuṃ. **Kallaṃ kātunti** samādhānassa paṭipakkhadhammānaṃ dūrīkaraṇena sahakārīkāraṇānaṃca samappadhānena samāpajjane cittaṃ samatthaṃ kātuṃ. **Samādhissa gocarakusaloti** samādhismiṃ nipphādetabbe tassa gocare kammaṭṭhānasaññite pavattiṭṭhāne bhikkhācāragocare satisampajaññayogato kusalo cheko. Tenāha “**samādhissa asappāye anupakārake dhamme vajjetvā**”tiādi. **Paṭhamajjhānādisamādhim abhinīharitunti** paṭhamajjhānādisamādhim visesabhāgiyatāya abhinīharitūṃ upanetuṃ.

Himavantasuttavaṇṇanā niṭṭhitā.

5. Anussatiṭṭhānasuttavaṇṇanā

25. Pañcame **anussatikāraṇānī** anussatiyo eva diṭṭhadhammikasamparāyikādihitasukhānaṃ hetubhāvato kāraṇāni. **Nikkhantanti** nissaṭaṃ. **Muttanti** vissatṭhaṃ. **Vuṭṭhanti** apetaṃ. Sabbametaṃ vikkhambhanameva sandhāya vadati. **Gedhamhāti** pañcakāmaguṇato. **Idampīti** buddhānussativasena laddhaṃ upacārajjhānamāha. **Ārammaṇaṃ karitvāti** paccayaṃ karitvā, pādakaṃ katvāti attho.

Anussatiṭṭhānasuttavaṇṇanā niṭṭhitā.

6. Mahākaccānasuttavaṇṇanā

26. Chaṭṭhe **sambādheti** vā taṇhāsaṃkilesādīnaṃ sampīḷe saṅkare gharāvāse. **Okāsā vuccantīti** maggaphalasukhādhighamāya okāsabhāvato okāsāti vuccanti. **Okāsādhigamoti** lokuttaradhammassa adhigamāya adhigantabbaokāso. **Visujjhanatthāyāti** rāgādīhi malehi abhijjhāvisamalobhādīhi ca upakkiliṭṭhacittānaṃ visuddhatthāya. Sā panāyaṃ cittassa visuddhi sijjhamānā yasmā sokādīnaṃ anupādāya saṃvattati, tasmā vuttaṃ “**sokaparidevānaṃ samatikkamāyā**”tiādi. Tattha socanaṃ ñātibyasanādinimittaṃ cetaso santāpo antotāpo antonijjhānaṃ **soko**, ñātibyasanādinimittameva socikatā. “Kahaṃ ekaputtakā”tiādīnā (ma. ni. 2.353-354; saṃ. ni. 2.63) paridevanavasena lapanāṃ **paridevo**. **Samatikkamanatthāyāti** pahānāya. Āyatiṃ anuppajjanañhi idha samatikkamo. **Dukkhadomanassānaṃ atthaṅgamāyāti** kāyikadukkhassa ca cetasikadomanassassa cāti imesaṃ dvinnāṃ atthaṅgamāya, nirodhāyāti attho. Ñāyati nicchayena kamati nibbānaṃ, taṃ vā ñāyati paṭivijjhati etenāti **ñāyo**, ariyamaggo. Idha pana saha pubbabhāgena ariyamaggo gahitoti āha “**sahavipassanakassa maggassa adhigamanatthāyā**”ti. **Apaccayapariniḥṣāyati** anupādisesanibbānaṃ sandhāya vadati. Paccayavasena anuppannaṃ asaṅkhatāṃ amatadhātumeva. Sesamettha uttānameva.

Mahākaccānasuttavaṇṇanā niṭṭhitā.

7. Paṭhamasamayasuttavaṇṇanā

27. Sattame **vaḍḍhetīti** manaso vivaṭṭanissitaṃ vaḍḍhiṃ āvahati. **Manobhāvanīyoti** vā manasā bhāvito sambhāvito. Yañca āvajjato manasi karoto cittaṃ vinīvaraṇaṃ hoti. Imasmiṃ pakkhe kammasādhano sambhāvanattho bhāvanīya-saddo. “**Thinamiddhavinodanakammaṭṭhāna**”nti vatvā tadeva vibhāvento “**ālokasaññaṃ vā**”tiādīmāha. **Vīriyārambhavatthuādīnaṃ vāti** ettha **ādi**-saddena idha avuttānaṃ atibhojane nimittaggāhādīnaṃ saṅgaho daṭṭhabbo. Vuttañhetāṃ “cha dhammā thinamiddhassa pahānāya saṃvattanti atibhojane nimittaggāho, iriyāpathasamparivattanatā, ālokasaññaṃmanasikāro, abbhokāsavāso, kalyāṇamittatā, sappāyakathā”ti (itivu. atṭha. 111). Antarāyasaddapariyāyo idha **antarā**-saddoti āha “**anantarāyenā**”ti.

Paṭhamasamayasuttavaṇṇanā niṭṭhitā.

8. Dutiyasamayasuttavaṇṇanā

28. Aṭṭhame maṅḍalasaṅghānamālasaṅkhepena katā bhojanasālā **maṅḍalamāḷati** adhippetāti āha “**bhojanasālāyā**”ti. Sesamettha suviññeyyameva.

Dutiyasamayasuttavaṇṇanā niṭṭhitā.

9. Udāyīsuttavaṇṇanā

29. Navame diṭṭhadhammo vuccati paccakkho attabhāvoti āha “**imasmimīyeva attabhāve**”ti. **Sukhavihāratthāyāti** nikkilesatāya nirāmisena sukkena vihāratthāya. **Ālokasaññaṃ manasi karotīti**

sūriyacandapajjotamaṇiukkāvijjuādīnaṃ āloko divā rattiṅca upaladdho, yathāladdhavaseneva ālokaṃ manasi karoti, citte ṭhapeti. Tathā ca naṃ manasi karoti, yathāssa subhāvītālokakasiṇassa viya kasiṇāloko yathicchakaṃ yāvadicchakaṅca so āloko rattiyaṃ upatiṭṭhati. Yena tattha divāsaññaṃ ṭhapeti, divāriva vigatathinamiddho hoti. Tenāha “**yathā divā tathā ratti**”nti. **Divāti saññaṃ ṭhapetī** vuttanayena manasi katvā divāriva saññaṃ uppādeti. **Yathānena divā...pe... tatheva taṃ manasi karotī** yathānena divā upaladdho sūriyāloko, evaṃ rattimpi divā diṭṭhākārenea taṃ ālokaṃ manasi karoti. **Yathā canena rattim...pe... manasi karotī** yathā rattiyaṃ candāloko upaladdho, evaṃ divāpi rattim diṭṭhākārenea taṃ ālokaṃ manasi karoti, citte ṭhapeti. **Vivaṭenā**ti thinamiddhena apihittā vivaṭena. **Anonaddhenā**ti asaṅchādītena. **Sahobhāsakanti** saññaṅobhāsaṃ. Dibbacakkhuññaṃ rūpagatassa dibbassa itarassa ca dassanaṭṭhena idha ñāṇadassananti adhippetanti āha “**dibbacakkhusaṅkhātassā**”tiādi.

Uddhaṃ jīvitapariyādānāti jīvitakkhayato upari maraṇato paraṃ. **Samuggatenā**ti utṭhitena. **Dhumātattā**ti uddhaṃ uddhaṃ dhumātattā sūnattā. Setarattehi viparibhinnaṃ vimissitaṃ nīlaṃ, purimavaṇṇavipariṇāmaḥūtaṃ vā nīlaṃ vinīlaṃ, vinīlameva **vinīlakanti** ka-kārena padavaḍḍhanamāha anantantarato yathā “pītakaṃ lohita”nti. **Paṭikūlattā**ti jigucchaniyattā. Kucchitaṃ vinīlaṃ **vinīlakanti** kucchanattho vā ayaṃ ka-kāroti dassetaṃ vuttaṃ yathā “pāpako kittisaddo abhuggacchatī”ti (dī. ni. 3.316; a. ni. 5.213). **Paribhinnaṭṭhānehi** kākadhaṅkādihi. **Vissandamānaṃ pubbanti** vissavantaṃpubbaṃ, taṃ taṃ paggharantaṃpubbanti attho. **Tathābhāvanti** vissandamānapubbatāṃ.

So bhikkhūti yo “passeyya sarīraṃ sīvathikāya chaḍḍita”nti vutto, so bhikkhu. **Upasaṃharati** sadisaṃ. **Ayampi khoti**ādi upasaṃharaṅkāradassanaṃ. **Āyū**ti rūpajīvitindriyaṃ. Arūpajīvitindriyaṃ panettha viññāṇagatikameva. **Usmā**ti kammajatejo. **Evampūtikasabhāvoti** evaṃ ativiya pūtisabhāvo āyūdivigame viyāti adhippāyo. Ediso bhavissatīti evaṃbhāvīti āha “**evamevaṃ uddhumātādibhedo bhavissatī**”ti.

Luñcivā luñcivāti uppātetvā uppātetvā. **Sesāvasesamaṃsalohitayuttanti** sabbaso akkhādītattā taṃ taṃ sesena appāvasesena maṃsalohitena yuttaṃ. **Añña**na **hatthaṭṭhikanti** avisesena hatthaṭṭhikānaṃ vippakiṇṇatā jotitāti anavasesato tesāṃ vippakiṇṇataṃ dassento “**catusaṭṭhibhedampī**”tiādimāha. **Terovassikānī**ti tirovassagatāni. Tāni pana saṃvaccharaṃ vītivattāni hontīti āha “**atikkantaṃvaccharānī**”ti. Purāṇatāya ghanabhāvavigamena vicuṇṇatā idha pūtibhāvo. So yathā hoti, taṃ dassento “**abbhokāse**”tiādimāha. **Anekadhātūnanti** cakkhudhātuādīnaṃ, kāmadhātuādīnaṃ vā. **Satiyā ca ñāṇassa ca atthāyā**ti “abhikkante paṭikkante sampajānakārī hotī”tiādinā (dī. ni. 1.214; 2.376; ma. ni. 1.109) vuttāya sattaṭṭhānikāya satiyā ceva taṃsampaṃyuttañāṇassa ca atthāya.

Udāyīsuttavaṇṇanā niṭṭhitā.

10. Anuttariyasuttavaṇṇanā

30. Dasame **nihīnanti** lāmaṃ, kiliṭṭhaṃ vā. **Gāmaṃvāsikānanti** bālānaṃ. Puthujjanānaṃ idanti **pothujjanikaṃ**. Tenāha “**puthujjanānaṃ santaka**”nti, puthujjanehi sevītabbattā tesāṃ santakanti vuttaṃ hoti. **Anariyanti** na niddosaṃ. Niddosaṭṭho hi ariyaṭṭho. Tenāha “**na uttamaṃ na parisuddha**”nti. Ariyehi vā na sevītabbanti **anariyaṃ**. **Anatthasaṃhitanti** diṭṭhadhammikasaṃparāyikādivividhaviṇṇānatthasaṃhitāṃ. Tādīsaṅca atthasaṃnissitaṃ na hotīti āha “**na atthasaṃnissita**”nti. **Na vaṭṭe nibbindanattāyā**ti catusaccakammaṭṭhānābhāvato. Asati pana vaṭṭe nibbidāya virāgādīnaṃ asambhavoyevāti āha “**na virāgāyā**”tiādi.

Anuttamaṃ **anuttariyanti** āha “**etaṃ anuttara**”nti. **Hatthisminti** nimittatthe bhumanti āha “**hatthinimittaṃ sikkhitabba**”nti. Hatthivisaṃyattā hatthisaṃnissitattā ca hatthisippaṃ “hatthī”ti

gahetvā ‘‘hatthismimpi sikkhatī’’ti vuttaṃ. Tasmā hatthisippe sikkhatīti evamettha attho daṭṭhabbo. Sesapadesupi eseva nayo.

Liṅgabyattayena vibhattibyattayena **pāricariyeti** vuttanti āha ‘‘**pāricariyāya paccupaṭṭhitā**’’ti. Sesamettha suviññeyyameva.

Anuttariyasuttavaṇṇanā niṭṭhitā.

Anuttariyavaggavaṇṇanā niṭṭhitā.

4. Devatāvaggo

1-4. Sekhasuttādivaṇṇanā

31-34. Catutthassa paṭhame sekhānaṃ paṭiladdhaguṇassa parihāni nāma natthīti āha ‘‘**uparūpariguṇaparihānāyā**’’ti, uparūpariladdhabbānaṃ maggaphalānaṃ parihānāya anuppādāyāti attho. Tatiyādīni uttānatthāneva.

Sekhasuttādivaṇṇanā niṭṭhitā.

5. Vijjābhāgiyasuttavaṇṇanā

35. Pañcame sampayogavasena vijjaṃ bhajanti, sahaḥajātaaññaṃāññanissayasampayuttaatthiavigatādipaccayavasena tāya saha ekābhāvaṃ gacchantīti **vijjābhāgiyā**. Atha vā vijjābhāge vijjākoṭṭhāse vattanti vijjāsabhāgatāya tadekadese vijjākoṭṭhāse pavattantīti **vijjābhāgiyā**. Tattha vipassanāññaṃ, manomayiddhi, cha abhiññāti aṭṭha vijjā. Purimena atthena tāhi sampayuttadhammā vijjābhāgiyā. Pacchimena atthena tāsu yā kāci ekāva vijjā vijjā, sesā vijjābhāgiyā. Evaṃ vijjāpi vijjāya sampayuttadhammāpi ‘‘vijjābhāgiyā’’tveva veditabbā. Idha pana vipassanāññasampayuttā saññāva vijjābhāgiyāti āgatā, saññāsīsena sesasampayuttadhammāpi vuttā evāti daṭṭhabbaṃ. **Aniccānupassanāññāṇeti** aniccānupassanāññaṇe nissayapaccayabhūte uppannasāññā, tena sahaḥatīti attho. Sesesupi eseva nayo.

Vijjābhāgiyasuttavaṇṇanā niṭṭhitā.

6. Vivādamūlasuttavaṇṇanā

36. Chaṭṭhe **kodhanoti** kujjhanasīlo. Yasmā so appahīnakodhatāya adhigatakodho nāma hoti, tasmā ‘‘**kodhena samannāgato**’’ti āha. Upanāho etassa atthīti **upanāhī**, upanayhanasīloti vā **upanāhī**. Vivādo nāma uppajjamāno yebhuyyena paṭhamam dvinnam vasena uppajjatīti vuttaṃ ‘‘**dvinnam bhikkhūnam vivādo**’’ti. So pana yathā bahūnam anattāhāva hoti, taṃ nidassanamukhena nidassento ‘‘**katha**’’ntiādimāha. **Abbhantaraparisāyāti** parisabbhantare.

Guṇamakkhanāya pavattopi attano kāraṃ gūthena paharantiṃ gūtho viya paṭhamataram makkhetīti makkho, so etassa atthīti **makkhī**. Paḷāsātīti paḷāso, parassa guṇe ḍamsitvā viya apantēti attho. So etassa atthīti **paḷāsī**. Paḷāsī puggalo hi dutiyassa dhuraṃ na deti, samaṃ haritvā ativadati. Tenāha ‘‘**yugaggāhalakkhaṇena paḷāsena samannāgato**’’ti. Issatīti **issukī**. Maccharāyatīti maccharaṃ, taṃ etassa atthīti **maccharī**. Saṭṭhayati na sammā bhāsātīti **saṭṭho** aññathā santaṃ attānaṃ aññathā pvedanato. Māyā etassa atthī **māyāvī**. Micchā pāpikā viññugarahitā etassa diṭṭhīti **micchādiṭṭhi**, kammaṭṭhāpariyāpannāya ‘‘natthi dinna’’ntiādivatthukāya micchattāpariyāpannāya aniyyānikāya diṭṭhiyā samannāgatoti attho. Tenāha ‘‘**natthikavādī**’’tiādi.

Sam attano diṭṭhiṃ, sayam vā attanā yathāgahitaṃ parāmasati, sabhāvaṃ atikkamitvā parato āmasatīti **sandiṭṭhiparāmāsī**. Ādhānaṃ dalhaṃ gaṇhātīti **ādhānaggāhī**, dalhaggāhī, “idameva sacca”nti thiraggāhīti attho. Yuttaṃ kāraṇaṃ disvāva laddhiṃ paṭinissajjati paṭinissaggī, dukkhena kicchena kasirena bahumpi kāraṇaṃ dassetvā na sakkā paṭinissaggaṃ kātunti **duppaṭinissaggī**. Yo attano uppannadiṭṭhiṃ “idameva sacca”nti dalhaṃ gaṇhitvā api buddhādīhi kāraṇaṃ dassetvā vuccamāno na paṭinissajjati. Tassetam adhivacanaṃ. Tādiso hi puggalo yaṃ yadeva dhammaṃ vā adhammaṃ vā suṇāti, taṃ sabbaṃ “evaṃ amhākaṃ ācariyehi kathitaṃ, evaṃ amhehi suta”nti kummova aṅgāni sake kapāle antoyeva samodahati. Yathā hi kacchapo attano hatthapādādiṅge aṅge kenaci ghaṭite sabbāni aṅgāni attano kapāleyeva samodahati, na bahi nīharati, evamayampi “na sundaro tava gāho, chaḍḍehi na”nti vutto taṃ na vissajjati, antoyeva attano hadaye eva ṭhapetvā vicarati, kumbhīlaggāhaṃ gaṇhāti. Yathā susumārā gahitaṃ na paṭinissajjanti, evaṃ gaṇhāti.

Vivādamūlasuttavaṇṇanā niṭṭhitā.

7. Chaḷaṅgadānasuttavaṇṇanā

37. Sattame dakkhanti vaḍḍhanti etāyāti **dakkhiṇā**, pariccāgamayaṃ puññaṃ, tassūpakaraṇabhūto deyyadhammo ca. Idha pana deyyadhammo adhippeto. Tenevāha “**dakkhiṇaṃ patiṭṭhāpeti**”ti. **Ito uṭṭhitenāti** ito khettato uppanna. Rāgo vinayati etenāti **rāgavinayo**, rāgassa samucchedikā paṭipadā. Tenāha “**rāgavinayaṃ paṭipadaṃ paṭipannā**”ti.

“**Pubbeva dānā sumano**”tiādigāthāya pubbeva dānā muñcacetanāya pubbe dānūpakaraṇasambharaṇato paṭṭhāya sumano “sampattīnaṃ nidānaṃ anugāmikadānaṃ dassāmī”ti somanassito bhaveyya. **Dadaṃ cittaṃ pasādayeti** dadanto deyyadhammaṃ dakkhiṇeyyahatthe patiṭṭhāpento “asārato dhanato sārādānaṃ karomī”ti attano cittaṃ pasādeyya. **Datvā attamano hotīti** dakkhiṇeyyānaṃ deyyadhammaṃ pariccajivā “paṇḍitapaññattaṃ nāma mayā anuṭṭhitaṃ, aho sādhu suṭṭhū”ti attamano pamudito pītisomanassajāto hoti. **Esāti** yā ayaṃ pubbacetanā muñcacetanā aparacetanāti imāsaṃ kammaphalānaṃ saddhānugātānaṃ somanassapariggahitānaṃ tividdhānaṃ cetanānaṃ pāripūrī, esā.

Sīlasaññamenāti kāyikavācasikasamvarena. **Hatthapādeti** dakkhiṇeyyānaṃ hatthapāde. **Mukhaṃ vikkhāletvāti** tesamyeva mukhaṃ vikkhāletvā, attanāva mukhodakaṃ datvāti adhippāyo.

Chaḷaṅgadānasuttavaṇṇanā niṭṭhitā.

8-11. Attakārīsuttādivaṇṇanā

38-41. Aṭṭhame kusalakiriyāya ādiārambhabhāvena pavattavīriyaṃ ṭhitasabhāvatāya sabhāvadhāraṇaṭṭhena dhātūti vuttanti āha – “**ārambhadhātūti ārabhanavasena pavattavīriya**”nti. Laddhāsevanaṃ vīriyaṃ balappattaṃ hutvā paṭipakkhe vidhamatīti āha “**nikkamadhātūti kosajjato nikkhamanasabhāvaṃ vīriya**”nti. **Parakkamanasabhāvoti** adhimattatarānaṃ paṭipakkhadhammānaṃ vidhamanasamatthatāya paṭupaṭutarabhāvena paraṃ paraṃ ṭhānaṃ akkamanasabhāvo. Navamādīsu natthi vattabbaṃ.

Attakārīsuttādivaṇṇanā niṭṭhitā.

12. Nāgitasuttavaṇṇanā

42. Dvādasame **māhaṃ nāgita yasena samāgamanti** mā ahaṃ yasena samāgamaṃ patthemī. **Mā ca mayā yasoti** yaso ca mayā mā samāgacchatūti attho. Iminā attano lābhasakkārena anattikataṃ

vibhāveti. **Pañcahi vimuttīhīti** tadanāvavimuttiādīhi pañcahi vimuttīhi. Sesamettha uttānameva.

Nāgitasuttavaṇṇanā niṭṭhitā.

Devatāvaggavaṇṇanā niṭṭhitā.

5. Dhammikavaggo

1. Nāgasuttavaṇṇanā

43. Pañcamassa paṭhame **parisiñcītunti** (ma. ni. aṭṭha. 1.272) yo cuṇṇamattikādīhi gattāni ubbaṭṭento mallakamuṭṭhādīhi vā ghaṃsanto nahāyati, so “nahāyati”ti vuccati. Yo tathā akatvā pakatiyāva nahāyati, so “parisiñcati”ti vuccati. Bhagavato ca sarīre tathā haritabbaṃ rajojallaṃ nāma nupalimpati acchachavibhāvato, utuggahaṇatthaṃ pana bhagavā kevalaṃ uduke otarati. Tenāha “**gattāni parisiñcītu**”nti.

Pubbakoṭṭhakoti pācīnakoṭṭhako. Sāvattiyāṃ kira jetavanavīhāro kadāci mahā, kadāci khuddako. Tathā hi so vipassissa bhagavato kāle yojaniko ahoṣi, sikkhissa tigāvuto, vessabhussa aḍḍhayaṇjaniko, kakusandhassa gāvutappamāṇo, koṇāgamanassa aḍḍhagāvutappamāṇo, kassapassa vīsatiusabhappamāṇo, amhākaṃ bhagavato kāle aṭṭhakarīsappamāṇo jāto. Tampi nagaraṃ tassa vihārassa kadāci pācīnato hoti, kadāci dakkhiṇato, kadāci pacchimoto, kadāci uttarato. Jetavanagandhakuṭiyāṃ pana catunnaṃ mañcapādānaṃ paṭiṭṭhitaṭṭhānaṃ acalameva. Cattāri hi acalacetiyatṭhānāni nāma mahābodhipallāṅkaṭṭhānaṃ, isipatane dhammacakkappavattanaṭṭhānaṃ, saṅkassanagare devorohanakāle sopānassa paṭiṭṭhānaṭṭhānaṃ, mañcapādaṭṭhānanti. Ayaṃ pana pubbakoṭṭhako kassapadasabalassa vīsatiusabhavīhārakāle pācīnadvārakoṭṭhako ahoṣi. So idāni “pubbakoṭṭhako”tveva paññāyati.

Kassapadasabalassa kāle aciravatī nagaraṃ parikkhipitvā sandamānā pubbakoṭṭhakaṃ patvā udakena bhinditvā mahantaṃ udakarahadaṃ māpesi samatittikaṃ anupubbagambhīraṃ. Tattha ekaṃ rañño nhānatitthaṃ, ekaṃ nāgarānaṃ, ekaṃ bhikkhusaṅghassa, ekaṃ buddhānanti evaṃ pāṭiekkāni nhānatitthāni honti ramaṇīyānivippakiṇṇarajatapaṭṭasadisavālukāni. Iti bhagavatā āyasmatā ānandena saddhiṃ yena ayaṃ evarūpo pubbakoṭṭhako, tenupasaṅkami gattāni parisiñcītuṃ. Athāyasmā ānando udakasāṭikaṃ upanāmesi. Bhagavā surattadupaṭṭaṃ apanetvā udakasāṭikaṃ nivāsesi. Thero dupaṭṭena saddhiṃ mahācīvaraṃ attano hatthagataṃ akāsi. Bhagavā udakaṃ otari, sahotaraṇevassa uduke macchakacchapā sabbe suvaṇṇavaṇṇā ahesuṃ, yantanālikāhi suvaṇṇarasadhārāni siñcanakālo viya suvaṇṇapaṭappasāraṇakālo viya ca ahoṣi. Atha bhagavato nahānavattaṃ dassetvā paccuttiṇṇassa thero surattadupaṭṭaṃ upanāmesi. Bhagavā taṃ nivāsetvā vijjullatāsadiṣaṃ kāyabandhanaṃ bandhitvā mahācīvaraṃ antantena saṃharitvā padumagabbhasadiṣaṃ katvā upanītaṃ dvīsu kaṇṇesu gahetvā aṭṭhāsi. Tena vuttaṃ “**pubbakoṭṭhake gattāni parisiñcītvā ekacīvaro aṭṭhāsi**”ti.

Evaṃ ṭhitassa pana bhagavato sarīraṃ vikasitapadumapupphasadiṣaṃ sabbapāliphullaṃ pāricchattaṃ, tārāmarīcivikasitañca gaganatalaṃ siriyā avahasamānaṃ viya virocittha, byāmapabhāparikkhepavilāsinī cassa dvattiṃsavaraṅkhaṇamālā ganthitvā ṭhapitā dvattiṃsa candimā viya, dvattiṃsa sūriyā viya, paṭipāṭiyā ṭhapitadvattiṃsacakkavattidvattiṃsadevarājadvattiṃsamahābrahmāno viya ca ativiya virocittha. Yasmā ca bhagavato sarīraṃ sudhantaṅgānīkarasamānavāṇṇaṃ, suparisodhitapavāḷaruciroraṇaṃ, suvisuddhanīlaratanāvalisadisakesatanuruhaṃ, tasmā taṃ taṃ viniggatasujātajātihiṅgulakarasūpasobhitaṃ upari satamegharatanāvalisucchāditāṃ jaṅgamamiva kanakagirisikharaṃ virocittha. Tasmīñca samaye dasabalassa sarīrato nikkhamitvā chabbaṇṇarasmiyo samantato asītihatthappamaṇe padese ādhāvanti vidhāvanti

ratanāvaliratanadāmaratanacuṇṇavippakiṇṇaṃ viya pasāritaratanacittakañcanapaṭṭamiva āsiñcamānalākhārasadhārācittamiva ukkāsataniṭṭasamākulamiva nirantaravippakiṇṇakaṇikārakiṇṇikāpupphamiva vāyuvegasamuddhatacinapiṭṭhacuṇṇarañjitamiva indadhanuvijjullatāvītānasanthatamiva ca gaganatalaṃ, taṃ ṭhānaṃ pavanañca sammā pharanti. Vaṇṇabhūmi nāmesā. Evarūpesu ṭhānesu buddhānaṃ sarīravannaṃ vā guṇavannaṃ vā cuṇṇiyapadehi vā gāthāhi vā atthañca upamāyo ca kāraṇāni ca āharitvā paṭibalena dhammakathikena pūretvā kathetum vaṭṭati. Evarūpesu hi ṭhānesu dhammakathikassa thāmo vedītabbo. **Pubbasadisāni kurumānoti** nirudakāni kurumāno, sukkhāpayamānoti attho. Sodake gatte cīvaraṃ pārupantassa hi cīvare kaṇṇikāni utṭhahanti, parikkhārabhaṇḍaṃ dussati, buddhānaṃ pana sarīre rajojallaṃ na upalimpati, padumapatte ukkhittaudakabindu viya udakaṃ vinivaṭṭetvā gacchati. Evaṃ santepi sikkhāgāravatāya bhagavā “pabbajitavattaṃ nāmeta”nti mahācīvaraṃ ubhosu kaṇṇesu gahetvā purato kāyaṃ paṭicchadetvā atṭhāsi.

Tālitañca vāditañca tālītavāditaṃ, tūriyānaṃ tālītavāditaṃ tūriyatālītavāditaṃ. Mahantañca taṃ tūriyatālītavāditañcāti **mahātūriyatālītavāditaṃ**. Tenāha “**mahantenā**”tiādi. Atha vā bherimudīngapaṇavādītūriyānaṃ tālītaṃ vīṇāveḷugomukhiādīnaṃ vāditañca **tūriyatālītavādīnti** vā evamettha attho daṭṭhabbo.

Abhiññāpāraṃ gatoti **abhiññāpāragū**. Evaṃ sesesupi. So hi bhagavā sabbadhamme abhijānanto gatoti **abhiññāpāragū**. Tesu pañcupādānakkhandhe pariānanto gatoti **pariññāpāragū**. Sabbakilese pajahanto gatoti **pahānapāragū**. Cattāro magge bhāvento gatoti **bhāvanāpāragū**. Nirodhaṃ sacchikaronto gatoti **sacchikiriyāpāragū**. Sabbasamāpattim samāpajjanto gatoti **samāpattipāragū**. **Subrahmadevaputtādayoti** ettha so kira devaputto accharāsaṅghaparivuto nandanakīlītaṃ katvā pārīcchattakamūle paññattāsane nisīdi. Taṃ pañcasatā parivāretvā nisinnā, pañcasatā rukkhaṃ abhiruhitvā madhurassarena gāyitvā pupphāni pātentī. Tāni gahetvā itarā ekatovaṇṭikamālāva ganthenti. Atha rukkhaṃ abhiruḷhā upacchedakavasena ekappahāreneva kālaṃ katvā avīcimhi nibbattā mahādukkhaṃ anubhavanti. Atha kāle gacchante devaputto “imāsaṃ neva saddo suyayati, na pupphāni pātentī, kahaṃ nu kho gatā”ti āvajjento niraye nibbattabhāvaṃ disvā piyavatthukasokena ruppamāno cintesi – “etā tāva yathākammena gatā, mayhaṃ āyusañkhāro kittako”ti. So “sattame divase mayāpi avasesāhi pañcasatāhi saddhiṃ kālaṃ katvā tattheva nibbattitabba”nti disvā balavatarena sokena samappito. “Imaṃ mayhaṃ sokaṃ sadevake loke aññātra tathāgatā nibbāpetuṃ samattho natthī”ti cintetvā satthu santikaṃ gantvā vanditvā ekamantaṃ ṭhito –

“Niccaṃ utrastamidaṃ cittaṃ, niccaṃ ubbiggamidaṃ mano;
Anuppannesu kicchesu, atho uppatitesu ca;
Sace atthi anutrastaṃ, taṃ me akkhāhi pucchito”ti. (saṃ. ni. 1.98) –

Imaṃ gāthamabhāsi. Bhagavāpissa –

“Nāññātra bojjhā tapasā, nāññātrindriyasamvarā;
Nāññātra sabbanissaggā, sotthim passāmi paṇina”nti. (saṃ. ni. 1.98) –

Dhammaṃ desesi. So desanāpariyosāne vigatasoko pañcahi accharāsatehi saddhiṃ sotāpattiphale patiṭṭhāya bhagavantaṃ namassamāno atṭhāsi. Taṃ sandhāyetaṃ vuttaṃ “**dukkhappattā subrahmadevaputtādayo**”ti. **Ādi**-saddena candasūriyadevaputtādayo saṅgaṇhāti. **Catūhi kāraṇehīti** ārakattā, arīnaṃ arānañca hatattā, paccayādīnaṃ arahattā, pāpakaraṇe rahābhāvāti imehi catūhi kāraṇehi.

Dasavidhasaṃyojanānīti orambhāgiyuddhambhāgiyabhedato dasavidhasaṃyojanāni. **Sabbe accarucīti** sabbasatte atikkamitvā pavattaruci. **Aṭṭhamakanti** sotāpattimaggatṭhaṃ sandhāya vadati. **Sotāpannoti** phalaṭṭho gahito.

Soraccanti “tatha katamaṃ soraccaṃ? Yo kāyiko avītikkamo, vācasiko avītikkamo, kāyikavācasiko avītikkamo, idaṃ vuccati soraccaṃ, sabbāpi sīlasaṃvaro soracca”nti (dha. sa. 1349) vacanato sucisīlaṃ “soracca”nti vuttaṃ. **Karuṇāti** karuṇābrahmavihāramāha. **Karuṇāpubbabhāgoti** tassa pubbabhāgaṃ upacārajjhānaṃ vadati.

Duvidhena jhānenāti ārammaṇūpanijjhānalakkhaṇūpanijjhānabhedato duvidhena jhānāmanena. **Pañcavidhamicchājīvavasenāti** kuhanālapānānemittikatānippesikatālābhenalābhaṃnījigīsanatāsāṅkhāta- pañcavidhamicchājīvavasena. **Na lippatīti** na allīyati anusayato ārammaṇakaraṇato vā taṇhādīṭṭhiabhinivesābhāvato. Sesametta uttānameva.

Nāgasuttavaṇṇanā niṭṭhitā.

2. Migasālāsuttavaṇṇanā

44. Dutiye **samasamagatiyāti** ka-kārassa ya-kāravasena niddesoti āha “**samabhāvene**va **samagatikā**”ti. **Bhavissantīti** atītatthe anāgatavacanaṃ katanti āha “**bhavissantīti jātā**”ti. Purāṇassa hi isidattassa ca samagatikam sandhāya sā evamāha.

Ammakāti mātuḡāmo. Upacāravacanañhetam. Itthīsu yadidaṃ ammakā mātuḡāmo janānī janikāti. Tenāha “**itthī hutvā itthisaññāya eva samannāgatā**”ti.

Dīṭṭhiyā paṭivijjhitabbaṃ appaṭividdhaṃ hotīti atthato kāraṇato ca paññāya paṭivijjhitabbaṃ appaṭividdhaṃ hoti, nijjaṭam nigḡumbaṃ katvā yāthāvato aviditaṃ hoti. Samaye samaye kilesehi vimuccanakam pītipāmojjaṃ idha **sāmāyikam** ma-kāre akārassa dīgham katvā. Tenāha – “**sāmāyikampi vimuttiṃ na labhatīti kālānukālam dhammassavanaṃ nissāya pītipāmojjaṃ na labhatī**”ti. **Pamiṇantīti** ettha ārambhattho pa-saddoti āha “**tuletum ārabhantī**”ti. **Paṇītoti** visiṭṭho.

Tadantaranti vacanavipallāsenā upayogathe sāmivacanaṃ katanti āha “**taṃ antaram taṃ kāraṇa**”nti. Lobhassa aparāparuppattiyā bahuvacanavasena “**lobhadhammā**”ti vuttā. **Sīlena visesī aho**si methunadhammaviratīyā samannāgatattā.

Migasālāsuttavaṇṇanā niṭṭhitā.

3-6. Iṇasuttādivaṇṇanā

45-48. Tatiye daliddo nāma duggato, tassa bhāvo **dāliddiyam**. Na etassa sakaṃ sāpateyyanti **assako**, asāpateyyo. Tenāha “**attano santakena rahito**”ti. “Buddho dhammo saṅgho”ti vutte “sammāsambuddho bhagavā, svākkhāto dhammo, suppaṭipanno saṅgho”ti kenaci akampiyabhāvena okappanaṃ ratanattayaḡe ogāhetvā kappanaṃ **okappanasaddhā** nāma. “Idaṃ akusalaṃ kammaṃ no sakaṃ, idaṃ pana kammaṃ saka”nti evaṃ byatirekato anvayato ca kammassakatajānanapaññā **kammassakatapaññā**. Tividhañhi duccharitaṃ attanā katampi sakakammaṃ nāma na hoti atthabhañjanato. Sucaritaṃ sakakammaṃ nāma atthajananato. **Iṇādānasminti** paccattavacanatthe etaṃ bhummanti āha “**iṇaggahaṇam vadāmī**”ti.

Kaṭaggāhoti kataṃ sabbaso siddhameva katvā gahaṇam. So pana vijjalābho hotīti āha “**jayaggāho**”ti. Hirimano etassāti **hirimanoti** āha “**hirisampayuttacitto**”ti, pāpajigucchānalakkhaṇāya hiriyā sampayuttacittoti attho. Ottappati ubbijjati bhāyati sīlenāti **ottappī**, ottappena samannāgato. **Nirāmisam sukhanti** tatiyājjhānasukham dūrasamussāritakāmāmisattā. **Upekkhanti** catutthājjhānupekkham, na yaṃ kiñci upekkhāvedananti āha “**catutthājjhānupekkha**”nti.

Āraddhavīriyoti paggahitaparipunnakāyikacetāsikavīriyoti attho. Yo gaṇasaṅgaṇikaṃ vinodetvā catūsu iriyāpathesu aṭṭhārambhavatthuvāsena ekako hoti, tassa kāyikaṃ vīriyaṃ āraddhaṃ nāma hoti. Cittasaṅgaṇikaṃ vinodetvā aṭṭhasamāpattivasena ekako hoti. Gamane uppannakilesassa ṭhānaṃ pāpuṇitū na deti, ṭhāne uppannakilesassa nisajjaṃ, nisajjāya uppannakilesassa sayanaṃ pāpuṇitū na deti, uppannaṭṭhāneyeva kilese niggaṇhāti. Ayaṃ cetāsikaṃ vīriyaṃ āraddhaṃ nāma hoti. Paṭipakkhadūrībhāvena seṭṭhaṭṭhena ca eko udetūti ekodi, ekaggaṭā. Tassa yogato ekaggacitto idha **ekodi**. Paṭipakkhato attānaṃ nipāti, taṃ vā nipayati visoseṭṭi **nipako**. Aññataraṃ kāyādibhedam ārammaṇaṃ sātisaṃyāya satiyā saraṭṭi **sato**. Tenāha “**ekaggacitto**”tiādi.

Akuppā me vimuttīti mayhaṃ arahattaphalavimutti akuppatāya akuppārammaṇatāya ca akuppā. Sā hi rāgādīhi na kuppatīti akuppatāyapi akuppā. Akuppaṃ nibbānamassā ārammaṇanti akuppārammaṇatāyapi akuppā. Tenevāha “**akuppārammaṇattā**”tiādi. **Bhavasamyojanānanti** kāmarāgapaṭiḡhamānadiṭṭhivicikicchāsīlabbataparāmāsabhavarāgaissāmacchariya- avijjāsāṅkhātānaṃ dasannaṃ samyojanānaṃ. Imāni hi satte bhavesu samyojenti upanibandhanti bhavābhavena samyojenti, tasmā bhavasamyojanānīti vuccanti. **Khīṇāsavo uttamaṇaṇo** kilesaīṇānaṃ abhāvato. Aññe hi sattā yāva na kilesā pahīyanti, tāva saīṇā nāma aserivihārabhāvato. Catutthādīni uttānatthāni.

Īnasuttādivaṇṇanā niṭṭhitā.

7. Khemasuttavaṇṇanā

49. Sattame **vutthabrahmacariyavāso**ti nivutthabrahmacariyavāso. **Katakarāṇīyoti** ettha **karāṇīyanti** pariññāpahānabhāvanāsacchikiriyamāha. Taṃ pana yasmā catūhi maggehi paccekaṃ catūsu saccesu kattabbattā soḷasavidhaṃ veditabbaṃ. Tenāha “**catūhi maggehi kattabba**”nti. Khandhakilesaabhisaṅkhārasāṅkhātā tayo osīdāpanaṭṭhena bhārā viyāti bhārā. Te ohitā oropitā nikkhittā pātītā etenāti **ohitabhāro**. Tenāha “**khandhabhāraṃ...pe... otāretvā ṭhito**”ti. Anuppatto sadatthanti **anuppattasadattho**. **Sadatthoti** ca sakatthamāha ka-kārassa da-kāraṃ katvā. Ettha hi arahattaṃ attano yonisomanasikārāyattattā attūpanibandhaṭṭhena sasantānapariyāpannattā attānaṃ avijahanaṭṭhena attano uttamatthena ca attano atthattā “sakattho”ti vuccati. Tenāha “**sadattho vuccati arahatta**”nti. **Sammadaññā vimuttoti** sammā aññāya vimutto, acchinnabhūtāya maggapaññāya sammā yathābhūtaṃ dukkhādīsū yo yathā jānitabbo, tathā jānitvā vimuttoti attho. Tenāha “**sammā hetunā**”tiādi. **Vimuttoti** ca dve vimuttiyo sabbassa cittasaṃkilesassa maggo nibbānādhimutti ca. Nibbāne adhimuccanaṃ tattha ninnapaṇapabbhāratāya. Arahā sabbakilesehi vimuttacittattā cittavimuttiyā vimutto. Nibbānaṃ adhimuttattā nibbāne vimutto. Sesamettha uttānameva.

Khemasuttavaṇṇanā niṭṭhitā.

8. Indriyasamvarasuttavaṇṇanā

50. Aṭṭhame upanisīdati phalaṃ etthāti kāraṇaṃ **upanisā**. **Yathābhūtaññadassananti** yathāsabhāvajānanasaṅkhātānaṃ dassanaṃ. Etena taruṇavipassanaṃ dasseti. Taruṇavipassanā hi balavavipassanāya paccayo hoti. **Taruṇavipassanā**ti nāmarūpapariggāhe ñānaṃ, paccayapariggāhe ñānaṃ, sammasane ñānaṃ, maggāmagge vavatthapetvā ṭhitaññanti catunnaṃ ñānaṃ adhivacanaṃ. Nibbindati etāyāti **nibbidā**. **Balavavipassanā**ti bhayatupaṭṭhāne ñānaṃ ādīnavānupassane ñānaṃ muccitukamyatāññānaṃ saṅkhārupekkhāññanti catunnaṃ ñānaṃ adhivacanaṃ. Paṭisaṅkhānupassanā pana muccitukamyatāpakkhikā eva. “Yāva maggāmaggaññadassanavisuddhi, tāva taruṇavipassanā”ti hi vacanato upakkilesavimuttaudayabbayaññato balavavipassanā. Virajjati ariyo saṅkhārato etenāti **virāgo**, ariyamaggo. **Arahattaphalanti** ukkaṭṭhaniddesato vuttaṃ. Indriyasamvarassa silarakkhaṇahetuttā vuttaṃ “**sīlānurakkhaṇaīndriyasamvaro kathito**”ti.

Indriyasamvarasuttavaṇṇanā niṭṭhitā.

9. Ānandasuttavaṇṇanā

51. Navame **therā bhikkhū viharanti bahussutā āgatāgamā**tiādipālipadesu imināva nayena attho daṭṭhabbo – silādiguṇānaṃ thirabhāvappattiyā **therā**. Suttageyyādi bahu sutama etesanti **bahussutā**. Vācuggatadhāraṇena sammadeva garūnaṃ santike āgamitabhāvena āgato pariyattidhammasaṅkhāto āgamo etesanti **āgatāgamā**. Suttātidhammasaṅkhātassa dhammassa dhāraṇena **dhammadharā**. Vinayadhāraṇena **vinayadharā**. Tesameva dhammavinayānaṃ mātikāya dhāraṇena **mātikādhara**. Tattha tattha dhammaparipucchāya **paripucchati**. Taṃ atthaparipucchāya **paripaṇhāti** vīmaṃsati vicāreti. **Idaṃ, bhante, kathaṃ, imassa kvatthoti** paripucchanaṃ paṇhanākāradassanaṃ. **Āvivaṇṇa**ṇeva pāliya atthama padasantarapālidassanaṃ āgamato **vivaranti**. **Anuttānikataṇca** yuttivibhāvanaṃ **uttānikaronti**. **Kaṅkhāṭṭhānīyesu dhammesu** saṃsayuppattiyā hetuyā gaṇṭhiṭṭhānabhūtesu pālipadesu yāthāvato vinicchayaḍānaṃ **kaṅkhaṃ paṭivinodenti**.

Ānandasuttavaṇṇanā niṭṭhitā.

10. Khattiyasuttavaṇṇanā

52. Dasame bhoge adhippāyo etesanti **bhogādhippāyā**. Paññatthāya etesama mano upavicaratīti **paññūpavicārā**. Pathaviyā ḍayattāya vā cittaṃ abhiniveso etesanti **pathavībhinivesā**. Mantā adhiṭṭhānaṃ paṭiṭṭhā etesanti **mantādhīṭṭhānā**. Iminā nayena sesapadānīpi veditabbāni. Sesama uttānameva.

Khattiyasuttavaṇṇanā niṭṭhitā.

11. Appamādasuttavaṇṇanā

53. Ekādasame **jaṅgalānanti** ettha yo nipicchalo na anūpo nirudakatāya thaddhalūkho bhūmippadeso, so “jaṅgalo”ti vuccati. Tabbahulatāya pana idha sabbo bhūmippadeso jaṅgalo. Tasmīṃ jaṅgale jātā bhavāti vā jaṅgalā, tesama **jaṅgalānaṃ**. Evañhi nadicarānāma hatthīnaṃ saṅgaho kato hoti samodhātābānaṃ viya samodhāyakānāma idha jaṅgalaggahaṇena gahetabbato. **Pathavītalacārīnanti** iminā jalacārīno ca nivatteti adissamānapādatā. “**Pāṇāna**”nti sādharāṇavacanāma “**padajātānī**”ti saddantarasaṇnidhānaṃ viyesaniviṭṭhameva hotīti āha “**sapāḍakapāṇāna**”nti. “Muttagata”ntiāḍisu (ma. nī. 2.119; a. nī. 9.11) gata-saddo viya idha **jāta**-saddo anattantaroṭi āha “**padajātānīti padānī**”ti. **Samodhānanti** samavarodhama, antogadhama vā. Tenāha “**odhānaṃ upanikkhepaṃ gacchantī**”ti. **Kūṭaṅgamā**ti pārimantena kūṭama upagacchanti. **Kūṭaninnā**ti kūṭacchiddamaḡge pavisaṇavasena kūṭe ninnā. **Kūṭasamosaraṇā**ti chidde anupavisaṇavasena ca āhacca avatthānaṃ ca kūṭe samodahitvā ṭhitā. Vaṇṭe patamāne sabbāni bhūmīyama patantīti āha “**vaṇṭānuvattakāni bhavantī**”ti.

Appamādasuttavaṇṇanā niṭṭhitā.

12. Dhammikasuttavaṇṇanā

54. Dvādasame **jātibhūmīyanti** ettha janamaṃ jāti, jātiyā bhūmi **jātibhūmi**, jātaṭṭhānaṃ. Taṃ kho panetaṃ neva kosalamahārājāḍīnaṃ, na caṅkibrāhmaṇāḍīnaṃ, na sakkasuyāmasantusitāḍīnaṃ, na asīṭimahāsāvākānaṃ, na añṇesaṃ sattānaṃ “jātibhūmī”ti vuccati. Yassa pana jātaḍivase dasasahassī lokadhātu ekadhajamaḡāvippakiṇṇakusumavāsacuṇṇagaṇasugandhā sabbapālipullama vi nandanavanaṃ virocamaṇā paduminipaṇṇe udakabindu viya akampittha, jaccandhāḍīnaṃ rūpadassaṇāḍīni anekāni pāṭihāriyāni pavattīmsu. Tassa sabbaññubodhisattassa jātaṭṭhānaṃ, sātisa yassa pana janakapilavatthusannaṃsayo “jātibhūmī”ti vuccati. **Jātibhūmakā upāsakā**ti jātibhūmivāsīno upāsakā. Santanetvā sabbaso tanetvā pattharivā ṭhitamaḡlāni **mūlasantānakāni**. Tāni pana atthato

mūlāniyevāti āha “**mūlasantānakānanti mūlāna**”nti.

Jātaḍivase āvudhānaṃ jotitattā, rañño aparimitassa ca sattakāyassa anathato paripālanasamatthatāya ca “jotipālo”ti laddhanāmattā vuttaṃ “**nāmena jotipālo**”ti. **Govindoti** govindiyābhisekena abhisitto, govindassa thāne thapanābhisekena abhisittoti attho. Taṃ kira tassa brāhmaṇassa kulaparamparāgatam thānantaram. Tenāha “**thānena mahāgovindo**”ti. Gavama paññañca vindati paṭilabhatīti govindo, mahanto govindoti **mahāgovindo**. Goti hi paññāyetaṃ adhivacanama “gacchati atthe bujhatī”ti katvā. Mahāgovindo ca amhākaṃ bodhisattoyeva. So kira disampatissa nāma rañño purohitassa govindabrāhmaṇassa putto hutvā attano pitussa ca rañño ca accayena tassa putto reṇu, sahāyā cassa sattabhū, brahmadatto, vessabhū, bharato, dve dhataratthāti ime satta rājāno yathā aññamaññaṃ na vivadanti. Evaṃ rajje patiṭṭhāpetvā tesama atthadhamme anusāsante jambudīpatale sabbesama rājāva raññaṃ, brahmāva brāhmaṇānaṃ, devova gahapatikānaṃ sakkato garukato mānito pūjito apacito uttamagāravatthānaṃ ahoṣi. Tena vuttaṃ “**reṇuādīnaṃ sattanaṃ rājūnaṃ purohito**”ti. Imeva satta bhāradhārā mahārājāno. Vuttañhetama –

“Sattabhū brahmadatto ca, vessabhū bharato saha;
Reṇu dve ca dhataratthā, tadāsum satta bhāradhā”ti. (dī. ni. aṭṭha. 2.308);

Rañño diṭṭhadhammikasamparāyikatthānaṃ puro vidhānato pure samvidhānato **purohito**. **Kodhāmagandhenā**ti kodhasankhātena pūtigandhena. Karuṇā assa atthīti **karuṇanti** sapubbabhāgakarūṇajjhānaṃ vuttanti āha “**karuṇāya ca karuṇāpubbabhāge ca thitā**”ti. Yakāro sandhivasena āgatoti āha “**yeteti ete**”ti. **Arahattato paṭṭhāya sattamoti** sakadāgāmī. **Sakadāgāmiṃ upādāyāti** sakadāgāmi bhāvaṃ paṭicca. Sakadāgāmiṃ hi pañcīndriyāni sakadāgāmi bhāvaṃ paṭicca mudūni nāma honti. Sesamettha suviññeyyameva.

Dhammikasuttavaṇṇanā niṭṭhitā.

Dhammikavaggavaṇṇanā niṭṭhitā.

Paṭhamapaṇṇāsakaṃ niṭṭhitam.

2. Dutiyapaṇṇāsakaṃ

6. Mahāvaggo

1. Soṇasuttavaṇṇanā

55. Chaṭṭhassa paṭhame **nisīdi bhagavā paññatte āsaneti** ettha kiṃ taṃ āsanaṃ paṭhamameva paññattaṃ, udāhu bhagavantaṃ disvā paññattanti ce? Bhagavato dharamānakāle padhānikabhikkhūnaṃ vattametaṃ, yadidaṃ attano vasanaṭṭhāne buddhāsanama paññāpetvāva nisīdananti dassento āha “**padhānikabhikkhū**”tiādi. Buddhakāle kira yattha yattha ekopi bhikkhu viharati, sabbattha buddhāsanama paññattameva hoti. Kasmā? Bhagavā hi attano santike kammaṭṭhānaṃ gahetvā phāsukaṭṭhāne viharante manasi karoti – “asuko mayhaṃ santike kammaṭṭhānaṃ gahetvā gato, asakkhi nu kho visesaṃ nibbattetuṃ, no”ti. Atha naṃ passati kammaṭṭhānaṃ vissajjetvā akusalavitakkaṃ vitakkayamānaṃ, tato “kathañhi nāma mādisassa satthu santike kammaṭṭhānaṃ gahetvā viharantaṃ imaṃ kulaputtaṃ akusalavitakkā adhibhavitvā anamatagge vaṭṭadukkhe saṃsāressantī”ti tassa anuggahatthaṃ tattheva attānaṃ dassetvā taṃ kulaputtaṃ ovaditvā ākāsaṃ uppatitvā puna attano vasanaṭṭhānameva gacchati. Athevaṃ ovadiyamānā te bhikkhū cintayimsu “sattā amhākaṃ manama jānitvā āgantvā amhākaṃ samīpe thitamyeva attānaṃ dasseti. Tasmīṃ khaṇe, ‘bhante, idha nisīdatha nisīdathā’ti āsanapariyesanaṃ nāma bhāro”ti. Te āsanaṃ paññāpetvāva viharanti. Yassa piṭṭhaṃ atthi, so

taṃ paññapeti. Yassa natthi, so mañcaṃ vā phalakaṃ vā pāsāṇaṃ vā vālikāpuñjaṃ vā paññapeti. Taṃ alabhamānā purāṇapaṇṇānīpi saṃkaḍḍhitvā tattha paṃsukūlaṃ pattharītvā ṭhapenti.

Satta sarāti – chajjo, usabho, gandhāro, majjhimo, pañcama, dhevato, nisādoti ete satta sarā. **Tayo gāmāti** – chajjagāmo, majjhimagāmo, sādharāṇagāmōti tayo gāmā, samūhāti attho. Manussaloke vīṇāvādanā ekekassa sarassa vasena tayo tayo mucchanāti katvā **ekavīsati mucchanā**. Devaloke vīṇāvādanā pana samapaññāsa mucchanāti vadanti. Tattha hi ekekassa sarassa vasena satta satta mucchanā, antarassa sarassa ca ekāti samapaññāsa mucchanā. Teneva **sakkapañhasuttasaṃvaṇṇanāyaṃ** (dī. ni. aṭṭha. 2.345) “samapaññāsa mucchanā mucchetvā”ti pañcasikkhassa vīṇāvādanaṃ dassentena vuttaṃ. **Ṭhānā ekūnapaññāsāti** ekekasseva sarassa satta satta ṭhānabhedā, yato sarassa maṇḍalatāvavattṭhānaṃ hoti. Ekūnapaññāsattṭhānaviseso tisso duve catasso catasso tisso duve catassoti dvāvīsati sutibhedā ca icchitā.

Atigāḷhaṃ āraddhanti thinamiddhachambhitattānaṃ vūpasamatthaṃ ativiya āraddhaṃ. Sabbattha niyuttā **sabbatthikā**. Sabbena vā līnuddhaccapakkhiyena atthetabbā **sabbatthikā**. Samathoyeva **samathanimittaṃ**. Evaṃ sesesupī. **Khayā rāgassa vītarāgattāti** ettha yasmā bāhirako kāmesu vītarāgo na khayā rāgassa vītarāgo sabbaso avippahīnarāgattā. Vikkhambhitarāgo hi so. Arahā pana khayā eva, tasmā vuttaṃ “khayā rāgassa vītarāgattā”ti. Esa nayo dosamohesupī.

Lābhasakkārasilokaṃ nikāmayamānoti ettha labbhati pāpuñiyatīti **lābho**, catunnaṃ paccayānametaṃ adhivacanaṃ. Sakkaccaṃ kātabboti **sakkāro**. Paccayā eva hi pañitapañitā sundarasundarā abhisankharītvā katā “sakkāro”ti vuccati, yā ca parehi attano gāravakiriyā, pupphādīhi vā pūjā. **Silokoti** vaṇṇabhaṇanaṃ. Taṃ lābhañca, sakkārañca, silokañca, nikāmayamāno, pavattayamānoti attho. Tenevāha “**catupaccayalābhañca...pe... patthayamāno**”ti.

Thūṇanti pasūnaṃ bandhanatthāya nikhātattambhasankhātāṃ thūṇaṃ. Sesāṃ suviññeyyameva.

Soṇasuttavaṇṇanā niṭṭhitā.

2. Phaggunasuttavaṇṇanā

56. Dutīye **samadhosīti** samantato adhosi. Sabbabhāgena pariphandaṇacalanākārena apacitīṃ dasseti. Vattaṃ kiretaṃ bālḥagilānenapi vuḍḍhataraṃ disvā uṭṭhitākārena apacitī dassetabbā. Tena pana “mā cali mā cali”ti vattabbo, taṃ pana calanaṃ uṭṭhānākāradassanaṃ hotīti āha “**uṭṭhānākāraṃ dasseti**”ti. **Santimāni āsanānīti** paṭhamameva paññatthāsanaṃ sandhāya vadati. Buddhakālasmiñhi ekassapi bhikkhuno vasanaṭṭhāne – “sace satthā āgacchissati, āsanaṃ paññattameva hotū”ti antamaso phalakaṃ mattampi paṇṇasanthāramattampi paññattameva. **Khamanīyaṃ yāpanīyanti** kacci dukkhaṃ khamitūṃ, iriyāpathaṃ vā yāpetūṃ sakkāti pucchati. **Sīsavedanāti** kutoci nikkhamitūṃ alabhamānehi vātehi samuṭṭhāpitā balavatiyo sīsavedanā hontī.

Phaggunasuttavaṇṇanā niṭṭhitā.

2. Chaḷabhijātisuttavaṇṇanā

57. Tatiye **abhijātiyoti** ettha **abhi**-saddo upasaggamattaṃ, na atthavisesajotakoti āha “**chajātiyo**”ti. **Abhijāyatīti** etthāpi eseva nayo.

Urabbhe hanantīti **orabbhikā**. Evaṃ **sūkarikā**dayo veditabbā. **Rodenti** kururakammantatāya sappatibaddhe satte assūni mocentīti ruddā, te eva **luddā** ra-kārassa la-kāraṃ katvā. Iminā aññepi ye keci māgavikā nesādā vuttā, te pāpakammappasutatāya “**kaṇhābhijāti**”ti vadati.

Bhikkhūti ca buddhasāsane bhikkhū. Te kira sacchandarāgena paribhuñjantīti adhippāyena catūsu paccayesu kaṇṭake pakkhipitvā khādantīti “kaṇṭakavuttikā”ti vadati. Kasmāti ce? Yasmā te paṇīte paccaye paṭisevantīti tassa micchāgāho. Nāyaladdhepi paccaye bhuñjamānā ājīvakasamayassa vilomaggāhitāya paccayesu kaṇṭake pakkhipitvā khādanti nāmāti vadatīti. Atha vā **kaṇṭakavuttikā** evaṃnāmākā eke pabbajitā, ye savisesaṃ attakilamathānuyogaṃ anuyuttā. Tathā hi te kaṇṭake vattantā viya hontīti “kaṇṭakavuttikā”ti vuttā. Imameva ca atthavikappaṃ sandhāyāha “**kaṇṭakavuttikāti samaṇā nāmete**”ti.

Lohitābhijāti nāma nigaṇṭhā ekasātakāti vuttā. Te kira ṭhatvā bhuñjananahānappaṭikkhepādivatasamāyogena purimehi dvīhi paṇḍaratarā.

Acelakasāvakāti ājīvakasāvake vadati. Te kira ājīvakaladdhiyā suvisuddhacittatāya nigaṇṭhehipi paṇḍaratarā. Evañca katvā attano paccayadāyake nigaṇṭhehipi jeṭṭhakatare karoti.

Ājīvakā ājīvakiniyo “**sukkābhijāti**”ti vuttā. Te kira purimehi catūhi paṇḍaratarā. Nandādayo hi tathārūpaṃ ājīvakappaṭipattim ukkaṃsaṃ pāpetvā ṭhitā, tasmā nigaṇṭhehi ājīvakasāvakehi ca paṇḍaratarāti “**paramasukkābhijāti**”ti vuttā.

Bilaṃ olaggeyyunti maṃsabhāgaṃ nhārunā vā kenaci vā ganthitvā purisassa hatthe vā kese vā olambanavasena bandheyyuṃ. Iminā satthadhammaṃ nāma dasseti. Satthavāho kira mahākantāraṃ paṭipanno antarāmagge goṇe mate maṃsaṃ gahetvā sabbesaṃ satthikānaṃ “idaṃ khādītva ettakaṃ mūlaṃ dātabba”nti koṭṭhāsaṃ olambati. Goṇamaṃsaṃ nāma khādantāpi atthi, akhādantāpi atthi, khādantāpi mūlaṃ dātuṃ sakkontāpi asakkontāpi. Satthavāho yena mūlena goṇo gahito, taṃ mūlaṃ satthikehi dhāraṇatthaṃ sabbesaṃ balakkārena koṭṭhāsaṃ datvā mūlaṃ gaṇhāti. Ayaṃ satthadhammo.

Kaṇhābhijātiyo samānoti kaṇhe nīcakule jāto hutvā. **Kaṇhadhammanti** paccatte upayogavacananti āha “**kaṇhasabhāvo hutvā abhijāyati**”ti, taṃ antogadhahetuatthaṃ padaṃ, uppādetīti attho. Tasmā **kaṇhaṃ dhammaṃ abhijāyati**ti kālakaṃ dasadussīlyadhammaṃ uppādeti. **Sukkaṃ dhammaṃ abhijāyati**ti etthāpi iminā nayena attho vedītabbo. So hi “ahaṃ pubbepi puññaṃ akatattā nīcakule nibbato, idāni puññaṃ karissāmi”ti puññasāṅkhātaṃ paṇḍaradhammaṃ karoti.

Akaṇhaṃ asukkaṃ nibbānanti sace kaṇhaṃ bhaveyya, kaṇhavipākaṃ dadeyya yathā dasavidhaṃ dussīlyadhammaṃ. Sace sukkaṃ, sukkavipākaṃ dadeyya yathā dānasīlādikusalakammaṃ. Dvinnampi appādānato “akaṇhaṃ asukka”nti vuttaṃ. Nibbānañca nāma imasmiṃ atthe arahattaṃ adhippettaṃ “abhijāyati”ti vacanato. Tañhi kilesanibbānante jātattā nibbānaṃ nāma yathā “rāgādīnaṃ khayante jātattā rāgakkhayo, dosakkhayo, mohakkhayo”ti. Paṭippassambhanavasena vā kilesānaṃ nibbāpanato nibbānaṃ. Taṃ esa abhijāyati pasavati. Idhāpi hi antogadhahetu atthaṃ “jāyati”ti padaṃ. Aṭṭhakathāyaṃ pana “jāyati”ti imassa pāpuṇātīhi atthaṃ gahetvāva “**nibbānaṃ pāpuṇāti**”ti vuttaṃ. **Sukkābhijātiyo samānoti** sukke uccakule jāto hutvā. Sesamettha suviññeyyameva.

Chalābhijātisuttavaṇṇanā niṭṭhitā.

4. Āsavasuttavaṇṇanā

58. Catutthe **saṃvarenāti** saṃvarena hetubhūtena vā. **Idhāti** ayaṃ idha-saddo sabbākārato indiyasaṃvarasaṃvutassa puggalassa sannissayabhūtasāsanaparidīpano, aññassa tathābhāvappaṭisedhano vāti vuttaṃ “**idhāti idhasmiṃ sāsane**”ti. **Paṭisaṅkhāti** paṭisaṅkhāya. **Saṅkhā-**saddo ñāṇakoṭṭhāsapaññattigaṇaṇādīsu dissati “saṅkhāyekaṃ paṭisevati”tiādīsu (ma. ni. 2.168) hi ñāṇe dissati. “Papañcasaññāsāṅkhā samudācaranti”tiādīsu (ma. ni. 1.202, 204) koṭṭhāse. “Tesaṃ tesaṃ dhammānaṃ saṅkhā samaññā”tiādīsu (dha. sa. 1313-1315) paññattiyaṃ. “Na sukaraṃ

sāṅkhātu’’ntiādīsu (saṃ. ni. 2.128) gaṇanāya. Idha pana ñāṇe daṭṭhabbo. Tenevāha “**paṭisañjānitvā paccavekkhitvāti attho**’’ti. Ādīnavapaccavekkhaṇā ādīnavapaṭisañkhāti yojanā. **Sampalimaṭṭhanti** ghaṃsitam. **Anubyañjanasoti** hatthapādasitaālokitavilokitādippakārahāgaso. Tañhi ayonisomanasikaroto kilesānaṃ anubyañjanato “anubyañjana’’nti vuccati. **Nimittaggāhoti** itthipurisanimittassa subhanimittādikassa vā kilesavatthubhūtaṃ nimittassa gāho. **Ādittapariyāyenāti ādittapariyāye** (saṃ. ni. 4.28; mahāva. 54) āgatanayena veditaṃ.

Yathā itthiyā indriyaṃ itthindriyaṃ, na evamidaṃ, idaṃ pana cakkhumeva indriyanti **cakkhundriyaṃ**. Tenāha “**cakkhumeva indriya**’’nti. Yathā āvāṭe niyataṭṭhitiko kacchapo “āvāṭakacchapo’’ti vuccati, evaṃ tappaṭibaddhavuttitāya taṃ thāno saṃvaro cakkhundriyasamvaro. Tenāha “**cakkhundriye saṃvaro cakkhundriyasamvaro**’’ti. Nanu ca cakkhundriye saṃvaro vā asaṃvaro vā natthi. Na hi cakkhupasādaṃ nissāya sati vā muṭṭhassaccaṃ vā uppajjati. Apica yadā rūpārammaṇaṃ cakkhussa āpāthaṃ āgacchati, tadā bhavaṅge dvikkhattuṃ uppajjitvā niruddhe kiriyamanodhātu āvajjanakiccaṃ sādhamānā uppajjitvā nirujjhati. Tato cakkhuviññānaṃ dassanakiccaṃ, tato vipākamanodhātu sampaṭicchanaṃ, tato vipākamanoviññānadhātu santīraṇakiccaṃ, tato kiriyāhetukamanoviññānadhātu voṭṭhabbanakiccaṃ sādhamānā uppajjitvā nirujjhati, tadanantaraṃ javanaṃ javati. Tatthāpi neva bhavaṅgasamaye, na āvajjanādīnaṃ aññatarasamaye ca saṃvaro vā asaṃvaro vā atthi. Javanakkaṇe pana sace dussīlyaṃ vā muṭṭhassaccaṃ vā aññānaṃ vā akkhanti vā kosajjaṃ vā uppajjati, asaṃvaro hoti. Tasmīṃ pana silādīsu uppannesu saṃvaro hoti, tasmā “cakkhundriye saṃvaro’’ti kasmā vuttanti āha “**javane uppajjamānopi hesa... pe... cakkhundriyasamvaroti vuccati**’’ti.

Idaṃ vuttaṃ hoti – yathā nagare catūsu dvāresu asaṃvutesu kiñcāpi antogharadvārakoṭṭhakagabbhādayo susaṃvutā, tathāpi antonagare sabbaṃ bhaṇḍaṃ arakkhitaṃ agopitameva hoti. Nagaradvārena hi pavisitvā corā yadicchakaṃ kareyyuṃ, evamevaṃ javane dussīyādīsu uppannesu tasmīṃ asaṃvare sati dvārampi aguttaṃ hoti bhavaṅgampi āvajjanādīni vīthiccittāni. Yathā pana nagaradvāresu saṃvutesu kiñcāpi antogharādayo asaṃvutā, tathāpi antonagare sabbaṃ bhaṇḍaṃ surakkhitaṃ sugopitameva hoti. Nagaradvāresu hi pihitesu corānaṃ paveso natthi, evamevaṃ javane silādīsu uppannesu dvārampi suguttaṃ hoti bhavaṅgampi āvajjanādīni vīthiccittāni, tasmā javanakkhaṇe uppajjamānopi cakkhundriyasamvaroti vuttoti.

Saṃvarena samannāgato puggalo saṃvutoti āha “**upeto**’’ti. **Ayamevettha attho sundarataroti** upari pāliyaṃ sandissanato vuttaṃ. Tenāha “**tathā hī**’’tiādi.

Yanti ādesoti iminā līngavipallāseṇa saddhiṃ vacanavipallāso katoti dasseti, nipātapadaṃ vā etaṃ puthuvacanattaṃ. **Vighātakarāti** cittavighātakarā, kāyacittadukkhanibbattakā vā. Yathāvuttakilesahetukā dāhānubandhā vipākā eva **vipākaparilāhā**. Yathā panettha āsavā aññe ca vighātakarā kilesapariḷāhā sambhavanti, taṃ dassetuṃ “**cakkhudvārasmiñhī**’’tiādi vuttaṃ. Taṃ suviññeyyameva. Ettha ca saṃvaraṇūpāyo, saṃvaritabbaṃ, saṃvaro, yato so saṃvaro, yattha saṃvaro, yathā saṃvaro, yañca saṃvaraphalanti ayaṃ vibhāgo veditaṃ. Kathaṃ? “Paṭisañkhā yoniso’’ti hi **saṃvaraṇūpāyo**. Cakkhundriyaṃ **saṃvaritabbaṃ**. Saṃvaraggahaṇeṇa gahitā sati **saṃvaro**. “Asaṃvutassā’’ti **saṃvaraṇāvadhī**. Asaṃvarato hi saṃvaraṇaṃ. Saṃvaritabbaṃ gahaṇasiddho idha **saṃvaravisayo**. Cakkhundriyañhi saṃvaraṇaṃ ñāṇaṃ rūpārammaṇe saṃvarayatīti avuttasiddhoyamattho. Āsavatanimittakilesapariḷāhābhāvo **phalaṃ**. Evaṃ sotadvārādīsu yojetabbaṃ. **Sabbatthevāti** manodvāre pañcadvāre cāti sabbasmīṃ dvāre.

Paṭisañkhā yoniso cīvarantiādīsu “sītassa paṭighātāyā’’tiādinā paccavekkhaṇameva yoniso paṭisañkhā. **Īdisanti** evarūpaṃ itthārammaṇaṃ. **Bhavapatthanāya assādayatoti** bhavapatthanāmukhena **bhāvitaṃ** ārammaṇaṃ assādentassa. **Cīvaranti** nivāsanādi yaṃ kiñcicīvaraṃ. **Paṭisevatīti** nivāsanādivasena paribhuñjati. **Yāvadevāti** payojanaparimāṇanīyamaṇaṃ. Sītappaṭighātādiyeva hi yogino cīvarappaṭisevanappayojanaṃ. **Sītassāti** sītadhātukkabhato vā utupariṇāmato vā uppannessa

sītassa. **Paṭighātāyāti** paṭighātanattham tappaccayassa vikārassa vinodanattham. **Uṇhassāti** aggisantāpato uppannassa uṇhassa. **Damśādayo** pākāṭāyeva. Puna **yāvadevāti** niyatappayojanaparimāṇaniyamanam. Niyatañhi payojanam cīvaram paṭisevantassa hirikopīnappaṭicchādanam, itaram kadāci. **Hirikopīnanti** sambādhaṭṭhānam. Yasmiñhi aṅge vivaṭe hiri kuppāti vinassati, tam hiriyā kopānato hirikopīnam, tampaṭicchādanattham cīvaram paṭisevati.

Piṇḍapātanti yaṃ kiñci āhāram. So hi piṇḍolyena bhikkhuno patte patanato, tattha tattha laddhabhikkhāpiṇḍānam pāto sannipātoti vā “piṇḍapāto”ti vuccati. **Neva davāyāti** na kīlanāya. **Na madāyāti** na balamadamānamadapurisamadattham. **Na maṇḍanāyāti** na aṅgapaccaṅgānam piṇanabhāvattam. **Na vibhūsanāyāti** na tesamyeva sobhattham, chavisampattiatthanti attho. Imāni yathākkamaṃ mohadosaṅṭhānavañṇarāgūpanissayappahānatthāni veditabbāni. Purimaṃ vā dvayaṃ attano saṃkilesuppatinisedhanattham, itaram parassapī. Cattāripi kāmasukhallikānuyogassa pahānattham vuttānīti veditabbāni. **Kāyassāti** rūpakāyassa. **Ṭhitiyā yāpanāyāti** pabandhaṭṭhitatthañceva pavattiyā avicchedanatthañca, cirakālaṭṭhitattham jīvitindriyassa pavattāpanattham. **Vihimsūparatīyāti** jighacchādūkkhassa uparamattham. **Brahmacariyānuggahāyāti** sāsanamaggabrahmacariyānam anuggaṇhanattham. **Itīti** evaṃ iminā upāyena. **Purāṇaṅca vedanam paṭihanākhāmīti** purāṇam abhuttapaccayā uppajjanakavedanam paṭihanissāmi. **Navañca vedanam na uppādessāmīti** navam bhuttapaccayā uppajjanakavedanam na uppādessāmi. Tassā hi anuppajjanatthameva āhāram paribhuñjati. Ettha abhuttapaccayā uppajjanakavedanā nāma yathāvuttajighacchānimittā vedanā. Sā hi abhuñjantassa bhīyyo bhīyyopavaḍḍhanavasena uppajjati, bhuttapaccayā anuppajjanakavedanāpi khudānimittāva aṅgadāhasūlādivedanā appavattā. Sā hi bhuttapaccayā anuppannāva na uppajjissati. Vihimsānimittatā cetāsam vihiṃsāya viseso.

Yātrā ca me bhavissatīti yāpanā ca me catunnam iriyāpathānam bhavissati. “Yāpanāyā”ti iminā jīvitindriyayāpanā vuttā, idha catunnam iriyāpathānam avicchedasāṅkhātā yāpanāti ayametāsam viseso. **Anavajjatā ca phāsuvihāro cāti** ayuttapariyesanappaṭiggahaṇaparibhogaparivajjanena anavajjatā, parimitaparibhogena phāsuvihāro. Asappāyāparimitabhōjanapaccayā aratitandīvijambhitāvīñṇugarahādidosābhāvena vā anavajjatā. Sappāyāparimitabhōjanapaccayā kāyabalasambhāvena phāsuvihāro. Yāvadattham udarāvadehakabhōjanaparivajjanena vā seyyasukhapassasukhamiddhasukhādīnam abhāvato anavajjatā. Catupañcāloparamattaūnabhōjanena catuiriyāpathayogyatāpādanato phāsuvihāro. Vuttañhetam –

“Cattāro pañca ālope, abhuvā udakam pive;
Alam phāsuvihārāya, pahitattassa bhikkhuno”ti. (theragā. 983; mi. pa. 6.5.10);

Ettāvatā ca payojanapariggaho, majjhimā ca paṭipadā dīpitā hoti. **Yātrā ca me bhavissatīti** payojanapariggahadīpanā. Yātrā hi nam āhārūpayogam payojeti. Dhammikasukhāpariccāgahetuko **phāsuvihāro** majjhimā paṭipadā antadvayaparivajjanato.

Senāsananti senaṅca āsanaṅca. Yattha vihārādike seti nipajjati āsati nisīdati, tam senāsanam. **Utparissayavinodanappaṭisallānārāmatthanti** utuyeva parisahanatthena parissayo sarīrābādhacittavikkhepakaro, tassa vinodanattham, anuppannassa anuppādanattham, uppannassa vūpasamanatthañcāti attho. Atha vā yathāvutto utu ca sīhabyagghādīpākāṭaparissayo ca rāgadosādīpaṭicchannaparissayo ca utparissayo, tassa vinodanatthañceva ekībhāvaphāsukatthañca. Cīvarappaṭisevane hirikopīnappaṭicchādanam viya tam niyatappayojananti puna “yāvadevā”ti vuttam.

Gilānapaccayabhesajjaparikkhānti rogassa paccanīkappavattiyā gilānapaccayo, tato eva bhisakkassa anuññātavatthutāya bhesajjam, jīvitassa parivārasambhārahāvehi parikkhāro cāti gilānapaccayabhesajjaparikkhāro, tam. **Veyyābādhikānti** veyyābādhato dhātukkhobhato ca tamnibbattakuṭṭhagaṇḍapīlakādirogato uppannānam. **Vedanānti** dukkhavedanānam. **Abyābajjhāparamatāyāti** niddukkhāparamabhāvāya. Yāva tam dukkham sabbam pahīnam hoti, tāva

paṭisevāmīti yojanā. Evamettha saṅkhepeneva pāḷivaṇṇanā veditabbā. **Navavedanuppādatopīti** na kevalaṃ āyatim eva vipākaparilāhā, atha kho atibhojanapaccayā alamsātakādīnaṃ viya navavedanuppādatopi veditabbā.

Kammaṭṭhānikassa calanaṃ nāma kammaṭṭhānapariccāgoti āha “**calati kampati kammaṭṭhānaṃ vijahati**”ti. “Khamo hoti sītassa uṇhassā”ti ettha ca lomasaṅgātharassa vatthu kathetabbam. Thero kira cetiyapabbate piyaṅguguhāya padhānaghare viharanto antaraṭṭhake himapātasamaye lokantarikanirayaṃ paccavekkhitvā kammaṭṭhānaṃ avijahantova abbhokāse vītināmesi. Gimhasamaye ca pacchābhataṃ bahicaṅkame kammaṭṭhānaṃ manasikaroto sedāpissa kacchehi muccanti. Atha naṃ antevāsiko āha – “idha, bhante, nisīdatha, sītalo okāso”ti. Thero “uṇhabhayenevamhi, āvuso, idha nisinno”ti avīcimahānirayaṃ paccavekkhitvā nisīdiyeva. **Uṇhanti** cettha aggisantāpova veditabbo sūriyasantāpassa parato vuccamānattā. Sūriyasantāpavasena panetaṃ vatthu vuttaṃ.

Yo ca dve tayo vāre bhataṃ vā pānīyaṃ vā alabhamānopi anamatagge saṃsāre attano pettivisayūpapattim paccavekkhitvā avedhanto kammaṭṭhānaṃ na vijahatiyeva. **Ḍaṃsamakasavātātapasamphassehi** phuṭṭho cepi tiracchānūpapattim paccavekkhitvā avedhanto kammaṭṭhānaṃ na vijahatiyeva. Sarisapasamphassena phuṭṭho cāpi anamatagge saṃsāre sīhabyagghādīmukhesu anekavāraṃ parivattitapubbabhāvaṃ paccavekkhitvā avedhanto kammaṭṭhānaṃ na vijahatiyeva **padhāniyatthero** viya, ayaṃ “**khamo jighacchāya...pe... sarisapasamphassāna**”nti veditabbo. Theram kira khaṇḍacelavīhāre kaṇikārapadhāniyaghare ariyavaṃsadhammaṃ suṇantaññeva ghoraviso sappo ḍaṃsi. Thero jānitvāpi pasannacitto nisinno dhammaṃyeva suṇāti, visavego thaddho ahoṣi. Thero upasampadamāḷaṃ ādim katvā sīlaṃ paccavekkhitvā “visuddhasīlomhī”ti pītim uppādesi, saha pītuppādā viyaṃ nivattitvā pathaviṃ pāvīsi. Thero tattheva cittekaggataṃ labhitvā vipassanaṃ vadḍhetvā arahattaṃ pāpuṇi.

Yo pana akkosavasena durutte duruttattāyeva ca durāgate api antimavatthusaññite vacanapathe sutvā khaṇṭigūṇaṃyeva paccavekkhitvā na vedhati **dīghabhāṇakaabhayatthero** viya, ayaṃ “**khamo duruttānaṃ durāgatānaṃ vacanapathāna**”nti veditabbo. Thero kira paccayasantosabhāvanārāmatāya mahāriyavaṃsappaṭipadaṃ kathesi, sabbo mahāgāmo āgacchati, therassa mahāsakkāro uppajji. Taṃ aññataro mahāthero adhivāsetuṃ asakkonto “dīghabhāṇako ‘ariyavaṃsaṃ kathamī’ti sabbarattim kolāhalaṃ karoti”tiādīhi akkoṣi. Ubhopi ca attano attano vihāraṃ gacchantā gāvutamattaṃ ekapathena agamaṃsu. Sakalagāvutampi so taṃ akkoṣiyeva. Tato yattha dvinnaṃ vihāraṃ maggo bhijjati, tattha ṭhatvā dīghabhāṇakatthero taṃ vanditvā “eso, bhante, tumhākaṃ maggo”ti āha. So assuṇanto viya agamāsi. Theropi vihāraṃ gantvā pāde pakkhāletvā nisīdi. Tameṇaṃ antevāsiko “kiṃ, bhante, sakalagāvutaṃ paribhāsantaṃ na kiñci avocutthā”ti āha. Thero “khantiyevāvuso, mayhaṃ bhāro, na akkhanti, ekapaduddhārepi kammaṭṭhānaviyogaṃ na passāmī”ti āha.

Vacanameva tadattaṃ ṇāpetukāmānañca patho upāyoti āha “**vacanameva vacanapatho**”ti. Asukhaṭṭhena vā **tibbā**. Yañhi na sukhaṃ, taṃ anīṭṭhaṃ tibbanti vuccati. **Adhivāsakajātiko hotīti** yathāvuttavedanānaṃ adhivāsakasabhāvo hoti. Cittalapabbate padhāniyattherassa kira rattim padhānena vītināmetvā ṭhitassa udaravāto uppajjati. So taṃ adhivāsetuṃ asakkonto āvattati parivattati. Tameṇaṃ caṅkamanapasse ṭhito piṇḍapātiyatthero āha – “āvuso, pabbajito nāma adhivāsanasīlo hotī”ti. So “sādhu, bhante”ti adhivāsetvā niccalo sayi. Vāto nābhito yāva hadayaṃ phālesi. Thero vedanaṃ vikkhambhetvā vipassanto muhuttana anāgāmī hutvā parinibbāyi. **Evam sabbatthāti** “uṇhena phuṭṭhassa sītaṃ patthayato”tiādīnā sabbattha uṇhādinimittam kāmāsavuppatti veditabbā. **Natthi sugatibhave sītaṃ vā uṇhaṃ vāti** anīṭṭhaṃ sītaṃ vā uṇhaṃ vā natthīti adhippāyo. Attaggāhe sati attaniyaggāhoti āha “**mayhaṃ sītaṃ uṇhanti gāho dīṭṭhāsavo**”ti.

Ahaṃ samaṇoti “ahaṃ samaṇo, kiṃ mama jīvitena vā maraṇena vā”ti evaṃ cintetvāti adhippāyo. **Paccavekkhitvāti** gāmapavesappayojanādiñca paccavekkhitvā. **Paṭikkamatīti** hatthiādīnaṃ samīpagamanato apakkamatī. Ṭhāyanti etthāti ṭhānaṃ, kaṇṭakānaṃ ṭhānaṃ **kaṇṭakattānaṃ**, yattha

kaṅṭakāni santi, taṃ okāsanti vuttaṃ hoti. **Amanussaduṭṭhānī** amanussasañcārena dūsitāni, sapaṛissayānīti attho. **Aniyatavattubhūta**ni aniyatasikkhāpadassa kāraṇabhūtaṃ. **Vesiyādhedatoti** vesiyāvidhavāthullakumārikāpaṇḍakapānāgārabhikkhunibhedato. **Samānanti** samaṃ, avisamanti attho. **Akāsi vāti** tādisaṃ anācāraṃ akāsi vā. **Sīlasaṃvarasaṅkhātenā**ti kathaṃ parivajjanaṃ sīlaṃ? Anāsanaparivajjanaena hi anācāraparivajjanaṃ vuttaṃ. Anācārāgocaraparivajjanaṃ cārittasīlatāya sīlasaṃvaro. Tathā hi bhagavatā “pātimokkhasaṃvarasaṃvuto viharatī”ti (vibha. 508) sīlasaṃvaravibhajane ācāragocarasaṃpattim dassentena “atthi anācāro, atthi agocarō”tiādīnā (vibha. 513-514) ācāragocarā vibhajitvā dassitā. “Caṇḍaṃ hatthim parivajjeti”ti vacanato hatthiādiparivajjanampi bhagavato vacanānuṭṭhānanti katvā ācārasīlamevāti veditabbaṃ.

Itipīti imināpi kāraṇena ayonisomanasikārasamuṭṭhitattāpi, lobhādisahagattāpi, kusalapattipakkhatopītiādīhi kāraṇehi ayaṃ vitakko akusaloti attho. Iminā nayena **sāvajjoti**ādīsipi attho veditabbo. Ettha ca **akusaloti**ādīnā diṭṭhadhammikaṃ kāmavitakkassa ādīnavaṃ dasseti, **dukkhavipākoti** iminā samparāyikaṃ. **Attabyābādhāya saṃvattatī**ādīsipi imināva nayena ādīnavavibhāvanā veditabbā. Uppannassa kāmavitakkassa anadhivāsanaṃ nāma puna tādisassa anuppādanaṃ. Taṃ panassa pahānaṃ vinodanaṃ byantikaraṇaṃ anabhāvagamananti ca vattaṃ vaṭṭatīti pālīyaṃ – “uppannaṃ kāmavitakkaṃ nādhivāsetī”ti vatvā “pajahatī”tiādī vuttanti tamattaṃ dassento “**anadhivāseṇo kiṃ karotī**”tiādīmāha. Pahānañcetha vikkhambhanaeva, na samucchodoti dassetuṃ “**vinodeti**”tiādī vuttanti vikkhambhanaevaseneva attho dassito. **Uppannuppanneti** tesam pāpavitakkānaṃ uppādāvattahāgahaṇaṃ vā kataṃ siyā anavasesaggahaṇaṃ vā. Tesu paṭṭhamam sandhāyāha “**uppannamatte**”ti, sampatijātetī attho. Anavasesaggahaṇaṃ byāpanicchāyaṃ hotīti dassetuṃ “**satakkhattumpi uppannuppanne**”ti vuttaṃ.

Nātivitakkoti “amhākaṃ nātayo sukhajīvino sampattiyuttā”tiādīnā gehassitapemavasena nātake ārabba uppannavitakko. **Janapadavitakkoti** “amhākaṃ janapado subhikkho sampannasasso ramaṇīyo”tiādīnā gehassitapemavasena janapadaṃ ārabba uppannavitakko. Ukkuṭikappadhānādīhi dukkhe nijjiṇṇe samparāye sattā sukhī hontī amarātī dukkarakārikāya paṭisaṃyutto amarathāya vitakko. Taṃ vā ārabba amarāvikkhepadīṭṭhisahagato amaro ca so vitakko cāti **amarāvitakko**. **Parānuddayatāpaṭisaṃyuttoti** paresu upaṭṭhākādīsū sahananditādivasena pavatto anuddayatāpatirūpako gehassitapemappaṭisaṃyutto vitakko. **Lābhasakkārasilokappaṭisaṃyuttoti** cīvarādīlābhena ca sakkārena ca kittisaddena ca ārammaṇakaraṇavasena paṭisaṃyutto. **Anavaññattippaṭisaṃyuttoti** “aho vata maṃ pare na avajāneyyūṃ, na heṭṭhā katvā maññeyyūṃ, pāsānacchattaṃ viya garuṃ kareyyu”ntī uppannavitakko.

Kāmavitakko kāmasaṅkappanasabhāvato kāmāsavappattiyā sātīsayattā ca kāmānākārotī āha “**kāmavitakko panettha kāmāsavo**”ti. **Tabbisesoti** kāmāsavaviseso bhavasabhāvattāti adhippāyo. Kāmavitakkādīke vinodeti attano santānato nīharatī etenāti **vinodanaṃ**, vīriyanti āha “**vīriyasamvarasaṅkhātena vinodanena**”ti.

“Satta bojjaṅgā bhāvitā bahulīkatā vijjāvimuttiyo paripūrentī”ti vacanato vijjāvimuttīnaṃ anadhigamo tato ca sakalavaṭṭadukkhānativattī **abhāvanāya ādīnavo**. Vuttavipariyāyena bhagavato orasaputtabhāvādivasena ca **bhāvanāya ānisaṃso** veditabbo. **Thomentoti** āsavapahānassa dukkarattā tāya eva dukkarakiriyāya taṃ abhitthavanto. **Samvareneva pahīnā**ti samvarena pahīnā eva. Tena vuttaṃ “**na appahīnesuyeva pahīnasaññī**”ti.

Āsavasuttavaṇṇanā niṭṭhitā.

5. Dārukammikasuttavaṇṇanā

59. Pañcame **puttasambādhasayananti** puttehi sambādhasayanaṃ. Ettha puttāsīsenā dārapariggahaṃ puttadāresu uppilo viya. Tena tesam rogādihetu sokābhibhavena ca cittassa

saṃkiliṭṭhatam dasseti. **Kāmabhoginā**ti iminā pana rāgābhībhavanti. Ubhayenapi vikkhittacittatam dasseti. **Kāsikacandananti** ujjalacandanam. Tam kira vaṇṇavisesasamujjalam hoti pabhassaram, tadatthameva nam saṅhataram karonti. Tenevāha “**saṅhacandana**”nti, kāsikavatthañca candanañcāti attho. **Mālāgandhavilepananti** vaṇṇasobhatthañceva sugandhabhāvattathañca mālam, sugandhabhāvattāya gandham, chavirāgakaraṇattathañceva subhatthañca vilepanam dhārentena. **Jātarūparajatanti** suvaṇṇaṇceva avasiṭṭhadhanañca sādiyantena. Sabbenapi kāmesu abhigiddhabhāvameva pakāseti.

Dārukammikasuttavaṇṇanā niṭṭhitā.

6. Hatthisāriputtasuttavaṇṇanā

60. Chaṭṭhe hatthim sāretīti hatthisārī, tassa puttoti **hatthisāriputto**. So kira sāvatthiyam hatthiācariyassa putto bhagavato santike pabbajitvā tīṇi piṭakāni uggahetvā sukhumesu khandhadhātuāyatanādīsu atthantaresu kusalo ahoṣi. Tena vuttam – “**therānam bhikkhūnam abhidhammakatham kathentānam antarantarā katham opāteṭī**”ti. Tattha **antarantarā katham opāteṭī**ti therehi vuccamānassa kathāpabandhassa antare antare attano katham paveṣeṭīti attho. **Pañcahi saṃsaggeḥī**ti savanasaṃsaggo, dassanasaṃsaggo, samullāpasasaggo, sambhogasaṃsaggo, kāyasasaggoti imehi pañcahi saṃsaggehi. **Kiṭṭhakhādakoti** kiṭṭhatṭhāne uppannasassañhi kiṭṭhanti vuttam kāraṇūpacārena. **Sippiyo** suttīyo. **Sambukā**ti saṅkhamāha.

Gihibhāve vaṇṇam kathesīti (dī. ni. aṭṭha. 1.422) kassapasammāsambuddhassa kira sāsane dve saḥāyakā ahesum, aññamaññam samaggā ekatova sajjhāyanti. Tesu eko anabhirato gihibhāve cittam uppādetvā itarassa ārocesi. So gihibhāve ādīnavam, pabbajjāya ānisaṃsam dassetvā ovadi. So tam sutvā abhiramitvā puna ekadivasam tādisse citte uppane tam etadavoca – “mayham, āvuso, evarūpam cittam uppajjati, imāham pattacīvaram tuyham dassāmī”ti. So pattacīvaralobhena tassa gihibhāve ānisaṃsam dassetvā pabbajjāya ādīnavam kathesi. Tassa tam sutvāya gihibhāvato cittam nivattetvā pabbajjāyameva abhirami. Evamesa tadā sīlavantassa bhikkhuno gihibhāve ānisaṃsakathāya kathitattā idāni cha vāre vibbhamitvā sattamavāre pabbajitvā mahāmoggallānassa mahākoṭṭhikattherassa ca abhidhammakatham kathentānam antarantarā katham opātesī. Atha nam mahākoṭṭhikatthero apasādesī. So mahāsāvakkassa kathite patiṭṭhātum asakkonto vibbhamitvā gihi jāto. Poṭṭhapādassa panāyam gihisahāyako ahoṣi, tasmā vibbhamitvā dvīhatīhaccayena poṭṭhapādassa santikam gato. Atha nam so dīsvā – “samma, kiṃ tayā katam, evarūpassa nāma satthu sāsana apasakkantosi, ehi pabbajitum dāni te vaṭṭatī”ti tam gahetvā bhagavato santikam agamāsi. Tasmim ṭhāne pabbajitvā arahattam pāpuṇi. Tena vuttam “**sattame vāre pabbajitvā arahattam pāpuṇī**”ti.

Hatthisāriputtasuttavaṇṇanā niṭṭhitā.

7. Majjhesuttavaṇṇanā

61. Sattame **mantā**ti ya-kāralopena niddeso, karaṇatthe vā etam paccattavacanam. Tenāha “**tāya ubho ante veditvā**”ti. **Phassavasena nibbattattā**ti dvayadvayasamāpattiyam aññamaññam samphassavasena nibbattattā, “phassapaccayā taṇhā, taṇhāpaccayā upādānam, upādānapaccayā bhavo, bhavapaccayā jāti”ti iminā cānukkamena phassasamuṭṭhānattā imassa kāyassa phassavasena nibbattattāti vuttam. **Eko antoti** ettha ayam **anta**-saddo antaabbhantaramariyādālāmakaabhāvakoṭṭhāsapadapūraṇasamīpādīsu dissati. “Antapūro udarapūro”tiādīsu (su. ni. 197) hi ante antasaddo. “Caranti loke parivārachannā anto asuddhā, bahi sobhamānā”tiādīsu (saṃ. ni. 1.122) abbhantare. “Kāyabandhanassa anto jīrati (cūlava. 278) sā haritantaṃ vā panthantaṃ vā selantaṃ vā udakantaṃ vā”tiādīsu (ma. ni. 1.304) mariyādāyam. “Antamidam, bhikkhave, jīvikāna”ntiādīsu (saṃ. ni. 3.80; itivu. 91) lāmake. “Esevanto dukkhassā”tiādīsu (ma. ni. 3.393; saṃ. ni. 2.51) abhāve. Sabbapaccayasāṅkhayo hi dukkhassa abhāvo

koṭṭīpi vuccati. “Tayo antā”tiādīsu (dī. ni. 3.305) koṭṭhāse. “Ingha tāva suttantaṃ vā gāthāyo vā abhidhammaṃ vā pariyāpuṇassu, suttante okāsaṃ kārapetvā”ti (pāci. 442) ca ādīsu padapūraṇe. “Gāmantam vā osaṭo (pārā. 409-410; cūlava. 343) gāmantasenāsana”ntiādīsu (pārā. aṭṭha. 2.410) samīpe. Svāyamidha koṭṭhāse vattatīti **ayameko koṭṭhāsoti**.

Santo paramatthato vijjamāno dhammasamūhoti **sakkāyo**, pañcupādānakkhandhā. Tenāha “**tebhūmakavaṭṭa**”nti. Sesamettha suviññeyyameva.

Majjhésuttavaṇṇanā niṭṭhitā.

8. Purisindriyāñāṣasuttavaṇṇanā

62. Aṭṭhame nibbattivaseṇa apāyasaṃvattaniyena vā kammunā apāyesu niyuttoti **āpāyiko nerayikoti** etthāpi eseṇa nayo. Avīcimhi uppajjitvā tattha āyukappasaññitaṃ antarakappaṃ tiṭṭhatīti **kappaṭṭho**. Nirayūpapattipariharaṇavasena tikicchitum asakkuṇeyyoti **atekiccho**. **Akhaṇḍānīti** ekadesenapi akhaṇḍitāni. Bhinnakālato paṭṭhāya bījaṃ bījattāya na upakappati. **Apūtīnīti** udakatemaneṇa apūtīkāni. Pūtīkāñhi bījaṃ bījattāya na upakappati. **Avātātapahatānīti** vātena ca ātapena ca na hatāni nirojataṃ na pāpitāni. Nirojañhi kasaṭaṃ bījaṃ bījattāya na upakappati. “Sārādānī”ti vattabbe ā-kārassa rassattaṃ katvā pāliyaṃ “**sārādānī**”ti vuttanti āha “**sārādānī**”ti. Taṇḍulasārassa ādānato **sārādāni**, gahitasārāni patiṭṭhitasārāni. Nissarañhi bījaṃ bījattāya na upakappati. **Sukhasayitānīti** cattāro māse koṭṭhe pakkhittaniyāmeneva sukhasayitāni suṭṭhu sannicitāni. **Maṇḍakhetteti** ūsakhārādīdosehi aviddhaste sārakkhette. **Abhidoti** abhi-saddena samānatthanipātapadanti āha “**abhiadḍharatta**”nti. Natthi etassa bhidāti vā **abhido**. “Abhidaṃ adḍharatta”nti vattabbe upayogathe paccattavacanam. **Adḍharattanti** ca accantasamāyogavacanam, bhummatthe vā. Tasmā **abhido adḍharattanti** abhinne adḍharattasamayeti attho. Puṇṇamāsiyañhi gaganamajjhassa purato vā pacchato vā cande ṭhite adḍharattasamāyo bhinnō nāma hoti, majjhe eva pana ṭhite abhinno nāma.

Suppabuddhasunakkhattādayoti ettha (dha. pa. aṭṭha. 2.127 suppabuddhasakyavatthu) suppabuddho kira sākiyo “mama dhītaraṃ chaḍḍetvā nikkhanto, mama puttaṃ pabbājetvā tassa veriṭṭhāne ṭhito cā”ti imehi dvīhi kāraṇehi satthari āghātaṃ bandhitvā ekadivasam “na dāni nimantitaṭṭhānaṃ gantvā bhuñjituṃ dassāmī”ti gamanamaggaṃ pidahitvā antaravīthiyaṃ suraṃ pivanto nisīdi. Athassa satthari bhikkhusaṅghaparivute taṃ ṭhānaṃ āgate “satthā āgato”ti ārocesum. So āha – “purato gacchāti tassa vadetha, nāyaṃ mayā mahallakataro, nāssa maggaṃ dassāmī”ti. Punappunaṃ vuccamānopi tatheva nisīdi. Satthā mātulassa santikā maggaṃ alabhitvā tatova nivatti. Sopi carapurisaṃ pesesi – “gaccha tassa kathaṃ sutvā ehi”ti. Satthāpi nivattanto sitaṃ katvā ānandattherena – “ko nu kho, bhante, sitapātukamme paccayo”ti puṭṭho āha – “passasi, ānanda, suppabuddha”nti. Passāmi, bhante. Bhāriyaṃ tena kammaṃ kataṃ mādisassa buddhassa maggaṃ adentena, ito sattame divase heṭṭhāpāsāde pāsādamūle pathaviyā pavissati”ti ācikkhī.

Sunakkhattopi (ma. ni. aṭṭha. 1.147) pubbe bhagavantaṃ upasaṅkamitvā dibbacakkhuparikammaṃ pucchi. Athassa bhagavā kathesi. So dibbacakkuṃ nibbattetvā ālokaṃ vaḍḍhetvā olovento devaloke nandanavanacittalatāvanaphārusakavanamissakavanese dibbasampattiṃ anubhavamāne devaputte ca devadhītaro ca disvā – “etesam evarūpāya attabhāvasampattiyā ṭhitānaṃ kira madhuro nu kho saddo bhavissati”ti saddaṃ sotukāmo hutvā dasabalaṃ upasaṅkamitvā dibbasotadhātuparikammaṃ pucchi. Bhagavā panassa – “dibbasotadhātussa upanissayo natthī”ti ṇatvā parikammaṃ na kathesi. Na hi buddhā yaṃ na bhavissati, tassa parikammaṃ kathenti. So bhagavati āghātaṃ bandhitvā cintesi – “ahaṃ samaṇaṃ gotamaṃ paṭhamaṃ dibbacakkhuparikammaṃ pucchim, so mayhaṃ ‘sampajjatu vā mā vā sampajjatu’ti kathesi. Ahaṃ pana paccattapurisakārena taṃ nibbattetvā dibbasotadhātuparikammaṃ pucchim, taṃ me na kathesi. Addhā evaṃ hoti ‘ayaṃ rājapabbajito dibbacakkuñānaṃ nibbattetvā, dibbasotañānaṃ nibbattetvā, cetopariyakammañānaṃ nibbattetvā,

āsavānaṃ khaye ñāṇaṃ nibbattetvā, mayā samasamo bhavissatī”ti issāmacchariyavasena mayhaṃ na kathetī”ti bhiyyoso āghātaṃ bandhitvā kāsāyāni chaḍḍetvā gihibhāvaṃ patvāpi na tuṅhībhūto vihāsi. Dasabalaṃ pana asatā tucchena abbhācikkhitvā apāyūpago ahosi. Tampi bhagavā byākāsi. Vuttañhetam – “evampi kho, bhaggava, sunakkhatto licchaviṃputto mayā vuccamāno apakkameva imasmā dhammavinayā, yathā taṃ apāyiko”ti (dī. ni. 3.6). Tena vuttaṃ **“aparepi suppubuddhasunakkhattādayo bhagavatā ñātāvā”**ti. Ādi-saddena kokālikādīnaṃ saṅgho daṭṭhabbo.

Susīmo paribbājako (saṃ. ni. aṭṭha. 2.2.70) evaṃnāmako vedaṅgesu kusalo paṇḍito paribbājako. Aññatitthiyā hi parihīnalābhasakkārasilokā “samaṇo gotamo na jātigottādīni ārabha lābhaggappatto jāto, kaviseṭṭho panesa uttamakavitāya sāvakānaṃ bandhaṃ bandhitvā deti. Te taṃ uggaṇhitvā upaṭṭhākānaṃ upanisinnakathampi anumodanampi sarabhaññampīti evamādīni kathenti. Te tesam pasannānaṃ lābhaṃ upasaṃharanti. Sace mayam yaṃ samaṇo gotamā jānāti, tato thokaṃ jāneyyāma, attano samayaṃ tattha pakkhipitvā mayampi upaṭṭhākānaṃ katheyyāma. Tato etehi lābhitarā bhaveyyāma. Ko nu kho samaṇassa gotamassa santike pabbajitvā khippameva uggaṇhituṃ sakkhissatī”ti evaṃ cintetvā “susimo paṭibalo”ti disvā upasaṅkamitvā evamāhaṃsu “ehi tvam, āvuso susīma, samaṇe gotame brahmacariyaṃ cara, tvam dhammaṃ pariyāpuṇitvā amhe vāceyyāsi, taṃ mayam dhammaṃ pariyāpuṇitvā gihīnaṃ bhāsissāma, evam mayampi sakkatā bhavissāma garukatā mānitā pūjitā lābhino cīvarapiṇḍapātasenāsanagilānapaccayabhesajjaparikkhārāna”nti (saṃ. ni. 2.70).

Atha susīmo paribbājako tesam vacanaṃ sampaṭicchitvā yenānando tenupasaṅkami, upasaṅkamitvā pabbajam yāci. Thero ca taṃ ādāya bhagavantaṃ upasaṅkamitvā etamatthaṃ ārocesi. Bhagavā pana cintesi “ayaṃ paribbājako tittiyasamaye ‘ahaṃ pāṭiekkko satthā’ti paṭijānamāno carati, ‘idheva maggabrahmacariyaṃ carituṃ icchāmi’ti kira vadati, kiṃ nu kho mayi pasanno, udāhu mayhaṃ vā mama sāvakānaṃ dhammakathāya pasanno”ti. Athassa ekaṭṭhānēpi pasādābhāvaṃ ñatvā “ayaṃ mama sāsane ‘dhammaṃ thenessāmi’ti pabbajati, itissa āgamaṇaṃ aparissuddhaṃ, nipphatti nu kho kīdisā”ti olokento “kiñcāpi ‘dhammaṃ thenessāmi’ti pabbajati, katipāheneva pana ghaṭetvā arahattaṃ gaṇhissatī”ti ñatvā “tenahānanda, susīmaṃ pabbājethā”ti āha. Taṃ sandhāyetaṃ vuttaṃ **“evaṃ bhagavatā ko ñāto? Susīmo paribbājako”**ti.

Santatihāmattoti (dha. pa. aṭṭha. 2.141 santatihāmattavatthu) so kira ekasmiṃ kāle rañño pasenadissa paccantaṃ kupitaṃ vūpasametvā āgato. Athassa rājā tuṭṭho satta divasāni rajjam datvā ekaṃ naccagītakusalaṃ itthiṃ adāsi. So satta divasāni surāmadamatto hutvā sattame divase sabbālānkarappaṭimaṇḍito hatthikkhandhavaragato nahānatitthaṃ gacchanto satthāraṃ piṇḍāya pavisantaṃ dvārantare disvā hatthikkhandhavaragatova sīsaṃ cāletvā vandi. Satthā sitaṃ katvā “ko nu kho, bhante, sitapātukaraṇe hetū”ti ānandattherena puṭṭho sitakāraṇaṃ ācikkhanto āha – “passasi, ānanda, santatihāmattaṃ, ajjeva sabbābharappaṭimaṇḍito mama santikaṃ āgantvā cātuppadikagāthāvasāne arahattaṃ patvā parinibbāyissatī”ti. Tena vuttaṃ **“evaṃ ko ñāto bhagavatāti? Santatihāmatto”**ti.

Purisindriyāñāṇasuttavaṇṇanā niṭṭhitā.

9. Nibbedhikasuttavaṇṇanā

63. Navame parihāyati attano phalaṃ pariggahetvā vattati, tassa vā kāraṇabhāvaṃ upagacchatīti **pariyāyoti** idha kāraṇaṃ vuttanti āha **“nibbijjanakāraṇa”**nti.

“Anujānāmi, bhikkhave, ahatānaṃ vatthānaṃ diguṇaṃ saṅghāṭī”nti ettha hi paṭalaṭṭho guṇaṭṭho. “Accentī kālā tarayanti rattiyo, vayogunā anupubbaṃ jahantī”ti (saṃ. ni. 1.4) ettha rāsaṭṭho guṇaṭṭho. “Sataguṇā dakkhiṇā paṭikaṅkhitabbā”ti (ma. ni. 3.379) ettha ānisaṃsaṭṭho. “Antaṃ antaguṇaṃ (dī. ni. 2.377; ma. ni. 1.110; khu. pā. 3.dvattiṃsākāro), kayirā mālāguṇe bahū”ti (dha. pa. 53) ettha

bandhanaṭṭho guṇaṭṭho. Idhāpi esova adhippetoti āha “**bandhanaṭṭhena guṇā**”ti. Kāmarāgassa saṃyojanassa paccayabhāvena vatthukāmesupī bandhanaṭṭho rāsaṭṭho vā guṇaṭṭho daṭṭhabbo. **Cakkhuviññeyyāti** vā cakkhuviññānataṃdvārikaviññānehi jānītabbā. **Sotaviññeyyāti**tiādisupī eseva nayo. **Iṭṭhārammaṇabhūtāti** sabhāveneva iṭṭhārammaṇajātikā, iṭṭhārammaṇabhāvaṃ vā pattā. **Kamanīyāti** kāmetabbā. **Manavaḍḍhanakāti** manoharā. Etena parikkappanātopi iṭṭhārammaṇabhāvaṃ saṅgaṇhāti. **Piyajātikāti** piyāyitabbasabhāvā. **Kāmūpasañhitāti** kāmarāgena upecca sambandhanīyā sambandhā kātabbā. Tenāha “**ārammaṇaṃ katvā**”tiādi. **Saṅkappaṛāgoti** vā subhādivasena saṅkappitavutthamhi uppannārāgo. Evamettha vatthukāmaṃ paṭikkhipitvā kilesakāmo vutto tasseva vasena tesampi kāmabhāvasiddhito, kilesakāmassapi iṭṭhavedanā diṭṭhādisampayogabhedena pavattiākārabhedena ca atthi vicittakāti tato visesetum “**citravicitrārammaṇāni**”ti āha, nānappakārāni rūpādiārammaṇāni attho.

Athettha dhīrā vinayanti chandanti atha etesu ārammaṇesu dhitisampannā paṇḍitā chandarāgaṃ vinayanti.

Tajjātikanti taṃsabhāvaṃ, atthato pana tassa kāmassa anurūpanti vuttaṃ hoti. Puññassa bhāgo puññabhāgo, puññakoṭṭhāso. Tena nibbato, tattha vā bhavoti **puññabhāgiyo**. **Apuññabhāgiyoti** etthāpi eseva nayo. Vipākoyeva **vepakkanti** āha “**vohāravipāka**”nti.

Sabbasaṅgāhikāti kusalākusalasādhāraṇā. **Samvidahanacetanāti** sampayuttadhammesu samvidahanalakkhaṇā cetanā. **Urattāḷinti** uraṃ tāḷetvā. **Ekapadanti** ekapadacitaṃ mantam. Tenāha “**ekapadamantaṃ vā**”tiādi.

Nibbedhikasuttavaṇṇanā niṭṭhitā.

10. Sīhanādasuttavaṇṇanā

64. Dasame **tathāgatabalānīti** aññehi asādhāraṇāni tathāgatasseva balāni. Nanu cetāni sāvakānampi ekaccāni uppajjantīti? Kāmaṃ uppajjanti, yādisāni pana buddhānaṃ ṭhānāṭṭhānaññādīni, na tādisāni tadaññesaṃ kadāci uppajjantīti aññehi asādhāraṇāni. Imameva hi yathāvuttaṃ lesaṃ apekkhitvā sādhāraṇabhāvato āsayānusayaññādīsū eva asādhāraṇasamaññā nirulhā. Yathā pubbabuddhānaṃ balāni puññassa sampattiyā āgatāni, tathā āgatabalānīti vā **tathāgatabalāni**. Usabhassa idaṃ **āsabhaṃ**, seṭṭhaṭṭhānaṃ. **Pamukhanādanti** seṭṭhanādaṃ. **Paṭivedhaññāṇe** **desanāññāṇe** **cāti** ettha paññāya pabhāvitam attano ariyaphalāvahaṃ paṭivedhaññaṃ. Karuṇāya pabhāvitam sāvakānaṃ ariyaphalāvahaṃ desanāññaṃ. Tattha paṭivedhaññaṃ uppajjamānaṃ uppannanti duvidhaṃ. Tañhi abhinikkhamaṇato yāva arahattamaggā uppajjamānaṃ, phalakkhaṇe uppannaṃ nāma. Tusitabhavanato yāva mahābodhipallanke arahattamaggā uppajjamānaṃ, phalakkhaṇe uppannaṃ nāma. Dīpaṅkarato paṭṭhāya yāva arahattamaggā uppajjamānaṃ, phalakkhaṇe uppannaṃ nāma. Desanāññaṃampi pavattamānaṃ pavattanti duvidhaṃ. Tañhi yāva aññātakonḍaññaṃ sotāpattimaggā pavattamānaṃ, phalakkhaṇe pavattaṃ nāma. Tesu paṭivedhaññaṃ lokuttaraṃ, desanāññaṃ lokiyaṃ. Ubhayampi panetaṃ aññehi asādhāraṇaṃ, buddhānaññeva orasaññaṃ.

Ṭhānañca ṭhānato pajānātīti kāraṇaṇca kāraṇato pajānāti. Yasmā tattha phalaṃ tiṭṭhati tadāyattavuttitāya uppajjati ceva pavattati ca, tasmā ṭhānanti vuccati. Bhagavā “ye ye dhammā yesaṃ yesaṃ dhammānaṃ hetū paccayā uppādāya, taṃ taṃ ṭhānaṃ, ye ye dhammā yeyaṃ yeyaṃ dhammānaṃ na hetū na paccayā uppādāya, taṃ taṃ aṭṭhāna”nti pajānanto ṭhānato aṭṭhānato yathābhūtaṃ pajānāti.

Samādiyantīti **samādānāni**, tāni pana samādiyitvā katāni hontīti āha “**samādiyitvā katāna**”nti. **Kammameva vā kammamādānanti** etena “samādāna”nti saddassa apubbatthābhāvaṃ dasseti muttagatasadde gatasaddassa viya. **Gatīti** nirayādigatiyo. **Upadhīti** attabhāvo. **Kāloti** kamma

vipaccanārahakālo. **Payogoti** vipākuppattiyā paccayabhūtā kiriyā.

Catunnaṃ jhānānanti paccanīkajjhāpanaṭṭhena ārammaṇūpanijjhānaṭṭhena ca catunnaṃ rūpāvacarajjhānānaṃ. Catukkanayena hetamaṃ vuttaṃ. **Aṭṭhannaṃ vimokkhānanti** “rūpī rūpāni passatī”tiādīnaṃ (ma. ni. 2.248; 3.312; dha. sa. 248; paṭi. ma. 1.209) aṭṭhannaṃ vimokkhānaṃ. **Tiṇṇaṃ samādhīnanti** savitakkasavicārādīnaṃ tiṇṇaṃ samādhīnaṃ. **Navannaṃ anupubbasaṃpattīnanti** paṭhamajjhānasamāpattiādīnaṃ navannaṃ anupubbasaṃpattīnaṃ. Ettha ca paṭipāṭiyā aṭṭhannaṃ samādhītipi nāmaṃ, samāpattītipi cittekaggaṭṭasabbhāvato, nirodhasamāpattiyā tadabhāvato na samādhīti nāmaṃ. **Hānabhāgiyaṃ dhammanti** appaṇṇehi paṭhamajjhānādīhi vuṭṭhitassa saññāmanasikārānaṃ kāmādiṭṭhānaṃ. **Visesabhāgiyaṃ dhammanti** paṇṇehi paṭhamajjhānādīhi vuṭṭhitassa saññāmanasikārānaṃ dutiyajjhānādiṭṭhānaṃ. Iti saññāmanasikārānaṃ kāmādidutiyajjhānādiṭṭhānaṃ hānabhāgiyavisesabhāgiyadhammāti dassitāni. Tehi pana jhānānaṃ taṃsabhāvataṃ dhammasaddena vuttā. **Tasmāti** vuttamevatthaṃ hetubhāvena paccāmasati. **Vodānanti** paṇṇatāsankhātamaṃ vodānaṃ. Tañhi paṭhamajjhānādīhi vuṭṭhahitvā dutiyajjhānādīnaṃ adhigamassa paccayattā “**vuṭṭhāna**”nti vuttaṃ. Ye pana “nirodhato phalasaṃpattiyā vuṭṭhānanti pāḷi natthī”ti vadanti. Te “nirodhā vuṭṭhahantassa nevasaññānāsaññāyatanamaṃ phalasaṃpattiyā anantarapaccayena paccayo”ti imāya **pāḷiyaṃ** (paṭṭhā. 1.1.417) paṭisedhetabbā.

Sīhanādasuttavaṇṇanā niṭṭhitā.

Mahāvaggavaṇṇanā niṭṭhitā.

7. Devatāvaggo

1-3. Anāgāmiṭṭhānaṃ

65-67. Sattamaṃ paṭhamādīni uttānathāni. Tatiye abhisamācāre uttamasamācāre bhavaṃ **ābhisamācārikaṃ**, vattappaṭipattivattaṃ. Tenāha “**uttamasamācārabhūta**”ntiādi. **Sekhapaṇṇattisīlanti** sekhiyavasena paññattasīlaṃ.

Anāgāmiṭṭhānaṃ niṭṭhitā.

4-5. Saṅgaṇikārāmasuttādivaṇṇanā

68-69. Catutthe gaṇena saṅgaṇamaṃ samodhānaṃ gaṇasaṅgaṇikā, sā āramitabbaṭṭhena ārāmo etassāti **gaṇasaṅgaṇikārāmo**. **Saṅgaṇikāti** vā sakaparisaṃsamodhānaṃ. **Gaṇoti** nānājanasamodhānaṃ. Sesamettha suviññeyyameva. Pañcamaṃ uttānathameva.

Saṅgaṇikārāmasuttādivaṇṇanā niṭṭhitā.

6. Samādhisuttavaṇṇanā

70. Chaṭṭhe paṭippassambhanaṃ paṭippassaddhīti atthato ekanti āha “**na paṭippassaddhiladdhenāti kilesappaṭippassaddhiyā aladdhenā**”ti. Sukkapakkhe **santenāti**ādisu aṅgasantatāya ārammaṇasantatāya sabbakilesasantatāya ca santena, atappaniyaṭṭhena **paṇītena**, kilesappaṭippassaddhiyā laddhattā, kilesappaṭippassaddhibhāvaṃ vā laddhattā **paṭippassaddhiladdhena**, passaddhikilesena vā arahatā laddhattā **paṭippassaddhiladdhena**, ekodibhāvena adhigatattā **ekodibhāvādhigatenāti** evamattho daṭṭhabbo.

Samādhisuttavaṇṇanā niṭṭhitā.

7-10. Sakkebbhabbasuttādivaṇṇanā

71-74. Sattame **tasmim tasmim viseseti** tasmim tasmim sacchikātabbe visese. Sakkebbhāvāya paccakkhakarītāya bhabbo sakkebbhabbo, tassa bhāvo sakkebbhabbatā. Tam **sakkebbhabbatam. Sati satiāyataneti** sati satikāraṇe. Kiñcetha kāraṇam? Abhiññā vā abhiññāpādakajjhānam vā, avasāne pana chaṭṭhābhiññāya arahattam vā kāraṇam, arahattassa vipassanā vāti veditabbam. Yañhi tam tatra tatra sakkebbhabbatāsāṅkhātā iddhividhapaccanubhavanādi, tassa abhiññā kāraṇam. Atha iddhividhapaccanubhavanādi abhiññā, evam sati abhiññāpādakajjhānam kāraṇam. Arahattampi “kudāssu nāmāham tadāyatanam upasampajja viharissāmī”ti anuttaresu vimokkhesu piham upaṭṭhapetvā chaṭṭhābhiññam nibbattentassa kāraṇam. Idañca sabbasādhāraṇam na hoti, sādhāraṇavasena pana arahattassa vipassanā kāraṇam. Atha vā **sati āyataneti** tassa tassa visesādhigamassa upanissayasāṅkhāte kāraṇe satīti evamettha attho daṭṭhabbo.

Hānabhāgiyādīsu “paṭhamajjhānassa lābhim kāmasahagatā saññāmanasikārā samudācaranti, hānabhāgiyo samādhī. Tadanudhammatā sati santiṭṭhati, ṭhitibhāgiyo samādhī. Avitakkasahagatā saññāmanasikārā samudācaranti, visesabhāgiyo samādhī. Nibbidāsahagatā saññāmanasikārā samudācaranti virāgūpasamhitā, nibbedhabhāgiyo samādhī”ti (vibha. 799) iminā nayena sabbasamāpattiyo vitthāretvā hānabhāgiyādiattho veditabbo. Tattha **paṭhamajjhānassa lābhinti** yvāyam appaṇassa paṭhamassa jhānassa lābhī, tam. **Kāmasahagatā saññāmanasikārā samudācarantīti** tato vuṭṭhitam ārammaṇavasena kāmasahagatā hutvā saññāmanasikārā samudācaranti tudanti, tassa kāmānatītassa kāmānupakkhandānam saññāmanasikārānam vasena so paṭhamajjhānasamādhī hāyati parihāyati, tasmā **hānabhāgiyo** vutto. **Tadanudhammatāti** tadanurūpasabhāvo. **Sati santiṭṭhatīti** idam micchāsatiṃ sandhāya vuttam. Yassa hi paṭhamajjhānānurūpasabhāvā paṭhamajjhānam santato paṇītato disvā assādayamānā abhinandamānā nikanti hoti, tassa nikantivasena so paṭhamajjhānasamādhī neva hāyati na vaḍḍhati, ṭhitikoṭṭhāsiko hoti. Tena vuttam “**ṭhitibhāgiyo samādhī**”ti. **Avitakkasahagatāti** avitakkam dutiyajjhānam santato paṇītato manasikaroto ārammaṇavasena avitakkasahagatā. **Saññāmanasikārā samudācarantīti** paṇṇapaṭhamajjhānato vuṭṭhitam dutiyajjhānādhigamatthāya codenti tudanti. Tassa upari dutiyajjhānānupakkhandānam saññāmanasikārānam vasena so paṭhamajjhānasamādhī visesabhūtassa dutiyajjhānassa uppattipadaṭṭhānatāya “**visesabhāgiyo**”ti vutto.

Nibbidāsahagatāti tameva paṭhamajjhānalābhim jhānato vuṭṭhitam nibbidāsāṅkhātena vipassanāñāṇena saḥagatā. Vipassanāñāṇaṇhi jhānaṅgesu pabhedena upaṭṭhahantesu nibbindati ukkaṇṭhati, tasmā “**nibbidā**”ti vuccati. **Samudācarantīti** nibbānasacchikiriyatthāya codenti tudanti. **Virāgūpasamhitāti** virāgasāṅkhātena nibbānena upasamhitā. Vipassanāñāṇaṇhi sakkā iminā maggena virāgam nibbānam sacchikātunti pavattito “virāgūpasamhitā”nti vuccati. Tam sampayuttā saññāmanasikārā virāgūpasamhitā eva nāma. Tassa tesam saññāmanasikārānam vasena paṭhamajjhānasamādhī ariyamaggappaṭivedhassa padaṭṭhānatāya “**nibbedhabhāgiyo**”ti vutto. Hānam bhajantīti **hānabhāgiyā**, hānabhāgo vā etesam atthīti **hānabhāgiyā**, parihānakoṭṭhāsikāti attho. Iminā nayena **ṭhitibhāgiyo** veditabbo. Aṭṭhamādīni uttānatthāneva.

Sakkebbhabbasuttādivaṇṇanā niṭṭhitā.

Devatāvaggavaṇṇanā niṭṭhitā.

8. Arahattavaggo

1-3. Dukkhasuttādivaṇṇanā

75-77. Aṭṭhamassa paṭhamādīsu natthi vattabbam. Tatiye **tividham kuhanavatthuntī** paccayappaṭisevanasāmantajappanairiyāpathappavattanasāṅkhātā tividham kuhanavatthum.

Ukkhipivāti “mahākuṭumbiko mahānāviko mahādānapatī”tiādīnā paggaṇhitvā lapanam.
Avakkhipivāti “kiṃ imassa jīvitam, bījabhojano nāmāya”nti hīletvā lapanam.

Dukkhasuttādivaṇṇanā niṭṭhitā.

4. Sukhasomanassasuttavaṇṇanā

78. Catutthe yathāvuttadhammādīsū tassa kilesanimittam dukkham anavassananti
 “sukhasomanassabahulo viharatī”ti vuttam. Kāyikasukhañceva cetāsikasomanassañca bahulam assāti
sukhasomanassabahulo. Yavati tena phalam missitam viya hotīti **yoni**, ekantikam kāraṇam. **Assāti**
 yathāvuttassa bhikkhuno. **Paripuṇṇanti** avikalam anavasesam.

Sukhasomanassasuttavaṇṇanā niṭṭhitā.

5. Adhigamasuttavaṇṇanā

79. Pañcame āgacchanti etena kusalā vā akusalā vāti āgamanam, kusalākusalānam uppattikāraṇam.
 Tattha kusaloti **āgamanakusalo**. Evaṃ dhamme manasikaroto kusalā vā akusalā vā dhammā
 abhivaḍḍhantīti evaṃ jānanto. Apagacchanti kusalā vā akusalā vā etenāti apagamanam. Tesam eva
 anuppattikāraṇam, tattha kusaloti **apagamanakusalo**. Evaṃ dhamme manasikaroto kusalā vā akusalā vā
 dhammā nābhivaḍḍhantīti evaṃ jānanto. **Upāyakusaloti** ṭhānuppattikapaññāsamannāgato. Idañca
 accāyikacce vā bhaye vā uppanne tassa tikicchanattham ṭhānuppattiyā kāraṇajānanavasena
 veditabbam.

Adhigamasuttavaṇṇanā niṭṭhitā.

6-7. Mahantattasuttādivaṇṇanā

80-81. Chaṭṭhe **sampatteti** kilese sampatte. Sattamam uttānameva.

Mahantattasuttādivaṇṇanā niṭṭhitā.

8-10. Dutianirayasuttādivaṇṇanā

82-84. Aṭṭhame **kāyapāgabbhiyādīhīti ādi**-saddena vacīpāgabbhiyam manopāgabbhiyañca
 saṅgaṇhāti. Navamādīni uttānatthāneva.

Dutianirayasuttādivaṇṇanā niṭṭhitā.

Arahattavaggavaṇṇanā niṭṭhitā.

9. Sītivaggo

1. Sītibhāvasuttavaṇṇanā

85. Navamassa paṭhame **sītibhāvanti** nibbānam, kilesavūpasamam vā. **Niggaṇhātīti**
 accāraddhavīriyatādīhi uddhatam cittam uddhaccapakkhato rakkhaṇavasena niggaṇhāti. **Paggaṇhātīti**
 atisithilavīriyatādīhi līnam cittam kosajjapātato rakkhaṇavasena paggaṇhāti. **Sampahamsetīti**
 samappavattacittam tathāpavattiyam paññāya toseti uttejeti vā. Yadā vā paññāpayogamandatāya
 upasamasukhānadhigamena vā nirassādam cittam bhāvanāya na pakkhandati, tadā jātiādīni

saṃvegavatthūni paccavekkhitvā sampahaṃseti samuttejeti. **Ajjhupekkhatīti** yadā pana cittaṃ alīnaṃ anuddhataṃ anirassādaṃ ārammaṇe samappavattaṃ sammadeva bhāvanāvītiṃ otiṇṇaṃ hoti, tadā paggahaniggahasampahaṃsanesu kiñci byāpāraṃ akatvā samappavattesu assesu sārathī viya ajjhupekkhati, upekkhako hoti. **Paṇītādhimuttikoti** paṇīte uttame maggaphale adhimutto ninnapoṇapabbhāro.

Sītibhāvasuttavaṇṇanā niṭṭhitā.

2-11. Āvaraṇasuttādivaṇṇanā

86-95. Dutiye **acchandikoti** kattukamyatākusalacchandarahito. Uttarakurukā manussā acchandikaṭṭhānaṃ paviṭṭhā. **Duppañṇoti** bhavaṅgapañṇāya parihīno. Bhavaṅgapañṇāya pana paripuṇṇāyapi yassa bhavaṅgaṃ lokuttarassa paccayo na hoti, sopi duppañṇo eva nāma. **Abhabbo niyāmaṃ okkamituṃ kusalesu dhammesu sammattanti** kusalesu dhammesu sammattaniyāmasaṅkhātāṃ ariyamaggaṃ okkamituṃ adhigantaṃ abhabbo. **Na kammāvaraṇatāyāti**ādīsu abhabbavipariyāyena attho veditaṃ. Catutthādīni uttānatthāni.

Āvaraṇasuttādivaṇṇanā niṭṭhitā.

Sītivaggavaṇṇanā niṭṭhitā.

10. Ānisaṃsavaggo

1-11. Pātubhāvasuttādivaṇṇanā

96-106. Dasamassa paṭhamādīsu natthi vattaṃ. Aṭṭhame mettā etassa atthīti mettāvā, tassa bhāvo **mettāvatā**, mettāpaṭipatti, tāya. Sā pana mettāvatā mettāvasena pāricariyāti āha “**mettāyuttāya pāricariyā**”ti. **Paricaranti** vipakatabrahmacariyattā. Pariciṇṇasatthukena sāvakena nāma satthuno yāva dhammena kātabbā pāricariyā, tāya sammadeva sampāditattā. Navamādīni uttānatthāni.

Pātubhāvasuttādivaṇṇanā niṭṭhitā.

Ānisaṃsavaggavaṇṇanā niṭṭhitā.

107-116. Ekādasamavaggo uttānatthoyeva.

Iti manorathapūraṇiyā aṅguttaranikāya-aṭṭhakathāya

Chakkanipātavaṇṇanāya anuttānatthadīpanā samattā.

Namo tassa bhagavato arahato sammāsambuddhassa

Aṅguttaranikāye

Sattakanipāta-ṭīkā

1. Paṭhamapaṇṇāsakaṃ

1. Dhanavaggavaṇṇanā

1-10. Sattakanipātassa paṭhamo vaggo uttānattho.

2. Anusayavaggo

4. Puggalasuttavaṇṇanā

14. Dutiyassa catutthe ubhato ubhayathā, ubhato ubhohi bhāgehi vimuttoti **ubhatobhāgavimutto** ekadesasarūpekasesanayena. **Dvīhi bhāgehīti** karaṇe nissakke cetam bahuvacanaṃ. Āvuttiādivasena ayam niyamo veditabboti āha “**arūpasamāpattiyā**”tiādi. Etena “samāpattiyā vikkhambhanavimokkhena, maggena samucchedavimokkhena vimuttattā ubhatobhāgavimutto”ti evaṃ pavatto **tipiṭakacūlanāgattheravādo**, “nāmakāyato rūpakāyato ca vimuttattā ubhatobhāgavimutto”ti evaṃ pavatto **tipiṭakamahārakkhitattheravādo**, “samāpattiyā vikkhambhanavimokkhena ekavāraṃ, maggena samucchedavimokkhena ekavāraṃ vimuttattā ubhatobhāgavimutto”ti evaṃ pavatto **tipiṭakacūlābhayattheravādo cāti** imesaṃ tinṇampi theravādānaṃ ekajjhaṃ saṅgaho katoti daṭṭhabbaṃ. Ettha ca paṭhamavāde dvīhi bhāgehi vimutto ubhatobhāgavimutto vutto, dutiyavāde ubhato bhāgato vimuttoti ubhatobhāgavimutto, tatiyavāde dvīhi bhāgehi dve vāre vimuttoti ayametesam viśesoti. **Vimuttoti** kilēsehi vimutto, kilēsavikkhambhanasamucchedanehi vā kāyato vimuttohi attho.

Soti ubhatobhāgavimutto. Kāmañcetha rūpāvacaṇacatutthajjhānampi arūpāvacaṇarajjhānaṃ viya duvaṅgikaṃ āneñjappattanti vuccati. Taṃ pana padaṭṭhānaṃ katvā arahattaṃ patto ubhatobhāgavimutto nāma na hoti rūpakāyato avimuttattā. Tañhi kilēsakāyatova vimuttaṃ, na rūpakāyato, tasmā tato vuṭṭhāya arahattaṃ patto ubhatobhāgavimutto na hotīti āha “**catunnaṃ arūpa...pe... pañcavidho hotī**”ti. **Arūpasamāpattīnanti** niddhāraṇe sāmivacanaṃ. **Arahattaṃ pattaanāgāminoti** bhūtapubbagatiyā vuttaṃ. Na hi arahattaṃ patto anāgāmī nāma hoti. “Rūpī rūpāni passaṭī”tiādi ke nirodhasamāpattiante aṭṭha vimokkhe vatvā –

“Yato ca kho, ānanda, bhikkhu ime aṭṭha vimokkhe kāyena phusitvā viharati, paññāya cassa disvā āsavā parikkhīṇā honti. Ayaṃ vuccati, ānanda, bhikkhu ubhatobhāgavimutto”ti –

Yadipi **mahānidāne** (dī. ni. 2.130) vuttaṃ, taṃ pana ubhatobhāgavimuttasetṭhavasena vuttanti, idha pana sabbaubhatobhāgavimutte saṅgahaṇatthaṃ “**pañcavidho hotī**”ti vatvā “**pāḷi panettha... pe... aṭṭhavimokkhalābhino vasena āgatā**”ti āha. Majjhimanikāye pana **kīṭāgirisutte** (ma. ni. 2.182) –

“Katamo ca, bhikkhave, puggalo ubhatobhāgavimutto? Idha, bhikkhave, ekacco puggalo ye te santā vimokkhā atikkamma rūpe āruppā, te kāyena phusitvā viharati, paññāya cassa disvā āsavā parikkhīṇā honti. Ayaṃ vuccati, bhikkhave, puggalo ubhatobhāgavimutto”ti –

Arūpasamāpattivasena cattāro ubhatobhāgavimuttā, seṭṭho ca vutto vuttalakkhaṇūpapattito. Yathāvuttesu hi pañcasu purimā cattāro samāpattisīsaṃ nirodhaṃ na samāpajjantīti pariyāyena ubhatobhāgavimuttā nāma. Aṭṭhasamāpattilābhī anāgāmī taṃ samāpajjitvā tato vuṭṭhāya vipassanaṃ vaḍḍhetvā arahattaṃ pattoti nipariyāyena ubhatobhāgavimuttasetṭho nāma.

Katamo ca puggalotiādi puggalapaññattipāḷi. Tattha **katamoti** pucchāvacaṇaṃ. **Puggaloti** asādhāraṇato pucchitabbavacaṇaṃ. **Idhāti** idhasmiṃ sāsane. **Ekaccoti** eko. **Aṭṭha vimokkhe kāyena phusitvā viharatīti** aṭṭha samāpattiyo samāpajjitvā nāmakāyato paṭilabhitvā viharati. **Paññāya cassa disvā āsavā parikkhīṇā hontīti** vipassanāpaññāya saṅkhāragataṃ, maggapaññāya cattāri saccāni passitvā cattāropi āsavā parikkhīṇā honti. **Disvāti** dassanahetu. Na hi āsave paññāya passanti,

dassanakāraṇā pana parikkhīṇā disvā parikkhīṇāti vuttā dassanāyattaparikkhayattā. Evañhi dassanaṃ āsavānaṃ khayassa purimakiriyābhāvena vuttaṃ.

Paññāvimuttoti visesato paññāya eva vimutto, na tassa adhiṭṭhānabhūtena aṭṭhavimokkhasaṅkhātena sātisayena samādhināti paññāvimutto. Yo ariyo anadhigataaṭṭhavimokkho sabbaso āsavehi vimutto, tassettaṃ adhivacanaṃ. Adhigatepi hi rūpajjhānavimokkhe na so sātisayasamādhinissitoti na tassa vasena ubhatobhāgavimuttatā hotīti vuttovāyamatto. Arūpajjhānesu pana ekasmimpi sati ubhatobhāgavimuttotoyeva nāma hoti. Tena hi aṭṭhavimokkhekadesena taṃnāmadānasamatthena aṭṭhavimokkhalābhīveva vuccati. Samudāye hi pavatto vohāro avayavepi dissati yathā taṃ “sattisayo”ti anavasesato āsavānaṃ parikkhīṇattā.

Aṭṭhavimokkhaṇāpattikāpavasesena na ekadesabhūtarūpajjhānapattikāpavasesena. Evañhi arūpajjhānekadesābhāvepi aṭṭhavimokkhaṇāpattikāpavasesena na hotīti siddhaṃ hoti. Arūpāvacarajjhānesu hi ekasmimpi sati ubhatobhāgavimuttotoyeva nāma hoti.

Phuṭṭhantaṃ sacchikatoti phuṭṭhānaṃ anto phuṭṭhanto, phuṭṭhānaṃ arūpajjhānānaṃ anantaro kāloti adhippāyo. Accantasamyoge cettaṃ upayogavacanaṃ. Taṃ phuṭṭhānantarakālema sacchikatābbaṃ sacchikato sacchikāraṇūpāyenāti vuttaṃ hoti, bhāvanapūṃsakaṃ vā etaṃ “ekamantaṃ nisīdi”tiādīsu viya. Yo hi arūpajjhānena rūpakāyato nāmakāyekadesato ca vikkhambhanavimokkhena vimutto, tena nirodhasaṅkhāto vimokkho ālocito pakāsīto viya hoti, na pana kāyena sacchikato. Nirodhaṃ pana āramaṇaṃ katvā ekaccesu āsavesu khepitesu tena so sacchikato hoti, tasmā so sacchikatābbaṃ nirodhaṃ yathāālocitaṃ nāmakāyena sacchi karotīti “kāyasakkhī”ti vuccati, na tu “vimutto”ti ekaccānaṃ āsavānaṃ aparikkhīṇattā. Tenāha “**jhānaphassaṃ paṭhamam phusati, pacchā nirodham nibbānaṃ sacchikarotī**”ti. Ayaṃ catunnaṃ arūpasamāpattīnaṃ ekekato vuṭṭhāya saṅkhāre sammasitvā kāyasakkhibhāvaṃ pattānaṃ catunnaṃ, nirodhā vuṭṭhāya aggamaggappattaanāgāmino ca vasena ubhatobhāgavimutto viya pañcavidho nāma hotīti vuttaṃ **abhidhammaṭikāyaṃ** (pu. pa. mūlaṭī. 24) “kāyasakkhimhipi eseva nayo”ti. **Ekacce āsavāti heṭṭhimamaggavajjhā** āsavā.

Diṭṭhantaṃ pattoti dassanasāṅkhātassa sotāpattimaggañāṇassa anantaraṃ pattoti vuttaṃ hoti. “Diṭṭhattā patto”tipi pāṭho. Etena catusaccadassanasāṅkhātāya diṭṭhiyā nirodhassa pattataṃ dīpeti. Tenāha “**dukkhā saṅkhārā**”tiādi. Tattha **paññāyāti** maggapaññāya. Paṭhamaphalaṭṭhato paṭṭhāya yāva aggamaggaṭṭhā diṭṭhippatto. Tenāha “**sopi kāyasakkhī viya chabbidho hotī**”ti. Yathā pana paññāvimutto, evaṃ ayampi sukkhavipassako catūhi arūpajjhānehi vuṭṭhāya diṭṭhippattabhāvappattā cattāro cāti pañcavidho hotīti veditabbo. Saddhāvimuttepi eseva nayo. **Idaṃ dukkhanti** ettakaṃ dukkhaṃ, na ito uddhaṃ dukkhanti. **Yathābhūtaṃ pajānāti** ṭhapetvā taṇhaṃ upādānakkhandhapañcakaṃ dukkhasaccanti yāthāvato pajānāti. Yasmā pana taṇhā dukkhaṃ janeti nibbatteti, tato taṃ dukkhaṃ samudeti, tasmā na “**ayaṃ dukkhasamudayo**”ti **yathābhūtaṃ pajānāti**. Yasmā pana idaṃ dukkhaṇca samudayo ca nibbānaṃ patvā nirujjhati, appavattiṃ gacchati, tasmā na “**ayaṃ dukkhanirodho**”ti **yathābhūtaṃ pajānāti**. Ariyo pana aṭṭhaṅgiko maggo taṃ dukkhanirodhaṃ gacchati, tena taṃ “**ayaṃ dukkhanirodhagāminī paṭipadā**”ti **yathābhūtaṃ pajānāti**. Ettāvata nānākkhaṇe saccavavattānaṃ dassitaṃ. Idāni taṃ ekakkhaṇe dassetaṃ “**tathāgatappaveditā**”tiādi vuttaṃ. **Tathāgatappaveditā**ti tathāgatena bodhimaṇḍe paṭividdhā viditā pākāṭā katā. **Dhammāti** catusaccadhammā. **Vodiṭṭhā** hotīti sudiṭṭhā. **Vocaritāti** sucaritā, paññāya suṭṭhu carāpitāti attho. **Ayanti** ayaṃ evarūpo puggalo diṭṭhippattoti.

Saddhāya vimuttoti saddahanavasena vimutto. Etena sabbathā avimuttassapi saddhāmattena vimuttabhāvaṃ dasseti. **Saddhāvimuttoti** vā saddhāya adhimuttoti attho. Kiṃ pana nesam kilesappahāne nānattaṃ atthīti? Natthi. Atha kasmā saddhāvimutto diṭṭhippattaṃ na pāpuṇāṭīti? Āgamanīyanānattena. Diṭṭhippatto hi āgamanamhi kilese vikkhambhento appadukkhena akasirena akilamantova sakkoti vikkhambhitaṃ, saddhāvimutto pana dukkhena kasirena kilamanto sakkoti vikkhambhitaṃ, tasmā saddhāvimutto diṭṭhippattaṃ na pāpuṇāti. Tenāha “**etassa hi**”tiādi.

Saddahantassāti “ekamsato ayaṃ paṭipadā kilesakkhayaṃ āvahati sammāsambuddhena bhāsītā”ti evaṃ saddahantassa. Yasmā panassa aniccānupassanādīhi niccasaññāpahānavasena bhāvanāya pubbenāparaṃ viṣesaṃ passato tattha tattha paccakkhatāpi atthi, tasmā vuttaṃ “**saddahantassa viyā**”ti. Sesapadadvayaṃ tasseva vevacanaṃ. Ettha ca **pubbabhāgamaggabhāvanāti** vacanena āgamanīyanānattena diṭṭhippattasaddhāvimmuttānaṃ paññānānattaṃ hotīti dassitaṃ. **Abhidhammaṭṭhakathāyampi** (pu. pa. aṭṭha. 28) “nesaṃ kilesappahāne nānattaṃ natthi, paññāya nānattaṃ atthiyevā”ti vatvā “āgamanīyanānatteneva saddhāvimmutto diṭṭhippattaṃ na pāpuṇāṭīti sannitṭhānaṃ kata”nti vuttaṃ.

Ārammaṇaṃ yāthāvato dhāreti avadhāretīti dhammo, paññā. Taṃ paññāsaṅkhātaṃ dhammaṃ adhimattatāya pubbaṅgamaṃ hutvā pavattaṃ anussarātīti **dhammānusārī**. Tenāha “**dhammo**”tiādi. **Paññāpubbaṅgamaṃ**ti paññāpadhānaṃ. “Saddhaṃ anussarati, saddhāpubbaṅgamaṃ maggaṃ bhāvetī”ti imamatthaṃ **eseva nayoti** atidisati. Paññaṃ vāhetīti **paññāvāhī**, paññaṃ sātisaṃ pavattetīti attho. Tenāha “**paññāpubbaṅgamaṃ ariyamaggaṃ bhāvetī**”ti. Paññā vā puggalaṃ vāheti nibbānābhimukhaṃ gametīti **paññāvāhī**. **Saddhāvāhīti** etthāpi iminā nayeneva attho vedītabbo. **Ubhatobhāgavimuttādīkathāti** ubhatobhāgavimuttādīsu āgamanato paṭṭhāya vattabbakathā. **Tasmāti visuddhimagge** (visuddhi. 2.773, 889) vuttatā. Tato eva **visuddhimaggasaṃvaṇṇanāyaṃ** (visuddhi. mahāṭī. 2.773) vuttanayeneva cettha attho vedītabbo.

Puggalasuttavaṇṇanā niṭṭhitā.

5. Udakūpamāsuttavaṇṇanā

15. Pañcame ekantakālakehīti natthikavādaahetukavādaakiriyavādasāṅkhātehi niyatamicchādīṭṭhidhammehi. Tenāha “**niyatamicchādīṭṭhiṃ sandhāya vutta**”nti. **Evaṃ puggaloti** iminā kāraṇena ekavāraṃ nimuggo nimuggoyeva so hoti. Etassa hi puna bhavato vuṭṭhānaṃ nāma natthīti vadanti makkhaligosālādayo viya. Heṭṭhā heṭṭhā narakaggīnaṃyeva āhāro. **Sādhu saddhā kusalesūti** kusalahammesu saddhā nāma sāhu laddhakāti ummujjati, so tāvattakeneva kusaleṇa ummujjati nāma. **Sādhu hirīti**ādisupi eseva nayo. **Caṅkavāreti** rajakānaṃ khāraparissāvane, surāparissāvane vā. **Evaṃ puggaloti** “evaṃ sādhu saddhā”ti imesaṃ saddhādīnaṃ vasena ekavāraṃ ummujjitvā tesāṃ parihāniyā puna nimujjatiyeva devadattādayo viya. Devadatto hi aṭṭha samāpattiyo pañca ca abhiññāyo nibbattetvāpi puna buddhānaṃ paṭipakkhatāya tehi guṇehi parihīno ruhiruppādakammaṃ saṅghabhedakammaṃ katvā kāyassa bhedaṃ dutiyacittavāreṇa cuticittamanantarā niraye nibbatta. Kokāliko dve aggasāvake upavaditvā padumaniraye nibbatta.

Neva hāyati no vaḍḍhatīti appahonakakālepi na hāyati, pahonakakālepi na vaḍḍhati. Ubhayampi panetaṃ agārikenapi anagārikenapi dīpetabbaṃ. Ekacco hi agāriko appahonakakāle pakkhikabhattaṃ vassikaṃ vā upanibandhāpesi, so pacchā pahonakakālepi pakkhikabhattādīmattameva pavatteti. Anagārikopi ādimhi appahonakakāle uddesaṃ dhutaṅgaṃ vā gaṇhāti, medhāvī balavīriyasampattiyā pahonakakāle tato uttariṃ na karoti. **Evaṃ puggaloti** evaṃ imāya saddhādīnaṃ ṭhitiyā puggalo ummujjitvā ṭhito nāma hoti. **Ummujjitvā pataratīti** sakadāgāmipuggalo kilesatanutāya uṭṭhahitvā gantabbadisābhimukho tarati nāma.

Paṭigādhappatto hotīti anāgāmipuggalaṃ sandhāya vadati. Ime pana satta puggalā udakopamena dīpitā. Satta kira jaṅghavāñijā addhānamaggappaṭipannā antarāmagge ekaṃ puṇṇanadiṃ pāpuṇimsu. Tesu paṭhamāṃ otiṇṇo udakabhīruko puriso otiṇṇaṭṭhāneyeva nimujjitvā puna saṅṭhātuṃ nāsakkhi, avassaṃva macchakacchapabhattaṃ jāto. Dutiyō otiṇṇaṭṭhāne nimujjitvā sakīṃ uṭṭhahitvā puna nimuggo uṭṭhātuṃ nāsakkhi, antoyeva macchakacchapabhattaṃ jāto. Tatiyō nimujjitvā uṭṭhito majjhe nadiyā ṭhatvā neva orato āgantuṃ, na pāraṃ gantuṃ asakkhi. Catuttho uṭṭhāya ṭhito uttaraṇatitthaṃ olokesi. Pañcamaṃ uttaraṇatitthaṃ oloketvā patarati. Chaṭṭho taṃ disvā pārimatīraṃ gantvā kaṭippamāṇe uduke ṭhito. Sattamo pārimatīraṃ gantvā gandhacūṇṇādīhi nhatvā varavatthādīni nivāsetvā

surabhivilepanaṃ vilimpitvā nīluppalamālādīni pilandhitvā nānālaṅkārapaṭimaṇḍito mahānagaraṃ pavisitvā pāsādamāruhitvā uttamabhojanaṃ bhuñjati.

Tattha jaṅghavāṇijā viya ime satta puggalā, nadī viya vaṭṭaṃ, paṭhamassa udakabhīrukassa purisassa otiṇṇatṭhāneyeva nimujjanaṃ viya micchādīṭṭhikassa vaṭṭe nimujjanaṃ, ummujjitvā nimujjanapuriso viya saddhādīnaṃ uppattimatthakena ummujjitvā tāsamaṃ hāniyā nimuggapuggalo, majjhe nadiyā ṭhatvā viya saddhādīnaṃ ṭhitiyā ṭhitipuggalo, uttaraṇatitthaṃ olokeno viya sotāpanno, patarantapuriso viya kilesakāmavaṭṭatāya pataranto sakadāgāmī, taritvā kaṭimatte udake ṭhitapuriso viya anāvaṭṭadhammattā anāgāmī, nhatvā pārimatīraṃ uttaritvā thale ṭhitapuriso viya cattāro oghe atikkamitvā nibbānathale ṭhito khīṇāsavabrāhmaṇo, thale ṭhitapurisassa nagaraṃ pavisitvā pāsādaṃ āruya uttamabhojanabhūjanaṃ viya khīṇāsavassa nibbānārammaṇasamāpattiṃ appetvā vītināmanaṃ veditabbaṃ.

Udakūpamāsuttavaṇṇanā niṭṭhitā.

6-9. Aniccānupassīsuttādivaṇṇanā

16-19. Chaṭṭhe “**idha samasīsī kathito**”ti vatvā evaṃ samasīsitaṃ vibhajitvā idhādhippetamaṃ dassetuṃ “**so catubbidho hotī**”tiādīmāha. Rogavasena samasīsī **rogasamasīsī**. Esa nayo sesesupi. **Ekappahārenevā**ti ekavelāyameva. Yo cakkhurogādīsu aññatarasmim̐ sati “**ito anuṭṭhito arahattaṃ pāpuṇissāmī**”ti vipassanaṃ paṭṭhapesi, athassa arahattaṇca rogato vuṭṭhānaṇca ekakārameva hoti, ayaṃ **rogasamasīsī** nāma. **Iriyāpathassa pariyosānanti** iriyāpathantarasaṃyogo. Yo ṭhānādīsu iriyāpathesu aññataraṃ adhiṭṭhāya “**avikopetvā arahattaṃ pāpuṇissāmī**”ti vipassanaṃ paṭṭhapesi. Athassa arahattappatti ca iriyāpathavikopanaṇca ekappahāreneva hoti, ayaṃ **iriyāpathasamasīsī** nāma. **Jīvitasamasīsī nāmā**ti ettha “**palibodhasīsamaṃ māno, parāmāsasīsamaṃ dīṭṭhi, vikkhepasīsamaṃ uddhaccaṃ, kilesasīsamaṃ avijjā, adhimokkhasīsamaṃ saddhā, pagghasīsamaṃ vīriyaṃ, upaṭṭhānasīsamaṃ sati, avikkhepasīsamaṃ samādhi, dassanasīsamaṃ paññā, pavattasīsamaṃ jīvitindriyaṃ, cutisīsamaṃ vimokkha, saṅkhārasīsamaṃ nirodho**”ti **paṭisambhidāyaṃ** (paṭi. ma. 3.33) vuttetu sattarasasu sīsasu pavattasīsamaṃ kilesasīsanti dve sīsāni idhādhippetāni – “**apubbaṃ acarimaṃ āsavapariyādānaṇca hoti jīvitapariyādānaṇca**”ti vacanato. Tesu kilesasīsamaṃ arahattamaggo pariyādiyati, pavattasīsamaṃ jīvitindriyaṃ cuticittaṃ pariyādiyati. Tattha avijjāpariyādāyakaṃ cittaṃ jīvitindriyaṃ pariyādātuṃ na sakkoti, jīvitindriyapariyādāyakaṃ avijjamaṃ pariyādātuṃ na sakkoti. Aññaṃ avijjāpariyādāyakaṃ cittaṃ, aññaṃ jīvitandriyapariyādāyakaṃ. Yassa cetamaṃ sīsadvayaṃ samaṃ pariyādānaṃ gacchati, so **jīvitasamasīsī** nāma.

Kathaṃ panidaṃ samaṃ hotīti? Vārasamatāya. Yasmiṇhi vāre maggavuṭṭhānaṃ hoti, sotāpattimagge pañca paccavekkhaṇāni, sakadāgāmimagge pañca, anāgāmimagge pañca, arahattamagge cattārīti ekūnavāsītime paccavekkhaṇāṇe patiṭṭhāya bhavaṅgaṃ otaritvā parinibbāyato imāya vārasamatāya idaṃ ubhayaśisapariyādānampi samaṃ hotīti imāya vārasamatāya. Vārasamavuttidāyakena hi maggacittena attano anantaraṃ viya nipphādetabbā paccavekkhaṇāvārā ca kilesapariyādānasēva vārāti vattabbaṃ arahati. “**Vimuttasmim̐ vimuttamitī ṇāṇamaṃ hotī**”ti (ma. ni. 1.78; saṃ. ni. 3.12, 14) vacanato paccavekkhaṇaparisaṃāpanena kilesapariyādānaṃ sampāpitaṃ nāma hotīti imāya vāravuttiyā samatāya kilesapariyādānajīvitapariyādānānaṃ samatā veditabbā. Tenevāha “**yasmā panassa...pe... tasmā evamaṃ vutta**”nti.

Āyuno vemajjhaṃ anatikkamitvā antarāva kilesaparinibbānena parinibbāyatīti **antarāparinibbāyī**. Tenāha “**yo pañcasu suddhāvāsesū**”tiādi. **Vemajjheti** avihādīsu yattha uppanno, tattha āyuno vemajjhe. Āyuvemajjhaṃ upahacca atikkamitvā tattha parinibbāyatīti **upahaccaparinibbāyī**. Tenāha “**yo tatthevā**”tiādi. Asaṅkhārena appayogena anussāhena akilamanto tikkhindriyatāya sukhevena parinibbāyatīti **asaṅkhāraparinibbāyī**. Tenāha “**yo tesamevā**”tiādi. **Tesameva puggalānanti** niddhāraṇe sāmivacanaṃ. **Appayogenā**ti adhimattappayogena vinā appakasirena. Saṅkhārena

sappayogena kilamanto dukkhena parinibbāyatīti **sasaṅkhāraparinibbāyī**. Uddhamvāhibhāvena uddhamassa taṅhāsotaṃ vaṭṭasotañcāti, uddhamā vā gantvā paṭilabhitaḃbato uddhamassa maggasotanti **uddhambho**. Paṭisandhivasena akaniṭṭhaṃ gacchatīti **akaniṭṭhagāmī**.

Ettha pana catukkaṃ veditabbaṃ. Yo hi avihato paṭṭhāya cattāro devaloke sodhetvā akaniṭṭhaṃ gantvā parinibbāyati, ayaṃ **uddhamasoto akaniṭṭhagāmī nāma**. Ayañhi aviheṣu kappasahassaṃ vasanto arahattaṃ pattuṃ asakkuṇivā atappaṃ gacchati, tatrāpi dve kappasahassāni vasanto arahattaṃ pattuṃ asakkuṇivā sudassaṃ gacchati, tatrāpi cattāri kappasahassāni vasanto arahattaṃ pattuṃ asakkuṇivā akaniṭṭhaṃ gacchati, tattha vasanto aggamaḃgaṃ adhigacchati. Tattha yo avihato paṭṭhāya dutiyaṃ vā catutthaṃ vā devalokaṃ gantvā parinibbāyati, ayaṃ **uddhamasoto na akaniṭṭhagāmī nāma**. Yo kāmabhavato cavitvā akaniṭṭhesu parinibbāyati, ayaṃ **na uddhamasoto akaniṭṭhagāmī nāma**. Yo heṭṭhā catūsu devalokesu tattha tattheva nibbattivā parinibbāyati, ayaṃ **na uddhamasoto na akaniṭṭhagāmīti**.

Ete pana aviheṣu uppannasamanantaraāyuvemajjhaṃ appatvāva parinibbāyanavasena tayo antarāparinibbāyino, eko upahaccaparinibbāyī, eko uddhamasototi pañcavidho, asaṅkhārasasaṅkhāraparinibbāyivibhāgena daṣa honti, tathā atappasudassasudassīsūti cattāro daṣakāti cattārīsaṃ. Akaniṭṭhe pana uddhamasoto natthi, tayo antarāparinibbāyino, eko upahaccaparinibbāyīti cattāro, asaṅkhārasasaṅkhāraparinibbāyivibhāgena aṭṭhāti aṭṭhacattārīsaṃ anāgāmino. Sattamādīsū natthi vattabbaṃ.

Aniccānupassīsuttādivaṇṇanā niṭṭhitā.

10. Niddasavatthusuttavaṇṇanā

20. Dasame **niddasavatthūnīti** ādisaddalopenāyaṃ niddesoti āha “**niddasādivatthūnī**”ti. Natthi idāni imassa daṣāti **niddaso**. **Pañhoti** ñātuṃ icchito attho. **Puna dasavasso na hotīti** tesam matimattametanti dassetuṃ “**so kira**”ti kirasaddaggaṇaṃ. **Niddasoti** cetam vacanamattaṃ. Tassa nibbīsādibhāvassa viya ninnavādibhāvassa ca icchitattāti dassetuṃ “**na kevalañcā**”tiādi vuttaṃ. **Gāme vicarantoti** gāme piṇḍāya caranto. Na idaṃ titthiyānaṃ adhivacanaṃ tesu tannimitassa abhāvā, sāsanepi sekhassapi na idaṃ adhivacanaṃ, kimaṅgaṃ pana puthujjanassa. Yassa panetaṃ adhivacanaṃ yena ca kāraṇena, taṃ dassetuṃ “**khīṇāsavasseta**”ntiādi vuttaṃ. Appaṭisandhikabhāvo hissa paccakkhato kāraṇaṃ. Paramparāya itarāni yāni pāliyaṃ āgatāniṃ.

Sikkhāya sammadeva ādānaṃ **sikkhāsamādānaṃ**. Taṃ panassā paṛipūriyā veditabbanti āha “**sikkhāttayapūraṇe**”ti. Sikkhāya vā sammadeva ādito paṭṭhāya rakkhaṇaṃ **sikkhāsamādānaṃ**. Tañca atthato pūraṇena paricchinnaṃ arakkhaṇe sabbena sabbaṃ abhāvato, rakkhaṇe ca paṛipūraṇato. **Balavacchandoti** daḃhacchando. **Āyatinti** anantarānāgatadivasādikālo adhippeto, na anāgatabhavoti āha “**anāgate punadivasādīsūpi**”ti. Sikkhaṃ paṛipūrentassa tattha nibaddhabhattitā **avigatapematā**. Tebhūmakadhammānaṃ aniccādivasena sammadeva nijjhānaṃ **dhammanisāmanāti** āha “**vipassanāyetaṃ adhivacana**”nti. **Taṅhāvinayeti** bhaṅgānupassanāñāṇānubhāvasiddhe taṅhāvikkhambhane. **Ekibhāveti** gaṇasaṅgaṇikākilesasaṅgaṇikāvigamasiddhe vivekavāse. **Vīriyārambheti** sammappadhānassa paggaṇhane. Taṃ pana sabbaso vīriyassa paṛibrūhanaṃ hotīti āha “**kāyikacetāsikassa vīriyassa pūraṇe**”ti. **Satiyañceva nipakabhāve cāti** satokāritāya ceva sampajānakāritāya ca. Satisampajāññabaleneva hi vīriyārambho ijjhati. **Diṭṭhipaṭivedheti** maggasammādiṭṭhiyā paṭivijjhane. Tenāha “**maggadassane**”ti.

Niddasavatthusuttavaṇṇanā niṭṭhitā.

Anusayavaggavaṇṇanā niṭṭhitā.

3. Vajjisattakavaggo

1. Sārandadasuttavaṇṇanā

21. Tatiyassa paṭhame devāyatanabhāvena cittattā lokassa cittikāraṭṭhānatāya ca **cetiyaṃ** ahoṣi. **Yāvākīvaṅti** (dī. ni. ṭī. 2.134) ekamevetamaṃ padaṃ aniyamato parimāṇavācī. Kālo cettha adhippetoti āha “**yattakaṃ kāla**”nti. **Abhiṇhaṃ sannipātāti** niccasannipātā. Taṃ pana niccasannipātataṃ dassetaṃ “**divasassā**”tiādi vuttaṃ. **Sannipātabahulāti** pacurasannipātā. **Vosānanti** saṅkocaṃ. “**Vuddhiyevā**”tiādinā vuttamatthaṃ byatirekamukhena dassetaṃ “**abhiṇhaṃ asannipatantā hī**”tiādi vuttaṃ. **Ākulāti** khubhitā na pasannā. **Bhijjivāti** vaggabandhato vibhajja viṣuṃ viṣuṃ hutvā.

Sannipātabheriyāti sannipātārocanabheriyā. **Addhabhuttā vāti** sāmibhuttā vā. **Osīdamāneti** hāyamāne.

Suṅkanti bhaṇḍaṃ gahetvā gacchantehi pabbatakhaṇḍanāditiṭṭhagāmadvārādīsu rājapurisānaṃ dātābhabhāgaṃ. **Balinti** nipphanasassādito chabhāgaṃ sattabhāgantiādinā laddhabbakaram. **Daṇḍanti** dasavīsatikahāpaṇādikāṃ aparādhānurūpaṃ gahetabbadhaṇḍaṃ. **Vajjidhammanti** vajjirājadhamaṃ. Idāni apaññattapaññāpanādīsu tappaṭikkhepe ca ādinavānisamse ca vitthārato dassetaṃ “**tesa**”ntiādi vuttaṃ. **Pāricariyakkhamāti** upaṭṭhānakkhamā. **Porāṇaṃ vajjidhammanti** ettha pubbe kira vajjirājāno “ayaṃ coro”ti ānetvā dassite “gaṇhatha naṃ cora”nti avatvā vinicchayamahāmatānaṃ denti. Te vinicchinitvā sace acoro hoti, vissajjenti. Sace coro, attanā kiñci akatvā vohārikānaṃ denti, tepi vinicchinitvā acoro ce, vissajjenti. Coro ce, suddharānaṃ denti. Tepi vinicchinitvā acoro ce, vissajjenti. Coro ce, aṭṭakulikānaṃ denti, tepi tatheva katvā senāpatissa, senāpati uparājassa, uparājā rañño. Rājā vinicchinitvā sace acoro hoti, vissajjeti. Sace pana coro hoti, paveṇipañṇakaṃ vācāpeti. Tattha “yena idaṃ nāma kataṃ, tassa ayaṃ nāmaḍḍo”ti likhitaṃ. Rājā tassa kiriyaṃ tena samānetvā tadanucchavikaṃ daṇḍaṃ karoti. Iti etaṃ porāṇaṃ vajjidhammaṃ samādāya vattantānaṃ manussā na ujjhāyanti. Paramparāgatesu aṭṭakulesu jātā agatigamanaviratā aṭṭamahallakapurisā **aṭṭakulikā**.

Sakkāranti upakāraṃ. **Garubhāvaṃ paccupaṭṭhapetvāti** “ime amhākaṃ garuno”ti tattha garubhāvaṃ paṭi paṭi upaṭṭhapetvā. **Mānessantīti** sammānessanti. Taṃ pana sammānaṃ tesu nesamaṃ attamanatāpubbakanti āha “**manena piyāyissanti**”ti. **Nipaccakāraṃ** paṇipātaṃ. **Dassentīti** garucittabhāraṃ dassenti. **Sandhānetunti** sambandhaṃ avicchinnaṃ katvā ghaṭetaṃ.

Pasayhakārassāti balakkārassa. Kāmaṃ vuddhiyā pūjanīyatāya “vuddhihāniyo”ti vuttaṃ, attho pana vuttānukkameneva yojetabbo. Pāḷiyaṃ vā yasmā “vuddhiyeva paṭikānkā, no parihāni”ti vuttaṃ, tasmā tadanukkamena “**vuddhihāniyo**”ti vuttaṃ.

Vipaccitaṃ aladdhokāse pāpakamme, tassa kammaṃ vipāke vā anavasaro va devasopasaggo. Tasmaṃ pana laddhokāse siyā devatopasaggassa avasaroti āha “**anuppannaṃ...pe... vaḍḍhenti**”ti. Eteneva **anuppannaṃ sukhanti** etthāpi attho veditabbo. Balakāyassa diguṇatiguṇatādassanaṃ paṭibhayabhāvadassananti evamādinā devatānaṃ **saṅgāmasīse sahāyatā** veditabbā.

Anicchitanti aniṭṭhaṃ. **Āvaraṇatoti** nisedhanato. Dhammato anapetā dhammiyāti idha “**dhammikā**”ti vuttā. Migasūkarādighātāya sunakhādīnaṃ kaḍḍhitvā vanacaraṇaṃ vājo, tattha niyuttā, te vā vājentīti **vājikā**, migavadhacārino.

Sārandadasuttavaṇṇanā niṭṭhitā.

2. Vassakārasuttavaṇṇanā

22. Dutīye **abhiyātukāmoti** ettha **abhi**-saddo abhibhavanattho “anabhividitu”ntiādīsu viyāti āha “**abhibhavanatthāya yātukāmo**”ti. **Vajjirājānōti** “vajjetabbā ime”ti ādito pavattaṃ vacanaṃ upādāya vajjīti laddhanāmā rājāno, vajjiraṭṭhassa vā rājāno vajjirājāno. Raṭṭhassa pana vajjisamaññā tannivāsīrājakumāravasena vedītabbā. **Rājiddhiyāti** rājabhāvānugatena pabhāvena. So pana pabhāvo nesam gaṇarājānaṃ mitho sāmaggīyā loke pākaṭo. Ciratṭhāyī ca ahoṣīti “**samaggabhāvaṃ kathetī**”ti vuttaṃ. Anu anu taṃsamāṅgino bhāveti vaḍḍhetīti anubhāvo, anubhāvo eva **ānubhāvo**, patāpo. So pana nesam patāpo hatthiassādivāhanasampattiyā tattha ca subhikkhitabhāvena loke pākaṭo jātoti “**etena... pe... kathetī**”ti vuttaṃ. **Tālacchiggaḷenāti** kuñcīkāchiddena. **Asananti** saraṃ. **Atipātayissantīti** atikkāmenti. **Poñkhānupōñkhanti** poñkhassa anupoñkhaṃ, purimasarassa poñkhapadānugatapōñkhaṃ itaraṃ saraṃ katvāti attho. **Avirādhanti** avirajjhitaṃ. **Ucchindissāmīti** ummulānavasena kulasantatiṃ chindissāmī. Ayanam vaḍḍhanaṃ ayo, tappatīpakkhena **anayoti** āha “**avaḍḍhi**”nti. Nātinam byasanaṃ vināso **ñātibyasanaṃ**.

Gaṅgāyāti gaṅgāsamīpe. **Paṭṭanagāmanti** sakaṭapaṭṭanagāmaṃ. **Tatrāti** tasmim paṭṭane. **Balavāghātajātōti** uppannabalavakodho. **Meti** mayham. **Gatenāti** gamanena. **Sītam vā uṇham vā natthi** tāya velāya. **Abhimukhaṃ yuddhenāti** abhimukhaṃ ujukameva saṅgāmakaraṇena. **Upalāpanam** sāmaṃ dānañcāti dassetuṃ “**ala**”ntiādī vuttaṃ. Bhedopi idha upāyo evāti vuttaṃ “**aññatra mithubhedā**”ti. Yuddhassa pana anupāyatā pageva pakāsītā. **Idanti** “aññatra upalāpanāya aññatra mithubhedā”ti idaṃ vacanaṃ. **Kathāya nayaṃ labhitvāti** “yāvakīvañca ...pe... parihānī”ti imāya bhagavato kathāya upāyaṃ labhitvā. **Anukampāyāti** vajjirājesu anuggahena.

Rājāpi tameva pesetvā sabbe...pe... pāpesīti rājā taṃ attano santikaṃ āgataṃ “kiṃ, ācariya, bhagavā avacā”ti pucchi. So “yathā bho samaṇassa gotamassa vacanaṃ na sakkā vajjī kenaci gahetuṃ, apica upalāpanāya vā mithubhedena vā sakkā”ti āha. Tato nam rājā “upalāpanāya amhākaṃ hatthiassādayo nassissanti, bhedeneva te gahessāmī, kiṃ karomā”ti pucchi. Tena hi, mahārāja, tumhe vajjī ārabha parisati kathaṃ samuṭṭhāpetha, tato aham “kiṃ te, mahārāja, tehi, attano santakena kasivaññijjādīni katvā jīvantu ete rājāno”ti vatvā pakkamissāmī. Tato tumhe “kiṃ nu, bho, esa brāhmaṇo vajjī ārabha pavattaṃ kathaṃ paṭibhāatī”ti vadeyyātha. Divasabhāge cāham tesam paṇṇākāraṃ pesessāmī, tampi gāhāpetvā tumhepi mama dosaṃ āropetvā bandhanatālanādīni akatvāva kevalaṃ khuramuṇḍaṃ maṃ katvā nagarā nīharāpetha, athāham “mayā te nagare pākāro parikhā ca kāritā, aham thiradubbalaṭṭhānañca uttānagambhīraṭṭhānañca jānāmī, na cirassaṃ dāni taṃ ujum karissāmī”ti vakkhāmī. Taṃ sutvā tumhe “gacchatū”ti vadeyyāthāti. Rājā sabbaṃ akāsi.

Licchavī tassa nikkhamaṃ sutvā “saṭho brāhmaṇo, mā tassa gaṅgaṃ uttāretuṃ adatthā”ti āhaṃsu. Tatra ekaccehi “amhe ārabha kathitattā kira so evaṃ karotī”ti vutte “tena hi bhāṇe etū”ti vadīmsu. So gantvā licchavī disvā “kimāgatattā”ti pucchito taṃ pavattiṃ ārocesi. Licchavīno “appamattakena nāma evaṃ garuṃ daṇḍaṃ kātuṃ na yutta”nti vatvā “kiṃ te tatra thānantara”nti pucchīmsu. Vinicchayamahāmaccohamasmīti. Tadeva te thānantaraṃ hotūti. So suṭṭhutaṃ vinicchayaṃ karoti. Rājājakumārā tassa santike sippaṃ uggaṇhanti. So patitṭhitaguṇo hutvā ekadivasam ekaṃ licchaviṃ gahetvā ekamantaṃ gantvā “dārakā kasantī”ti pucchi. Āma, kasanti. Dve goṇe yojetvāti. Āma, dve goṇe yojetvāti. Ettakaṃ vatvā nivatto. Tato tamañño “kiṃ ācariyo āhā”ti pucchitvā tena vuttaṃ – asaddahanto “na meso yathābhūtaṃ kathetī”ti tena saddhiṃ bhijji.

Brāhmaṇo aparampi ekadivasam ekaṃ licchaviṃ ekamantaṃ netvā “kena byañjanena bhuttosī”ti pucchitvā nivatto. Tampi añño pucchitvā asaddahanto tatheva bhijji. Brāhmaṇo aparampi divasaṃ ekaṃ licchaviṃ ekamantaṃ netvā “atiduggatosi kirā”ti pucchi. Ko evamāhāti. Asuko nāma licchavīti. Aparampi ekamantaṃ netvā “tvam kira bhīrujātiko”ti pucchi. Ko evamāhāti? Asuko nāma licchavīti. Evaṃ aññena akathitameva aññassa kathento tīhi samvaccharehi te rājāno aññamaññaṃ bhinditvā yathā dve ekamaggena na gacchanti, tathā katvā sannipātabheriṃ carāpesi. Licchavīno “issarā sannipatantu, sūrā sannipatantū”ti vatvā na sannipatiṃsu. Brāhmaṇo “ayaṃ dāni kālo, sīghaṃ āgacchatū”ti rañño sāsaṃ peseti. Rājā sutvāva balabheriṃ carāpetvā nikkhamī. Vesālikā sutvā “rañño gaṅgaṃ uttaritum

na dassāmā”ti bheriṃ carāpesuṃ. Te sutvā “gacchantu sūrarājāno”tiādīni vatvā na sannipatiṃsu. “Nagarappavesanaṃ na dassāma, dvārāni pidahissāmā”ti bheriṃ carāpesuṃ. Ekopi na sannipati. Yathāvivaṭehi dvārehi pavisitvā sabbe anayabyasanaṃ pāpetvā gato. Taṃ sandhāyetaṃ vuttaṃ – “rājāpi tameva pesetvā sabbepi bhinditvā gantvā anayabyasanaṃ pāpesi”ti.

Vassakārasuttavaṇṇanā niṭṭhitā.

2. Paṭhamasattakasuttavaṇṇanā

23. Tatiye aparihānāya hitāti **aparihāniyā** (dī. ni. ṭī. 2.136), na parihāyanti etehīti vā **aparihāniyā**. Evaṃ saṅkhepato vuttamatthaṃ vitthārato dassento “**idhāpi cā**”tiādīmāha. Tattha **tatotiādi** disāsu āgatasāsane vuttavacanaṃ vuttakathanaṃ. **Vihārasīmā ākulā** yasmā, tasmā **uposathapavāraṇā ṭhitā**. **Olīyamānakoti** pālīto atthato ca vinassamānako. **Ukkhipāpentāti** paguṇabhāvakaraṇena atthasaṃvaṇṇanāvasena ca paggaṇhantā.

Sāvattiyam bhikkhū viya (pārā. 565) pācittiyam desāpetabboti paññāpentā. **Vajjiputtakā viya** (cūḷava. 446) dasavattitudīpanena. **Tathā akarontāti** navaṃ katikavattaṃ vā sikkhāpadaṃ vā amaddantā dhammavinayato sāsanaṃ dīpentā khuddakampi ca sikkhāpadaṃ asamūhanantā. **Āyasmā mahākassapo viya cāti** “suṇātu me, āvuso, saṅgho, santāmhākaṃ sikkhāpadāni gihigatāni. Gihinopi jānanti ‘idaṃ vo samaṇānaṃ sakyaputtikānaṃ kappati, idaṃ vo na kappati’ti. Sacepi hi mayam khuddānukhuddakāni sikkhāpadāni samūhanissāma, bhavissanti vattāro ‘dhūmakālikam samaṇena gotamena sāvakānaṃ sikkhāpadaṃ paññattaṃ, yāvimesaṃ satthā aṭṭhāsi, tāvime sikkhāpadesu sikkhiṃsu. Yato imesaṃ satthā parinibbuto, na dānime sikkhāpadesu sikkhanti’ti. Yadi saṅghassa pattakallaṃ, saṅgho apaññattaṃ na paññapeyya, paññattaṃ na samucchindeyya, yathāpaññattesu sikkhāpadesu samādāya vatteyyā”ti imaṃ (cūḷava. 442) tantim ṭhapento āyasmā mahākassapo viya ca.

Thirabhāvappattāti sāsane thirabhāvaṃ anivattitabhāvaṃ upagatā. **Therakārakehīti** therabhāvasādhahehi silādiguṇehi asekkhadhammehi. **Bahū rattiyo**ti pabbajitā hutvā bahū rattiyo jānanti. Silādiguṇesu patiṭṭhāpanameva sāsane **pariṇāyakatāti** āha “**tīsu sikkhāsu pavattenti**”ti. **Ovādam na denti** abhājanabhāvato. **Paveṇikathanti** ācariyaparamparābhatam sammāpaṭipattidīpanam dhammakatham. **Sārabhūtam dhammapariyāyanti** samathavipassanāmaggaḥālasampāpanena sāsane sārabhūtam bojjhaṅgakoṣallaanuttarasītibhāva- (a. ni. 6.85) adhiccittasuttādidhammatantiṃ. **Ādikaṃ ovādanti ādi-**saddena “evaṃ te āloketabbaṃ, evaṃ te viloketabbaṃ, evaṃ te samiṇṇitabbaṃ, evaṃ te pasāretabbaṃ, evaṃ te saṅghāṭipattacīvaraṃ dhāretabba”nti ovādam saṅgaṇhāti.

Punabbhavadānaṃ **punabbhavo** uttarapadalopena. **Itareti** ye na paccayavasikā na āmisacakkhukā, te **na gacchanti** taṇhāya vasam.

Āraññakesūti araññabhāgesu araññapariyāpannesu. Nanu yattha katthacipi taṇhā sāvajjā evāti codanaṃ sandhāyāha “**gāmantasenāsanesu hī**”tiādi. Tena “anuttaresu vimokkhesu pihaṃ upaṭṭhāpayato”ti ettha vuttapihādayo piya āraññakasenāsanesu sālayatā sevitabbapakkhikā evāti dasseti.

Attanāvāti sayameva. Tena parehi anussāhitānaṃ saraseneva anāgatānaṃ pesalānaṃ bhikkhūnaṃ āgamaṇaṃ, āgatānaṃ phāsuvihāraṃ paccāsīsantīti dasseti. **Imināva nīhārenāti** imāya paṭipattiyā. **Aggahitadhammaggaṇanti** aggahitassa pariyattidhammassa uggahaṇaṃ. **Gahitasajjhāyakaṇanti** uggahitassa suṭṭhu atthacintanaṃ. Cintarattho hi ayaṃ sajjhāyasaddo. **Entīti** upagacchanti. Nisīdanti āsanapaññāpanādinā.

Paṭhamasattakasuttavaṇṇanā niṭṭhitā.

4-6. Dutiyasattakasuttādivaṇṇanā

24-26. Catutthe **karontoyevāti** yathāvuttaṃ tiracchānakathaṃ kathentoyeva.

Atiracchānakathābhāvepi tassa tatha tapparabhāvadassanattaṃ avadhāraṇavacanāṃ. **Pariyantakārīti** sapariyantāṃ katvā vattā. “Pariyantavatīṃ vācaṃ bhāsītā”ti (dī. ni. 1.9, 194) hi vuttaṃ.

Appabhassovāti parimitakathoyeva ekantena kathetabbasseva kathanato. Samāpattisamāpajjanaṃ **ariyo tuṅhībhāvo**. **Niddāyatiyevāti** niddokkamane anādīnavadassī niddāyatiyeva, iriyāpathaparivattanādinā na naṃ vinodeti. **Evam samsatthovāti** vuttanayena gaṇasaṅgaṇikāya samsattho eva viharati. **Dussilā pāpicchā nāmāti** sayam nissilā asantaḡaṇasambhāvanicchāya samannāgatattā pāpā lāmakā icchā etesanti pāpicchā. Pāpapuggalehi mittikaraṇato **pāpamittā**. Tehi sadā sahapavattanena **pāpasahāyā**. Tatha ninnatādinā tadadhimuttatāya **pāpasampavaṅkā**. Pañcamādīni uttānatthāniyeva.

Dutiyasattakasuttādivaṇṇanā niṭṭhitā.

7-11. Saññāsuttādivaṇṇanā

27-31. Sattame aniccāti anupassati etāyāti **aniccānupassanā**. Tathāpavattavipassanā pana yasmā attanā sahaḡatasaññāya bhāvitāya bhāvitā eva hoti, tasmā vuttaṃ “**aniccānupassanādīhi sahaḡatasaññā**”ti. Imā satta lokiyavipassanāpi honti “anicca”ntiādinā pavattanato. “Etaṃ santāṃ etaṃ paṇītaṃ yadidaṃ sabbasāṅkhārasamatho”ti āgatavasena panettha dve lokuttarā hontīti veditabbā. “Virāḡo nirodho”ti hi tatha nibbānaṃ vuttanti idha virāḡasaññā, tā vuttasaññā nibbānārammaṇāpi siyuṃ. Sesamettha suviññeyyameva. Aṭṭhamādīni uttānatthāneva.

Saññāsuttādivaṇṇanā niṭṭhitā.

Vajjisattakavaggavaṇṇanā niṭṭhitā.

4. Devatāvaggo

5. Paṭhamamittasuttavaṇṇanā

36. Catutthassa pañcame **attano** guyhaṃ tassa **āvīkarotīti** attano guyhaṃ nigguhituṃ yuttakathaṃ aññassa akathetvā tasseva ācikkhati. Tassa guyhaṃ **aññesaṃ nācikkhatīti** tena kathitaguyhaṃ yathā aññe na jānanti, evaṃ anāvīkaronto chādeti.

Paṭhamamittasuttavaṇṇanā niṭṭhitā.

6-11. Dutiyamittasuttādivaṇṇanā

37-42. Chaṭṭhe **piyo ca hoti manāpo cāti** kalyāṇamittalakkhaṇaṃ dassitaṃ. Kalyāṇamitto hi saddhāsampanno ca hoti sīlasampanno sutasampanno cāḡasampanno vīriyasampanno satisampanno samādhisampanno paññāsampanno. Tatha saddhāsampattiyā saddahati tathāḡatassa sambodhiṃ kammaṅca kammaphalaṅca, tena sambodhiyā hetubhūtaṃ sattesu hitasukhaṃ na pariccajati. Sīlasampattiyā sattānaṃ piyo hoti garu bhāvanīyo codako pāpagarahī vattā vacanakkhamo. Sutasampattiyā saccapaṭiccasamuppādādīpaṭisaṃyuttānaṃ gambhīrānaṃ kathānaṃ kattā hoti. Cāḡasampattiyā appiccho hoti santuṭṭho pavivitto asaṃsaṭṭho. Vīriyasampattiyā āradhaviṇīyo hoti attahitaparahitapaṭipattiyāṃ. Satisampattiyā upaṭṭhitassatī hoti. Samādhisampattiyā avikkhito hoti samāhitacito. Paññāsampattiyā aviparītaṃ pajānāti. So satiyā kusalākusalānaṃ dhammānaṃ gatiyo samannesamāno paññāya sattānaṃ hitāhitāṃ yathābhūtaṃ jānitvā samādhinā tatha ekaggacitto hutvā vīriyena satte ahite nisedhetvā hite niyojeti. Tena vuttaṃ “**piyo...pe... niyojeti**”ti. Sattamādīni uttānatthāni.

Dutiyamittasuttādivaṇṇanā niṭṭhitā.

Devatāvaggavaṇṇanā niṭṭhitā.

5. Mahāyaññavaggo

1. Sattaviññāṇaṭṭhitisuttavaṇṇanā

44. Pañcamassa paṭhame yasmā **nidassanatthe nipāto** (dī. ni. ṭi. 2.127) tasmā **seyyathāpi manussāti** yathā manussāti vuttaṃ hoti. **Viseso hotiyeva** satipi bāhirassa kāraṇassa abhede ajjhakkassa bhinnattā. Nānattaṃ kāye etesaṃ, nānatto vā kāyo etesanti **nānattakāyā**. Iminā nayena sesapadesupi attho veditabbo. **Nesanti** manussānaṃ. Nānattā saññā etesaṃ atthīti **nānattasaññino**. Sukhasamussayato vinipāto etesaṃ atthīti **vinipātikā** satipi devabhāve dibbasampattiyā abhāvato. Apāyesu vā gato natthi nipāto etesanti **vinipātikā**. Tenāha “**catuapāyavinimuttā**”ti. **Piyaṅkaramātādīnaṃ viyāti** piyaṅkaramātā kira yakkhinī paccūsasamaye anuruddhattherassa dhammaṃ sajjhāyato sutvā –

“Mā saddamakarī piyaṅkara, bhikkhu dhammapadāni bhāsati;
Api dhammapadaṃ vijāniya, paṭipajjema hitāya no siyā.

“Pāyesu ca saṃyamāmase, sampajānamusā na bhaṇāmase;
Sikkhema susīlyamattano, api mucceṃma piṣācayoniya”ti. (saṃ. ni. 1.240) –

Evam puttakaṃ saññāpetvā taṃ divasaṃ sotāpattiphalaṃ pattā. Uttaramātā pana bhagavato dhammaṃ sutvāva sotāpannā jātā.

Brahmakāye paṭhamajjhānanibbatte brahmasamūhe, brahmanikāye vā bhavāti **brahmakāyikā**. Mahābrahmuno parisāya bhavāti **brahmapārisajjā** tassa paricārakaṭṭhāne ṭhitattā. Mahābrahmuno purohitaṭṭhāne ṭhitāti **brahmapurohitā**. Āyuvaṇṇādīhi mahantā brahmānoti **mahābrahmāno**. Satipi tesam tividhānampi paṭhamena jhānena gantvā nibbattaḥāve jhānassa pana pavattibhedena ayaṃ visesoti dassetuṃ “**brahmapārisajjā panā**”tiādi vuttaṃ. **Parittenāti** hīnena. Sā cassa hīnatā chandādīnaṃ hīnatāya veditabbā. Paṭiladdhamattaṃ vā hīnaṃ. **Kappassāti** asaṅkhyeyyakappassa. Hīnapañitānaṃ majjhe bhavattā **majjhimam**. Sā cassa majjhimatā chandādīnaṃ majjhimatāya veditabbā. Paṭilabhivā nātisubhāvitaṃ vā **majjhimam**. **Upaḍḍhakappoti** asaṅkhyeyyakappassa upaḍḍhakappo. **Vipphārikataroti** brahmapārisajjehi pamāṇato vipulataro sabhāvato ulārataro ca hoti. Sabhāvenapi hi ulāratamova. Taṃ panettha appamāṇaṃ. Tassa hi parittābhādīnaṃ parittasubhādīnaṃ kāye satipi sabhāvavematte ekattavaseneva vavatthapiyatīti “ekattakāyā”tveva te vuccanti. **Pañītenāti** ukkaṭṭhena. Sā cassa ukkaṭṭhatā chandādīnaṃ ukkaṭṭhatāya veditabbā. Subhāvitaṃ vā, sammadeva, vasibhāvaṃ pāpitaṃ **pañītam** “padhānabhāvaṃ nīta”nti katvā. Idhāpi kappo asaṅkhyeyyakappavaseneva veditabbo paripuṇṇamahākappassa asambhavato. **Itīti** evaṃ vuttappakārena. **Teti** “brahmakāyikā”ti vuttā tividhāpi brahmāno. **Saññāya ekattāti** tihetukabhāvena ekasabhāvattā. Na hi tassā sampayuttadhammasena aññopi koci bhedo atthi. **Evanti** iminā nānattakāyā ekattasaññino gahitāti dasseti.

Daṇḍaukkāyāti daṇḍadīpikāya. **Sarati** dhāvati, **vissarati** vippakiṇṇā viya dhāvati. **Dve kappāti** dve mahākappā. Ito paresupi eseva nayo. **Idhāti** imasmim sutte. **Ukkaṭṭhaparicchedavasena** ābhassaraggahaṇeneva **sabbepi te** parittābhāappamāṇābhāpi gahitā.

Sundarā pabhā subhā, tāya kiṇṇā subhākiṇṇāti vattabbe. Bhā-saddassa rassattaṃ antima-ṇa-kārassa ha-kāraṇa katvā “**subhakiṇṇā**”ti vuttā. Aṭṭhakathāyaṃ pana niccalāya ekagghanāya pabhāya subhoti pariyaṇavacananti “subhena okiṇṇā vikiṇṇā”ti attho vutto. Etthāpi antima-ṇa-kārassa ha-kārakaṇaṃ

icchitabbameva. **Na chijjivā pabhā gacchati** ekagghanattā. **Catutthaviññāṇaṭṭhitimeva bhajanti** kāyassa saññāya ca ekarūpattā. Vipulasantasukhāyuvanṇādiphallattā **vehapphalā. Etthāti** viññāṇaṭṭhitīyaṃ.

Vivaṭṭapakkhe ṭhitā apunarāvattanato. “**Na sabbakālikā**”ti vatvā tameva asabbakālikattam vibhāvetum “**kappasatasahassampi**”tiādi vuttam. Soḷasakappasahassaccayena uppannānaṃ suddhāvāsabrahmānaṃ parinibbāyanato aññesañca tattha anuppajjanato **buddhasuññe loke** suññaṃ taṃ ṭhānaṃ hoti, tasmā suddhāvāsā na sabbakālikā. **Khandhāvāraṭṭhānasadisā honti** suddhāvāsabhūmiyo. **Iminā suttena** suddhāvāsānaṃ sattāvāsabhavadīpaneneva viññāṇaṭṭhitibhāvopi dīpito hoti, tasmā **suddhāvāsāpi** sattasu viññāṇaṭṭhitīsu **catutthaviññāṇaṭṭhitim**, navasu sattāvāsesu **catutthasattāvāsāna bhajanti**.

Sukhumattāti saṅkhārāvasesasukhumabhāvappattattā. Paribyattaviññāṇakiccābhāvato **neva viññāṇaṃ**, na sabbaso aviññāṇaṃ hotīti **nāviññāṇaṃ**, tasmā paripphutaviññāṇakiccavantūsu **viññāṇaṭṭhitīsu na vuttam**.

Sattaviññāṇaṭṭhitisuttavaṇṇanā niṭṭhitā.

2. Samādhiparikkhārasuttavaṇṇanā

45. Dutiye **samādhiparikkhārāti** ettha tayo parikkhārā. “Ratho sīlparikkhāro, jhānakkho cakkavīriyo”ti (saṃ. ni. 5.4) hi ettha alaṅkāro parikkhāro nāma. “Sattahi nagaraparikkhārehi suparikkhatam hoti”ti (a. ni. 7.67) ettha parivāro parikkhāro nāma. “Gilānapaccaya...pe... jīvītaparikkhārā”ti (ma. ni. 1.191-192) ettha sambhāro parikkhāro nāma. So idha adhippetoti āha “**maggasamādhissa sambhārā**”ti. Parivāraparikkhāropi vaṭṭatīyeva. Parivāro hi sammādiṭṭhādayo maggadhammā sammāsamādhissa sahaṅgātipaccayabhāvena parikaraṇato abhisāṅkharāṇato. **Parikkhatāti** parivārītā. **Ayaṃ vuccati ariyo sammāsamādhīti** ayaṃ sattahi ratanehi parivuto cakkavattī viya sattahi aṅgehi parivuto ariyo sammāsamādhīti vuccati. Upecca nissīyatīti upanisā, saha upanisāyāti **saupaniso**, saupanissayo attho, saparivāroyevāti vuttam hoti. Sahakārikāraṇabhūto hi dhammasamūho idha “upaniso”ti adhippeto.

Samādhiparikkhārasuttavaṇṇanā niṭṭhitā.

3. Paṭhamaaggisuttavaṇṇanā

46. Tatiye **anuḍahanaṭṭhenāti** kāmaṃ āhuneyyaggiādayo tayo aggī brāhmaṇehipi icchitā santi. Te pana tehi icchitamattāva, na sattānaṃ tādīsā atthasādhakā. Ye pana sattānaṃ atthasādhakā, te dassetuṃ “**āhunaṃ vuccatī**”tiādi vuttam. Tattha ānetvā hunanaṃ pūjanaṃ “āhuna”nti vuttam, taṃ **āhunaṃ arahantī** mātāpitaro. Tenāha bhagavā – “āhuneyyāti, bhikkhave, mātāpitūnaṃ etaṃ adhivacana”nti (itīvu. 106). Yadaggena ca te puttānaṃ bahūpakāratāya āhuneyyāti, tesu sammāpaṭipatti nesaṃ hitasukhāvahā, tadaggena tesu micchāpaṭipatti ahitadukkhāvahāti āha “**tesu...pe... nibbantī**”ti.

Svāyamattho (dī. ni. aṭṭha. 3.305) **mittavindakavattunā** veditabbo. Mittavindako hi mātārā, “tāta, ajja uposathiko hutvā vihāre sabbarattim dhammassavanaṃ suṇohi, sahasaṃ te dassāmī”ti vutto dhanalobhena uposathaṃ samādāya vihāraṃ gantvā “idaṃ ṭhānaṃ akutobhaya”nti sallakkhetvā dhammāsanassa heṭṭhā nipanno sabbarattim niddāyitvā gharaṃ agamāsī. Mātā pātova yāguṃ pacitvā upanāmesi. So sahasaṃ gahetvā pivi. Athassa etadahosi “dhanaṃ saṃharissāmī”ti. So nāvāya samuddaṃ pakkhanditukāmo ahosi. Atha naṃ mātā, “tāta, imasmim kule cattālīsakoṭīdhanam atthi, alaṃ gamaneṇā”ti nivāreti. So tassā vacanaṃ anādiyitvā gacchati eva. Sā purato aṭṭhāsī. Atha naṃ kujjhitvā “ayaṃ mayhaṃ purato tiṭṭhatī”ti pādena paharivā patitaṃ antaraṃ katvā agamāsī.

Mātā uṭṭhahitvā “mādisāya mātari evarūpaṃ kammaṃ katvā gatassa te gataṭṭhāne sukhaṃ bhavissatīti evaṃsaññī nāma tvaṃ puttā”ti āha. Tassa nāvaṃ āruyha gacchato sattame divase nāvā aṭṭhāsi. Atha te manussā “addhā ettha pāpapuggalo atthi, salākaṃ deṭhā”ti āhaṃsu. Salākā dīyamānā tasseva tikkhattuṃ pāpuṇi. Te tassa uḷumpaṃ datvā taṃ samudde pakkhipiṃsu. So ekaṃ dīpaṃ gantvā vimānapeṭhi saddhiṃ sampattim anubhavanto tāhi “purato purato mā agamāsi”ti vuccamānopi taddiḡuṇaṃ taddiḡuṇaṃ sampattim passanto anupubbena khuracakkadharaṃ ekaṃ addasa. Taṃ cakkam padumapupphaṃ viya upaṭṭhāsi. So taṃ āha, “ambho, idaṃ tayā piḷandhitam padumaṃ mayhaṃ dehi”ti. Na idaṃ, sāmi, padumaṃ, khuracakkaṃ etanti. So “vañcesi maṃ tvaṃ, kiṃ mayā padumaṃ na diṭṭhapubba”nti vatvā “tvaṃ lohita candanaṃ vilimpitvā piḷandhanaṃ padumapupphaṃ mayhaṃ na dātukāmo”ti āha. So cintesi “ayampi mayā katasadisam kammaṃ katvā tassa phalaṃ anubhavitukāmo”ti. Atha naṃ “gaṇha, re”ti vatvā tassa matthake cakkam khipi. Tena vuttaṃ –

“Catubbhi aṭṭhajjhagamā, aṭṭhāhi pica soḷasa;
Soḷasāhi ca bāṭṭiṃsa, atricchaṃ cakkamāsado;
Icchāhatassa posassa, cakkam bhamati matthake”ti. (jā. 1.1.104; 1.5.103);

Soti gehasāmiko bhattā. **Purimanayenevāti** anuḍāhanassa paccayatāya. Tatridaṃ vatthu – kassapabuddhakāle sotāpannassa upāsakassa bhariyā aticāraṃ carati. So taṃ paccakkhato disvā “kasmā evaṃ karosī”ti āha. Sā “sacāhaṃ evarūpaṃ karomī, ayaṃ me sunakho viluppamāno khādatū”ti vatvā kālakatā kaṇṇamuṇḍakadahe vemānikapeṭi hutvā nibbattā divā sampattim anubhavati, rattim dukkhaṃ. Tadā bārāṇasirājā migavaṃ caranto araññaṃ pavisitvā anupubbena kaṇṇamuṇḍakadahaṃ sampatto tāya saddhiṃ sampattim anubhavati. Sā taṃ vañcetaṃ rattim dukkhaṃ anubhavati. So ñatvā “kattha nu kho gacchatī”ti piṭṭhito piṭṭhito gantvā avidūre ṭhito kaṇṇamuṇḍakadahato nikkhamitvā taṃ “paṭapaṭa”nti khādamānaṃ ekaṃ sunakhaṃ disvā asinā dvidhā chindī, dve ahesuṃ. Puna chinne cattāro, puna chinne aṭṭha, puna chinne soḷasa ahesuṃ. Sā “kiṃ karosi, sāmi”ti āha. So “kiṃ ida”nti āha. Sā “evaṃ akatvā khelapiṇḍaṃ bhūmiyaṃ niṭṭhubhitvā pādena ghaṃsāhi”ti āha. So tathā akāsi. Sunakhā antaradhāyimsu. Mutṭhiyogo kirāyaṃ tassa sunakhan taradhānassa, yadidaṃ khelapiṇḍaṃ bhūmiyaṃ niṭṭhubhitvā pādena ghaṃsanaṃ, taṃ divasaṃ tassā kammaṃ khīṇaṃ. Rājā vipaṭṭisārī hutvā gantuṃ āraddho. Sā “mayhaṃ, sāmi, kammaṃ khīṇaṃ, mā agamāsi”ti āha. Rājā assutvā gato.

Dakkhināti cattāro paccayā dīyamānā dakkhanti etehi hitasukhānīti, taṃ dakkhiṇaṃ arahatīti **dakkhiṇeyyo**, bhikkhusaṅgho.

Paṭhamaaggisuttavaṇṇanā niṭṭhitā.

4-5. Dutiyaaggisuttādivaṇṇanā

47-48. Catutthe yaññavāṭaṃ sampādetvā mahāyaññaṃ uddissa saviññāṇakāni aviññāṇakāni ca yaññūpakaraṇāni sajjitānīti āha pāliyaṃ “**mahāyañño upakkhaṭo**”ti. Taṃ upakaraṇaṃ tesam tathāsajjananti āha “**upakkhaṭoti paccupaṭṭhito**”ti. **Vaccharasatānīti** yuvabhāvappattāni nātibalavavacchasatāni. Te pana vacchā eva honti, na dammā, balībaddā vā. **Urabbhāti** taruṇameṇḍakā vuccanti. **Upanītānīti** ṭhapanatthāya upanītāni. **Vihimsaṭṭhena**ti hiṃsanatṭhena. **Upavāyatūti** upagantvā sarīradarathaṃ nibbāpento saṅhasītalā vāto vāyatu. Sesam suviññeyyameva. Pañcame natthi vattabbaṃ.

Dutiyaaggisuttādivaṇṇanā niṭṭhitā.

6. Dutiyasaññāsuttavaṇṇanā

49. Chaṭṭhe **nhāruvilekhananti** cammaṃ likhantānaṃ cammaṃ likhitvā chaḍḍitakasaṭaṃ. “Esohamasmi”tiādinā ahaṃkaraṇaṃ **ahaṅkāro**. “Etaṃ mamā”ti mamaṃkaraṇaṃ **mamaṅkāro**. Tenāha “**ahaṅkāraditṭhito**”tiādi. **Tisso vidhāti** seyyasadisahīnavasena tayo mānā. “Ekavidhena

rūpaṅgaho”tiādīsu (dha. sa. 584) koṭṭhāso “vidhā”ti vutto. “Kathaṃvidhaṃ sīlavantaṃ vadanti, kathaṃvidhaṃ paññavantaṃ vadanti”tiādīsu (saṃ. ni. 1.95) pakāro. “Tisso imā, bhikkhave, vidhā. Katamā tisso? Seyyohamasmīti vidhā”ti (vibha. 920) ettha māno “vidhā”ti vutto. Idhāpi mānova adhippeto. Māno hi vidahanato hīnādivasena **tividhā**. Tenākārena dahanato upadahanato “**vidhā**”ti vuccati.

Dutiyasaññāsuttavaṇṇanā niṭṭhitā.

7-8. Methunasuttādivaṇṇanā

50-51. Sattame **idhā**ti imasmim loke. **Ekaccoti** eko. **Samaṇo vā brāhmaṇo vā**ti pabbajjāmatena samaṇo vā, jātimattena brāhmaṇo vā. **Dvayaṃdvayasamāpattinti** dvīhi dvīhi samāpajjitabbaṃ, methunanti attho. Na heva kho samāpajjati sambandho. **Ucchādanaṃ** ubbaṭṭanaṃ. **Sambāhanaṃ** parimaddanaṃ. **Sādiyatīti** adhvāseti. **Tadassādetīti** ucchādanādiṃ abhiramati. **Nikāmetīti** icchati. **Vittinti** tuṭṭhiṃ. **Idampi khoti** ettha **idanti** yathāvuttaṃ sādiyanādiṃ khaṇḍādi bhāvavasena ekaṃ katvā vuttaṃ. **Pi**-saddo vakkhamānaṃ upādāya samuccayattho, **kho**-saddo avadhāraṇattho. Idaṃ vuttaṃ hoti – yadetaṃ brahmacāripaṭiññassa asatipi dvayaṃdvayasamāpattiyāṃ mātugāmassa ucchādanānaḥāpanasambāhanasādiyanādi. Idampi ekaṃsena tassa brahmacariyassa khaṇḍādi bhāvāpādanato khaṇḍampi chiddampi sabalampi kammāsampīti. Evaṃ pana khaṇḍādi bhāvāpattiyā so aparissuddhaṃ brahmacariyaṃ carati, na parisuddhaṃ, saṃyutto methunasam̐yogena, na visam̐yutto. Tato cassa na jātiādīhi parimuttīti dassento “**ayaṃ vuccati**”tiādīmāha.

Sañjagghatīti kilesavasena mahāhasitaṃ hasati. **Samkīlatīti** kāyasam̐saggavasena kīḷati. **Samkelāyatīti** sabbaso mātugāmaṃ kelāyanto viharati. **Cakkhunāti** attano cakkhunā. **Cakkhanti** mātugāmassa cakkhuṃ. **Upanijjhāyatīti** upecca nijjhāyati oloketi. **Tirokuṭṭanti** kuṭṭassa parato. Tathā **tiropākāraṃ**, “mattikāmayā bhitti **kuṭṭaṃ**, iṭṭhakāmayā **pākāro**”ti vadanti. Yā kāci vā bhitti porisakā diyaḍḍharatanappamāṇā **kuṭṭaṃ**, tato adhiko **pākāro**. **Assāti** brahmacāripaṭiññassa. **Pubbeti** vatasamādānato pubbe. **Kāmaguṇehīti** kāmakotṭhāsehi. **Samappitanti** suṭṭhu appitaṃ sahitaṃ. **Samaṅgibhūtaṃ**ti samannāgataṃ. **Paricārayamānanti** kīḷantaṃ, upaṭṭhahiyamānaṃ vā. **Paṇidhāyāti** patthetvā. **Sīlenāti**ādīsu yamaniyamādīsamādānavasena **silam̐**, avītikkamavasena **vatam̐**. Ubhayampi vā **silam̐**, dukkaracariyavasena pavattitaṃ **vatam̐**. Taṃtaṃmakiccasammatato vā nivattilakkhaṇaṃ **silam̐**, taṃtaṃsamādānavato vesabhojanakiccakaraṇādivisesappaṭipatti **vatam̐**. Sabbathāpi dukkaracariyā **tapo**. Methunā virati **brahmacariyanti** evampettha pāḷivaṇṇanā veditabbā. Aṭṭhamaṃ uttānameva.

Methunasuttādivaṇṇanā niṭṭhitā.

9. Dānamahapphalasuttavaṇṇanā

52. Navame “**sāhu dāna**”nti **dānaṃ detīti** “dānaṃ nāma sādhu sundara”nti dānaṃ detīti attho. Dānañhi datvā taṃ paccavekkhantassa pāmojjapītīsomānassādayo uppajjanti, lobhadosaissāmaccherādayo vidūrībhavanti. Idāni dānaṃ anukūladhammaparibrūhanena paccanīkadhamavidūrīkaraṇena ca bhāvanācittassa upasobhanāya ca parikkhārāya ca hotīti “**alaṅkārahūtañceva parivārahūtañca detī**”ti vuttaṃ. **Jhānānāgāmī nāma hoti** jhānaṃ nibbattetvā brahmalokūpapannānaṃ ariyānaṃ heṭṭhā anuppajjanato. **Imaṃ pecca paribhuñjissāmīti** sāpekkhassa dānaṃ paralokaphalāsāya sātīsayāya ca pubbācāravasena uppajjamānāya anubhavattā taṇhuttaraṃ nāma hotīti āha “**paṭṭhamam̐ taṇhuttariyadāna**”nti. Dānaṃ nāma buddhādīhi pasatthanti garuṃ cittikāraṃ upaṭṭhapetvā dātabbattā “**dutiyam̐ cittikāradāna**”nti vuttaṃ. Pubbakehi pitupitāmahehi dinnapubbaṃ katapubbaṃ jahāpetuṃ nāma nānucchavikanti attabhāvasabhāgavasena hirottappam̐ paccupaṭṭhapetvā dātabbato “**tatiyam̐ hirottappadāna**”nti vuttaṃ. “Ahaṃ pacāmi, na ime pacanti, nārahāmi pacanto apacantānaṃ dānaṃ adātu”nti evaṃsaññī hutvā dento niravasesam̐ katvā

detīti āha “**catuttham niravasesadāna**”nti. “Yathā tesam pubbakānam isīnam tāni mahāyaññakāni ahesum, evam me ayam dānaparibhogo bhavissatī”ti evamaññino dānam dakkhiṇam arahesu dātabbato “**pañcamam dakkhiṇeyyadāna**”nti vuttam. “Imam me dānam dadato cittam pasīdatī”tiadinā pītisomanassam uppādetvā dentassa dānam somanassabāhullappattiyā somanassupacāram nāma hotīti āha “**chaṭṭham somanassupavicāradāna**”nti vuttam.

Dānamahapphalasuttavaṇṇanā niṭṭhitā.

10. Nandamātāsuttavaṇṇanā

53. Dasame “**vutthavasso pavāretvā...pe... nikkhamī**”ti ānguttarabhāṇakānam matenetaṃ vuttam. Majjhimabhāṇakā pana vadanti “bhagavā upakaṭṭhāya vassūpanāyikāya jetavanato bhikkhusaṅghaparivuto cārikaṃ nikkhami. Teneva ca akāle nikkhantattā kosalarājādayo vāretum ārabhiṃsu. Pavāretvā hi caraṇam buddhāciṇṇa”nti. Puṇṇāya sammāpaṭipattiṃ paccāsīyanto bhagavā “**mama nivattanapaccayā tvam kiṃ karissasī**”ti āha. **Puṇṇāpi...pe... pabbajīti** ettha seṭṭhi “puṇṇāya bhagavā nivattito”ti sutvā taṃ bhujissam katvā dhītuttāhāne ṭhapesi. Sā pabbajjam yācitvā pabbajī, pabbajitvā vipassanam ārabhi. Athassā sathā āradhaviṇṇasakabhāvaṃ ṇatvā imam obhāsagātham vissajjesi –

“Puṇṇe pūrasu saddhammam, cando pannaraso yathā;
Paripuṇṇāya paññāya, dukkhassantaṃ karissasī”ti. (therīgā. 3);

Sā gāthāpariyosāne arahattaṃ patvā abhiññātā sāvika ahoṣi. Sesamettha suviññeyyameva.

Nandamātāsuttavaṇṇanā niṭṭhitā.

Mahāyaññavaggavaṇṇanā niṭṭhitā.

Paṭhamapaṇṇāsakaṃ niṭṭhitam.

6. Abyākatavaggo

1-2. Abyākatasuttādivaṇṇanā

54-55. Chaṭṭhavaggassa paṭhamam suviññeyyameva. Dutiye **atīte attabhāve nibbattakam kammanti** “purimakammabhavasmiṃ moho avijjā, āyūhanā saṅkhārā, nikanti taṇhā, upagamanam upādānam, cetanā bhavo”ti evamāgataṃ sapaṭikkhāram pañcavidham kammavaṭṭamāha. **Ētarahi me attabhāvo na siyāti** viññāṇanāmarūpasalāyatanaphassavedanāsahitaṃ paccuppannam pañcavidham vipākavaṭṭamāha. **Yaṃ atthikanti** yaṃ paramatthato vijjamānakam. Tenāha “**bhūta**”nti. Tañhi paccayanibbattatāya “bhūta”nti vuccati. **Taṃ pajahāmīti** tappaṭibaddhacchandarāgappahānena tato eva āyatim anuppattidhammatāpādanavasena pajahāmi pariccajāmi. **Haritantanti** (ma. ni. aṭṭha. 1.303) haritameva. Anta-saddena padavaḍḍhanaṃ kataṃ yathā “vanantaṃ suttanta”nti, allatiṇḍāṇi āgamma nibbāyatīti attho. **Pathantanti** mahāmaggaṃ. **Selantanti** pabbataṃ. **Udakantanti** udakaṃ. **Ramaṇīyam vā bhūmibhāganti** tiṇagumbādirahitaṃ vivittaṃ abbhokāsabhūmibhāgaṃ. **Anāhārāti** apaccayā nirupādānā. Sesamettha uttānameva.

Abyākatasuttādivaṇṇanā niṭṭhitā.

3. Tissabrahmāsuttavaṇṇanā

56. Tatiye **vivittāni** tādīsāni pana pariyantāni atidūrāni hontīti āha “**antimapariyantimāni**”ti. Ante bhavāni antimāni, antimāniyeva pariyantimāni. Ubhayenapi atidūrataṃ dasseti. **Samannāhāre ṭhapayamānoti** indriyaṃ samākārena vattento indriyasamataṃ paṭipādentō nāma hoti. Vipassanācittasampayutto samādhi, satipi saṅkhāranimittāvirahe niccanimittādivirahato “animitto”ti vuccatīti āha “**animitanti balavavipassanāsamādhi**”nti.

Tissabrahmāsuttavaṇṇanā niṭṭhitā.

4-7. Sīhasenāpatisuttādivaṇṇanā

57-60. Catutthe kucchito ariyo **kadariyo**. Thaddhamacchariyasadisamṃ hi kucchitaṃ sabbanihīnaṃ natthi sabbakusalānaṃ ādibhūtaṃ nisedhanato. Sesametha pañcamādīni ca uttānatthāneva.

Sīhasenāpatisuttādivaṇṇanā niṭṭhitā.

8. Pacalāyamānasuttavaṇṇanā

61. Aṭṭhame **ālokasaññaṃ manasi kareyyāsīti** divā vā rattiṃ vā sūriyapajjotacandamaṇiādīnaṃ ālokaṃ “āloko”ti manasi kareyyāsī. Idaṃ vuttaṃ hoti – sūriyacandālokādīnaṃ divā rattiñca upaladdhaṃ yathāladhavaseneva manasi kareyyāsī, citte ṭhapeyyāsī. Yathā te subhāvitālokakasiṇassa viya kasiṇāloko yadicchakaṃ yāvadicchakaṃ so āloko rattiyaṃ upatiṭṭhati, yena tattha divāsaññaṃ ṭhapeyyāsī, divā viya vigatathinamiddhova bhavēyyāsīti. Tenāha “**yathā divā tathā ratti**”nti. **Iti vivaṇṇena cetasāti** evaṃ apihitena cittaena thinamiddhapidhānena apihitattā. **Apariyonaddhenāti** samantato anonaddhena asañchādītena. **Sahobhāsanti** saññaṇobhāsaṃ. Thinamiddhavinodanaāloko vi vā hotu kasiṇāloko vi vā parikkammāloko vi vā, upakkilesāloko viya sabboyaṃ āloko ñānasamuṭṭhānovāti. Yesam akaraṇe puggalo mahājāniyo hoti, tāni **avassaṃ kātabbāni**. Yāni akātumpi vaṭṭanti, sati samavāye kātabbato tāni **karaṇīyānīti** āha “**itarāni karaṇīyāni**”ti. Atha vā kattabbāni kammāni karaṇaṃ arahantīti **karaṇīyāni**. Itarāni **kiccānīti** vadanti.

Ādinayappavattā viggāhikakathāti “na tvam imaṃ dhammavinayaṃ ājānāsi, ahaṃ imaṃ dhammavinayaṃ ājānāmi, kiṃ tvam imaṃ dhammavinayaṃ ājānissasi, micchāpaṭipanno tvamasi, ahamasmi sammāpaṭipanno, sahitaṃ me, asahitaṃ te, purevacanīyaṃ pacchā avaca, pacchāvacanīyaṃ pure avaca, adhiciṇṇaṃ te viparāvattaṃ, āropito te vādo, niggaḥito tvamasi. Cara vādappamokkhāya, nibbeṭhehi vā sace pahosī”ti (dī. ni. 1.18; ma. ni. 3.41) evampavattā kathā. Tattha **sahitaṃ meti** (dī. ni. aṭṭha. 1.18) mayhaṃ vacanaṃ sahitaṃ siliṭṭhaṃ, atthayuttaṃ kāraṇayuttanti attho. **Sahitanti** vā pubbāparāvuddhaṃ. **Asahitaṃ teti** tuyhaṃ vacanaṃ asahitaṃ asiliṭṭhaṃ. **Adhiciṇṇaṃ te viparāvattanti** yaṃ tuyhaṃ dīgharattāciṇṇavasena suppaṇaṃ, taṃ mayhaṃ ekavacaneneva viparāvattaṃ parivattitvā ṭhitaṃ, na kiñci jānāsīti attho. **Āropito te vādoti** mayā tava vāde doso āropito. **Cara vādappamokkhāyāti** dosamocanattaṃ cara vicara, tattha tattha gantvā sikkhāti attho. **Nibbeṭhehi vā sace pahosīti** atha sayam pahosi, idāni eva nibbeṭhehīti attho.

Taṇhā sabbaso khīyanti etthāti **taṇhāsaṅkhayo**, tasmimṃ. **Taṇhāsaṅkhayeti** ca idaṃ visaye bhummanti āha “**taṃ ārammaṇaṃ katvā**”ti. **Vimuttacittatāyāti** sabbasaṃkilesehi vippayuttacittatāya. Aparabhāge paṭipadā nāma ariyasaccābhisamayo. Sā sāsanacārigocarā paccattaṃ veditabbatoti āha “**pubbabhāgappaṭipadaṃ saṃkhittena desethāti pucchati**”ti. Akuppadhammatāya khayavayasāṅkhātaṃ antaṃ aṭṭhāti accantā, so eva aparihāyanasabhāvattā accantā niṭṭhā assāti **accantaniṭṭhā**. Tenāha “**ekantaniṭṭho satataniṭṭhoti attho**”ti. Na hi paṭividdhassa lokuttaradhammassa dassanaṃ kuppannaṃ nāma atthi. Accantameva catūhi yogehi khemo etassa atthīti **accantayogakkhemī**. Maggabrahmacariyassa vusittā tassa ca aparihāyanasabhāvattā accantaṃ brahmacārīti **accantabrahmacārī**. Tenāha “**niccabrahmacārīti attho**”ti. **Pariyosānanti** maggabrahmacariyapariyapariyosānaṃ vaṭṭadukkhapariyosānaṃca.

Pañcakkhandhāti pañcupādānakkhandhā. Sakkāyasabbañhi sandhāya idha “**sabbe dhammā**”ti vuttam vipassanāvisayassa adhippetattā. Tasmā āyatanadhātuyopi taggatikā eva daṭṭhabbā. Tenāha bhagavā “**nālaṃ abhinivesāyā**”ti. **Na yuttā abhinivesāya** “etaṃ mama, eso me attā”ti ajjhosānāya. “Alameva nibbinditum alaṃ virajjitu”ntiādīsu (dī. ni. 2.272; saṃ. ni. 2.124, 128, 134, 143) viya **alam-**saddo yuttatthopi hotīti āha “**na yuttā**”ti. **Sampajjantīti** bhavanti. Yadi “tatiyā catutthī”ti idaṃ visuddhidvayaṃ abhiññāpaññā, tassa pana sapaccayanāmarūpadassanabhāvato sati ca paccayapariggahe sapaccayattā aniccanti, nāmarūpassa aniccatāya dukkhaṃ, dukkhañca anattāti atthato lakkhaṇattayaṃ supākaṭameva hotīti āha “**aniccam dukkhaṃ anattāti nātapariññāya abhijānātī**”ti. **Tatheva tīraṇapariññāyāti** iminā aniccādibhāvena nālaṃ abhinivesāyāti nāmarūpassa upasaṃharati, na abhiññāpaññānaṃ sambhāradhammānaṃ. Purimāya hi atthato āpannaṃ lakkhaṇattayaṃ gaṇhāti salakkhaṇasallakkhaṇaparattā tassā. Dutiyāya sarūpato tassā lakkhaṇattayāropanavasena sammasanabhāvato. Ekacittakkhaṇikatāya abhinipātamattatāya ca **appamattakampi**. Rūpariggaḥassa oḷārikabhāvato **arūpariggaḥaṃ dasseti**. Dassento ca vedanāya āsannabhāvato, visesato sukhasārāgitāya, bhavassādagadhitamānasatāya ca therassa vedanāvasena nibbattetvā dasseti.

Khayavirāgoti khayasañkhāto virāgo sañkhāraṇaṃ palujjanā. Yaṃ āgamma sabbaso sañkhārehi virajjanā hoti, taṃ nibbānaṃ **accantavirāgo**. **Nirodhānupassimhipīti** nirodhānupassipadehi. **Eseva nayoti** atidisiṭvā taṃ ekadesena vivaranto “**nirodhopi hi...pe... duvidhoyevā**”ti āha. Khandhānaṃ pariccajanaṃ tappaṭibaddhakilesappahānavasenāti yenākārena vipassanā kilese pajahati, tenākārena taṃnimittakkhandhe ca pajahatīti vattabbataṃ arahatīti āha “**sā hi...pe... vossajjati**”ti. **Ārammaṇatoti** kiccāsādhana vasena ārammaṇakaraṇato. Evañhi maggato aññesaṃ nibbānārammaṇaṃ pakkhandanavossaggābhāvo siddhova hoti. Pariccajanaṃ pakkhandanena cāti **dvīhipi vā kāraṇehi**. **Soti** maggo. Sabbesaṃ khandhānaṃ vossajjanaṃ tappaṭibaddhasaṃkilesappahānena daṭṭhabbaṃ. Yasmā vā vipassanācittaṃ pakkhandatīti maggasampayuttacittaṃ sandhāyāha. Maggo ca samucchadavasena kilese khandhe ca pariccajati, tasmā yathākkamaṃ vipassanāmaggānañca vasena pakkhandanapariccāgavossaggāpi veditabbā. **Tadubhayasamaṅgīti** vipassanāsamaṅgī maggasamaṅgī ca. “Aniccānupassanāya niccasaññaṃ pajahati”tiādivacanato (paṭi. ma. 1.52) hi yathā vipassanāya kilesānaṃ pariccāgappaṭinissaggo labbhati, evaṃ āyatim tehi kilesehi uppādetabbakkhandhānampi pariccāgappaṭinissaggo vattabbo. Pakkhandanapaṭinissaggo pana magge labbhamānāya ekantakāraṇabhūtāya vuṭṭhānagāminivipassanāya vasena veditabbo. Magge pana tadubhayampi ñāyāgatameva nippariyāyatova labbhamānattā. Tenāha “**tadubhayasamaṅgīpuggalo**”tiādi. Pucchantassa ajjhāsaya vasena “na kiñci loke upādiyati”ti ettha kāmupādānavasena upādiyaṃ paṭikkhipatīti āha “**taṇhāvasena na upādiyati**”ti. Taṇhāvasena vā asati upādiyane diṭṭhivasena upādiyaṃ anavakāsamevāti “**taṇhāvasena**”iceva vuttam. **Na parāmasatīti** nādiyati. Diṭṭhiparāmāsavasena vā “nicca”ntiādinā **na parāmasati**. **Samkhitteneva kathesīti** tassa ajjhāsaya vasena papañcaṃ akatvā kathesi.

Pacalāyamānasuttavaṇṇanā niṭṭhitā.

9. Mettasuttavaṇṇanā

62. Navame **mā, bhikkhave, puññānanti** (itivu. aṭṭha. 62) ettha **māti** paṭisedhe nipāto. **Puñña-**saddo “kusalānaṃ, bhikkhave, dhammānaṃ samādānahetu evamidam puññaṃ pavaḍḍhati”tiādīsu (dī. ni. 3.80) puññaphale āgato. “Avijjāgatoyaṃ, bhikkhave, purisapuggalo puññañce sañkhāraṃ abhisankharoti”tiādīsu (saṃ. ni. 2.51) kāmārūpāvacarasucaritesu. “Puññūpagaṃ hoti viññāna”ntiādīsu (saṃ. ni. 2.51) sugativisesabhūte upapattibhave. “Tīṇimāni, bhikkhave, puññakiriyavatthūni dānamayaṃ puññakiriyavatthu, sīlamayaṃ puññakiriyavatthu, bhāvanāmayam puññakiriyavatthū”tiādīsu (itivu. 60; dī. ni. 3.305; a. ni. 8.36) kusalacetanāyaṃ. Idha pana tebhūmakakusaladhamme veditabbo. **Bhāyitthāti** ettha duvidham bhayaṃ ñānabhayaṃ, sārājjabhayanti. Tattha “yepi te, bhikkhave, devā dīghāyukā vaṇṇavanto sukhabahulā uccesu vimānesu ciraṭṭhitikā, tepi tathāgatassa dhammadesanaṃ sutvā yebhuyyena bhayaṃ saṃvegaṃ santāsaṃ āpajjantī”ti (a. ni. 4.33)

āgataṃ **ñāṇabhayaṃ**. “Ahudeva bhayaṃ, ahu chambhitattaṃ, ahu lomahaṃso” tiādīsu (dī. ni. 2.318) āgataṃ **sārajjabhayaṃ**. Idhāpi sārajjabhayaṃeva. Ayañhettha attho – bhikkhave, dīgharattaṃ kāyavacīsaṃyamo vattappaṭivattapūraṇaṃ ekāsaṃ ekaseyyaṃ indriyadamo dhutadhammehi cittassa niggaho satisampajaññaṃ kammaṭṭhānānuyogavasena vīriyārambhoti evamādīni yāni bhikkhunā nirantaraṃ pavattetabbāni puññāni, tehi mā bhāyittha, mā bhayaṃ santāsaṃ āpajjittha. Ekaccassa diṭṭhadhammasukhassa uparodhabhayaṃ samparāyikanibbānasukhadāyakehi puññehi mā bhāyitthāti. Nissakke idaṃ sāmivacanaṃ.

Idāni tato abhāyitabbabhāve kāraṇaṃ dassento “**sukhassetā**” tiādīmāha. Tattha **sukha**-saddo “sukho buddhānamuppādo, sukhā virāgatā loke” tiādīsu (dha. pa. 194) sukhamūle āgato. “Yasmā ca kho, mahāli, rūpaṃ sukhaṃ sukhānupatitaṃ sukhāvakkanta” tiādīsu (saṃ. ni. 3.60) sukhārammaṇe. “Yāvañcidaṃ, bhikkhave, na sukaraṃ akkhānena pāpuṇitūṃ yāva sukhā saggā” tiādīsu (ma. ni. 3.255) sukhapaccayaṭṭhāne. “Sukho puññassa uccayo” tiādīsu (dha. pa. 118) sukhaheṭumhi. “Diṭṭhadhammasukhavihārā ete dhammā” tiādīsu (ma. ni. 1.82) abyāpajje. “Nibbānaṃ paramaṃ sukha” tiādīsu (ma. ni. 2.215; dha. pa. 203, 204) nibbāne. “Sukhassa ca pahānā” tiādīsu (dī. ni. 1.232; ma. ni. 1.271; saṃ. ni. 2.152) sukhavedanāyaṃ. “Adukkhamasukhaṃ santaṃ, sukhamicceva bhāsita” tiādīsu (saṃ. ni. 4.253; itivu. 53) upekkhāvedanāyaṃ. “Dvepi mayā, ānanda, vedanā vuttā pariyaṇena sukhā vedanā dukkhā vedanā” tiādīsu (ma. ni. 2.89) iṭṭhasukhesu. “Sukho vipāko puññāna” tiādīsu (peṭako. 23) iṭṭhavipāke. Idhāpi iṭṭhavipāke eva daṭṭhabbo. **Iṭṭhassāti** tiādīsu icchitabbato ceva anīṭṭhappaṭipakkhato ca iṭṭhassa. Kamaṇīyato manasmiñca kamanato pavisanato **kantassa**. Piyāyitabbato santappanato ca **piyassa**. Mananīyato manassa vaḍḍhanato ca **manāpassāti** attho veditabbo. **Yadidaṃ puññānīti puññānīti** yadidaṃ vacanaṃ, etaṃ sukhassa iṭṭhassa vipākassa adhivacanaṃ nāmaṃ. **Sukhassetam yadidaṃ puññānīti** phalena kāraṇassa abhedopacāraṃ vadati. Tena katūpacitānaṃ puññānaṃ avassaṃbhāviphalaṃ sutvā appamattena sakkaccaṃ puññāni kattabbānīti puññakiriyāyaṃ niyojeti, ādarañca nesam tattha uppādeti.

Idāni attanā sunettakāle katena puññakammaṇa dīgharattaṃ paccanubhūtaṃ bhavantarappaṭicchannaṃ ulārataṃ puññavipākaṃ udāharitvā tamatthaṃ pākāṭataṃ karonto “**abhijānāmi kho panāha**” tiādīmāha. Tattha **abhijānānīti** abhivisiṭṭhena ñāṇena jānāmi, paccakkhato bujjhāmi. **Dīgharattanti** cirakālaṃ. **Puññānanti** dānādīnaṃ kusaladhammānaṃ. **Satta vassānīti** satta saṃvaccharāni. **Mettacittanti** mijjatīti mettā, siniyatīti attho. Mitte bhavā, mittassa vā esā pavattītipi mettā. Lakkhaṇādito pana hitākārapavattilakkhaṇā, hitūpasamhārasā, āghātavinayapaccupaṭṭhānā, sattānaṃ manāpabhāvadassanapadaṭṭhānā. Byāpādūpasamo etissā sampatti, sinehasambhavo vipatti. **Mettacittam bhāvetvāti** mettāsahagataṃ cittaṃ, cittaśīna samādhi vuttoti mettāsamādhiṃ metābrahmavihāraṃ uppādetvā ceva vaḍḍhetvā ca.

Satta saṃvaṭṭavivaṭṭakappeti satta mahākappe. Saṃvaṭṭavivaṭṭaggahaṇeṇeva hi saṃvaṭṭaṭṭhāyivivaṭṭaṭṭhāyīnopi gahitā. **Imaṃ lokanti** kāmaloṃ. **Saṃvaṭṭamāne sudanti** saṃvaṭṭamāne, sudanti nipātamattaṃ, vipajjamāneti attho. “Varasaṃvattaṭṭhāne suda” ntipi paṭhanti. **Kappeti** kāle. Kappasīna hi kālo vutto, kāle khīyamāne sabbopi khīyateva. Yathāha – “kālo ghasati bhūtāni, sabbāneva sahattanā” ti (jā. 1.2.190). “**Ābhassarūpago homī**” ti vuttatā tejo saṃvaṭṭavasenettha kappavuttānaṃ veditabbam. **Ābhassarūpagoti** tattha paṭisaṇḍhiggahaṇavasena ābhassarabrahmalokaṃ upagacchāmīti ābhassarūpago homi. **Vivaṭṭamāneti** saṅghamaṇeti attho. **Suññaṃ brahmavimānaṃ upapajjāmīti** kassaci sattassa tattha nibbattassa abhāvato suññaṃ yaṃ paṭhamajjhānabhūmisāṅkhātaṃ brahmavimānaṃ ādito nibbattati, taṃ paṭisaṇḍhiggahaṇavasena upapajjāmi upemi.

Brahmāti kāmāvacarasattehi visiṭṭhaṭṭhena tathā tathā brūhitaguṇatāya brahmavihārato nibbattanaṭṭhena ca brahmā. Brahmāpārisajjabrahmapurohitehi mahanto brahmāti **mahābrahmā**, tato eva te abhibhavitvā ṭhitatā **abhibhū**. Tehi na kenacipi guṇena abhibhūtoti **anabhibhūto**. **Aññadatthūti** ekaṃsavacane nipāto. Dassanato **daso**, atītānāgatapaccuppannānaṃ dassanasamattho abhiññāññāṇena

passitabbaṃ passāmīti attho. Sesabrahmānaṃ iddhipādabhāvanābalena attano cittaṅca mama vase vattemīti **vasavattī** homīti yojetabbaṃ. Tadā kira bodhisatto aṭṭhasamāpattilābhīpi samāno tathā sattahitaṃ attano pāramipūraṅgaṅca olokeno tāsū eva dvīsū jhānabhūmīsū nikantī uppādetvā mettābrahmavihāravasena aparāparaṃ saṃsari. Tena vuttaṃ “**satta vassāni...pe... vasavattī**”ti.

Evam bhagavā rūpāvacarapuññassa vipākamahantataṃ pakāsetvā idāni kāmāvacarapuññassapi vipākaṃ dassento “**chattiṃsakkhattu**”ntiādīmāha. Tattha **sakko ahosinti** chattiṃsakkhattuṃ chattiṃsavāre aññattha anupapajjitvā nīrantaraṃ sakko devānamindo tāvatīṃsadevarājā ahosiṃ. **Rājā ahosinti**ādīsū catūhi acchariyadhammehi catūhi saṅgahavatthūhi ca lokaṃ rañjetīti **rājā**. Cakkaratanaṃ vatteti, catūhi sampatticakkehi vattati, tehi ca paraṃ vatteti, parahitāya ca iriyāpathacakkānaṃ vatto etasmīṃ atthīti **cakkavattī**. “Rājā”ti cettha sāmāññaṃ, “cakkavattī”ti visesaṃ. Dhammena caratīti **dhammiko**, ñāyena samena vattatīti attho. Dhammeneva rajjaṃ labhitvā rājā jātoti **dhammarājā**, dasavidhe kusaladhamme arahate ca rājadhamme niyuttoti **dhammiko**. Tena ca dhammena sakalaṃ lokaṃ rañjetīti **dhammarājā**. Parahitadhammakaraṇena vā **dhammiko**, attahitadhammakaraṇena **dhammarājā**. Yasmā cakkavattī dhammena ñāyena rajjaṃ adhigacchati, na adhammena, tasmā vuttaṃ “**dhammena laddharajjattā dhammarājā**”ti.

Catūsū disāsū samuddapariyosānatāya cāturantā nāma tattha tattha dīpe mahāpathavīti āha “**puratthima...pe... issaro**”ti. **Vijitāvīti** vijetabbassa vijitavā, kāmakodhādikassa abhantarassa paṭirājabhūtassa bāhirassa ca arigaṇassa vijayī vijinitvā ṭhitoti attho. Kāmaṃ cakkavattino kenaci yuddhaṃ nāma natthi, yuddhena pana sādhetabbassa vijayassa siddhiyā “**vijitasāṅgāmo**”ti vuttaṃ. Janapado vā catubbidhaacchariyadhammena samannāgato asmiṃ rājini thāvāriyaṃ kenaci asaṃhāriyaṃ dalhabhattibhāvaṃ patto, janapade vā attano dhammikāya paṭipattiyā thāvāriyaṃ thirabhāvaṃ pattoti **janapadatthāvāriyappatto**. Caṇḍassa hi rañño balidaṇḍādīhi lokaṃ pīlayato manussā majjhimajanapadaṃ chaḍḍetvā pabbatasamuddatīrakandarādīni nissāya paccante vāsaṃ kappenti. Atimudukassa rañño corehi sāhasikadhanavilopapīḷitā manussā paccantaṃ pahāya janapadamajjhe vāsaṃ kappenti. Iti evarūpe rājini janapado thirabhāvaṃ na pāpuṇāti.

Sattaratanasamannāgatoti cakkaratanādīhi sattahi ratanehi samupeto. Tesu hi rājā cakkavattī cakkaratanena ajitaṃ jināti, hatthiassaratanehi vijite sukheneva anuvarati, pariṇāyakaratanena vijitamanurakkhati, avasesehi upabhogasukhamanubhavati. Paṭhamena cassa ussāhasattiyogo, pacchimaṃ mantasattiyogo, hatthiassagahapatiratanehi pabhusattiyogo supariṇaṇṇo hoti. Itthimaṇiratanehi upabhogasukhamanubhavati, sesehi issariyasukhaṃ. Visesto cassa purimāni tīṇi adosakusalāmūlajanitakammānubhāvena sampajjanti, majjhimāni alobhakusalāmūlajanitakammānubhāvena, pacchimamekaṃ amohakusalāmūlajanitakammānubhāvenāti.

Sūrāti sattivanto, nibbhayāti atthoti āha “**abhīruno**”ti. **Aṅganti** kāraṇaṃ. Yena kāraṇena “vīrā”ti vucceyyuṃ, taṃ vīraṅgaṃ. Tenāha “**vīriyassetam nāma**”nti. Yāva cakkavālapabbatā cakkassa vattanato “**cakkavālapabbataṃ sīmaṃ katvā ṭhitasamuddapariyanta**”nti vuttaṃ. **Adaṇḍenāti** iminā dhanadaṇḍassa sarīradaṇḍassa ca akaraṇaṃ vuttaṃ. **Asatthenāti** iminā pana senāya yujjhanassāti tadubhayaṃ dassetuṃ “**na daṇḍenā**”tiādi vuttaṃ. Iduṃ vuttaṃ hoti – ye katāparādhe satte satampi sahasampi gaṇhanti, te dhanadaṇḍena rajjaṃ kārenti. Ye chejjabhejjaṃ anusāsanti, te satthadaṇḍena. Ahaṃ pana duvidhampi daṇḍaṃ pahāya adaṇḍena ajjhāvasiṃ. Ye ekatodhārādīnā satthena paraṃ vihetthenti, te satthena rajjaṃ kārenti nāma. Ahaṃ pana satthena khuddakamakkhikāya pivanamattampi lohitaṃ kassaci anuppādetvā dhammeneva “ehi kho, mahārājā”ti evaṃ paṭirājūhi sampaṭicchitāgamano vuttappakāraṃ pathaviṃ abhijinitvā ajjhāvasiṃ, abhivijinitvā sāmī hutvā vasinti.

Iti bhagavā attānaṃ kāyasakkiṃ katvā puññānaṃ vipākamahantataṃ pakāsetvā idāni tamevatthaṃ gāthābandhanena dassento “**passa, puññānaṃ vipāka**”ntiādīmāha. **Sukhesinoti** ālapanavacanametam, tena sukhapariyesake satte āmanteti. Pāliyaṃ pana “passathā”ti vattabbe “**passā**”ti vacanabyattayo katoti daṭṭhabbo. Manussānaṃ ure satthaṃ ṭhapetvā icchitadhanaharaṇādīnā vā sāhasakāritāya sāhasikā,

tesaṃ kammaṃ **sāhasikakammaṃ**. Pathaviyā issaro **pathabyoti** āha “**puthavisāmiko**”ti.

Mettasuttavaṇṇanā niṭṭhitā.

10. Bhariyāsuttavaṇṇanā

63. Dasame uccāsaddā mahāsaddā uddhaṃ uggatattā uccaṃ patthaṭattā mahantaṃ avinibbhogaṃ vinibhuñjitvā gahetuṃ asakkuṇeyyaṃ saddaṃ karontā vadanti. Vacīghosopi hi bahūhi ekajjhaṃ pavattito atthato ca saddato ca duravabodho kevalaṃ mahānigghoso eva hutvā sotapathamāgacchati. **Macchavilopeti** macche vilumpitvā viya gahaṇe, macchānaṃ vā vilumpane. Kevaṭṭānañhi macchapacchiṭṭhapitaṭṭhāne mahājano sannipativā “idha aññaṃ ekaṃ macchaṃ dehi, ekaṃ macchaphālaṃ dehi, etassa te mahā dinno, mayhaṃ khuddako”ti evaṃ uccāsaddamahāsaddaṃ karonti. Taṃ sandhāyetaṃ vuttaṃ “**kevaṭṭānaṃ macchapacchiṃ otāretvā ṭhitattṭhāne**”ti. Macchaggahaṇatthaṃ jāle pakkhittepi tasmim̐ ṭhāne kevaṭṭā ceva añña ca “paviṭṭho na paviṭṭho, gahito na gahito”ti mahāsaddaṃ karonti. Taṃ sandhāyetaṃ vuttaṃ “**jāle vā...pe... mahāsaddo hoti**”ti. **Kattabbavattanti** pādaparikammādikattabbakiccaṃ. **Kharāti** cittena vācāya ca kakkhaḷā. Sesametta uttānameva.

Bhariyāsuttavaṇṇanā niṭṭhitā.

11. Kodhanasuttavaṇṇanā

64. Ekādasame **sapattakaraṇāti** vā sapattehi kātabbā. **Kodhananti** kujjhanasīlaṃ. **Kodhanoyanti** kujjhano ayaṃ. **Ayanti** ca nipātamattaṃ. **Kodhaparetoti** kodhena anugato, parābhibhūto vā. **Dubbaṇṇova hotīti** pakatiyā vaṇṇavāpi alaṅkatappaṭiyattopi mukhavikārādivasena virūpo eva hoti. Etarahi āyatiñcāti kodhābhibhūtassa ekantamidaṃ phalanti dīpetuṃ “dubbaṇṇovā”ti avadhāraṇaṃ katvā puna “**kodhābhibhūto**”ti vuttaṃ.

Ayasabhāvanti akittimabhāvaṃ. Attano pasesaṇca anattaṃ janetīti **anattahajanano**. **Antaratoti** abbhantarato, cittato vā. **Taṃ jano nāvabujjhatīti** kodhasaṅkhātaṃ antarato abbhantare attano cittyeva jātaṃ anattahajanacittappakopanādibhayaṃ bhayaṃ ayaṃ bālamahājano na jānāti. **Yanti** yattha. Bhummatthe hi etaṃ paccattavacanaṃ. Yasmim̐ kāle kodho sahate naraṃ, andhatamaṃ tadā hotīti sambandho. **Yanti** vā kāraṇavacanaṃ, yasmā kodho uppajjamāno naraṃ sahate abhibhavati, tasmā andhatamaṃ tadā hoti, yadā kuddhoti attho yaṃ-taṃ-saddānaṃ ekantasambandhabhāvato. Atha vā **yanti** kiriyāparāmasanaṃ. **Sahateti** yadetamaṃ kodhassa sahanaṃ abhibhavanaṃ, etaṃ andhatamaṃ bhavananti attho. Atha vā yaṃ naraṃ kodho sahate abhibhavati, tassa andhatamaṃ tadā hoti. Tato ca kuddho atthaṃ na jānāti, kuddho dhammaṃ na passaṭīti.

Bhūnaṃ vuccati vuddhi, tassa hananaṃ ghāto etesanti **bhūnahaccāni**. Tenāha “**hatavuddhīni**”ti. **Dama**-saddena vuttamevatthaṃ vibhāvetuṃ paññāvīriyena diṭṭhiyāti vuttanti dassento “**katarena damenā**”tiādimāha. Anekatto hi **dama**-saddo. “Saccena danto damasā upeto, vedantagū vusitabrahmacariyo”ti (saṃ. ni. 1.195; su. ni. 467) ettha hi indriyasamvaro damoti vutto “manacchaṭṭhāni indriyāni dametī”ti katvā. “Yadi saccā damā cāgā, khantiyā bhīyyodha vijjatī”ti (saṃ. ni. 1.246; su. ni. 191) ettha pañña damo “saṃkilesaṃ dameti pajahatī”ti katvā. “Dānena damena saṃyamena saccavajjena atthi puññaṃ, atthi puññaṃ āgamo”ti (saṃ. ni. 4.365) ettha uposathakammaṃ damo “upavasanasena kāyakammādiṇi dametī”ti katvā. “Sakkhissasi kho tvaṃ, puñña, iminā damūpasamena samannāgato sunāparantasmim̐ janapadantare viharitu”nti (ma. ni. 3.396; saṃ. ni. 4.88) ettha adhvāsanaṃ damo “kodhūpanāhamakkhādike dameti vinodetī”ti katvā. “Na mānakāmassa damo idhatthi, na monamatthi asamāhitassā”ti (saṃ. ni. 1.9) ettha abhisambojjhaṅgādiko samādhīpakkhiko dhammo damo “dammati cittaṃ etena”ti katvā. Idhāpi “taṃ damena samucchinde, paññāvīriyena diṭṭhiyā”ti vacanato **dama**-saddena paññāvīriyadiṭṭhiyo vuttā.

Kodhanasuttavaṇṇanā niṭṭhitā.

Abyākatavaggavaṇṇanā niṭṭhitā.

7. Mahāvaggo

1-2. Hiriottappasuttādivaṇṇanā

65-66. Sattamassa paṭhamaṃ uttānameva. Dutiye **tayo saṃvaṭṭāti** āposamvaṭṭo, tejosamvaṭṭo, vāyosamvaṭṭoti tayo saṃvaṭṭā. **Tisso saṃvaṭṭasīmāti** ābhassarā, subhakiṇhā, vehapphalāti tisso saṃvaṭṭasīmā. Yadā hi kappo tejena saṃvaṭṭati vinassati, tadā ābhassarato heṭṭhā agginā ḍayhati. Yadā āpena saṃvaṭṭati, tadā subhakiṇhato heṭṭhā udakena vilīyati. Yadā vāyunā saṃvaṭṭati, tadā vehapphalato heṭṭhā vāyunā viddhamsati. Vitthārato pana sadāpi ekaṃ buddhakkhettaṃ vinassati. **Buddhakkhettaṃ nāma** tividhaṃ hoti jātikkhettaṃ āṇākkhettaṃ visayakkhettaṃ. Tattha **jātikkhettaṃ** nāma dasasahassacakkavālapariyantam hoti, yaṃ tathāgatassa paṭisandhigahaṇādīsu kampati. **Āṇākkhettaṃ** koṭīśahassacakkavālapariyantam, yattha ratanasuttaṃ (khu. pā. 6.1 ādayo; su. ni. 224 ādayo) khandhaparittaṃ (a. ni. 4.67; cūḷava. 251) dhajaggaparittaṃ (saṃ. ni. 1.249). Āṭṇāṭṭiyaparittaṃ (dī. ni. 3.275 ādayo), moraparittanti (jā. 1.2.17-18) imesaṃ parittānaṃ ānubhāvo vattati. **Visayakkhettaṃ** anantamaparimāṇam, yaṃ “yāvata vā pana ākaṅkheyyā”ti vuttaṃ. Evametesu tīsu buddhakkhettesu ekaṃ āṇākkhettaṃ vinassati. Tasmim̐ pana vinassante jātikkhettaṃ vīnaṭṭhameva hoti. Vinassantaṅca ekatova vinassati, saṅṭhahantampi ekatova saṅṭhahati.

Tīṇi saṃvaṭṭamūlānīti rāgadosamohasankhātāni tīṇi saṃvaṭṭakāraṇāni. Rāgādīsu hi akusalamūlesu ussannesu loko vinassati. Tathā hi rāge ussannatare agginā vinassati, dose ussannatare udakena, mohe ussannatare vātena. Keci pana “dose ussannatare agginā, rāge udakenā”ti vadanti.

Tīṇi kolāhalānīti kappakolāhalaṃ, buddhakolāhalaṃ, cakkavattikolāhalanti tīṇi kolāhalāni. Tattha “vassasatasahassamatthake kappuṭṭhānaṃ nāma bhavissatī”tiādīnā devatāhi ugghositasaddo **kappakolāhalaṃ** nāma hoti. “Ito vassasatasahassamatthake loko vinassissati, mettaṃ, mārisā, bhāvētha karuṇaṃ muditaṃ upekkha”nti manussapathe devatā ghosantiyo caranti. “Vassasahasamatthake buddho uppajjissatī”ti **buddhakolāhalaṃ** nāma hoti. “Ito vassasahasamatthake buddho uppajjivā dhammānudhammapaṭipanno saṅgharatanena parivārito dhammaṃ desento vicarissatī”ti devatā ugghosanti. “Vassasatamatthake pana cakkavattī uppajjissatī”ti **cakkavattikolāhalaṃ** nāma hoti. “Ito vassasatamatthake sattaratanasampanno cātuddīpissaro saḥassaparivāro vehāsaṅgamo cakkavattī rājā uppajjissatī”ti devatā ugghosanti.

Aciraṭṭhena na dhuvāti udakabubbulaḍayo viya na ciraṭṭhāyitāya dhuvabhāvarahitā. **Assāsarahitāti** supinake pītapānīyaṃ viya anulittacandanam viya ca assāsavirahitā.

Upakappanameghoti kappavināsakameghaṃ sandhāya vadati. Yasmiṅhi samaye kappo agginā nassati, āditova kappavināsakamahāmegho utṭhahitvā koṭīśasahasacakkavāle ekamahāvassaṃ vassati. Manussā tuṭṭhahaṭṭhā sabbabījāni nīharitvā vapanti. Sassesu pana gokhāyitakamattesu jātesu gadrabharavaṃ ravanto ekabindumpi na vassati, tadā pacchinnaṃ pacchinnameva vassaṃ hoti. Tenāha “**tadā nikkhantabījaṃ..pe... ekabindumpi devo na vassatī**”ti. “Vassasatasahassa accayena kappavutṭhānaṃ bhavissatī”tiādīnā devatāhi vuttavacanaṃ sutvā yebhuyyena manussā ca bhummadevatā ca saṃvegajāta aññaṃaññaṃ muducittā hutvā mettādīni puññāni katvā devaloke nibbattanti, avīcīto paṭṭhāya tuccho hotīti.

Pañca bījajātānīti mūlabījaṃ khandhabījaṃ phaḷubījaṃ aggabījaṃ bījabījanti pañca bījāni jātāni. Tattha **mūlabījanti** vacā, vacattaṃ, haliddaṃ, siṅgiveranti evamādi. **Khandhabījanti** assattho,

nigrodhoti evamādi. **Phalubijanti** ucchu, veḷu, naḷoti evamādi. **Aggabijanti** ajjukam, phaṇijjakanti evamādi. **Bijabijanti** vīhiādi pubbaṇṇaṇceva muggamāsādiaparaṇṇaṇca. Paccayantarasamavāye visadisuppattiyā visesakāraṇabhāvato ruhanasamatthe sārāphale niruḷho bīja-saddo tadatthasiddhiyā mūlādīsūpi kesuci pavattatīti mūlādito nivattanattham ekena bīja-saddena visesetvā vuttam “bījabīja”nti “rūparūpam (visuddhi. 2.449) dukkhadukkha”nti (saṃ. ni. 4.327) yathā. Yathā phalapākāpariyantā osadhirukkhā veḷukadaliādayo.

Yaṃ kadācītiādīsū yanti nipātamattam. **Kadācīti** kismiñci kāle. **Karahacīti** tasseva vevacanam. **Dīghassa addhunoti** dīghassa kālassa. **Accayenāti** atikkamena. Sesamettha uttānameva.

Hiriottappasuttādivaṇṇanā niṭṭhitā.

3. Nagaropamasuttavaṇṇanā

67. Tatiye paccante bhavaṃ **paccantimam**. “Ratho sīlāparikkhāro, jhānakkho cakkavīriyo”tiādīsū (saṃ. ni. 5.4) viya alaṅkāravacano parikkhārasaddoti āha “**nagarālaṅkārehi alaṅkata**”nti. Parivāravacanopi vaṭṭatīyeva “satta samādhīparikkhārā”tiādīsū (dī. ni. 3.330) viya. Nemaṃ vuccati thambhādīhi anupatabhūmippadesoti āha “**gambhīraāvāṭā**”ti, gambhīram bhūmiṃ anupparivāṭhāti attho. **Suṭṭhu sannisīdāpitāti** bhūmiṃ nikhanitvā sammadeva ṭhapitā.

Anupariyāyeti etenāti anupariyāyo, soyeva pathoti **anupariyāyapatho**, parito pākārassa anuyāyamaggo.

Hatthiṃ ārohanti ārohāpayanti cāti **hatthārohā** (dī. ni. ṭī. 1.163). Yena hi payogena puriso hatthino ārohanayoggo hoti, hatthissa taṃ payogaṃ vidhāyantānaṃ sabbesampetesam gahaṇam. Tenāha “**sabbepī**”tiādi. Tattha **hatthācariyā** nāma ye hatthino hatthārohakānaṇca sikkhāpakā. **Hatthivejjā** nāma hatthibhisakkā. **Hatthibandhā** nāma hatthīnaṃ pādarakkhakā. **Ādi**-saddena hatthīnaṃ yavapadāyakādike saṅgaṇhāti. **Assārohā rathikāti** ethhāpi eseve nayo. Rathe niyuttā **rathikā**. **Ratharakkhā** nāma rathassa āṇirakkhakā. Dhanuṃ gaṇhanti gaṇhāpentī cāti **dhanuggahā**, issāsā dhanusippassa sikkhāpakā ca. Tenāha “**dhanuācariyā issāsā**”ti. Celena celapaṭākāya yuddhe akanti gacchantīti **celakāti** āha – “**ye yuddhe jayaddhajaṃ gahetvā purato gacchantī**”ti. Yathā tathā ṭhite senike brūhakarāṇavasena tato tato calayanti uccālentīti **calakā**. Sakunagghīādayo viya maṃsapīṇḍam parasenāsamūhaṃ sāhasikamahāyodhatāya chetvā chetvā dayanti uppatitvā gacchantīti **piṇḍadāyakā**. Dutiyavikappe piṇḍe dayanti janassammade uppatantā viya gacchantīti **piṇḍadāyakāti** attho veditabbo. **Uggatuggatāti** thāmajavaparakkamādivasena ativiya uggatā, udaggāti attho. **Pakkhandantīti** attano vīrasūrabhāvena asajjamānā parasenaṃ anupavisantīti attho. Thāmajavabalaparakkamādisampattiyā **mahānāgā viya mahānāgā**. **Ekasūrāti** ekākisūrā attano sūrabhāveneva ekākino hutvā yujjhanakā. **Sajjalikāti** savammikā. **Saraparittāṇanti** cammaparisibbitam khetakam, cammamayaṃ vā phalakam. **Gharadāsayodhāti** attano dāsayodhā.

Sampakkhandanalakkhaṇāti saddheyyavattuno evametanti sampakkhandanalakkhaṇā. **Sampasādanalakkhaṇāti** pasīditabbe vatthusmiṃ pasīdanalakkhaṇā. **Okappanasaddhāti** okkantitvā pakkhanditvā adhimuccanam. Pasādanīye vatthusmiṃ pasīdanam **pasādasaddhā**. **Ayaṃ anudhammoti** ayaṃ navannaṃ lokuttaradhammānaṃ anulomadhammo. **Nibbidābahuloti** ukkaṇṭhanābahulo. **Saddhā bandhati pātheyyanti** saddhā nāmāyaṃ sattassa maraṇavasena mahāpatham saṃvajato mahākantāram paṭipajjato mahāvīduggaṃ pakkhandato pātheyyapuṭam bandhati, sambalam vissajjetīti attho. Saddhañhi uppādetvā dānaṃ detī, sīlam rakkhati, uposathakammaṃ karotī. Tenetaṃ vuttam “saddhā bandhati pātheyya”nti. **Sirīti** issariyaṃ. Issariye hi abhimukhībhūte thalātopi jalātopi bhogā āgacchantīyeva. Tenetaṃ vuttam “**sirī bhogānamāsayo**”ti. **Saddhā dutiyā purisassa hotīti** purisassa devaloke, manussaloke ceva nibbānaṇca gacchantassa saddhā dutiyā hoti, sahāyakiccaṃ sādheti. **Bhattapuṭādīti** ādi-saddena dutiyikādīnaṃ saṅgaho daṭṭhabbo. **Anekasarasatāti** anekasabhāvatā, anekakiccatā vā.

Sesaṃ suviññeyyameva.

Nagaropamasuttavaṇṇanā niṭṭhitā.

4. Dhammaññūsuttavaṇṇanā

68. Catutthe suttageyyādidhammaṃ jānātīti **dhammaññū**. Tassa tasseva suttageyyādinā bhāsītassa tadaññassa suttapadatthassa bodhakassa saddassa atthakusalatāvasena atthaṃ jānātīti **atthaññū**. “Ettakomhi sīlena samādhinā paññāyā”ti evaṃ yathā attano pamāṇajānanavasena attānaṃ jānātīti **attaññū**. Paṭiggahaṇaparibhogapariyesanavissajjanesu mattaṃ jānātīti **mattaññū**. Niddese pana paṭiggahaṇamattaññūtāya eva paribhogādimmattaññūtā pabodhitā hotīti paṭiggahaṇamattaññūtāva dassitā. “Ayaṃ kālo uddesassa, ayaṃ kālo paripucchāya, ayaṃ kālo yogassa adhigamāyā”ti evaṃ kālaṃ jānātīti **kālaññū**. Tattha pañca vassāni uddesassa kālo, dasa paripucchāya, idaṃ atisambādham, atikkhapaññassa tāvatā kālena tīretuṃ asakkuṇeyyattā dasa vassāni uddesassa kālo, vīsati paripucchāya, tato paraṃ yoge kammaṃ kātabbhaṃ. Khattiyaparisādikaṃ aṭṭhavidham paraṃ jānātīti **parisaññū**. Bhikkhuparisādikaṃ catubbidham, khattiyaparisādikaṃ manussapariyaṃveva puna catubbidham gahetvā aṭṭhavidham vadanti apare. Niddese panassa khattiyaparisādicatubbidhaparisaṃgahaṇaṃ nidassanamattaṃ daṭṭhabbhaṃ. “Imaṃ me sevantassa akusalā dhammā parihāyanti, kusalā dhammā abhivaḍḍhanti, tasmā ayaṃ puggalo sevitaṃbo, vipariyāyato añño asevitabbo”ti sevitaṃbāsevitabbapuggalaṃ jānātīti **puggalaparoparaññū**. Evañhi tesāṃ puggalaṇaṃ paroparaṃ ukkaṭṭhanihīnataṃ jānāti nāma. Niddesepissa sevitaṃbāsevitabbapuggale vibhāvanameva samaṇakathākatanti daṭṭhabbhaṃ.

Dhammaññūsuttavaṇṇanā niṭṭhitā.

5-6. Pāricchattakasuttādivaṇṇanā

69-70. Pañcame **patitapalāsoti** patitapatto. Ettha paṭhamaṃ paṇḍupalāsataṃ, dutiyaṃ pannapalāsataṃca vatvā tatiyaṃ jālakajātataṃ, catutthaṃ khārakajātataṃ ca pāḷiyaṃ vuttā. **Dīghanikāyattakathāyaṃ** pana **mahāgovindasuttavaṇṇanāyaṃ** (dī. ni. aṭṭha. 2.294) imameva pāḷiṃ āharitvā dassentena paṭhamaṃ paṇḍupalāsataṃ, dutiyaṃ pannapalāsataṃca vatvā tatiyaṃ khārakajātataṃ, catutthaṃ jālakajātataṃ ca dassitā. Evañhi tattha vuttaṃ – “pāricchattake pupphamāne ekaṃ vassaṃ upaṭṭhānaṃ gacchanti, te tassa paṇḍupalāsabhāvato paṭṭhāya attamanā honti. Yathāha –

Yasmiṃ, bhikkhave, samaye devānaṃ tāvatimsānaṃ pāricchattako koviḷāro, paṇḍupalāso hoti, attamanā, bhikkhave, devā tāvatimsā tasmīṃ samaye honti ‘paṇḍupalāso dāni pāricchattako, koviḷāro, na cirasseva pannapalāso bhavissatī’ti. Yasmiṃ samaye devānaṃ tāvatimsānaṃ pāricchattako, koviḷāro, pannapalāso hoti, jālakajāto hoti, khārakajāto hoti, kuṭumalakajāto hoti, korakajāto hoti, attamanā, bhikkhave, devā tāvatimsā tasmīṃ samaye honti ‘korakajāto dāni pāricchattako koviḷāro, na cirasseva sabbapāliphullo bhavissatī’ti.

Līnatthappakāsiniyampi (dī. ni. ṭī. 2.294) ettha evamattho dassito – **pannapalāsoti** patitapatto. **Khārakajātoti** jātakhuddakamakuḷo. Ye hi nīlapattakā ativiya khuddakā makuḷā, te “khārakā”ti vuccanti. **Jālakajātoti** tehiyeva khuddakamakuḷehi jātajālo sabbaso jālo viya jāto. Keci pana “jālakajātoti ekajālo viya jāto”ti atthaṃ vadanti. Pāricchattako kira khārakaggahaṇakāle sabbatthakameva pallaviko hoti, te cassa pallavā pabhassarapavāḷavaṇṇasamujjalā honti. Tena so sabbaso samujjalanto tiṭṭhati. **Kuṭumalajātoti** sañjātamahāmakuḷo. **Korakajātoti** sañjātasūcibhedo sampativikasamānavattho. **Sabbapāliphulloti** sabbaso phullitavikasitoti. Ayañca anukkamo dīghabhāṇakānaṃ vaḷaṇjanānukkamena dassito, na ettha ācariyassa virodho āsaṅkitabbo.

Kantanakavātoti devānaṃ puññakammaṃpaccayā pupphānaṃ chindanakavāto. **Kantaṭīti** chindati.

Sampañicchanakavātoti chinnānaṃ chinnānaṃ pupphānaṃ sampañiggaṇhakavāto. **Cinantoti** nānāvidhabhattisannivesavasena nicinaṃ karonto. **Aññataradevatānanti** nāmagottavasena apaññātadevatānaṃ. **Reṇuvaṭṭīti** reṇusaṅghāto. **Kaṇṇikaṃ āhaccāti** sudhammāya kūṭaṃ āhantvā.

Anupharaṇānubhāvoti khīṇāsavassa bhikkhuno kittisaddassa yāva brahmalokā anupharaṇasaṅkhāto ānubhāvo. **Pabbajjānissitaṃ hotīti** pabbajjāya catupārisuddhisīlampi dassitamevāti adhippāyo. **Paṭhamajjhānasannissitanti** ādīsipi imināva nayena attho vedītabbo. Idha pana ubhayato paricchedo heṭṭhā sīlato upari arahattato ca paricchedassa dassitattā. **Tenetāṃ vuttanti** tena kāraṇena etaṃ “catupārisuddhisīlaṃ pabbajjānissitaṃ hotī”tiādivacanaṃ vuttaṃ. Chaṭṭhaṃ uttānameva.

Pāricchattakasuttādivaṇṇanā niṭṭhitā.

7. Bhāvanāsuttavaṇṇanā

71. Sattame **atthassa asādhikā** “bhāvanaṃ ananuyuttassā”ti vuttattā. **Sambhāvanattheti** “api nāma evaṃ siyā”ti vikappanattho sambhāvanattho. **Evañhi loke siliṭṭhavacanaṃ hotīti** ekameva saṅkhaṃ avatvā aparāya saṅkhāya saddhiṃ vacanaṃ loke siliṭṭhavacanaṃ hoti yathā “dve vā tīṇi vā udakaphusitāni”ti. **Sammā adhisayitānīti** pādādīhi attanā nesam kiñci upaghātaṃ akarontiyā bahivātādiparissayapariharaṇattham sammadeva upari sayitāni. Upariattho hettha adhi-saddo. **Utum gaṇhāpentiyāti** tesam allasinehāpariyādānattham attano kāyusmāvasena utum gaṇhāpentiyā. Tenāha “**usmikatānī**”ti. **Sammā paribhāvītānīti** sammadeva sabbaso kukkuṭavāsanāya vāsītāni. Tenāha “**kukkuṭagandhaṃ gāhāpitānī**”ti. Ettha ca sammāparisedanaṃ kukkuṭagandhāparibhāvānaṃ sammāadhisayanāsammāparisedananipphattiyā ānubhāvanipphādītanti daṭṭhabbaṃ. Sammāadhisayaneneva hi itaradvayaṃ ijjhati. Na hi sammāadhisayanato viṣuṃ sammāparisedanassa sammāparibhāvanassa ca kāraṇaṃ atthi. Tena pana saddhiṃyeva itaresaṃ dvinnampi ijjhanato vuttaṃ.

Tividhakiriyākaraṇenāti sammāadhisayanāditividhakiriyākaraṇenāti attho. Kiñcāpi “evaṃ aho vata me”tiādīnā na icchā uppajjeyya kāraṇassa pana sampādītattā, atha kho bhābhāva te abhinibbhijjītiyojanā. Kasmā bhābhāti āha “**te hi yasmā tāyā**”tiādi. **Sayampīti** aṇḍāni. **Parīṇāmananti** paripākaṃ bahinikkhāmanayogyataṃ. Yathā kapālassa tanutā ālokassa anto paññāyamānassa kāraṇaṃ, tathā kapālassa tanutāya nakhasikhāmukhatuṇḍakānaṃ kharatāya ca allasinehāpariyādānaṃ kāraṇavacanaṃ daṭṭhabbaṃ. **Tasmāti** ālokassa anto paññāyamānato sayaṅca paripākagattā.

Opammasampañipādananti opammatthassa upameyyena sammadeva paṭipādanaṃ. **Tanti** opammasampañipādanaṃ. **Evanti** idāni vuccamānākārena. **Atthenāti** upameyyatthena saṃsandetvā saha yojetvā. Sampādanena sampayuttadhammasena ñāṇassa tikkhabhāvo vedītabbo. Ñāṇassa hi sabhāvato satīnepakkato ca tikkhabhāvo, samādhivasena kharabhāvo, saddhāvasena vippasannabhāvo. **Parīṇāmakāloti** balavavipassanākālo. **Vaḍḍhikāloti** vuṭṭhānagāminivipassanākālo. Anulomaṭṭhāniyā hi vipassanā gahitagaḅbhā nāma tadā maggaḅbhassa gahitattā. **Tajjātikanti** tassa vipassanānuyogassa anurūpaṃ. Satthāpi avijjaṇḍakosaṃ paharati, desanāpi vineyyasantānagataṃ avijjaṇḍakosaṃ paharati, yathāḥāne ṭhātuṃ na deti.

Olambakasaṅkhātanti olambakasuttasaṅkhātaṃ. “Pala”nti hi tassa suttassa nāmaṃ. **Cāretvā** dārūno heṭṭhā dosajānanattham ussāpetvā. **Gaṇḍaṃ haratīti palagaṇḍoti** etena “palena gaṇḍahāro palagaṇḍoti pacchimāpade uttarapadalopena niddeso”ti dasseti. **Gahaṇaṭṭhāneti** hatthena gahetabbaṭṭhāne. Sammādeva khipiyanti etena kāyaduccarītādīnīti saṅkhepo, pabbajjāva saṅkhepo **pabbajjāsaṅkhepo**. Tena vipassanaṃ anuyūñjantassa puggalassa ajānantasseva āsavānaṃ parikkhāyo idha vipassanānisamsoti adhippeto.

Hemantikena kārāṇabhūtena, bhummatthe vā etaṃ karaṇavacanāṃ, hemantiketi attho. **Paṭippassambhantī** paṭippassaddhaphalāni honti. Tenāha “**pūtikāni bhavanti**”ti. **Mahāsamuddo viya sāsanaṃ** agādhagambhīrabhāvato. **Nāvā viya yogāvacarō** mahoghuttarato. **Pariyāyanaṃ viyāti** parito aparāparaṃ yāyanaṃ viya. **Khajjamānānanti** khādantena viya udakena khepiyamānabandhanānaṃ. **Tanubhāvoti** pariyuṭṭhānapavattiyā asamatthatāya dubbalabhāvo. **Vipassanānānapītipāmojjehī** vipassanānānasamuttūthitehi pītipāmojjehi. **Okkhāyamāneti** vipassanākammatthāne vīthippaṭipāṭiyā okkhāyamāne, paṭisaṅkhānupassanāya vā **okkhāyamāne**. Saṅkhārupekkhāya **pakkhāyamāne**. **Dubbalatā dīpitā** “appakasireneva saṃyojanāni paṭippassambhanti, pūtikāni bhavanti”ti vuttatā.

Bhāvanāsuttavaṇṇanā niṭṭhitā.

8-9. Aggikkhandhopamasuttādivaṇṇanā

72-73. Aṭṭhame **passatha nūti** api passatha. **Mahantanti** vipulaṃ. **Aggikkhandhanti** aggisamūhaṃ. **Ādittanti** padittaṃ. **Sampajjalitanti** samantato pajjalitaṃ accivipphuliṅgāni muñcantāṃ. **Sajotibhūtanti** samantato uṭṭhitāhi jālāhi ekappabhāsamudayaabhūtaṃ. **Taṃ kiṃ maññathāti** taṃ idāni mayā vuccamānatthaṃ kiṃ maññathāti anumattiggahaṇatthaṃ pucchati. Yadettha satthā aggikkhandhāliṅganaṃ kaññāliṅganaṃ ānesi, tamatthaṃ vibhāvetuṃ “**ārocayāmi**”tiādimāha.

Dussīlassāti nissīlassa sīlavirahitassa. **Pāpadhammassāti** dussīlattā eva hīnājjhāsayaṭāya lāmakasabhāvassa. **Asucisaṅkassarasamācārassāti** aparisuddhatāya asuci hutvā saṅkāya saritabbasamācārassa. Dussīlo hi kiñciveva asārappaṃ disvā “idaṃ asukena kataṃ bhavissati”ti paresaṃ āsaṅkā hoti. Kenaciveva karaṇīyena mantayante bhikkhū disvā “kacci nu kho ime mayā katakammaṃ jānitvā mantenti”ti attanoyeva saṅkāya saritabbasamācāro. **Paṭicchannakammantassāti** lajjitabbatāya paṭicchādetabbakammantassa. **Assamaṇassāti** na samaṇassa. Salākaggahaṇādīsu “ahampi samaṇo”ti micchāpaṭiññāya **samaṇapaṭiññassa**. Aseṭṭhacāritāya **abrahmacārissa**. Uposathādīsu “ahampi brahmacārī”ti micchāpaṭiññāya **brahmacāripaṭiññassa**. Pūtinā kammena sīlavipattiyā anto anupaviṭṭhattā **antopūtikassa**. Chadvārehi rāgādīkilesānussavanena tintattā **avassutassa**. Sañjātarāgādīkacavarattā sīlavantehi chaḍḍetabbattā ca **kasambujātassa**.

Vālarajjuyāti vālehi katarajjuyā. Sā hi kharatarā hoti. **Ghaṃseyyāti** mathanavasena ghaṃseyya. **Teladhotāyāti** telena nisitāya. **Paccorasminti** patiurasmim, abhimukhe uramajjheti adhippāyo. **Ayosaṅkunāti** saṅḍāsena. **Pheṇuddehakanti** pheṇaṃ uddehetvā uddehetvā, anekavāraṃ pheṇaṃ uṭṭhāpetvāti attho. Evamettha saṅkhepato pāḷivaṇṇanā veditabbā. Navamaṃ uttānameva.

Aggikkhandhopamasuttādivaṇṇanā niṭṭhitā.

10. Arakasuttavaṇṇanā

74. Dasame **parittanti** ittaraṃ. Tenāha “**appaṃ thoka**”nti. Pabandhānupacchedassa paccayabhāvo idha jīvitassa raso kiccanti adhippetanti āha “**sarasaparittatāyapi**”ti. Tadadhīnavuttitāyapi hi “yo, bhikkhave, ciraṃ jīvati, so vassasataṃ appaṃ vā bhiyyo”ti vacanato parittaṃ **khaṇaparittatāyapi**. Paramatthato hi atiparitto sattānaṃ jīvitakkhaṇo ekacittakkhaṇappavattimattoyeva. Yathā nāma rathacakkaṃ pavattamānampi ekeneva nemippadesena pavattati, tiṭṭhamānampi ekeneva tiṭṭhati, evamevaṃ ekacittakkhaṇikaṃ sattānaṃ jīviṭṭhaṃ tasmim cītte niruddhamatte satto niruddhoti vuccati. Yathāha “atīte cittakkhaṇe jīvittha na jīvati na jīvissati. Anāgate cittakkhaṇe na jīvittha na jīvati jīvissati. Paccuppanne cittakkhaṇe na jīvittha jīvati na jīvissati.

“Jīviṭṭhaṃ attabhāvo ca, sukhadukkā ca kevalā;
Ekacittasamāyuttā, lahuso vattate khaṇo.

“Ye niruddhā marantassa, tiṭṭhamānassa vā idha;
Sabbepi sadisā khandhā, gatā appaṭṭisandhikā.

“Anibbattena na jāto, paccuppanna jīvati;
Cittabhaṅgā mato loko, paññatti paramatthiyā”ti. (mahāni. 10);

Lahusanti lahukaṃ. Tenāha “lahuṃ uppajjitvā nirujjhanato lahusa”nti. **Parittaṃ lahusanti** ubhayaṃ panetaṃ appakassa vevacanaṃ. Yañhi appakaṃ, taṃ parittañceva lahukañca hoti. Idha pana āyuno adhippetattā rassanti vuttaṃ hoti. **Mantāyanti** karaṇatthe etaṃ bhummavacanaṃti āha “**mantāya bodhabbaṃ, paññāya jānitabbanti attho**”ti. **Mantāyanti** vā manteyyanti vuttaṃ hoti, mantetabbam mantāya upaparikkhitabbanti attho. **Paññāya jānitabbanti** jānitabbam jīvitassa parittabhāvo bahudukkhādibhāvo. Jānitvā ca pana sabbapalibodhe chinditvā kattabbam kusalaṃ, caritabbam brahmacariyaṃ. Yasmā itthi jātassa amaraṇaṃ, appaṃ vā bhiiyo vassasatato upari appaṃ aññaṃ vassasataṃ appatvā vīsaṃ vā tiṃsaṃ vā cattālīsaṃ vā paññāsaṃ vā saṭṭhi vā vassāni jīvati, evaṃdīghāyuko pana atidullabho. “Asuko hi evaṃ ciraṃ jīvati”ti tattha tattha gantvā daṭṭhabbo hoti. Tattha visākhā upāsikā vīsasataṃ jīvati, tathā pokkharasātibrāhmaṇo, brahmāyubrāhmaṇo, bāvariyaubrāhmaṇo, ānandatthero, mahākassapattheroti. Anuruddhatthero pana vassasatañceva paññāsañca vassāni. Bākulatthero vassasatañceva saṭṭhi ca vassāni, ayaṃ sabbadīghāyuko, sopi dve vassasatāni na jīvi.

Arakasuttavaṇṇanā niṭṭhitā.

Mahāvaggavaṇṇanā niṭṭhitā.

8. Vinayavaggo

1-8. Paṭhamavinayadharasuttādivaṇṇanā

75-82. Aṭṭhamassa paṭhamaṃ dutiyañca uttānatthameva. Tatiye **vinayalakkhaṇe patiṭṭhito** lajjibhāvena vinayalakkhaṇe ṭhito hoti. Alajjī (pārā. aṭṭha. 1.45) hi bahussutopi samāno lābhagarukatāya tantim viṣaṃvādetvā uddhammaṃ ubbinayaṃ satthusāsanam dīpetvā sāsane mahantaṃ upaddavaṃ karoti, saṅghabhedampi saṅgharājimpī uppādeti. Lajjī pana kukkuccako sikkhākāmo jīvitahetupi tantim avisaṃvādetvā dhamameva vinayameva ca dīpeti, satthusāsanam garuṃ katvā ṭhabeti. Evaṃ yo lajjī, so vinayaṃ ajahanto avokkamantova lajjibhāvena vinayalakkhaṇe ṭhito hoti patiṭṭhito.

Asaṃhīroti ettha **saṃhīro** nāma yo pāliyaṃ vā aṭṭhakathāyaṃ vā heṭṭhā vā uparito vā padapaṭipāṭiyā vā pucchiyamāno vitthunati vipphandati, saṅṭhātum na sakkoti, yaṃ yaṃ parena vuccati, taṃ taṃ anujānāti, sakavādaṃ chaḍḍetvā paravādaṃ gaṇhāti. Yo pana pāliyaṃ vā aṭṭhakathāyaṃ vā heṭṭhupariyavasena vā padapaṭipāṭiyā vā pucchiyamāno na vitthunati na vipphandati, ekekalomaṃ saṅḍāsena gaṇhanto viya “evaṃ mayaṃ vadāma, evaṃ no ācariyā vadanti”ti vissajjeti. Yamhi pāli ca pālivinichayo ca suvaṇṇabhājane pakkhittasīhavasā viya parikkhayaṃ pariyādānaṃ agacchanto tiṭṭhati, ayaṃ vuccati **asaṃhīro**. Yasmā pana evarūpo yaṃ yaṃ parena vuccati, taṃ taṃ nānujānāti, attanā suvinichinitaṃ katvā gahitaṃ aviparītamattaṃ na vissajjeti, tasmā vuttaṃ “**na sakkoti gahitaggaṇaṃ vissajjāpetu**”nti. Catutthādīni suviññeyyāni.

Paṭhamavinayadharasuttādivaṇṇanā niṭṭhitā.

9. Satthusāsanasuttavaṇṇanā

83. Navame **vivekaṭṭho**ti vivitto. Tenāha “**dūrībhūto**”ti. **Satiavippavāse ṭhitoti** kammaṭṭhāne

satim avijahitvā t̥hito. **Pesitattoti** kāye ca jīvite ca anapekkhatāya nibbānaṃ pesitacitto tanninno tappoṇo tappabbhāro.

Satthusāsanasuttavaṇṇanā niṭṭhitā.

10. Adhikaraṇasamathasuttavaṇṇanā

84. Dasame adhiṅkarīyanti etthāti **adhikaraṇāni**. Ke adhiṅkarīyanti? Samathā. Kathaṃ adhiṅkarīyanti? Samanavasena. Tasmā te tesam samanavasena pavattantīti āha “**adhikaraṇāni samenti**”tiādi. **Uppannānaṃ uppanānanti** uṭṭhitānaṃ uṭṭhitānaṃ. **Samathatthanti** samanatthaṃ. **Dīghanikāye saṅgītisuttavaṇṇanāyampi** (dī. ni. aṭṭha. 3.331) **vitthāratoyevāti** etthāyaṃ vitthāranayo – adhiṅkaraṇesu tāva dhammoti vā adhammoti vā aṭṭhārasahi vatthūhi vivadantānaṃ bhikkhūnaṃ yo vivādo, idaṃ **vivādādhikaraṇaṃ** nāma. Sīlavipattiyā vā ācāradīṭṭhiājīvavipattiyā vā anuvadantānaṃ yo anuvādo upavadanā ceva codanā ca, idaṃ **anuvādādhikaraṇaṃ** nāma. Mātikāyaṃ āgatā pañca, vibhaṅge dveti sattapi āpattikkhandhā, idaṃ **āpattādhikaraṇaṃ** nāma. Yaṃ saṅghassa apalokanādīnaṃ catunnaṃ kammānaṃ karaṇaṃ, idaṃ **kiccādhikaraṇaṃ** nāma.

Tattha vivādādhikaraṇaṃ dvīhi samathehi sammati sammukhāvinayena ca yebhuyyasikāya ca. Sammukhāvinayeneva sammamānaṃ yasmiṃ vihāre uppannaṃ tasmimyeva vā, aññatra vūpasametum gacchantānaṃ antarāmagge vā, yattha gantvā saṅghassa niyyātitaṃ, tattha saṅghena vā, saṅghe vūpasametum asakkonte tattheva ubbāhikāya sammatapuggalehi vā vinicchitaṃ sammati. Evaṃ sammamāne ca panetasmim yā saṅghasammukhato dhammasammukhato vinayasammukhatā puggalasammukhatā, ayaṃ **sammukhāvinayo** nāma. Tattha ca kārasaṅghassa saṅghasāmaggivasena sammukhibhāvo **saṅghasammukhatā**. Sametabbassa vatthuno bhūtattā **dhammasammukhatā**. Yathā taṃ sametabbaṃ, tathevassa samaṇaṃ **vinayasammukhatā**. Yo ca vivadati, yena ca vivadati, tesam ubhinnaṃ atthapaccatthikānaṃ sammukhībhāvo **puggalasammukhatā**. Ubbāhikāya vūpasame panettha saṅghasammukhatā parihāyati. Evaṃ tāva sammukhāvinayeneva sammati.

Sace panevampi na sammati, atha naṃ ubbāhikāya sammatā bhikkhū “na mayaṃ sakkoma vūpasametu”nti saṅghasseva niyyātentī. Tato saṅgho pañcaṅgasamannāgataṃ bhikkhum salākaggāhāpakaṃ sammannati, tena guḷhakavivaṭakasaṅgaṇṇajappakesu tīsu salākaggāhakesu aññataravasena salākaṃ gāhāpetvā sannipatīyā parisāya dhammavādīnaṃ yebhuyyatāya yathā te dhammavādino vadanti, evaṃ vūpasantaṃ adhiṅkaraṇaṃ sammukhāvinayena ca yebhuyyasikāya ca vūpasantaṃ hoti. Tattha sammukhāvinayo vuttanayo eva. Yaṃ pana yebhuyyasikākamassa karaṇaṃ, ayaṃ yebhuyyasikā nāma. Evaṃ vivādādhikaraṇaṃ dvīhi samathehi sammati.

Anuvādādhikaraṇaṃ catūhi samathehi sammati sammukhāvinayena ca sativinayena ca amūḷhavinayena ca tassapāpiyasikāya ca. Sammukhāvinayeneva sammamānaṃ yo ca anuvadati, yañca anuvadati, tesam vacanaṃ sutvā sace kāci āpatti natthi, ubho khamāpetvā, sace atthi ayaṃ nāmettha āpattīti evaṃ vinicchitaṃ vūpasammati. Tattha sammukhāvinayalakkhaṇaṃ vuttanayameva.

Yadā pana khīṇāsavassa bhikkhuno amūlikāya sīlavipattiyā anuddhamṣitassa sativinayaṃ yācamānassa saṅgho ñatticatutthena kammena sativinayaṃ deti, tadā sammukhāvinayena ca sativinayena ca vūpasantaṃ hoti. Dinne pana sativinaye puna tasmim puggale kassaci anuvādo na ruhati. Yadā ummattako bhikkhu ummādasena kate assāmaṇake ajjhācāre “saratāyasmā evarūpiṃ āpatti”nti bhikkhūhi codiyamāno “ummattakena me, āvuso, etaṃ kataṃ, nāhaṃ taṃ sarāmi”ti bhaṇantopi bhikkhūhi codiyamānova puna acodanattāya amūḷhavinayaṃ yācati, saṅgho cassa ñatticatutthena kammena amūḷhavinayaṃ deti. Tadā sammukhāvinayena ca amūḷhavinayena ca vūpasantaṃ hoti. Dinne pana amūḷhavinaye puna tasmim puggale kassaci tappaccayā anuvādo na ruhati. Yadā pana pārājikena vā pārājikasāmantena vā codiyamānassa aññenaññāṃ paṭicarato pāpussannatāya pāpiyassa puggalassa “sacāyaṃ acchinnamūlo bhavissati, sammā vattitvā osāraṇaṃ labhissati. Sace chinnamūlo, ayamevassa

nāsanā bhavissatī”ti maññamāno saṅgho ñatticatutthena kammaena tassapāpiyasikaṃ karoti, tadā sammukhāvinayena ca tassapāpiyasikāya ca vūpasantaṃ hotīti. Evaṃ anuvādādhikaraṇaṃ catūhi samathehi sammati.

Āpattādhikaraṇaṃ tīhi samathehi sammati sammukhāvinayena ca paṭiññātakaraṇena ca tiṇavatthārakena ca. Tassa sammukhāvinayeneva vūpasamo natthi. Yadā pana ekassa vā bhikkhuno santike saṅghagaṇamajjhesu vā bhikkhu lahukaṃ āpattiṃ deseti, tadā āpattādhikaraṇaṃ sammukhāvinayena ca paṭiññātakaraṇena ca vūpasammati. Tattha sammukhāvinaye tāva yo ca deseti, yassa ca deseti, tesam sammukhībhāvo puggalasammukhato. Sesam vuttanayameva.

Puggalassa ca gaṇassa ca desanākāle saṅghasammukhato parihāyati. Yaṃ panettha “ahaṃ, bhante, itthannāmaṃ āpattiṃ āpanno”ti ca “passasī”ti ca “āma, passāmī”ti ca paṭiññātāya “āyatiṃ saṃvareyyāsī”ti karaṇaṃ, taṃ paṭiññātakaraṇaṃ nāma. Saṅghādisese parivāsādiyācanā paṭiññā, parivāsādīnaṃ dānaṃ paṭiññātakaraṇaṃ nāma.

Dvepakkhajātā pana bhaṇḍanakārakā bhikkhū bahuṃ assāmaṇakaṃ ajjhācāraṃ caritvā puna lajjidhamme uppanne “sace mayaṃ imāhi āpattīhi aññamaññaṃ kāressāma, siyāpi taṃ adhikaraṇaṃ kakkhaḷattāya vāḷattāya saṃvatteyyā”ti aññamaññaṃ āpattiyā kārapane dosaṃ disvā yadā bhikkhū tiṇavatthārakakammaṃ karonti, tadā āpattādhikaraṇaṃ sammukhāvinayena ca tiṇavatthārakena ca sammati. Tatra hi yattakā hatthapāsūpagatā “na metaṃ khamatī”ti evaṃ diṭṭhāvikammaṃ akatvā “dukkaṭaṃ kammaṃ puna kātappaṃ kamma”nti na ukkoṭenti, niddampi okkantā honti, sabbesaṃ ṭhapetvā thullavajjaṇca gihipaṭisaṃyuttaṇca sabbāpattiyo vuṭṭhahanti. Evaṃ āpattādhikaraṇaṃ tīhi samathehi sammati.

Kiccādhikaraṇaṃ ekena samathena sammati sammukhāvinayeneva. Iti imāni cattāri adhikaraṇāni yathānurūpaṃ imehi sattihi samathehi sammanti. Tena vuttaṃ – **“uppannuppannānaṃ adhikaraṇānaṃ samathāya vūpasamāya sammukhāvinayo dātabbo...pe... tiṇavatthārako”**ti. Sesam sabbattha uttānameva.

Adhikaraṇasamathasuttavaṇṇanā niṭṭhitā.

Vinayavaggavaṇṇanā niṭṭhitā.

Iti manorathapūraṇiyā aṅguttaranikāya-aṭṭhakathāya

Sattakanipātavaṇṇanāya anuttānatthadīpanā samattā.